

### 新唐書

宋歐陽修宋祁撰

中華書局

卷一七一至卷一九〇(傳)第 一 七 册

# 唐書卷一百七十一

### 列傳第九十六

李光進 光顔 烏重胤 石洪 李珙 王 沛 逢 元卿 延宗 曹華

### 高瑀 劉沔 石雄

李光進, 其先河曲諸部, 姓阿跌氏。 貞觀中內屬, 以其地爲雞田州 世襲刺

朔方軍。

拜洺州 **遂與光進俱家太原**。 大夫、代州刺史。元和 大夫,故軍中呼「大小大夫」。 光進與弟光顏少依舍利葛旃,葛旃妻,其女兄也。 刺史。 弟兄榮冠當時。 四年,王承宗反,范希朝引師救易定行,表光進爲都將。 以沈果稱。 俄檢校工部尚書,爲振武節度使,賜姓以光寵之。 光進徙靈武,卒,年六十五,贈尚書左僕射。 從馬燧救臨洺, 戰洹水有功。 初,葛旃殺僕固瑒, 歷前後軍牙門將、 歸河東辛雲京, 時光顔 別韶光顔 兼御史 亦至

九十六 李光進

列

傳

第

貲貯、 納 管鑰於姒, 性 居母喪,三年不歸寢。 光進命反之, 曰:「婦逮事姑, 光顏先娶, 而母委以家事。 且嘗命主家事, 及光進娶,母已亡, 不可改。」因相持泣,乃 弟婦籍

如初。

度使 高崇文平 馬燧謂 光顔 劍南 字光遠。 日:「若 ,數搴旗蹈軍,出入若神, 有奇 葛旃少教以騎射,每歎其天資票健,己所不逮。 相, 終必光大。」解所佩 益 知 名。 劍贈之。 進 兼 御 史大夫、歷代、洛二州 討李懷光、 長從河東軍為裨將 楊惠琳, 刺 戰 有 功

當 始"裴度宣慰諸軍 叱之,於是士爭奮, 栅,將數騎 面。 元 和 光顏 九年討察,以陳州 突入 乃壁般水。 賊 中, ,還爲憲宗言:「光顏 賊乃 反往 潰 明 北。 一再,衆識 刺史充忠武 年, 當此 大破 時, 光顔 賊 勇而 軍 時 諸鎭兵環察十 都 曲 **一** 矢集其 義,必立功 知兵 初, 馬 使。 身 賊晨壓其營以 如 餘 蝟。 始 屯, 踰 月, 子攬 相顧 擢本 陣, 馬鞅諫無深 不肯前, 軍節 衆不得出 度 獨光顏 使, 入, 光顔 光顔 詔 先敗賊。 以 毁 挺 其 刃 其

甚, 襲其城, 請救於光額。 叉 夷之,賊失贅聚。 與烏重胤破賊小澱河。 光顏策賊旣出,則小溵橋之堡 弘怒不救重胤, 違節度, 取顯等將發之, 舉軍惜其材, 初, 都統 韓弘約諸軍攻 [H 7乘,且 重胤 賊, 不可 賊先薄 破。 重胤 遣大 壘, 將 田 重胤 穎 光顏不敢 中 宋 矛 朝 創

拒 會中人景忠信至,知其然, 即矯詔械繫在所,馳以聞,有詔釋之。 弘及光顏更以

謂 弘 使 日 …「違都統令當死,但以功可 '贖,赦之以爲後圖 1。」弘不 悅。 自是與弘有

將鄧懷金大恐,其令董昌齡因是勸懷金降,且來請曰:「城中兵父母妻子皆質賊, 年 而 应 屈,且赤族。 十一年 奉僞印,懷金率諸將素服開門待。光顏入之,城自壞者五十版。 月,敗賊於郾城,死者什三,數其甲凡三萬,悉畫雷公符、斗星,署曰:「破城北軍。」郾守 屢困賊, 遂拔凌雲栅。 請公攻城,我舉火求援,援至,公迎破之,我以城下。」光顏許之。 捷奏入,帝大悅,厚賚其使,進檢校尚書左僕射。 有如不戰 賊已北

爲我謝公,天子於光顏恩厚,誓不與賊同生!」指心曰:「雖死不貳。」因嗚咽泣下,將卒數萬 勤。」光顏約旦日納焉。 珠 皆感激流涕,乃厚賂使者還之,於是士氣益勵 日:「我去室家久,以爲公憂,誠無以報德。 琲,舉止光麗,費百 弘素蹇縱,陰挾賊自重,且惡光顏忠力,思有以橈衊之。乃飭名姝,教歌舞、六博,襦欘 鉅萬, 遣使以遺光顏, 曰:「公以君暴露于外, 恭進侍者, 慰君征行之 乃大合將校置酒,引使者以侍姝至,秀曼都雅,一軍驚視。 然戰士皆棄妻子,蹈白刃,柰何獨以女色爲樂? 。光顏徐

甚,光顏力戰却之。先是,光顏策賊必至,密遣田布伏精騎溝下,扼其歸。 裴度築赫連城於沲口,率輕騎觀之。賊以奇兵自五溝至,大呼薄戰,城爲震壞,度危 賊敗,棄騎去

傳

第

九

+ 大

李

光 進

顚 顏 死 躍 溝 中 馬 者 入 賊 千 營大 餘 呼 由是賊悉 ,衆萬餘 銳 人投 士 一當光顏 甲 請 賊平, 而 李愬得乘虛入蔡矣。 加 檢校司空。 入朝, 董 重質 召 對鱗 棄洄曲 德殿 軍降敷 賜

命

宴其

第

歸芻米二十

車

破之。 聞 復 級 者亦 城之, 上言許 帝 光顏 泣 計 亦以 李 下 聞 師 鄭兵合不 遽 忠武 賊至 道 卽 ),徙義 路 兵從。 , 料兵以赴, 虜 山 成 走 節度 用。 初 出 , 寒 田 遂復鎭 使, 邠 縉 人 鎭 許以忠武 慢 夏州 忠武。 言 区区区 以 、兵自隨。 吐蕃 叨 沓 騰 入寇, 課 開 不肯行。 邊 不三旬 隊, 徙 邠 故 寧軍 党項 光 再敗賊濮陽, 顏 引 爲陳說 時虜 吐蕃 毁 重 大 鹽州 涇州 拔 義 斗 城 感 門,斬數 郝 慨 使 玼 流 力戦 光 顏

翌 相 賜 徙 河 東 處 珍器 鳳 日 置 節 翔 穆宗 拔 失宜 度 良馬 尉 깘 帝 氏 寶 解 將 召還 歷 玉 伐 兼 與汴 帶 鎭 二年卒,年六十六,贈太尉 領 州 賜 光顏 開化 亦 復還 戦 會赦王 琵 里第, 提 忠武 琶 軍深 溝 廷 , 加同中書門下 入, 又 凄, 未 兼深冀行 陣 復 而 所治。 餽 薄之, 運 諡 不 營節 日忠 賊 李介 平 至 走。 章 度使。 有 亂 事 賻賜良厚。 济 詔 汴州 平 以滄、 還 宰相 , 軍 進 詔 一,賚況 兼 景、 百官班 總 侍 及葬, 軍 德 中。 出 不 棣 餕 貲, 討 文宗以其功高 敬 一,帝御 州 宗 以寵 朝 益 初 受命 之。 通 示 眞 化 光顔 羣 門 暮 拜 臣 ,復賜 臨 卽 司 以宰 徒 俄

二千匹。

光顏性忠義,善撫士,其下樂爲用。

衞上 曹 有 請 師 將 宰相得其謀,不聽,以自勉代元裕。 以爲援、率不報。 罕以千 許 軍。 師 勁 五百人隸招討使宋威,張貫以四千人隸副使曾元裕。 悍, 常為諸 至是表請討賊, 詔乘傳赴軍 大將張自勉討雲南、党項,龐勛亂,解圍壽州,戰准口 軍鋒,故數立勳。 , 解宋州圍。 王仙芝、 黃巢反, 諸道告急, 威忌自勉成功, 請以隸麾下, 僖宗 倚許軍以屏蔽 多請以助守。 ,以功累擢右威 且欲殺 東都,

王承宗, 「天子有命, 烏 重胤字保君, 陰與賊連。 從者賞, 吐突承璀將圖之, 以告重胤, 乃縛從史, 帳下士持兵合讙, 重胤叱曰: 河東將承毗子也。 違者斬!」士斂手還部無敢動。 少爲路牙將, 兼左司馬。 憲宗嘉其功, 節 度使盧從史奉詔討 擢河陽節度使, 封

張掖郡公。

領 年 (軍能: ,賊平,再遷檢校 帝討淮蔡,詔重胤以兵壓賊境, 作威 福 也。 使 司空,進邠國公。 刺 史得職,大帥雖有祿山、思明之姦,能據 徙横海 割汝州隸其軍,與李光顏相掎角。 軍,建言:「河朔能拒朝命者 一州爲叛哉?臣 l,蓋刺 大小百餘戰, 凡三 史失權,鎮將 一所管三州

列

傳

第

九十六

鳥

重胤

輒還刺史職,各主其兵。」因請廢景州。 法制脩立, 時以爲宜。

節度使。 詔杜叔良代之,以重胤爲太子太保。 討 王廷凑也,出屯深州,方朝廷號令乖迕,賊寖不制,重胤久不敢進。 召至京師, 改節天平軍。 文宗初, 眞拜司徒。 長慶末,以檢校司徒、同中書門下平章事爲山南西道 未幾卒,年六十七,贈太尉,諡懿穆。 李同捷請襲父位,帝方務靜安,授 穆宗以爲觀望

烏僕 射 重胤 出行伍,善撫士,與下同甘苦。 」得士心 大抵 如此。 待官屬有禮,當時有名士如温造、石洪皆在幕府。 蔡將李端降重胤,蔡人執其妻殺之,妻呼曰:「善事 既殁,士二

+-餘人刲股以祭。 同捷兗海

,以重胤耆將,兼節度滄景,以齊州隸軍。

子漢弘嗣爵。 居母喪,奪爲左領軍衞將軍,固辭,帝嘉許之。

曰:「彼無求於人,其肯爲我來邪? 歸 東都 石 ,十餘年隱居不出。 洪者,字濬川,其先姓烏石蘭,後獨以石爲氏。 公卿數薦,皆不答。 乃 具書幣邀辟,洪亦謂重胤知己,故欣然戒行。 重胤 鎭河陽,求賢者以自重,或薦洪, 有至行,舉明經,爲黃州錄事參軍,罷 重胤喜 重胤

其至,禮之。

後詔書召爲昭應尉、集賢校理。

爲將。 不用。都將王虔休曰:「珙奇士,不能用卽殺之,無爲它人得也。」抱真 又有李珙者,世儒家,珙獨尙材武,有崖岸。 重胤禽從史, 珙將救之, 既聞謀出朝廷,乃止。 嘗至澤路見李抱眞,欲署牙將,聞其使酒, 重胤愛其才, 討准西也,表爲行營都 不納。 虔休代節度,引

終右武衞上將軍。

昌裔 田 **偁脅脫子襲領其軍** 所請薄、謂沛曰:「吾意殊未厭,爾歸矣,方使別奏。」沛未至許,拜兼御史中丞。 而劉昌裔領節度,奏沛爲監察御史,有詔護灚喪還京師。帝召見歎息,以爲功異等, 王沛 許州許昌人。少勇決, , 謀殺監軍 爲節度使上官況所器, 沛知其計,密告之,支黨悉禽。 妻以女, 署牙門將。 德宗嘉美, 即拜行 |洗卒, 它壻 軍 司

戰 光顏定淄青。 太原、魏博等軍繼度,圍郾城。 , 諸將觀望, 不敢度澱以壁。 李光顏討吳元濟,奇沛風概,署行營兵馬使,使將勁兵別屯,數破賊有 及光顏鎭別,紹分許兵往戍,沛又爲都將,救鹽州,敗吐蕃,以功擢寧州刺史。 沛引兵五千夜濟合流,扼賊衝,遂城以居。 沛先結壘與賊對,蔡將鄧懷金遂降。 蔡平,加좙大夫。復從 於是河陽、宣武、 功。 時詔書趣

列傳第九十六 王沛 楊元

卿

徙陳州

Ħ.

時 新 建 府 介之亂 、俗獷 驚 ,沛明示法制, 蒐閱以時, 軍政大治。 加檢校右散騎常侍, 以檢校工部尚書徙忠武。 進 拜克 海沂密節度 大和元年 使。 是

卒,贈

尚書右僕射。

賞, 命 ? 至 於 忠武節度使云 天德, 何哉 子逢,從父征伐,累功署忠武都知兵馬使。 討 劉 ? 有 稹 」武宗以逢用法嚴, ·士二千人未嘗戰,欲冒常 也 ,爲太原道 行營將 使宰相李德裕讓之, 領 賜, 陳許兵七千屯翼城。 逢 不 與,或爲請之,答曰:「士奮死 大和 中,入爲 |逢 曰:「戰者前蹈白刃,不以法, 1種平,加檢校右散騎常侍。 諸衞將軍。從劉 取賞 沔、 石 雄 若 破 無 孰 回 後 功 用 鶻 而

然 李 跋 元卿 吉 扈 察州 甫 楊 陰橈少陽事,而輸欵朝廷。 慰 元 卿 納 元卿以 史失其何所人。 元 卿還,與少陽 褐 衣 見, 署劇 少孤 言 君 縣, 及元濟擅襲節度, 臣 慷慨有 大義 俄 召 辽 入 術 (動其心 八幕府。 略。 客江海 城黨 叉 元卿欲困其財使不振, 事 上,時 少陽。 惡 而共構之,判官 時 每 高 奏 論 事 至 人 京 謂 **蘇肇** 謬說曰:「先公 師 狂 生 保 頗 救 吳少誠 爲 乃免。 宰相

則諸將悅, 客于財,諸將至寒餒。府之有亡,我具知之。 ,請敕諸道執元濟誅之。 庶幾助我。 吾爲君持表見天子, 元濟覺,乃殺其妻丼四子,圬爲一堋射之,肇亦被害 安有不從者?」元濟許之。 君若大賜將士以自固, 又卑辭厚禮邀事諸鎭 既至,則具條賊虛

汾州 元卿 寶帶,往取必得。」帝曰:「我討賊,爲人除害。 元 卿 入見, 刺史,復入爲金吾。 ,恐觖望生事, 憲宗拜元卿岳王 願假度支錢及它奏請不合旨, 議格。 府司馬, 更授光祿少卿。 與李愬議僑置蔡州 蔡平, 又裴度以諸將討蔡三年, 賊平 超拜左金吾衞將軍。 - ,我求得矣,焉用寶 ,以元卿爲刺史, 優納 功且 ! 建言:「准西多怪珍 止勿復言。」 降附, 成, 若又以州與 壞賊黨與。 出為

河陽。 石,助天子經費。進光祿大夫。 元卿墾發 然性險巧,所至聚斂,諧結權近,故累更方任云。 長慶初,鎭、魏易帥,元卿具道所以成敗事,穆宗久乃悟,賜白玉帶, 何進滔亂魏博, 元卿請自齎三月糧舉軍出討,文宗嘉美, (屯田五千頃,屯築高垣,牢鍵閉,寇至,耕者保垣以守。 徙宣武軍。 大和七年,以疾歸東都,授太子太保。 加檢校司空。 居六年,涇人德之。 擢涇原渭節 獻栗二十萬 卒,贈司 度使。 徙節

子延宗,開成中爲磁州刺史,與河陽兵謀逐帥自立。 列 傳 第 九 + 六 楊 元 卿 曹 華 事敗,詔以元卿嘗毀家歸忠,全其 五 九一

宗 杖死延宗於京兆府、賜還田產。

不受 憲宗 奔東 命 初 都 曹 菙 累 會吳少 詔 拜 河 宋州 陽 檢校右散 犪 誠 楚丘人。 汝 叛, 節 留守 ·騎常侍,召至京師, 度使鳥重胤討之, 始從宣武 王翃署華襄城 軍, 縛亂將李迺送闕下,節度使董晉署爲牙將。 重胤 賜矛 戊將 請華自副 甲繒錦,還屯。 華 浚隍埤堞, 戰靑陵城, 拜 日 寧州刺 與賊搏, 賊大奔, 拔凌雲棚 史,未行,屬吳元濟 數禽馘 ,賊憚之。 後避仇

功封

陳留

郡王

耶爲三 兵, 廡, 盜 मि 乃闔 酒 用者 察 中,令曰:「天子以鄆 鎭。 平 門大言曰:「天子有 1,貸死, , 進棣州 其明年 補屯卒,使據 刺 史。 軍亂, 州與鄭比, 人參 命, 孔 別 誅殺 殺觀 道。 解息。 而 戍, 師者。」 賊至, 察使王遂,詔華往代。 時賊略定滴河,華遽逐賊,斬二千級, 有 轉徙勞,欲厚賞之。 輒擊卻之,不敢 甲起于幕,環之。 北。 視 請 事三日 凡 擢 郿 斬 横海 人右,州 千二百人, 節 合軍大饗, 度 一副使。 兵 復其縣。 左。 血 流 旣 幕 時 殿渠、 甲 朝 而 又 / 募羣 出 廷 州 披

惡沂地褊,請治克,許之。 自李正己盜齊、魯,俗益汙驚, 華下今日:「鄒、魯禮義鄉 氛冒門

高

丈

徐。

海、沂之人,重足

不可忘本。」乃身見儒士,春秋祀孔子祠,立學官講誦,斥家貲佐贍給入乃知教,成就諸生,

仕諸

朝

以 兵取宋州。華不待命,以兵逆擊,破之。。亦平,檢校尚書右僕射,徙鎭義成軍。 鎭 人害田弘正,華亟請以本軍進討,不從。 進華檢校工部尚書,就充節度使。 盜殺商賈 李介扳,

吏捕得,乃華嬖人。 |華雖出戎伍,而動必由禮,愛重士大夫,不以貴倨人,至厮豎必待以誠信,人以爲難。 華怒,斷其頸以祭死者。 卒,年六十九,贈左僕射。

太僕卿。 高 瑀 ,冀州蓨人。少沈邃,喜言兵。 釋褐右金吾胄曹參軍,累遷陳、蔡二州刺史,入爲

及瑀 出官 里, 軍 中情僞,欲任之。會其軍表丐瑀,乃檢校左散騎常侍,領忠武節度使。 時其鍾洩, 有 人中尉,所輸貨至鉅 忠武節度使王沛死,衞軍諸將多自謂得之,宰相裴度、韋處厚以瑀治陳、蔡素有狀,習 命 士相 告曰:「韋、裴作相,天下無債帥。」州比 民賴不饑。 萬,貧者假資富人,既得所欲, 再加檢校尙書右僕射。 六年, 徙節武寧軍。 水旱無年,瑀 則椎斷膏血 相 ,倍以酬息,十常六七。 地宜,築隄庸百八十 以刑部尚書召,辭 自大曆後,擇帥悉

列

傳

第九

十六

高

瑀

劉沔

五

一九三

拜太子少傅。 |瑀寬和,居官無赫然譽,所至稱治,士人懷之。 不閱月,復詔節度忠武,卒于鎮,贈司空。

劉 河字子汪, 徐州彭城人。父廷珍,以羽林軍扈德宗奉天, 以戰功官左驍衞大將軍、

東陽郡王。

「後日必處吾坐。」希朝卒,入爲神策將。大和末,遷累大將軍,擢涇原節度使,徙振武。 沔少孤 突厥劫營田,沔發吐渾、契苾、沙陀部萬人擊之,賊一轡無返者,悉頒所獲馬羊于戰 ,客振武,節度使范希朝署牙將。軍中大會,沔捉刀立堂下,希朝奇之,召謂曰: 開 成

太原、振武,天子使兵部郎中李拭調兵食,因視諸將能否,拭獨稱沔,乃拜河東節度兼招撫 卒,築都護府 回鶻使,進屯鴈門關。 議 武宗立,遷檢校尚書左僕射。 軍還,次代州,歸義軍降虜三千,使隸食諸道,不受詔,據滹沱河叛,沔悉禽誅之。 者恨其薄,又進金紫光祿大夫,賜一子官。 西北四 壘。 廣寇雲州,沔擊之,斬七裨將,敗其衆。 進檢校戶部尙書。 回鶻寇天德,詔以兵據雲伽關,虜引去。 虜殘衆走, 詔沔追北, 仍錄李靖平 頡利事 以還太和公主功, 會昌二年,又掠 加檢校 司

國 昌 及契苾、 列 傳 第 九 拓拔雜 + 六 虜三千騎,夜發馬邑,且登振武城望之,見罽車十餘乘,從者朱碧衣 石 雄

校 逗留 司 徒, 劉 宰相 稹 徙忠武節度使。 (阻命, 李德裕表沔鎮 韶沔南討,屯榆 河陽 以病改太子少保,不任謁, 拜太子太傅致仕。 ,以滑兵二千壁萬善,居宰肘腋 社 洒素與張仲武不協,時方追幽州 下,激之俾出 兵,故徙義成。 卒, 軍 年六十五 稹 平, 會王 進 贈 檢

司

徒。

亂 變, 同 請以 捷 因 石 、收棣州, 立 雄 軍 功 法論。 奏除 徐州人,系寒 州 使雄先驅 文宗素. 刺 史, -, 知 詔以 度 其能 河 不知其先所來。 爲 ,鼓行無前 壁州 不 殺, 刺 史。 流白州 初, 少爲牙校, 智 興 徐 由 軍 是 徙為陳州 惡 殺雄素所善百 智 敢毅善戰, 興 岢 長 酷 史。 謀逐 党項擾 餘 氣 人, 之而 蓋 軍 河 中。 誣 立 |雄陰: 西 雄 王智 結 召雄 智 士搖 興討 興

振

武

劉

沔

軍

破羌

有勞,帝難

智

興,久不擢

牙, 劉沔 李 彼 屯雲州 會昌 不及備 初 回鶻 , 河召 必棄公主 入寇 |雄 謀 連年 日 走 虜離 掠 我當迎 雲、朔,牙五 散,當掃除 主 歸。 原 久矣。 有 塞下。 如 不 國家以公主故,不 捷 詔雄 吾則 爲天德防禦 死之。」雄 欲 副 (使, 日:「諾。」即選 血 攻。 兼 朔州 我若 刺 徑趨 沙陀 其

五

一九五

豐州

防禦

使。

躁,直 課者曰:「公主帳 [擣烏介帳。 也。」雄潛使喻之曰:「天子取公主,兵合, 可汗大駭,單騎走,追至殺胡山,斬首萬級,獲馬牛羊不貲,迎公主還。 第無動。」雄穴城夜出,縱牛馬鼓 進

| 積 每 義 屯 石 m 朝 自 勇罕 廷賜 千人徑薄路,受誼 會關,顧望莫先進。 武寧李彦佐討劉碩,逗留,以雄爲晉絳行營諸軍副使,助彦佐。是時,王宰屯萬善,劉沔 雄比者。」就 與,輒置 衆疑其詐,雄大言曰:「楫之叛, 軍門, 拜行營節度使,代彦佐。 降。 自取一匹綠,餘悉分士伍,由是衆感發無不 雄受命 進檢校兵部尚書, 卽 勒兵越烏嶺,破賊五壁,斬獲千 誼 徙河陽。 爲謀主。 徙 河中。 初, 今欲殺稹,乃誼 稱危蹙, 雄計稹, 其大將郭誼 奮。 計、賊 水次見白 自謀, 武宗喜曰:「今將帥 大震。 密獻 鷺 又何疑? 雄臨 款 謂衆日: 財康 請 雄 斬

最 宣宗立,徙鎮 字惡之, 數欲沮 鳳翔。 陷 雄素爲李德 會德裕 罷宰相, 裕 識 拔。 因代歸。 王宰者, 白敏中猥曰:「黑山、 智興子, 於雄故有隙。 天井功, 所酬 路之役, 雄 功

厭。」拜神武統軍。

失勢,怏怏卒。

「使吾射中其目,當成功。」

發如言。

帝聞,下

詔褒美。

記

贊曰:世皆謂李愬提孤旅入蔡縛賊爲奇功,殊未知光顔於平察爲多也。 ,憑空堞以居,故懲能乘一切勢,出賊不意。 然則無光顏之勝, 是時, 燃烏能 賊戰日

奮哉?

窘,盡取銳卒抗光顏

#### 校勘記

月,

四

[1] 元和四年王承宗反范希朝引師救易定 各本原無「反」字。按本書卷七憲宗紀載: 元和四年十

舊書卷一 王承宗反,五年四月, 范希 朝與張茂昭戰承宗於木刀溝, 敗之。 本書卷一七〇范希朝傳及

張茂昭傳略同。 木刀溝在定州新樂縣,與「救易定」 語合。 「王承宗」下顯脫「反」

字,今補。

# **唐書卷一百七十二**

### 列傳第九十七

于頔季友 王智與 晏平 宰 杜兼 羔 中立 杜 范傳正

使,有專對材。 于頔字允元,後周太師謹七世孫。蔭補千牛, 擢長安令、駕部郞中。 調華陰尉, 累勞遷侍御史。 爲吐蕃計會

魚無慮萬計。 出爲湖州刺史。部有湖陂,異時漑田三千頃,久廞廢,順行縣,命脩復隄閼,歲獲秔稻蒲 州地庫薄,葬者不掩柩,頗爲坎,瘞枯骨千餘,人賴以安。

矣! 察使王緯以聞,德宗不省。 」益自肆。 未幾,改蘇州。 峻罰苛懲,官吏惴恐,皆重足一迹。 罷淫祠,濬溝澮,端路衢,爲政有績。 俄遷大理卿,爲陝虢觀察使,慢言謝輝曰:「始足下劾我,三進官 參軍 事姚峴不勝虐,自沈于河。 然暴橫少恩,杖前部尉以逞憾,觀

十四四 年, 拜山南東道節度使。是時,吳少誠叛,順率兵自唐州戰吳房、朗山,取之,

列

傳

五

禽 兵 不 中 奉 意 其將 勝 悔 所 取 表 鄧 忿 奏 責 悟者類 李璨 州 誣 復 洪 刺 劾 署舊 殺 太 鄧 , 沿以軍 子 又 重 洪 州 ,未始誰 勝 一, 改 職 刺 之 府驚潰。 吉州 史元 法 濯 IE 倫 神溝 何 洪 長 帝 死 史,遣使厚諭 晚務姑息 初 朝廷 累 以 於是請 兵 遷 襄 重 檢 圍 有 違 校尚 其居 2 樂器 升襄州爲大都督府,廣募戰 順 爲 乃已。 所奏建 書左 , 流端州 天下以爲法 彊 使孽 僕 嘗 射、 怒判官薛正倫,奏貶陝州長史,比詔下 無不開允。 子 命中人護送至棗陽 與婚。 同 中 ·書門下平章事 至|順 昵吏高洪,縱使 公斂私輸 、驕蹇, 主 ,儲良械 故方帥不法者號「襄樣 ,封燕國公。 ", 持 順遣 **划下**, 下 捌 然 有 益急 兵劫洪還 別將 專漢 俄擅以 而 陳儀 慢 於 南 拘 順

節 憲 宗 立 權 綱 自 出 順 稍懼, 願以子: 尚主,帝許之。 **遂入朝**, 拜 司空、同中書門下平

事 請 準 杜佑 月三 奉朝 詔 미

度

它奴 鎭 為 建 恩王 福 送 門 久 時 宦 御 不 史獄 報 者 史不內, 子敏寬雷州 梁守謙幸於帝 敏怒其紿 命中 屛營負 丞 責 薛存 牆 所 至商山賜死 類用 誠、 立 饋 诱誘 ,更遣人 刑 事 部 正 0 侍 言 有 郎王 梁正 、上章 家 次子季友奪二官 奴 播 , 支 言者,與頗子敏善, 有 (解之) 大 司 理 拒 卿武 棄溷 不 聞 少儀 中。 正及方免官 翌 雜問 家童 日 | 敏因 復 之。 上 往 正 變, 言厚賂 宰 順 與 詔 流 相 壁 諸 捕 諭 守謙, 封 子 頔 使 還 、吏沈 州 素 浓 服 待 順 IF. 壁 出 及 貶

誅死。

以太子少保官之,帝改署賓客。 祿大夫。 久之, 拜戶部尚書。 帝初欲順告老,宰相李逢吉謂得謝乃優禮,非所以示責。 帝討察,順獻家財以助國,帝卻之。又坐季友居喪荒宴,削金紫光 鬱鬱不得意卒,贈太保,太常諡曰 厲。 明年,乃致仕。 宰司 將

頗嘗制順聖樂舞獻諸朝。 又教女伎爲八佾,聲態雄侈,號孫吳順聖樂云。

吏,倔彊犯命,擅軍襄、鄧,欲脅制朝廷;殺不辜,留制囚,遮使者,僭正樂。 爲請,更賜諡曰思。 季友尚憲宗永昌公主, 尚書右丞張正甫封還詔書,右補闕高釴、博士王彥威持不可,謂:「順文 拜駙馬都尉。 從穆宗獵苑中,求改頔諡,會徐泗節度使李愬亦 勢迫而朝,非其

旗結客刺裝度,事下有司,驗無狀,方坐誅 方, 長慶時以勳家子通豪俠,欲事河朔,以策干宰相元稹。 而李逢吉黨謀傾執政,乃告

宿心,得全腰領而歿,獨以爲幸,不宜更諡。」帝不從。

納 怒、急攻洧。 王 智興字匡諫,懷州温人。 智興能駛步,奉表不數日至京師告急,德宗出朔方軍五千擊納 少驍銳,爲徐州牙兵, 事刺史李洧。 **洧棄李納** 挈州 解去,自是

列傳

第九

十七

王

智與

五二〇二

爲徐特將

智興 王 朝 日::日 曼方 討 误 元 軍 攻 中 沛 濟 有 也, 智 女子, · 興逆 李師道謀橈王 擊,敗之, 安得不敗。」卽斬以徇。 朝晏 一師, 脫 數侵徐救蔡。 身保 沂 州 朝晏自沂以輕 進破 節度使李愿遣智興 姚海 兵襲 兵 五 萬 沛 於 豐北, 夜戰狄丘 來步騎 獲美妾三人, 拒賊。 ,復破之。

先鋒 元 自率軍繼之。 和 十三年 ·, 伐 師道 壤 河 橋, 智興以步騎八 收黄隊,攻金鄉, 千次胡陵, 拔魚臺,俘斬萬計。 與忠武軍會, 以騎 賊平, 進御史中 界其子晏平、晏宰爲 明

年

刺

史。

累

遷 侍

御

史。

掠 殺異己者十餘輩 兵三千度河。 王廷凑,諸節 ,召還爲沂州 鹽 軍節 李次 鐵 長 一慶初 院及貢物, 攻宋州 度使。 度班師。 河朔用兵, 屬朝 ,然后謁羣謝曰:「此軍情也! 智興悉銳師出宋西鄙,破之潭口。 劫商旅, 廷用崔羣爲武寧節度使, 興由是揫索財賂,交權幸以賈虛名,用度不足,始稅泗口以佐 智興還,羣遣寮屬迎之,令士 加檢校左散騎常侍, 逐濠州刺史侯弘度。 充武 **零** 畏 羣乃治裝去, 朝廷甫罷兵,不能討, 寧軍 一委甲而 智 興 |芥平,加檢校尚書左僕射。 副使、 難 制 人。 河北行營諸軍 智興以兵衞送還朝, 智興 密 請 心 追 **不悦**, 還 卽詔 京 師 都 i 檢 校 工 因 知 勒 未 兵 兵斬 軍 李同捷以 報 馬 部尙 至 使 埇 關 會赦 帥

賜予備厚。 使。 滄德叛, 既戰, 智興請悉師三萬齎五月糧討賊,詔拜檢校司 降其將十輩、銳士三千,遂拔 册拜太傅,封鴈門郡王 一,進兼侍中。 棣州 諸將 改忠武、 聞 徒、 , 戰 同中書門下平章事、滄德行營招撫 河中、宣武三節度。 愈力,遂有功。 入 朝 卒,年七十九, 燕鱗 徳殿

子九人,晏平、宰知名。

贈太尉

困、改無州 文宗諭而止。 兵械七千自衞歸洛陽。 晏平幼從父軍,以討同捷功, 司馬。 給事中韋温、 御史劾之, 薛廷老、盧弘宣等還詔不敢下, 檢校右散騎常侍、朔方靈鹽節度使。 有韶流康州 不卽行, 陰求援於河北三鎮。 改永州司戶參軍。 父喪,擅取馬四百、 三鎭表其 温固執

史。 有美政,觀察使段文昌薦之朝,除鹽州 晏宰後去「晏」,獨名宰。 少拳果, 長隸神策軍。 刺史。 持法嚴,人不甚便。 甘露之變,以功棄御史大夫爲光州刺 累擢州寧慶節度使。

討 劉稹 列 傳 第 也 九 詔 + 字以 七 兵出魏博,趨磁州。 王 智 興 杜 兼 當是時,何弘敬陰首鼠,聞宰至,大懼,卽引軍濟 五二〇三

回鶻平,徙忠武

軍

晏實 千 潭 推 水 守磁 鋒 宰 兼 相 爲 統 李德 顧望計,帝有韶 河 陽 裕 行營。 建言:「河陽兵寡,以忠武爲援,旣以捍洛 進取天井關 切 責。 |幸懼, 賊黨離沮。 急攻陵川 德 , 裕 破 以字 賊 石 會關 乘破竹勢不遂取澤州 , 則丼制 進攻澤州 魏博。」遂詔宰以 郭誼 以 が其子 兵五

**履降。宰傳履首京師,遂節度太原。** 

代 北 諸 宣 宗 軍 初, 進 擊 入朝, 以疾不任事 厚結權幸 ,徙 求宰相, 河陽。 罷爲 周墀劾之,乃還軍。 太子 少保 分司 東 吐蕃引党項、 都 進 少 傅 回 卒。 鶻寇 河西 詔統

晏實 幼機警 智興自養之,故名與諸父齒 |積 平 雅淵 州 刺 史,終天雄節 度使。

事 南 参 杜 川 軍 事 兼 字處 伯 安 父存介爲賊執,臨 禄 弘 山 中書令 亂 , 逃去, Ē 倫 , 賊索之急, 宋州 刑, 五. 世孫。 兼 號 呼願爲奴以 初,正 刺史李岑以兵 倫 無子, 贖, |途皆| 故 以 迎之,爲追 兄子志靜 冤。 爲後。 一騎所 害。 父廙 兼 尙 幼, 爲 鄭 州 錄

德宗 帝 以爲才,遂横恣。 旣 建 厭 中 兵 初 進 大 抵 土 高 刺 第 僚官章賞、陸楚皆聞家子,有美譽,論事忤康, 史 重 , 徐泗 代易 節 至 度 使張 歷 车 建 不 徙。 封 表置 兼探 其 帝意 府 積勞爲豪州 謀自 固 卽 誣 刺 脩 一劾以罪。 史。 武 備 性浮 募 帝遣 占 險 勁 中人至 尙 兵 豪

無 廷勞畢, 出詔執賞等殺之,二人無罪死, 衆莫不冤。 又妄繫令狐運而陷李藩,欲殺之,

不克。

河南尹。 元和初,入爲刑部郎中,改蘇州刺史。比行,上書言李錡必反,留爲吏部郎中。 杜佑素善食,終始倚為助力。所至大殺戮,哀藝財貲,極菅欲。 適幸其時, 未嘗 尋擢

敗。卒,年六十。

家聚書至萬卷,署其末,以墜鬻爲不孝戒子孫云。

尚書致仕。 奉。 元和中,爲萬年令,時許季同爲長安令,京兆尹元義方責租賦不時,繫二縣吏,將罪之。 羔 |兼爲澤路判官,鞫獄,有媪辨對不凡,乃||無母,因得奉養。 而不知父墓區處,晝夜哀慟,它 等辯列尤苦,尹不爲縱。 日舍佛 詔皆免官,奪尹三月俸。議者以羔爲直。未幾,授戶部郎中,後歷振武節度使,以工部 從弟羔,貞元初及進士第,有至性。父死河北,母更兵亂,不知所之,羔憂號終日。 卒,贈尙書右僕射,諡曰敬。 羔乃謁宰相,請移散官。 憲宗遣中使問狀,具對府政苛細,力不堪 因是得葬。 及

子中立, 字無爲, 以門廕歷太子通事舍人。開成初,文宗欲以眞源、臨眞二公主降士

列

傳

第

九十七

杜

宗正卿取世家子以聞。中立及校書郎衞洙得召見禁中,拜著作郎。 族,謂宰相曰:「民間脩昏姻,不計官品而上閥閱。我家二百年天子, 月中, 遷光祿少卿、駙 顧不及崔、盧耶?」詔

馬都尉,尚眞源長公主。

耶? 自謂「盧言京兆」,驅放自如。中立部從吏捕繫,立箠死。 」帝聞異之,轉太僕、衞尉二少卿,歷左右金吾大將軍。 中立數求自試,憒憒不樂,因言:「朝廷法令備具, 吾若不任事, 京師惡少優戲道 遷司農卿。繩吏急, 何賴貴戚橈天下法 中, 具騶 反爲中 唱 珂

錢納帑舍,率五日一出,吏不得爲姦,後遂以爲法。 加檢校右散騎常侍。 農季一 農尤叢劇。 傷,左徙慶王傅。 久之,復拜司農卿,入謝,帝曰:「卿用法深,信乎?」答曰:「轂下百司養名不肯事 出付吏,大吏盡舉所給於人,權其子錢以給之,旣不以時,黃門來督責慢駡。中立取 陛下無遽信流言,假臣數月,事可濟。」帝許之。初,度支度六宮飧錢移司農,司 了,如司

歲晚 二年,大水汎徐、兗、靑、鄆,而滄地積卑,中立自按行,引御水入之毛河,東注海,州無水災。 鹽海瀕,民苦之。中立置「飛雪將」數百人,具舟以載,自是民不勞,軍食足矣。 大中十 京 兆 尹缺,宣宗將用之,宰相以年少,欲歷試其能,更出爲義武節度使。舊搖車三千乘,

卒,年四十八,贈工部尚書。

中立 居官精明,吏下寒慄畏伏。 中雖坐累免,及復用,亦不爲寬假,其天資所長云。

河 西, 杜亞字次公, 奏署幕府。 人朝,歷吏部員外郎。 自云本京兆人。 肅宗在靈武, 鴻漸爲山南、劍南 上書論當世事, 副元帥,亞與楊炎並爲判官。 擢校書郎。 杜鴻漸節度 再

諫議大夫。

闊,不稱旨,罷爲陝虢觀察兼轉運使。 宰,倍道進。 劉晏等劾治。 亞自以當衡柄, 與人語,皆天下大政。 載死,遷給事中。 悒悒不悦。 李栖筠 常衮惡之,出爲江西觀察使。 或以事祈謁, 徙河中。 風望高,時謂當宰相,故亞厚結納。 劉晏抵罪,貶睦州 輒相然 可。 帝知,不悅也。 德宗立, 刺 史。 召還。 元載得罪,亞與 亞意必 既又建奏疏 任台

萬。 方春,南民爲競度戲,亞欲輕駛,乃髤船底,使篙人衣油綵衣,沒水不濡,觀沼華邃,費皆千 通 重 ,用度無藝,人冀有所矯革,而亞雅意丞弼,厭外官,往往不親事,日夜召賓客言噱流連。 大舟,夾隄高卬,田因得溉灌。 隴 興元初,入遷刑部侍郎,又拜淮南節度使。 西李衡 在坐日:「使樂、紂爲之,不是過也!」旣泛九曲池,曳繡爲颿,詫曰:「要當稱 疏啓道衢,徹壅通堙,人皆悅賴。 至則治漕渠,引湖陂,築防庸,入之渠中,以 然承陳少游後,哀率煩

傳第

九

+

七

杜亞

范

傳

Œ

是 、林沼。」衡日:「未有錦纜,云何?」 啞大慚。 自是府財耗竭

假。 竉 辺 奏墾苑中爲營田,可減度支歲稟。 |亞| ,贈太子少傳,諡曰肅。 叉路中人求棄 貞元 窘,更舉軍帑錢與甸 中,罷歸。 河南尹。帝審其妄,使禮部尚書董晉代之,賜亞還。 宰相竇參憚其宿望,以檢校吏部尚書留守東都。 人,至秋取菽粟償息輸軍中,貧不能償者發囷窖略盡,流亡過 詔許之。先是, 苑地可耕者, 皆留司中人及屯士占 病 病不能謁。 風痹且廢, 卒,年七 

宣歙觀察使。 傳 正舉進 士、宏辭, 代還,坐治第過制, 皆高第, 授集賢殿校書郎。 憲宗薄不用,改光祿卿。 歷歙、 以風 湖、 蘇三 、痹卒、贈左散騎常侍 州刺 史, 有 殊 政, 進 拜

父倫,為戶部員外郎,與趙郡李華善,有當世名。

范傳正字西老,鄧州順陽人。

傳正 一好古, 性精悍, 初自整飭。 官益達、用度益奢侈、傾貲貨市權貴驩、私公府如家帑、

亦幸素有名,得不敗云。

# 唐書卷一百七十三

#### 列傳第九十八

#### **装**度 識 諗

河陰尉。遷監察御史,論權嬖梗切,出爲河南功曹參軍。 裴度字中立,河東聞喜人。 貞元初,擢進士第,以宏辭補校書郎。 武元衡帥西川,表掌節度府書記。 舉賢良方正異等,調

召爲起居舍人。

裴寰,才吏也,不爲禮,因構寰 爲帝高選,故郊迎趨跽受命,且請徧至屬州,布揚天子德澤,魏人由是歡服。 久之, 進御史中丞。 元和六年,以司封員外郎知制誥。 宣徽五坊小使方秋閱鷹狗,所過橈官司,厚得餉謝乃去。 出醜言,送詔獄,當大不恭。 田弘正效魏、博六州于朝,憲宗遣度宣諭, 宰相武元衡婉辭諍,帝怒未置。 還,拜中書舍 弘正知度 下掛令

列傳第九十八 装度

度見延英,言寰無辜,

帝恚曰:「寰誠無罪,杖小使;小使無罪, 且杖寰。」 度曰:「責若此固

宜 ,第寰爲令,惜陛下百姓,安可罪? 」帝色霽,乃釋寰。

而勇,當有成功。」不三日,光顏破時曲兵,帝歎度知言。 王師討察,以度視行營諸軍,還,奏攻取策,與帝意合。且問諸將才否,度對「李光顏義 進兼刑部侍郎。

計適 斷鞾 拜中 賊 墜溝 外內始安。 曲 書侍郎、同 折 ,賊意已死,因亡去。 王 ,刜背裂中單,又傷首, |承宗、李師道謀緩察兵,乃伏盜京師, ,帝益信杖。及病創一再旬,分衞兵護第,存候踵路。疾愈,詔毋須宣政 吾倚度,足破三賊矣! 由是討賊益急。 .'中書門下平章事。時方連諸道兵,環挐不解,內外大恐,人累息。 議者欲罷度,安二鎭反側,帝怒曰:「度得全,天也。 度冒氊、得不死。 」度亦以權紀未張,王室陵遲,常憤愧無死所。 刺用事大臣,已害宰相元衡, 哄導駭伏,獨騶王義持賊大呼, 又擊度,刃三進, 衙 賊斷義手。度 自行營歸, 若罷之,是賊 卽 及度當國 對 延英, 知

故國朝置否不常,不宜徇空名,稽樞務。」乃詔百 政,議置冢宰。 天下髦英咨籌策, 始,德宗時尙 度日:「冢宰, 何伺 乃建請還第與士大夫相見, 中朝士相過,金吾輒飛啓, 商、周六官首、秉統百僚、王者諒闇、 詔 司權聽中書門下處 可。 宰相至闔門謝賓客。 會莊 憲太后崩, 有權聽之制。 爲禮儀 度以時多故,宜延 使。 帝 不聽

王鍔死,家奴告鍔子稷易父奏末, 冒遺獻。 帝留奴仗內,遣使者如東都按責其貲。

諫曰:「自鍔死,數有獻。今因告訐而檢省其私,臣恐天下將帥聞之,有以家爲計者。」帝悟,

殺二奴,還使者。

行乎? 股。 大患。 十二年 招討處置使。 今但論帥臣勇怯、兵彊弱、處置何如耳,渠一敗便沮成計乎?」 于 時 」度俯伏流涕曰:「臣誓不與賊偕存。」即拜門下侍郎、平章事、彰義軍節度、准西宣慰 ,宰相逢吉、涯建言:「餉億煩匱,宜休師。」唯度請 不然,兩河亦將視此爲逆順。」會唐鄧節度使高霞寓戰卻,它相揣帝厭兵,欲赦賊,鉤 帝曰:「一勝一負, ,討蔡數不利,羣臣爭請罷兵,錢徽、蕭倪尤確苦。 度奏:「病在腹心,不時去,且爲 兵家常勢。若兵常利, 則古何憚用兵耶?雖累聖亦不應留賊付 身督戰,帝獨目度留,曰:「果爲朕 於是左右不能容其間

司馬 臣無還期。」帝壯之,爲流涕。 意弘怏怏則度 ?,李正 度以韓弘 封、馮宿、李宗閔備 無 . 領都統,乃上還招討以避弘,然實行都統事。 又制詔有異辭,欲激賊怒<<br />
弘者, 與共功。 度請易其辭, 及行, 兩使幕府。 御通化門臨遣,賜通天御帶, 窒疑間之嫌。 入對延英,日:「主憂臣辱,義在必 於是表馬總爲宣慰副 發神策騎三百爲衞。 死。 使, 賊未授首, 韓愈行軍

度屯郾城,勞諸軍,宣朝廷厚意,士奮于勇。 列 傳 第 九 + 袭 度 是時,諸道兵悉中官統監, 自處進退。

逢吉忌度,帝惡居中橈沮,出之外。

奏罷之,使將得顓制,號令一, 戰氣倍。 未幾,李愬夜入懸瓠城, 縛吳元濟以報 度遣馬總

先入蔡,明日 ,統洄曲降卒萬人持節徐進,撫定其人。

抵法 可去備,度笑曰:「吾爲彰義節度,元惡已擒,人皆吾人也!」衆感泣。 ·; 餘 初,元濟禁偶語於道,夜不然燭,酒食相饋遺者以軍法論。 一蠲 除,行來不限晝夜,民始知有生之樂。度以蔡牙卒侍帳下, 度視事 旣而申、光平定,以 下令唯盜賊 或謂反側未安,不 鬭 死

守謙 請如詔, 度 入朝,會帝以二劍付監軍梁守謙, 使悉誅賊將。 度固不然,騰奏申解, 全宥者甚衆。 策勳進金紫光祿大夫、弘文館大學士、上 度遇諸郾城,復與入蔡,商罪議誅。

馬摠爲留後。

柱國、晉國公,戶三千,復知政事。

程异、 皇甫鎛以言財賦幸, 俄得宰相。 度三上書極論不可,帝不納。 自上印, 又不聽。

纖人始得乘罅

察平,王承宗懼,度遣辯士柏耆脅說,乃獻德、棣二州,納質子。 又踰程權入覲。

判滄、景、德、棣爲一鎭,朝廷命帥,而承宗勢乃離。

請自黎陽濟,合諸節度兵,宰相皆謂宜,度日:「魏博軍度黎陽,卽叩賊境,封畛比聯,易生顧 李師 道怙彊,度密勸帝誅之。 乃詔宣武、義成、武寧、橫海四節度會田弘 正致討。

陽劉 望,是自戰其地。 ,深抵鄮,以營陽穀,則人人殊死,賊勢窮矣。」上曰:「善。」詔弘正如度言。 弘正、光顏素少斷,士心盤桓,果不可用。 不如養威河北,須霜降水落,絕 弘正奉韶,

師道果禽

若此 悅,徐乃悟,讓朝汝曰:「以爾,使我羞見宰相!」命殺之,而原繫者。 繇是京師澄肅 語:「錢入禁中,何可得?」御史中丞蕭倪及諫官列陳中人橫恣,度亦極言之。 時方討鄲,帝 而 日: 「姑議東軍 卒爲异、餺所構,以檢校尙書右僕射兼門下侍郞平章事爲 列箠挺脅不承。又獲盧大夫逋券,捕盧坦家客責償,久乃悟盧羣券。坦子上訴, 帝嘗語. ,朕豈易辨之? 君子之徒同德,小人之徒同惡,外甚類,中實遠,在陛下觀所行則辨。」帝曰:「言者大抵 大賈張陟負五坊息錢亡命,坊使楊朝汶收其家簿,閱貸錢雖已償,悉鈎止,根引數十百 :「臣事君當勵善底公, ·,此細事,我自處辦。」度曰:「兵事不理,止山東; 中人橫暴,將亂都下。」帝不 」度退,喜曰:「上以爲難辨則易,以爲易辨則難,君子小人行判矣。」已 股惡夫樹黨者。」<br />
度日:「君子小人以類而聚,未有無徒 河東節度使。 朝汶瀾

將以聞 俄 兼押北山諸蕃使。 時元稹顯結宦官魏弘簡求執政,憚度復當國, 因經制軍事,

列

李光

**「顏、烏重胤** 

爪牙將,倚

以擊賊,兵十餘萬

.,有所畏,無尺寸功。

度既受命

入賊境,數斬

穆宗

(即位)

進檢校

公司空。

朱克融

王廷凑

) 亂河朔,

加

度鎭

州

行營

招討

使。

時帝以

4年 敷居 相 中持 以 梗,不 度 守司空、平章事、東都留守。 使 有 功。 度恐亂作,即上書痛暴稹過惡。 諫官叩延英,言不可罷度兵,搖衆心。 帝不得已,罷 弘簡、積近職 帝不召。於 俄 擢

是交章 會 中 極 論 人使幽、鎭還,言:「軍 ,未之省 中謂度在朝, ൬ 兩河諸侯忠者懷,彊者畏。今居東,人人失

容出 憸拫 流 領 出 牛元 准 涕 涕。 帝 南 移克融、 抑 節 翼 悟 伏 慮帝 舊儀 未 度 ,更使度騰書布旨。 詔度由 起,謁 使 未 廷凑書,開 閣 能 太原 中 其 者欲宣旨,帝遽曰:「朕當延英待卿!」始,議者謂度無援奧,且久外,爲 忠。 羣 朝京 臣 說 未 及 師。 退 進 諄 沓, 見,辭切氣怡,卓然當天子意。 或曰:「賊知度失兵柄,必背約 , 宰 及陛見,始陳二賊畔渙,受命無功,并陳所以入覲意, 相 傅以 不奏事 大誼 ,稱賀則 ,二人不 謁者答。 敢桀,皆 顧望。 願 帝 在 靇 빓 位 兵。 度 」帝釋然, 聞者皆竦,毅將貴臣 勳德,故待以 帝方 憂 乃拜度 深 州 重 守 司徒 欲 三至齎 感 必 度

臣。 悟誠惡之,胡不自聞,何哉?」度曰:「雖悟得聞,恐陛下不必聽。 度 頓 是 會 時 謝:「藩臣不 昭 義 中人趙 監 軍 劉 弘亮在行 與政。」辭不 承 偕 慢 劉悟 營知 對。 7 狀 舉 軍 欲持悟書以 帝 華怒,執承偕,悟拘以 彊 之, 度日:「臣素 奏, 陛下亦 知 知之邪? 承偕 聞。 帝怒, 怙 且臣視天顏不咫尺, 寵 一帝曰:「 ··, |悟 問度:「何 不 能 我 堪 不 施 及 嘗 加 知 以 口 比尙 書訴 顧

義心 未能決,千里單言,可悟聖聽哉?」帝亟曰:「前語姑置,直謂今日奈何?」度曰:「必欲收忠 ,使帥 臣死節,獨斬承偕,則四方羣盜隱然破膽矣。」帝曰:「顧太后養爲子 ,且我何愛?

更言其次。」度曰:「投諸荒裔可乎?」帝曰:「可。」悟果出承偕,昭義遂安。

奪平章事。 度數請到內殿,求立太子,翼日乃見。帝遂立景王爲嗣。 部尙書。 書侍郞、平章事 厚李仲言、張又新、李續、張權興等,內結宦官,種支黨,醜沮日聞,乃出度山南西道節度使, 是時,徐州王智興逐崔羣,諸軍盤互河北,進退未一。議者交口請相度,乃以本官兼中 度居位再閱月, 權佞側目,謂李逢吉險賊善謀,可以構度,共諷帝自襄陽召逢吉還,拜兵 果爲逢吉所間,罷爲左僕射。 逢吉旣代相,思有以牙孽之,引所 帝暴風眩,中外不聞問者凡三日。

無蕭 臣。管仲曰:『人離而聽之則愚,合而聽之則聖。』治亂之本,非有他術。陛下當饋而歎,恨 「度累爲宰相,而 一賢制千里之難。 疏曰:「臣聞汲黯在朝,淮南寢謀;干木處魏,諸侯息兵。 王霸之理,以一士止百萬之師, 、曹、今一裴度擯棄于外,所以馮唐知漢文帝有頗、收不能用也。」帝感悟,謂處厚曰: 長慶四年、王廷凑屠元翼之家,敬宗嗟惋,歎宰輔非其人,使兇賊熾肆。 官無平章事,謂何?」處厚具道其由,帝於是復度兼平章事。 裴度元勳巨德,文武兼備。若位嚴廟,委參決,必使戎虜畏威,幽、鎭自 帝雖孺蒙,然 學士韋處厚

欲以傾度。 數,而度第平樂里,直第五 僞謠云:「非衣小兒坦其腹,天上有口被驅逐。」以度平元濟也。 注意度, 中人至度 天子獨能明其誣,詔復使輔政。 所,必丁寧慰安,且示召期。寶曆二年,度請入朝,逢吉黨大懼, 岡。 權輿乃言:「度名應圖讖,第據岡原,不召而來,其意 都城東西岡六,民間 可見。」 權興作 以爲乾

闕、署屯、百司之區,荒圮弗治,假歲月完新, 姓。」趣有司檢料行宮,中外莫敢言。 「羣臣諫朕不及此。 先是,帝將幸東都,大臣切諫,不納,帝恚曰:「朕意決矣!雖從官宮人自挾糗,無擾百 如卿言,誠有未便,安用往邪?」因止行。 度從容奏:「國家建別都,本備巡幸。 然後 可行。 倉卒無備 有司且得罪。」帝悅曰: 自艱難以來,宮

汴宋觀察使令狐楚言亳州聖水出,飲者疾輒愈。 度判曰:「妖由人興、水不自作。」命在

所禁塞。

遭,已詔在所供擬。』此則賊謀窮矣。 無志 軍必有變;且請遣工五千助治東都,須天子東巡。 庸遣重使,第以詔書言:『中人倨驕,須還,我自責譴。 而悖,是將亡。 朱克融執賜衣使者楊文端,詭言慢己,幷訴所賜濫惡,又丐假度支帛三十萬匹,不者, 譬猛虎自哮躍山林,憑窟穴則然,勢不得離其處,人亦不爲懼。 陛下若未能然,則答:『宮室營繕旣有序,毋遣工爲重 帝怒,患之,欲遣重臣臨慰。度曰:「克融 春服不謹,方詰有司。 所上工宜即 陛下無

朝廷緣召發乃有賜與,朕無所愛,獨與范陽,體不可爾。』」帝曰:「善。」用度次策。

聽命,歸文端。未幾軍亂,殺克融。

近開 道家法 方居盛夏, 延英益稀,恐萬機奏稟,有所壅閼。 帝縱強,日晏坐朝。 ::春夏蚤起,取鷄鳴時,秋冬晏起,取日出時。蓋在陽,勝之以陰; 在陰,勝之以陽。今 謂宜詰旦數坐,廣加延問;漏及巳午,則炎赫可畏,聖躬勞矣。」帝嘉納,爲數 度諫曰:「比陛下月率六七臨朝,天下人知勤政,河朔賊臣皆聳畏。 夫頤養之道,當順適時候,則六氣和平,萬壽可保**。** 

死, 子同捷求襲滄景軍。 未幾, 判度支。 帝崩,定策誅劉克明等,迎立江王,是爲文宗。 度奏討平之, 即陳:「調兵食非宰相事,請罷度支歸有司。」奏可。 加門下侍郎。 李全略

視

朝

進階開府儀同三司,賜實封戶三百。 度懇讓不得可,乃受實封

短之, 納之校,以善田 慮,稍詭迹避禍。 徒、 平章軍 大和 因度辭位,卽白帝進兼侍中, 四年, 或 重事 四百頃還襄人。 數引疾不任機重,願上政事。 ,須疾已,三日若五日一至中書。 於是牛僧孺、李宗閱同輔政,媢度勳業久居上,欲有所逞,乃共訾其跡損 頃之,固請老,不許。 出爲山南東道節度使。 帝擇上醫護治,中人日勞問相躡,乃韶進 度讓免册禮。 白罷无和所置臨漢監, 度自見功高位極,不能 收千馬 無

訊 報 计慘。 八 -,徙 度上疏申理,全活數十姓。 (東都留守,俄加中書令。 李訓之禍,宦官肆威以逞,凡訓、注宗婭賓客悉收逮 武德縣主藏史盜錢亡命,捕不得。 河陽節度使温造

獄其令王賞責負,繫三年,母死弗許喪。

度爲帝言之,賞得釋。

度安否 岑繚 爲文章、把 幽 時 勝。 閹豎擅威,天子擁虛器,晉紳道喪,度不復有經濟意,乃治第東都集賢里,沼石 酒,窮 午橋作別墅,具燠館凉臺、號綠野堂、激波其下。 《晝夜相歡,不問人間事。 而帝知度年雖及,神明不衰,每大臣自洛來,必問 度野服蕭散,與白居易、劉禹錫 林叢

北門 福 元益懼,束 山 開 也 成 二年,復以本官節度河東。 趣 身歸 上道 朝 ,度乃之鎭 易定節度使張璠卒,軍中將立其子元益, 度牢辭老疾,帝命吏部郎中盧弘宣諭意曰:「爲朕臥護 度乃遣使曉譬禍

銘誌。 疾爲 不赴 帝 聞 震悼 一帝賜 難 三年 ·, 勉 帝怪無遺奏,敕家人索之,得半藁,以儲貳爲請,無私言。 以詩 醫 詩 IJ, 樂 日:「注想待元 病丐還東都。 置 自 . 持。 靈 几。 肸 册贈· 集中欲見公詩,故示 老, 眞 太傅、諡文忠、 拜中書令,臥家未克謝,有詔先給俸料。 識 君恨 不早。 此, 我 家柱 優縟 異日 石衰, 可進。」使者及門而度薨, 命京兆 憂來學丘薦。」 尹鄭復 會昌元年,加贈太師。 後護喪。 上巳宴羣臣曲江 別 詔 度 曰:「方春愼 臨 年 終, 七十六。 自爲

南觀察使。

入拜大理卿,襲晉國公半封。

爲涇原節

度使。

初,

事 長 必問度年今幾,狀貌孰似, 退然纔中人,而神觀邁爽,操守堅正,善占對。 及歿,天下莫不思其風烈。 天子用否。 其威譽德業比郭汾陽, 葬管城,逮今廟食。 旣有功,名震四夷。 而用不用常為天下重輕 使外國者,

識字通理,性敏晤,凡經目未始忘。 推蔭補京兆參軍,擢累大理少卿。 王師討劉稹, 爲

,列屯分守。 宣宗擇名臣,以識帥 涇原,畢誠帥邠寧,李福帥

夏州

親 校尙書右僕射。 治堡障,整戎器,開屯田。 是人感悅。 地斥鹵無井,識誓神而鑿之,果得泉。 加檢 校刑部尚書,徙鳳翔、忠武、天平、邠寧、靈武等軍。 初,將士守邊,或積歲不得還。 歷六節度,所莅皆有可述。 識與立戍限,滿者代; 進檢

學士 御奩果以賜, 迫以僞官,不從,遇害。 ,累遷工部侍郎, | 說有文,藉蔭累官考功員外郎。 **診舉衣跽受。** 韶加承旨。 帝顧宮人取巾裹賜之。 適會帝幸其院, 宣宗訪元和宰相子,思度勳望, 諗 後爲太子少師, 即稱謝。 帝 曰:「可歸 故待諗有加。 封河東郡公。 與妻子相 黄巢盗 爲翰林 慶。」取

國

頌 其 然排 功。 非前 功曰:「凡此蔡功,惟斷乃成。」其知言哉 贊曰:憲宗討蔡,出入四年。 智後 任 度 (愚,用不用, 政 事,倚以討賊。 勢當然矣。 身督 元濟外連姦臣 戰,遂平准 前史稱度晚沉浮爲自安計, 穆宗不君,憸 西。 刺宰相,反用事者, 非度破 人腐夫乘釁鐫詆, (賊之難,任度 是不然, 沮駭朝謀。 之為 大雅日:「既明 難 而 度遂 也。 惟天子赫 無 韓 愈 顯

且哲,以保其身。」應何訛云。

# 唐書卷一百七十四

### 列傳第九十九

李逢吉 元稹 牛僧孺 蔚 徽 叢 李宗閔 楊嗣復 煚

損

改中書舍人,知禮部貢舉。未已事,拜門下侍郎、同中書門下平章事。 進 十第。 李逢吉字虚舟,系出隴西。 范希朝表爲振武掌書記,薦之德宗, 拜左拾遺。 父顏(1),有痼疾,逢吉自料醫劑,遂通方書。 元和時,遷給事中、皇太子侍讀 詔禮部尚書王播署 舉明經,又擢

和議者請罷諸道兵。 逢吉性忌前,險譎多端。 憲宗知而惡之,出爲劍南東川節度使。 及得位, 務償好惡。 裴度討淮西,逢吉慮成功, 密圖沮止,

趣

榜。

元稹 穆宗即位,徙山 知政,度嘗條積險佞, 南東道。 逢吉以爲其隙易乘,遂丼中之,遣人上變,言:和王傅于方結客, 緣講侍恩, 陰結近倖。 長慶二年,召入爲兵部尚書。 時度與

列傳

第九十

九

李逢

吉

欲爲 頸俟相 言度爲逢吉排迮,度初得留。 逢吉代 稹 爲門下侍郎、平章事 度,而中外交章言之,帝訖不省,度遂外遷。 刺 度 帝 命 尚書左僕射韓皋、給事中鄭覃與逢吉參鞠方, 時已失河朔, 因以 恩爵動詭薄者, 王智興 更相擬以詆傷度,於是李紳、韋處厚等誦 以徐叛,李齐以汴叛,國威不振,天下延 無狀,積、度坐是皆罷,

不得所欲。 言,頷之而已。 人,而傅會者又八人,皆任要劇,故號「八關十六子」。 有所求請,先賂關子,後達於逢吉,無 帝暴疾,中外阻遏,逢吉因中人梁守謙、劉弘規、王守澄議,請立景王爲皇太子,帝 自是肆志無所憚。 未幾封涼國公。 明日下詔,皇太子遂定。 其黨有張又新、李續、張權 鄭注得幸於王守澄,逢吉遣從子訓路注,結守澄 輿、 劉栖楚、李虞、程昔範、姜洽及訓八 不 爲 能

遣還,度署以軍職,從鎭太原,除石州刺 昭,厚相結納,忿隙得解。 用 君 參軍茅彙居長安中,以氣俠相許。 卒不行。 敬宗新立,度求入覲,逢吉不自安,張權興爲作讖言以沮度,而韋處厚亟爲帝言之,計 顧逢吉持不可。」昭愈憤,酒所,語其友劉審,欲刺逢吉。 有武昭者,陳留人,果敢而辯。 逢吉素厚待彙,嘗與書曰:「足下當以『自求』字僕,吾當以『利見』 逢吉與李程同執政,不叶。 史。 度之討蔡,遣說吳元濟,元濟臨以兵,辭不橈,厚禮 罷歸不得用,怨望,與太學博士李涉、金吾兵 程族人仍叔謂昭曰:「丞相 審竊語權輿,逢吉因彙召見 欲

彙流 訓 諷 崖州 彙使 辭 誣昭與李程同謀,不然且死。 頗猥昵。 |渉康州, 仍叔貶道州司馬, 及度將還,復命人發昭事。 訓流象州。擢審長壽主簿。 彙不可,曰:「誣人以自免,不爲也 由是昭、 彙皆下獄,命御史中丞王播按之。 而逢吉謀益露。 ! 」獄成 昭榜死、 昭死,人

訓用 章事 以從弟子植嗣。 集,使人僞過 倚逢吉親信,顧財利,進婢,嬖之。 皆冤之。 季俸 爲 事 初,逢吉興昭獄以止度入而不果,天子知度忠,卒相之。逢吉於是寖疎,以檢校司空、平 山南東道節度使,表李續自 因 召拜尚書左僕射,足病不能朝,以司徒致仕,卒,年七十八,贈太尉,諡曰成。 是 貶續爲涪州 門下省 ,調房州一 刺史, 司馬。 又新 **伾坐事** 副 爲有司 汀州 ,張又新行軍 刺 `匿逢吉家,名捕弗獲。 所發 史。 久乃徙宣武 即襄州捕之、詭讕 司 馬。 頃之,檢校司徒。 以太子太師爲東都留守。 及出鎮,表隨 不遣。 御 初,門下 史劾 軍,滿歲 奏 ·史田 無子, 詔 不 敢 伾 及

傳。 九歲工 元稹字微之, 屬文,十五 河南 擢明經,判入等,補校書郎。 河內人。六代祖巖,爲隋兵部尚書。 元和元年舉制科,對策第 種幼孤 母鄭賢 一,拜左拾遺。 而 文, 親授書

列

傳

第

九十

九

元

穣

性明銳,遇事輒舉。

()王叔文、王伾蒙幸太子宫,而橈國政,殞謂宜選正人輔導,因獻言曰: 伏見陛下降明詔,脩廢學,增胄子,然而事有先於此,臣敢昧死言之。

苟得志,必快其所蕴。 物性亦然,故魚得水而游,鳥乘風而翔,火得薪而熾。 陳之者易諭焉;回佞庸違,固吾所積懼,諂之者易辨焉。人之情莫不耀所能,黨所近, 周、召則善聞。豈天聰明哉?而克終于道者,敎也。始爲太子也,太公爲師,周公爲傅, 藴 君也,血氣旣定,游習旣成,雖有放心,不能奪已成之性。 召公爲保,伯禽、唐叔與游,目不閱滛豔,耳不聞優笑,居不近庸邪,玩不備珍異。及爲 ,道德也; 所近, 聖賢也。 賈誼有言:「三代之君仁且久者,敎之然也。」周成王本中才,近管、蔡則讒入,任 快其蘊,則興禮樂,朝諸侯,措刑罰,敎之至也。 則彼道德之言,固吾所習聞, 夫成王所

趙高 高之威懾天下,而|亥自幽深宮矣。 若|秦亡則有以致之也。 |秦則不然,滅先王之學,黜師保之位。||胡亥之生也,詩書不得聞,聖賢不得近。彼 刑餘之人,傅之以殘忍戕賊之術, 日恣睢,天下之人未盡愚,而这不能分馬鹿

上之失無不言,下之情無不達,不四三年而名高盛古,斯游習之致也。 太宗爲太子, 選知道德者十八人與之游; 即位後 雖閒宴飲食, 十八人者皆在。 貞觀以來,保、

傳皆宰相兼領,餘官亦時重選,故馬周恨位高不爲司議郎,其驗也。

罷帥者處之。又以僻滯華首之儒備侍直、侍讀,越月踰時不得召。夫以匹士之愛其 言中傷,惟樂工剖腹爲證,豈不哀哉!比來茲弊尤甚,師資保傅,不疾廢眊瞶,卽休戎 母后臨朝,剪棄王室,中、睿爲太子,雖有骨鯁敢言之士,不得在調護保安職,及讒

子, 循求明哲慈惠之師, 豈天下元良而反不及乎?

乎!願令皇太子洎諸王齒胄講業,行嚴師問道之禮,輟禽色之娛,資游習之善,豈不 世之後,有周成中才,生於深宮,無保助之教,則將不能知喜怒哀樂所自,況稼穡艱難 臣以爲高祖至陛下十一聖,生而神明,長而仁聖,以是爲屑屑者,故不之省。 設萬

又自以職諫諍,不得數召見,上疏曰:

美哉!

矣!」其小人則竦利曰:「彼之直,得幸於上,吾將直言以徼利乎!」由是天下賢不肖各 或激而進之,則天下君子望風曰:「彼狂而容於上,其欲來天下士乎? 吾之道可以行 習决事深宮中, 羣臣莫與, 此亂萌也。人君始卽位, 萌象未見, 必有狂直敢言者。上 得蔽疏遠之人,此治象也。大臣不親,直言不進,抵忌諱者殺,犯左右者刑,與一二近 臣聞治亂之始,各有萌象。容直言,廣視聽,躬勤庶務,委信大臣,使左右近習不

列傳

若此 屏蔽之,不使視聽,欲不亂可得哉? 君所惡者拂心逆耳,吾將苟順是非以事之。」由是進見者革而不內,言事者寢而不聞, 子內謀曰:「與其言不用而身爲戮,吾寧危行言遜以保其終乎!」其小人則擇利曰:「吾 以所忠貢於上,上下之志霈然而通。合天下之智,治萬物之心,人人樂得其所,戴其 上如赤子之親慈母也,雖欲誘之爲亂,可得乎?及夫進計者入,而直言者戮,則天下君 則十步之事不得見,況天下四方之遠乎!故曰:聾瞽之君非無耳目,左右前後者

輕,而危亡之禍大,思爲子孫建永安計也。爲後嗣者,其可順一 也。 四方言得失於外,不數年大治。 言不直、諫不極、不能激上之盛意,曾不以忌諱爲虞。於是房、杜、汪、魏議可否於前, 進之也。 夫樂全安,惡戮辱,古今情一也, 太宗初卽位,天下莫有言者,孫伏伽以小事持諫,厚賜以勉之。自是論事者唯懼 喜順從,怒蹇犯,亦古今情一也,豈獨文皇甘逆耳、怒從心哉?蓋以順從之利 豈文皇獨運聰明於上哉?蓋下盡其言,以宣揚發暢之 **豈獨貞觀之人輕犯忌諱而好戮辱哉?蓋** 朝意,而蔑文皇之天 上激而

前後拾遺補闕,亦未有奏封執諫而蒙勸者。設諫鼓,置匭函,曾未聞雪冤决事、明察幽 陛 [下卽位已一歲,百辟卿士、天下四方之人,曾未有獻一計進一言而受賞者; 左右

智,日 者獨 四、嫁宗女;五、時召宰相講庶政;六、次對羣臣,廣聰明;七、復正衙奏事;八、許方 位之罪乎?輒昧死條上十事:一、敎太子,正邦本;二、封諸王,固磐石;三、出宮人; 書計錢穀登降耳。 之意者。 [糾彈;九、禁非時貢獻;十、省出入游畋。 一二執政, 有獻可替否者。今陛下當致治之初,而言事進計者歲無一人,豈非羣下因循竊 以陛下睿博洪深,勵精求治,豈言而 對不及頃而罷 以陛下之政,視貞觀何如哉?貞觀時, , 豈暇陳治安、議敎化哉? 它有司或時召見, 不用哉?蓋下不能有所發明耳!承顧問 尚有房、杜、王、魏輔翊之 僅能奉簿

礪已死,七刺史皆奪俸,礪黨怒。 俄分司東都 陳西北邊事。 按獄東川,因劾奏節度使嚴礪違詔過賦數百萬,沒人塗山甫等八十餘家田產奴婢。 于時論像、高弘本、豆盧靖等出爲刺史,閱旬追還詔書,履諫:「詔令數易,不能信天下。」 憲宗悅,召問得失。當路者惡之,出爲河南尉,以母喪解。 服除,拜監察御

幅

養子; 中,吏不敢止;內園擅繫人踰年,臺不及知;河南 坐罪, 稱舉劾, 按故 時浙西觀察使韓皋杖安吉令孫澥,數日死;武寧王紹護送監軍孟昇喪乘驛,內喪郵 田季安盜取洛陽衣冠女;汴州沒入死賈錢千萬。凡十餘事 事追攝,移書停務。 韶薄式罪,召稹還。 尹誣殺諸生尹大階,飛龍使誘亡命奴爲 次敷水驛,中人仇士良夜至,積 ,悉論奏。 會河南 尹房式

第 九

+

九

元 稪

不讓 羣、白居易皆論其枉。 中人怒, 擊積敗面 久乃徙通州司馬,改號州長史。 宰相以稹年少輕樹威, 失憲臣體,貶江陵士曹參軍,而李絳、 元和末,召拜膳部員 外郎

數 體,務純厚明切,盛傳一時。 近習皆誦之,宮中呼元才子。 十百篇奏御, 帝大悅。 問旗今安在,曰:「爲南宮散郎。」 然其進非公議,爲士類訾薄。 **稹之謫江陵,善監軍崔潭峻。** 即擢祠部郎中, 旗內不平,因誠風俗詔歷武率有 長慶初,潭峻方親幸,以稹歌詞 穆宗在東宮 知制誥 變 詔 妃嬪 書

司

以逞其憾。

政:「陛下欲平賊,當先淸朝廷乃可。」帝迫摹議,乃罷弘簡,而出[[爲工部侍郎。 逢吉雜治,無刺度狀,而方計暴聞,遂與度偕罷宰相,出爲同州刺史。 間 圍 衰,未幾,進同中書門下平章事 魏弘 mi 牛元翼於深州,碩所善于方言:「王昭、于友明皆豪士,雅游燕、趙問,能得賊要領,可使反 簡在 出元翼。 俄 遷中書舍人、翰林承旨學士。數召入,禮遇益厚,自謂得言天下事。中人爭與稹交, 樞密,尤相善。。裴度出屯鎭州,有所論奏,共沮卻之。度三上疏劾弘簡、旗傾亂國 願以家貲辦行,得兵部虛告二十,以便宜募士。」履然之。李逢吉知其謀,陰令 ,朝野雜然輕笑,殞思立奇節報天子以厭人心。時王廷湊方 將刺公。」度隱不發。 神策軍中尉以聞, 諫官爭言度不當免, 詔韓皋、鄭覃及 然眷倚不

怒,責京兆 而 黜履輕。 帝獨憐種,但削長春宮使。 賊尉,使使者慰履。再期,徙浙東觀察使。 初, 獄未具,京兆劉遵古遣吏羅禁稹第, 稱訴之,帝 明州歲貢蚶,役郵子萬人,不勝

爲公議所右。 大和三年,召爲尚書左丞,務振綱紀, 王播卒,謀復輔政甚力,訖不遂。 出郎官尤無狀者七人。 俄拜武昌節度使。 卒,年五十三,贈尙書右 然積素無檢,望輕, 不

僕射。

其疲,損奏罷之。

官貴得宰相,居位纔三月罷。 益 傳,時號「蘭亭絕唱」。隨始言事峭直,欲以立名,中見斥廢十年,信道不堅,乃喪所守。附 所論著甚多,行于世。 在越時,辟竇鞏。 晚彌沮喪,加廉節不飾云。 鞏,天下工爲詩,與之酬和,故鏡湖、秦望之奇

避宰相。 文,第進士。 河南,遷監察御史,進累考工員外郎、集賢殿直學士。 牛僧孺字思黯 宰相怒,故楊於陵、鄭敬、韋貫之、李益等坐考非其宜,皆謫去。 元和初,以賢良方正對策,與李宗閔、皇甫 ,隋僕射奇章公弘之裔。 幼孤, 下杜樊鄉有賜田 **浸**俱 第 一,條指 數頃, 依以爲生。 失政, 僧孺調伊闕尉 其言 一般計,不 I

屬

賜金紫服,以戶部侍郎同中書門下平章事。 財當死,路宦侍爲助,具獄上。帝曰:「<u>直臣有才,</u>朕欲貸而用之。」僧孺曰:「彼不才者,持祿 取容耳。 穆宗初, 天子制法,所以束縛有才者。 豫山、朱泚以才過人,故亂天下。」帝異其言,乃止。 以庫部郎中知制誥。徙御史中丞,按治不法,內外澄肅。宿州刺史李直臣坐

千萬,不納。」帝善之,謂左右曰:「吾不謬知人。」繇是遂以相。 者至其家,悉收貲簿,校計出入。所以餉中朝臣者皆在,至僧孺,獨注其左曰:「某月日,送錢 始,韓弘入朝,其子公武用財路權貴,杜塞言者。俄而弘、公武卒,孫弱不能事,帝遣使 尋遷中書侍郎。

節度使、同平章事。 畢 敬宗立,進封奇章郡公。是時政出近倖,僧孺數表去位,帝爲於鄂州置武昌軍,授武昌 又廢沔州以省冗官。 鄂城土惡亟圮,歲增築,賦養茅於民, 吏倚爲擾。 僧孺陶甓以城, 五

休戚 此,公言是也。」因遣使慰撫之。進門下侍郎、弘文館大學士。 志誠繇向 逐李載義,帝不時召宰相問計,僧孺曰:「是不足爲朝廷憂。夫范陽自安、史後,國家無所繫 一前日 文宗立,李宗閔當國,屢稱僧孺賢,不宜棄外。復以兵部尚書平章事。 .載義也,第付以節使扞溪、契丹,彼且自力,不足以逆順治也。」帝曰:「吾初不計 劉總挈境歸國,荒財耗力且百萬,終不得范陽尺帛斗粟入天府,俄復失之。 幽州亂,楊志誠 今

西山 東襲隴坂,以騎綴回中,不三日抵咸陽橋,則京師戒嚴,雖得百維州何益!」帝然之,遂詔返 反其言。 如德裕策。 , 至死恨不能致, 今以生羌二千人燒十三橋, 擣虜之虛, 可以得志。」帝使羣臣大議, 請 且中國禦戎,守信爲上,應敵次之。彼來責曰:『何故失信?』贊普牧馬蔚茹川,若 吐蕃請和約弛兵,而大酋悉怛謀舉維州入之劍南,於是李德裕上言:「韋皋經略 僧孺持不可,曰:「吐蕃縣地萬里,失一維州無害其彊。今修好使者尚未至,

降者。時皆謂僧孺挾素怨,橫議沮解之,帝亦以爲不直

它宰相曰:「上責成如是,吾可久處此耶?」固請罷,乃檢校尙書左僕射平章事,爲淮南節度 室無彊家,上不壅蔽,下不怨讟,雖未及至盛,亦足爲治矣。 副 致之?」僧孺曰:「臣待罪宰相,不能康濟,然太平亦無象。 大使。 會中人王守澄引纖人竊議朝政,它日延英召見宰相曰:「公等有意於太平乎?何道以 天子旣急於治,故李訓等投隙得售其妄,幾至亡國。 今四夷不內擾,百姓安生業,私 而更求太平,非臣所及。」退謂

樽、龍勺,詔曰:「精金古器以比况君子,卿宜少留。」僧孺固請,乃行。 經,以悟帝意,帝泫然流涕。 賓客相娛樂。 開 成初,表解劇鎭,以檢校司空爲東都留守。 三年,召爲尙書左僕射。 以足疾不任謁,檢校司空、平章事,爲山南東道節度使。 僧孺入朝,會莊恪太子薨,旣見,陳父子君臣人倫大 僧孺治第洛之歸仁里,多致嘉木美石,與 賜彝

東都 會昌 劉稹誅,而石雄軍吏得從諫與僧孺、李宗閔交結狀。 元年,漢水溢,壞城郭,坐不謹防,下遷太子少保。 ` 進少師。 明年,以太子太傅留守 又河南少尹呂述言:「僧孺聞 積

誅,恨歎之。」武宗怒,黜爲太子少保,分司東都,累貶循州長史。 宣宗立、徙衡、汝二州

爲太子少師。 卒,贈太尉,年六十九。 諡日文簡

諸子蔚、叢最顯。

「牛氏果有子,差尉人意。」出金州刺史,遷累吏部郎中。 蔚字大章,少擢兩經,又第進士,繇監察御史爲右補闕。 失權倖意,貶國子博士,分司東都。 大中初, 屢條切政, 宣宗喜日:

復以吏部召,兼史館修撰。

中人嫌其吝,用吳行魯代之。 南 咸通中, 西道節度使。 進至戶部侍郎, 襲奇章侯。 治梁三年,徐州盜起,神策兩中尉諷諸藩悉財助軍,蔚索府帛三萬以獻, 黃巢入京師, 遁山南, 故吏民喜蔚至, 爭迎候。 坐累冤, 未一歲,復官。 久之, 檢校兵部尚書、 因請老,以尙

山

子徽。

書右僕射致仕,卒。

徽舉進士,累擢吏部員外郎。 乾符中選濫,吏多姦,歲調四千員,徽治以剛明,柅杜干

請,法度復振。

親疾。 給事中,留陳倉。 身乞還營醫藥。」時兄循已位給事中,許之。父喪,客梁、漢。終喪,以中書舍人召,辭疾,改 拜曰:「人皆有父,今親老而疾,幸無駭驚。」盜感之,乃止。 孝子也 <u></u>蔚避地于梁,道病,徽與子扶籃輿,歷閣路,盜擊其首,血流面,持輿不息。 盜迫之,徽 會拜諫議大夫,固辭,見宰相杜讓能曰:「上遷幸當從, 」共舉興舍之家,進帛裹創,以饘飲奉蔚,留信宿去。 及前谷,又逢盜, 輒相語曰:「此 親有疾當侍, 抵梁,徽趨蜀謁行在,丐歸侍 而徽兄在朝廷,

爲藩屏,而又濟以兵,諸侯離心,必有後憂。」不肯起。 張濬伐太原,引爲判官,敕在所敦遣。 徽太息曰:「王室方復,廥藏殫耗,當協和諸侯以 濬果敗。 復召爲給事 中。

討 則 罪在不俟命爾。 ,徽諫曰:「岐,國西門。 軍有所畏。」帝曰:「然。」乃以招討使授茂貞,果有功,然益偃蹇,帝使宰相杜讓能將兵誅 茂貞亟請,帝召羣臣議,無敢言。徽曰:「王室多難,茂貞誠有功。 楊復恭叛山南,李茂貞請假招討節伐之,未報,而與王行瑜輒出兵。 臣聞兩鎭兵多殺傷,不早有所制,則梁、益之人盡矣。 茂貞憑其衆而暴,若令萬分一不利,屈威重奈何?願徐制之。」不 今復恭阻兵而討之, 請假以節, 明約束, 昭宗怒,持奏不

列

傳

第九

+

九

牛僧

爭 聽。 大臣,王室益弱。 `,所言者 師出 軍國大體,如案賊平之期,願陛下考蓍龜,責將帥,非臣職也。」旣而師果敗, 帝復召徽曰:「今伐茂貞, 彼衆烏合,取必萬全,卿計何日有捷? 對 日:「臣職諫 遂殺

部尚書致仕,歸樊川。 俄繇中書舍人爲刑部侍郎,襲奇章男。 卒,贈吏部尙書。 崔胤忌徽之正,換左散常侍,徙太子賓客,以刑

睦州 能 是擢臣,非嫌 舉職爲可, 刺 叢字表齡, 史, 帝勞曰:「卿非得怨宰相乎? 也。」卽賜金紫,謝曰:「臣今衣刺史所假緋,卽賜紫,爲越等。」乃賜銀緋 奚用衆耶?今張符、趙璘、牛叢使朕聞所未聞,三人足矣。」以司勳員 第進士,繇藩帥幕府任補闕,數言事。 會宰相請廣諫員,宣宗曰"「諫臣惟 對日:「陛下比 韶不由刺史縣令不任近臣, 人外郎為 宰相以

威通 末, 叢囚其使四十人,釋二人還之,蠻懼, 拜劍南 西川節度使。時蠻犯邊,抵 大渡,進略黎、雅,叩邛崍關,謾書求入朝,且 即引去。

僖宗幸蜀,授太常卿。 以病求爲巴州刺史,不許。 還京,爲吏部尙書。 嗣襄王亂 |叢客

死太原。

日假道。

部員外郎。 切時政,觸宰相,李吉甫惡之,補洛陽尉。久流落不偶,去從藩府辟署。 李宗閱字損之,鄭王元懿四世孫。 裴度伐蔡,引爲彰義觀察判官。 擢進士,調華州參軍事。 蔡平,遷駕部郎中,知制誥。 舉賢良方正, 入授監察御史、禮 穆宗即位,進中書 與牛僧孺詆

舍人。 時翻爲華州刺史,父子同拜,世以爲寵。

|徽納干丐,取士不以實,|宗閔坐貶|劍州刺史。 長慶初,錢徽典貢舉,宗閔託所親於徽,而李德裕、李紳、元稹在翰林, 由是嫌忌顯結,樹黨相磨軋,凡四十年,搢紳 有寵於帝, 共白

之禍不能

解。

以相,而宗閔中助多,先得進,卽引僧孺同秉政,相唱和,去異己者,德裕所善皆逐之。遷中 初,累進兵部侍郎,父喪解。大和中,以吏部侍郎同中書門下平章事。 俄復爲中書舍人,典貢舉,所取多知名士,若唐沖、薛庠、袁都等,世謂之「玉筍」。寶曆 時德裕自浙西召,欲

書侍郎。

日:「衆以楊虞卿、張元夫、蕭澣爲黨魁。」德裕因請皆出爲刺史,帝然之。即以虞卿爲常州 「今中朝半爲黨人,雖後來者,趍利而靡,往往陷之。 陛下能用中立無私者,黨與破矣。」帝 久之,德裕爲相,與宗閔共當國。 德裕入謝,文宗曰:「而知朝廷有朋黨乎?」德裕曰:

列傳

第九十九

李宗閔

中非美官云何?」宗閱大沮,不得對。俄以同平章事爲山南 黨人不如臣之詳。 元夫為汝州 蕭澣爲鄭州。 虞卿日見賓客於第,世號行中書,故臣未嘗與美官。」德裕質之曰:「給事 宗閔曰:「虞卿位給事中,州不容在元夫下。 西道節度使。 德裕居 外久, 其知

踐 肆附託。 章元素王踐言等求宰相,且言:「頃上有疾,密問術家呂華, 卽 流 嶺 言監 出爲明州刺史,貶處州長史。 南,親信並斥。 李訓、鄭注始用事,疾德裕,共訾短之。乃罷德裕,復召宗閔知政事,進封襄武縣侯 軍劍南,受德裕財,復與宗閔交私。」乃貶宗閔潮州司戶參軍事,曦逐柳州, 會處卿以京兆尹得罪,極言營解,帝怒叱曰:「爾嘗以鄭覃爲妖氣,今自爲妖耶?」 訓、注乃劾宗閔異時陰結駙馬都尉沈礒、內人宋若憲、宦者 ,迎考命曆,曰:『惡十二月。』而 元素等悉

帝 乃韶宗閔、德裕姻家門生故吏,自今一切不問,所以慰安中外。嘗歎曰:「去河北賊易,去 畤 訓、 注欲以權市天下,凡不附己者,皆指以二人黨,逐去之。人人駭栗,連月雾晦。

此

朋

黨

難

善; 欲復用, 陛下徙令少近則可,若再用,臣請前免。」陳夷行曰:「宗閔之罪,不卽死爲幸。 開 成 初, 幽州 而畏鄭覃, 刺史元忠、河陽李載義累表論洗,乃徙爲衢州 乃托官 人諷 帝。 帝因紫宸對覃日:「朕念宗閔 司馬。 久斥, 楊嗣復輔政,與宗閔 應授一官。」覃

覃曰:「比殷侑爲韓益求官,臣以其昔坐贓,不許。 黨宗閔者,彼其惡似李林甫。」嗣復曰:「覃言過矣,林甫妬賢忌功, 鄭注,階其禍,幾覆國。」嗣復曰:「陛下向欲官鄭注,而宗閥不奉詔, 「事當適宜,不可以懀愛奪。」帝曰:「州刺史可乎? 不可不任以官。」夷行曰:「不然,舜逐四凶天下治, |李續、張又新等號『八關十六子』,朋比險妄,朝廷幾危。,|李珏曰:「此李逢吉罪。 始,宗閔與德裕俱得罪,德裕再徙鎮,而宗閔故在貶地。 遷太子賓客,分司東都。 **覃託臣勿論**,是豈不爲黨乎? 朝廷何惜數憸人,使亂紀綱? 」覃請授洪州別駕。 **夫懲勸宜** 尚當記之。」覃日:「嗣 夷滅十餘族, 夷行曰:「宗閔始庇 ,不可謂 今續 」途權宗閔 宗閔 」嗣復日: 黨。」因 喪闋 固 復 無

德裕建言宗閔素厚從諫,今上黨近東都, 史,流封州。 而覃、夷行去位, 宣宗卽位,徙郴州司馬,卒。 嗣復謀引宗閱復輔政,未及而文宗崩。 乃拜宗閔湖州 刺史。 **植敗**,得交通狀,貶漳州長 會昌中, 劉稹以澤路叛,

杭州

刺

史。

旣

宗閱遂與爲怨。 宗閔性機警, 韓愈爲作兩山、猛虎行視之。 始有當世令名, 旣寖貴, 喜權勢。 而宗閔崇私黨,熏熾中外,卒以是敗 初爲裴度引拔,後度薦德裕可爲相

使。不善禦軍,爲士卒所逐,貶死 子|琨、 瓚, 皆擢進士。 令狐綯作相, 而瓚以知制誥歷翰林學士。 **綯罷**,亦爲桂管觀察

宗閱弟宗冉,其子陽,累官京兆尹,黃巢陷長安,殺之。

之慶也。」因字日慶門。 矣,後貴且壽無若生者,有子必位宰相。」旣而生嗣復,滉撫其頂曰:「名與位皆踰其父,楊氏 |於陵爲戶部侍郎,|嗣復避同省,換它官,有詔:「同司,親大功以上,非聯判句檢官長,皆勿 知,表署劍南幕府。進右拾遺,直史館。尤善禮家學,改太常博士,再遷禮部員外郎。時 官同職異,雖父子兄弟無嫌。」遷累中書舍人。 楊嗣復字繼之。父於陵,始見識於浙西觀察使韓滉,妻以其女,歸謂妻曰:「吾閱人多 八歲知屬文,後擢進士、博學宏辭,與裴度、柳公綽皆爲武元衡所

二期 ,得士六十八人,多顯宦。<u>文宗嗣位,進</u>戶部侍郎。 嗣復與牛僧孺、李宗閔雅相善,二人輔政,引之,然不欲越父當國,故權知禮部侍郎。凡 大和中,宗閱罷,嗣復出爲劍南東川節度使。 宗閔復相,徙西川 於陵老,求侍不許。 喪除, 擢尚書

縣伯 曰:「士多趍競,能獎胯,貪夫廉矣。 開 ,仍領鹽鐵。 成初,以戶部侍郎召,領諸道鹽鐵轉運使。 後紫宸奏事,嗣復爲帝言:「陸洿屛居民間,而上書論兵,可勸以官。」珏和 比竇洵直以論事見賞,天下釋然,況官灣耶!」帝曰: 俄與李珏並 拜同中書門下平章事,弘農

在。」珏乃陳邊事,欲絕其語。『曰:「論邊事安危,臣不如珏;嫉朋比,珏不如臣。」嗣復曰: 少弭。」覃曰:「附離復生。」帝曰:「向所謂黨與不已盡乎?」。覃曰:「楊漢公、張又新、李續故 日:「陛下當祭朋黨。」嗣復日:「覃疑臣黨,臣應免。」即再拜祈罷。 珏見言切,繆曰:「朋黨固 「朕賞洵直,褒其心爾。」鄭覃不平曰:「彼苞藏固未易知。」嗣復曰:「洵直無邪,臣知之。」覃 進賢退不肖,以朋黨獲譏,非所以重朝廷。」固乞罷,帝方委以政,故尉安之。 「臣聞左右佩劍,彼此相笑,未知覃果謂誰爲朋黨邪?」因當香桉頓首曰:「臣位宰相,不能

帝曰:「然。」又問:「天后時有起布衣爲宰相者,果可用乎?」嗣復曰:「天后重用刑,輕用官, 其書蔓天下。 自爲之計耳。必責能否,要待歷試乃可。」 它日,帝問:「符讖可信乎?何從而生?」嗣復曰:「漢光武以讖決事,隋文帝亦喜之,故 班彪王命論有所引述,特以止賊亂,非重之也。」珏曰:「治亂宜直推人事耳。」

錄,月付史官。」它宰相議不同,止。 久之,帝又問:「延英政事,孰當記之?」」珏監修國史,對 姚璹、趙璟皆請置時政記,不能行。 此也。」压曰:「夷行疑宰相賣威權,貨刑賞。不然,何自居位而爲此言邪?臣得罷爲幸。」覃 曰:「臣之職也。」陳夷行曰:「宰相所錄,恐掩蔽聖德, 是時延英訪對,史官不及知。 嗣復建言:「故事,正衙,起居注在前;便坐,無所紀錄。 臣請延英對宰相語關道德刑政者,委中書門下直日紀 自盜美名。 臣向言不欲威權在下者,

傳第九十九

楊嗣復

謝 李珏 臣當死,累陛下之德,奈何?惟陛下別求賢以自輔。」帝曰:「覃偶及之,奚執咎?」嗣復闔門 嗣復日:「陛下月費俸禀數十萬,時新異賜必先及,將責臣輔聖功,求至治也。 不肯起,帝乃冤覃、夷行相,而嗣復專天下事 卽 叫 臣愚不 頭 同進。 陛下開成 、請從此辭,不敢更至中書, 乃趍出。 臣不能悉心奉職,使政 知忌諱,近事雖善,猶未盡公。 初政甚善,三年後,日不逮前。」嗣復日:「開成初,覃、夷行當國,三年後,臣與 (事日不逮前, 臣之罪也。 帝使使者召還,曰:「覃言失,何及 臣非專斥嗣復, 縱陛下不忍加誅,當自殄滅。」 而遽求去,乃不使臣言耳。」 使不及初,豈 此邪?」覃起

粃滓者,菁華乃出。」帝曰:「昔」蕭復秉政,難言者必言,卿其志之!」 進門下侍郞。建言:「使府官屬多,宜省。」帝曰:「無反滯才乎?」對曰:「才者自異,汰去

**」班等各有附會,若珏、季稜屬陳王,猶是先帝意。** 徐思其宜,使天下知盛德有所容,不欲人以爲冤。」帝曰:「朕纘嗣之際,宰相何嘗比數! 用 嗣復、珏, 李德裕, 而罷 未幾,帝崩,中尉仇士良廢遺詔,立武宗。帝之立,非宰相意,故內薄執政臣,不加禮,自 ,大臣非惡狀明白,未有誅死者。昔太宗、玄宗、德宗三帝,皆嘗用重刑,後無不悔 不利於陛下。 嗣復爲吏部尙書,出爲湖南觀察使。 帝剛急,即詔中使分道誅嗣復等,德裕與崔鄲、崔珙等詣延英言: 如嗣復、弘逸屬安王,乃內爲楊妃謀。 會誅薛季稜、劉弘逸,中人多言嘗附 頭 且 且

得通其謀。 其所詒書曰:『姑何不斅天后? 禁中證左尤具,我不欲暴于外。 』」德裕曰:「飛語難辨。」帝曰:「妃昔有疾,先帝許其弟入侍, 使安王立、肯容我耶?」言畢戚然,乃曰:「爲卿

赦之!」因追使者還,貶嗣復潮州刺史。

宣宗立,起爲江州 刺史。以吏部尚書召, 道岳州卒,年六十六,赠尚書左僕射, 諡

孝穆。

兩序。 嗣復領貢舉時,於陵自洛入朝,乃率門生出迎, 始於陵在考功, 擢浙東觀察使李師稷及第, 置酒第中,於陵坐堂上,嗣復與諸 時亦在焉。 人謂楊氏上下門生, 生坐 世以

爲美。

嗣復五子,其顯者:授、損。

授 字得符,於昆弟最賢。 由進士第遷累戶部侍郎,以母病求爲祕書監 後以刑部尚書

從昭宗幸華,徙太子少保,卒,贈尚書左僕射。

朱全忠入京師,煚挈族客湖南。 子煛, 字公隱,累擢左拾遺。 終諫議大夫。 昭宗 初立, 數遊宴,上疏極諫。 歷戶部員外郎。 崔胤招

陝虢 以廣第。損族仕者十餘人,議曰:「家世盛衰,繁權者喜怒,不可拒。」損曰:「今尺寸土皆先 舊貲,非吾等所有, 軍亂 三遷絳州刺史。 損 字子默,繇蔭補藍田尉,至殿中侍御史。家新昌里,與路巖第接。巖方爲相, ,逐觀察使崔薨,命損代之,至則盡誅有罪者。 安可奉權臣邪?窮達, 巖罷去, 召爲給事中, 命也!」卒不與。 遷京兆尹。 拜平盧節度使,徙天平 與宰相盧攜雅 巖不悅, 使損按獄黔中, 宋叶, 復除給 未赴復留, 欲易其廏 事中。 踰

卒官下。

給, 私 固無足言。 に昵黨 贊曰:夫口道先王語,行如市人,其名曰「盜儒」。 僧孺、宗閔以方正敢言進,旣當國,反 ,排擊所憎,是時權震天下,人指曰「牛<u>李」,非盜謂何</u>? 幸主孱昏,不底於戮,治世之罪人歟! 逢吉險邪,稹浮躁,嗣復辯

校勘記

- 父顔 按本書卷七二上宰相世系表及舊書卷一六七季逢吉傳均謂逢吉父名歸期,祖名顧。

# 唐書卷一百七十五

#### 列傳第一百

竇羣 常 牟 鞏 劉栖楚 張又新 楊虞卿 漢公 汝士 張宿

#### 熊望 柏耆

篇。 獨羣以處士客隱毗陵。 始自草茅擢臣爲拾遺, 爲左拾遺。 蘇州刺史韋夏卿薦之朝,幷表其書,報聞,不召。 竇羣字丹列,京兆金城人。父叔向,以詩自名,代宗時,位左拾遺。 時張薦持節使吐蕃,乃遷羣侍御史,爲薦判官。入見帝曰:「陛下卽位二十年, 母卒,齧一指置棺中,廬墓次終喪。從盧庇傳啖助春秋學,著書數十 何其難也?以二十年難進之臣爲和蕃判官,一何易?」帝壯其言, 後夏卿入爲京兆尹,復言之,德宗擢 羣兄弟皆擢進士第,

王叔文黨盛,雅不喜羣,羣亦悻悻不肯附。 列 傳 第 百 躛 翠. 欲逐之,章執誼不可, 五二四三 乃止。 **羣往見叔文** 

不遣。

傍,江南一吏耳。今君又處實之勢,豈不思路傍復有如君者乎?」叔文悚然,亦卒不用。 日:「事有不可知者。」叔文曰:「奈何?」曰:「去年李實伐恩恃權,震赫中外, 君此時逡巡路

谿洞羣蠻築作,因是羣蠻亂,貶開州刺史。稍遷容管經略使。召還,卒于行,年五十五,贈 登,得其情,大怒,將誅羣,吉甫爲救解,乃免,出爲湖南觀察使。改黔中。會水壞城郛,調 羣謂失恩,因擠之。 陳登者,善術,夜過吉甫家,羣即捕登掠考,上言吉甫陰事。 **羣引呂温、羊士諤爲御史,吉甫以二人躁險,持不下。羣忮很,反怨吉甫。** 奇之,表以自副。 憲宗立,轉膳部員外郎,兼侍御史知雜事。 武元衡、李吉甫皆所厚善,故召拜吏部郎中。 出爲唐州刺史。節度使于頗聞其名,與語, 元衡輔政, 薦羣代爲中丞。 吉甫節度淮南, 憲宗面覆

兄常、牟,弟庠、鞏,皆爲郎,工詞章,爲聯珠集行於時,義取昆弟若五星然。 |羣很自用,果於復怨。 始召,將大任之,衆皆懼,及聞其死,乃安。 左散騎常侍。

其才,奏辟不應。杜佑鎭淮南,署爲參謀。歷朗變江撫四州刺史、國子祭酒,致仕。卒,贈越州 常字中行,大曆中及進士第,不肯調,客廣陵,多所論著,隱居二十年。鎭州王武俊聞

都督。

牟字貽周,累佐節度府。 晚從昭義盧從史, 從史蹇驕, 牟度不可諫, 即移疾歸東都

從史敗,不以覺微避去自賢。位國子司業。

庠字胄卿,終婺州刺史。

器 字友封、雅裕、有名于時。 平居與人言若不出口,世號「囁嚅翁」。 元稹節度武昌,奏

|鞏自副,卒。

未幾,惡德流布,恐福祚之不長也。 鼓吹之聲日聞諸朝。 世王者初嗣位,皆親庶政、坐以待旦。陛下新即位,安臥寢內,日晏乃作。 逢吉之罷裝度、逐李紳、皆嗾而爲奸者。 劉栖楚,其出寒鄙。爲鎭州小史,王承宗奇之,薦於李逢吉,繇鄧州司倉參軍擢右拾遺。 且憲宗及先帝皆長君,朝夕恪勤,四方猶有叛者。 臣以諫爲官,使陛下負天下譏,請碎首以謝。」遂額叩龍 敬宗立、視朝常晏、數游畋失德。 陛下以少主,踐祚 栖楚諫曰:「惟前 大行殯宮密邇,

列傳第

百

劉栖楚

張又

新

爭者 聽臣言,臣請死于此。」有詔尉喻,乃出。遷起居郞,辭疾歸洛。 墀 ·,血被面。 在邪?」以諫議大夫召。未幾,宣授刑部侍郎。 李逢吉傳詔:「毋叩頭,待詔旨。」栖楚捧首立,帝動容,揚袂使去。 故事,侍郎無宣授者,逢吉喜助己,故 後諫官對延英,帝問:「向廷 栖楚日:「不

從旁譟曰:「癡男子,不記頭上尹邪?」 中,無敢捕。 數月,改京兆尹,峻誅罰,不避權豪。 栖楚一切窮治,不閱旬, 宿姦老蠹爲斂迹。 先是,諸惡少竄名北軍,凌藉衣冠,有罪則逃軍 一日,軍士乘醉有所凌突, 諸少年

不次任之。

辭, **韋處厚惡之,出爲桂管觀察使。** 然其性詭激,敢爲怪行,乘險抵巇,若無顧藉, 卒,贈左散騎常侍。 內實恃權怙寵以干進。 論宰相, 厲

用 事 ,惡<u>李</u>紳,冀得其罪,求中朝凶果敢言者厚之,以危中)神。 張又新字孔昭,工部侍郎薦之子。元和中,及進士高第,歷左右補闕。性傾邪。 又新與拾遺李續、劉栖楚等 李逢吉

爲逢吉搏吠所憎,故有「八關十六子」之目。

敬宗立,紳貶端州司馬,朝臣過宰相賀,閽者曰:「止,宰相方與補闕語,姑伺之。」及又新

出, 爲行軍司馬。 約,爲牙儈搜索陵突,御史劾舉,逢吉庇之,事不窮治。及逢吉罷,領山南東道節度,表又新 流汗揖百官曰:「端溪之事, 坐田伾事,貶汀州刺史。 竊不敢讓。」人皆辟易畏之。尋轉祠部員外郞。 李訓有寵,又新復見用,遷刑部郎中,爲申州刺史。 嘗買婢遷

訓死,復坐貶。 又新善文辭,再以諂附敗,喪其家聲云。 終左司郞中。

夏,與陽城爲莫逆交。德宗以諫議大夫召城,城未拜,詔寧卽論,與俱來。陝虢觀祭使李齊運 表置幕府。 楊虞卿字師皋,虢州弘農人。父寧,有高操,談辯可喜。 齊運入爲京兆尹,表奉先主簿,拜監察御史,坐累免。 擢明經,調臨渙主簿,棄官還 順宗初, 召爲殿中侍御

史,終國子祭酒。

嘗與游,悉所齎助之。 虞卿第進士、博學宏辭,爲校書郞。 擢累監察御史。 抵淮南,委婚幣焉,會陳商葬其先,貧不振,虞卿未

穆宗初立,逸游荒恣,虞卿上疏曰:「烏鳶遭害仁鳥逝,誹謗不誅良臣進。 臣聞堯、舜以天下爲憂,不以位爲樂。況今北虜方梗,西戎弗靖,兩河有瘡痏之虞

列 僔

第一

百

楊

虞 卿

臣敢冒誅獻

有所 息也。 作色荒,外作禽荒。 異,故不得皆爲聖明也。」時又有衡山布衣趙知微,亦上書指言帝倡優在側 若 詢。 宜 太尊、臣 臣情接 五 - 嶺罹氛厲之役。人之疾苦積下,朝之制度莫脩。 趨 周 利 爱顧逮,惠以氣色,使支體相成, 君臣昭明。 諫臣 聞。 而治道得矣。 陛下初臨萬幾,宜有憂天下心。 太卑故也。 論 盈廷,忠言不聞,臣實羞之。 而聽政六十日,八對延英,獨三數大臣承聖問 政 若 ·訴冤,此而不治,無有也。 辭頗危 公卿列位,雖陟降清地,曾未奉優睠、承下問。 今宰臣四五人"或頃刻侍坐,鞠躬隕越,隨旨上下,無能往來, 切, 帝韶宰相尉謝。 蓋主恩疏而正路塞也。 當日見輔臣公卿百 自古天子居危思安之心同,而居安慮危之心則 宰相因是賀天子納諫,然不能用也 陛下求治於宰相,宰相求治於臣等, 邊亡見儲, 门而已, 1執事 它內朝臣偕 國 公卿大臣宜朝夕燕見, , 用寖! 垂意 雖陛下神聖如 屈 以 問 固 入 使 未可以高枕而 馳騁無度, 、齊出 匹 方內 五帝 此 無所 外灼 進忠 絲 則君 內 君 猶

萬,亡命 僞 告, 俄 調官六十 詔行勞西北 私 奴受三十萬, 五員,贓千六百萬以上,虞卿發其姦 邊。 還,遷侍御史,改禮部員外郞,史館脩撰。 **虞卿縛奴送獄。** 三司嚴休復、 高釴、 章景休雜推, 進吏部。 而虞卿親吏嘗受二百 會曹史李竇等鬻 **置等皆誅死。** 

**虞卿坐不檢下冤官** 

李宗閔、牛僧孺輔政,引爲右司郎中、弘文館學士。 再遷給事中。 虞卿佞柔,善諧麗權

蘇景胤 幸, 可,三楊殺我。」宗閥待之尤厚,就黨中爲最能唱和者 倚 爲姦利。 張元夫,而虞卿兄弟汝士、漢公爲人所奔向,故語曰:「欲趣 歲舉選者 皆走門下, 署第注員, 無不得所欲, ,以口語軒輊事機 舉場 升沈在牙頰 ,問蘇、 ,故時號黨 間。 當時 魁。 蘇、 有 張

端 卽 注 倪 葯 李訓 帝治丹,剔小兒肝心用之。民相驚,扃護兒曹。 德裕之相,出爲常州刺史。宗閔復入,以工部侍郎召,遷京兆尹。大和九年,京師 知退、知權、壇、堪,漢公,皆擢進士第,漢公最顯。 帝 大怒,下虞卿韶獄。 奏言:「語出虞卿家, 於是諸子弟自囚闕下稱冤 因京兆騶伍布都下。」御史大夫李固言素嫉虞卿 帝不悅,注亦內不安,而雅與虞卿有怨, ,虞卿得釋,貶虔州司戶參軍,死 周比,因傅左 訛言鄭

子

荆 封 南 郞 節 # 漢公字用义。 度使,召爲 华 工部尚書。 下除 始辟興元 舒州 刺史, 李絳幕府, 或劾漢公治荆 徙湖、亳、蘇 絳死,不與其禍。 南 有貪 三州。 鰄 降秘 擢柱管、浙 遷累戶部郞中、史館脩撰, 書監 東觀 稍 察使。 遷 國子 祭酒 繇 芦 部侍 轉司 鄓 拜

卒行。 還 宣宗 制 會寒 書。 擢 食 帝它 爲 多近 同州 日 凡 刺 臣,帝自 門下 史。 論執 於是,給事 擊 |毬爲樂,巡勞從臣,見裔綽等日:「省中議無不從, 駁正 未嘗卻。 中鄭裔 綽、鄭 漢公素結 公 奧共奏漢公冒 左右, 有奧助。 綆 無廉槷, 至是, 不可 帝 唯漢公事 惠 處近 不 從,制

列

傳

第

百

楊

虞

卿

張

宿

五二五〇

有黨。」裔綽獨 下容可 舉劇部 [對:[] 私貪 人? 同 州 」帝恚見顔間。 太宗興王地, 陛下爲人子孫,當精擇守長付之,漢公旣以墨敗,陛 翌日,斥裔綽爲商州刺史。 漢公自 同州 更宣武、天平

子籌、範,仕亦顯。

兩節

度使,

卒。

汝士字慕巢。 時嗣復鎭西川, 中進士第,又擢宏辭。 乃族昆弟 牛、李待之善、引爲中書舍人。 ,對擁旄節,世榮其門。 終刑 部尚 開成 書。 初,繇兵部侍

郞 爲東川節度使。 子知温、 知至,悉以進士第入官。 知温終荆 南節 度使。 知至爲宰相劉瞻所 善 ,

以比部

郞 中 知制誥。 瞻得罪,亦貶瓊州 司馬,擢累戶 部侍郎。

楊 氏自汝士後,貴赫爲冠族。 所居靜恭里, 兄弟並列門戟。 咸通後,在臺省方鎭率十

餘人。

張宿者,本寒人,自名諸生。 憲宗爲廣陵王時,因張茂宗薦尉, 得出入邸中, 誕譎敢言。

及監撫,自布衣授左拾遺,交通權幸,四方路遺滿門。 數召對,不能愼密,坐漏禁中語,貶梆

丞十餘年。

復遣宿往,暴卒于道,贈祕書監。 皇甫鎛相附離,多中傷正人君子。元和末,持節至淄青,李師道願割地遣子入侍。 以寵,適以累之也。」請授它官,不聽,使中人宣授焉。宿怨執政不與己,乃日肆讒惎,與 議大夫,前世或自山林、擢行伍任之者,然皆道義卓異於時。今宿望輕,若待以不次,未足 必用之,請先去臣乃可。」帝不悅。後逢吉罷,詔權知諫議大夫,宰相崔羣、王涯同議曰:「諫 帝欲以爲諫議大夫,逢吉曰:「諫議職要重,當待賢者。 累遷比部員外郎。 宰相李逢吉數言其狡譎不可信,白爲濠州刺史,宿上疏自言,留不 宿細人,不可使汙是官。 旣而悔,

未及用、帝崩。 戶參軍。 日出入門下,爲刺取事機,陰佐計畫。敬宗喜爲歌詩,議置東頭學士,以備燕狎。栖楚薦望, 熊望者,字原師,擢進士第。性險躁,以辯說游公卿間。 文宗立,韋處厚秉政,詔望因緣險薄,營密職,圖褻幸,讙沸衆議,貶漳州司 劉栖楚爲京兆尹,樹權勢,望

列

常山 拾遺,由是聲震一時。 爲言,乃以左拾遺往。 叛 柏 看者,有縱橫學。 ,朝廷厭兵,耆杖策詣淮西行營謁裴度,且言願得天子一節馳入鎭,可掉舌下之。 旣至,以大誼動承宗,至泣下。 遷起居舍人。 父良器,為時威名將。 耆志健而望高,急于立名。 乃請獻二州,以二子入質。 是時,王承宗以 眞擢 耆左 度

遺膚諭天子意,衆乃信悅。轉兵部郎中、諫議大夫。 王承元徙義成軍,遣諫議大夫鄭覃往慰成德軍,齊緡錢百萬。 賚未至,舉軍譁議,穆宗

若死,是耆殺之。」至是,積前怒,詔長流愛州,賜死。 遂斬其首以獻。 也,耆以三百騎馳入滄,以事誅洪,與同捷朝京師。旣行,諜言王廷凑欲以奇兵劫同捷, 沈亞之諭旨。會橫海節度使李祐平德州, 人馬國亮潛耆受同捷先所得王稷女及奴婢珍貲。初,酤聞耆殺洪,大驚,疾遂劇。帝曰:「酤 大和初, |李同捷反, 韶兩河諸鎭出兵, 久無功。乃授||詹州行營諸軍計會使, 諸將嫉耆功,比奏攢詆,文宗不獲已,貶耆循州司戶參軍、亞之南康尉。 同捷窮,請降,耐使大將萬洪代守滄州,同捷未出 與判

**構黨以植私,其言纚纚若可聽,卒而入于敗亂也。** 贊曰: 詩人斥譖人最甚, 投之豺虎、有北, 不置也。 |孔子所謂「順非而澤」者數,「利口覆邦 。如墨、栖楚輩則然, 肆訐以示公,

## 唐書卷一百七十六

### 列傳第一百一

**韓愈** 孟郊 張籍 皇甫湜 盧仝 賈島 劉义

韓愈字退之,鄧州南陽人。 七世祖茂,有功於後魏,封安定王。父仲卿,爲武昌令,有

美政,旣去,縣人刻石頌德。

終祕書郞。

字之。 拜河南令。 調 出,不四日,汴軍亂,乃去依武寧節度使張建封,建封辟府推官。 長,盡能通六經、百家學。 四門博士,遷監察御史。 愈生三歲而孤,隨伯兄會貶官嶺表。 改江陵法曹參軍。 遷職方員外郎。 **擢進士第。會董晉爲宣武節度使,表署觀察推官。** 元和初,權知國子博士,分司東都,三歲爲眞。改都官員外郎,即 上疏極論宮市,德宗怒,貶陽山令。 會卒,嫂鄭鞠之。 愈自知讀書,日記數千百言,比 有愛在民,民生子多以其姓 操行堅正,鯁言無所忌。 晉卒,愈從喪

列傳第

百

韓

Ŵ

之,按其獄 華陰令柳澗有罪,前刺史劾奏之,未報而刺史罷。 ,貶澗房州司馬。 愈過華,以爲刺史陰相黨,上疏治之。 澗諷百姓遮索軍頓役直,後刺史惡 既御史覆問,得澗臟,再

貶封溪尉。愈坐是復爲博士。旣才高數黜,官又下遷,乃作進學解以自諭日

隨。 方今聖賢相逢,治具畢張,拔去兇邪,登崇畯良。 占小善者率以錄 把羅剔抉,刮垢磨光。蓋有幸而獲選,孰云多而不揚。<br />
諸生業患不能精,無患有司 國子先生晨入太學,召諸生立館下,誨之曰:「業精于勤,荒于嬉; 行成于思,毁于 名一藝者無不

之不明;

行患不能成,無患有司之不公。」

旣倒。 老。 下迨莊騷,太史所錄,子雲相如,同工異曲。 姚姒,渾渾亡涯。 於六藝之文,手不停披於百家之編。 細大不捐。燒膏油以繼晷,常矻矻以窮年。 始 知學,勇於敢爲。長通於方,左右其宜。 補苴罅漏、張皇幽眇。 言 [未旣,有笑于列者曰:「先生欺予哉! 先生之於儒,可謂有勞矣。 周誥商盤,佶屈聱牙。 **尋墜緒之芒芒,獨旁搜而遠紹。** 沈浸醲郁,含英咀華。 記事者必提其要,纂言者必鉤其玄。 春秋謹嚴,左氏浮夸。 先生之於爲人,可謂成矣。 弟子事先生,于茲有年矣。先生口不絕吟 先生之於文,可謂閎其中而 先生之業,可謂勤矣。 作爲文章, 其書滿家。 停百川而 **易奇而法,詩正而葩。** 觝排異端, 東之, 然而公不見信 肆其外矣。 貪多務得, 回狂瀾於 攘斥佛 上規

治。 於人,私不見助於友。跋前躓後,動輒得咎。暫爲御史,遂竄南夷。三年博士,冗不見 命與仇謀,其敗幾時。 多**媛**而兒號寒,年豐而妻啼飢。 頭童齒豁,竟死何裨?不

知慮此,而反敎人爲!」

動而得謗,名亦隨之。 興; 量己之所稱,指前人之瑕疵,是所謂詰匠氏之不以杙爲楹,而訾醫師以昌陽引年,欲 而 雖 於世何 者 施以成室者,匠氏之工也。 無遺者,醫師之良也。登明選公,雜進巧拙,紆餘爲妍,卓犖爲傑,校短量長,唯器是適 脩 ,宰相之方也。昔者孟軻好辯,孔道以明; 轍環天下,卒老于行。 逃讒于楚,廢死蘭陵。 而 先 踵常塗之促促,窺陳編以盜竊。 不顯於衆。 如也?今先生學雖勤而不繇其統,言雖多而不要其中,文雖奇 生曰:「吁!子來前。 獨且月費俸錢,歲**靡**稟粟,子不 投閉置散, 乃分之宜。 是二儒者,吐詞爲經,舉足爲法,絕類離倫,優入聖域,其遇 玉札丹砂,赤箭青芝,牛溲馬勃,敗皷之皮,俱收並蓄,待用 夫大木爲杗,細木爲桷,欂櫨侏儒,椳闐扂楔,各得其宜, 然而聖主不 若夫商財賄之有無,計班資之崇庫,忘 加誅 知耕,婦不知織; ,宰臣不見斥。 荀卿宗王,大倫以 乘馬從徒,安坐 而不濟於用,行 茲非其幸歟?

執政覽之,奇其才,改比部郞中、史館脩撰。 列 傳 第一百 韓 愈 轉考功,知制誥,進中書舍人。

進其豨苓也。」

初 憲宗將平察,命御史中丞襲度使諸軍按視。及還,且言賊可滅,與宰相議不合。 愈

#### 亦奏言:

端,小遇水旱,百姓愁苦。方此時,人人異議以惑陛下,陛下持之不堅,半塗而罷,傷威 之師不在速戰,兵多而戰不速則所費必廣。 損 力,其敗可立而待也。 其後,得不償費。 、費,爲弊必深。 必自委頓。 准西連年脩器械防守,金帛糧畜耗於給賞,執兵之卒四向侵掠,農夫織婦餉於 當其已衰,三尺童子可制其命。況以三州殘弊困劇之餘而當天下全 所要先決於心,詳度本末,事至不惑,乃可圖 比聞畜馬皆上槽櫪,此譬有十夫之力,自朝抵夕,跳躍叫呼,勢不支 然未可知者,在陛下斷與不斷耳。夫兵不多不足以取勝,必勝 疆埸之上,日相攻劫,近賊州縣,賦役百 功。

先入汴,說韓弘使叶力。元濟平,遷刑部侍郎 囂暴,由是改太子右庶子。及度以宰相節度彰義軍,宣慰淮西,奏愈行軍司馬。 功」。執政不喜。會有人詆愈在江陵時爲裴均所厚,均子鍔素無狀,愈爲文章,字命鍔,謗語 又言:「諸道兵羇旅單弱不足用,而界賊州縣,百姓習戰鬭, 一切可用。」又欲「四道置兵,道率三萬,畜力伺利,一日俱縱,則蔡首尾不救, 知賊深淺,若募以內軍,敎不三 愈請乘遽 可以責

憲宗遣使者往鳳翔迎佛骨入禁中,三日,乃送佛祠。

王公士人奔走膜唄, 至爲夷法灼

體膚,委珍貝,騰沓係路。 愈聞惡之,乃上表曰:

牢,晝日一食,止於菜果,後爲侯景所逼,餓死臺城,國亦尋滅。事佛求福,乃更得禍。 下,事佛漸謹,年代尤促。唯梁武帝在位四十八年,前後三捨身施佛,宗廟祭不用牲 時始有佛法,明帝在位纔十八年。其後亂亡相繼,運祚不長。宋、齊、梁、陳、元魏以 武王年九十三歲,穆王在位百年。此時佛法亦未至中國,非因事佛而致然也。 年,年百五歲;完在位九十八年,年百一十八歲;帝舜在位及禹年皆百歲。此時天下 太平,百姓安樂壽考,然而中國未有佛也。其後,陽亦年百歲,陽孫太戊在位七十五 由 百一十歲;少昊在位八十年,年百歲;顓頊在位七十九年,年九十歲;帝嚳在位七十 一此觀之,佛不足信,亦可知矣。 武丁在位五十年,書史不言其壽,推其年數,蓋不減百歲。周文王年九十七歲, 佛者、夷狄之一法耳。 自後漢時始入中國,上古未嘗有也。 昔黃帝在位百年, 年 漢明帝

年以來,未有倫比。即位之初,卽不許度人爲僧尼、道士,又不許別立寺觀。臣當時以 爲 闡 高祖 聖明,以救斯弊,其事遂止。臣常恨焉!伏惟睿聖文武皇帝陛下,神聖英武,數千百 高 之志,必行於陛下。 祖始受隋禪,則議除之。當時羣臣識見不遠,不能深究先王之道、古今之宜,推 今縱未能卽行,豈可恣之令盛也?今陛下令羣僧迎佛骨於

列

傳

第

百

韓愈

五二五九

遏,更歷諸寺,必有斷臂臠身以爲供養者。傷風敗俗,傳笑四方,非細事也。 佛、皆云:「天子大聖,猶一心信向,百姓微賤,於佛豈合更惜身命?」以至灼頂燔指,十 崇奉以祈福祥也。直以豐年之樂,徇人之心,爲京都士庶設詭異之觀、戲玩之具耳。安 百爲羣,解衣散錢,自朝至暮,轉相放效,唯恐後時,老幼奔波,棄其生業。 有聖明若此,而肯信此等事哉?然百姓愚冥,易惑難曉,苟見陛下如此,將謂眞心信 鳳翔,御樓以觀,舁入大內,又令諸寺遞加供養。臣雖至愚,必知陛下不惑於佛,作此 若不卽加禁

下之疑,絕前代之惑,使天下之人知大聖人之所作爲出於尋常萬萬也。佛如有靈,能 不用,羣臣不言其非,御史不舉其失,臣實恥之。乞以此骨付之水火,永絕根本,斷天 令巫祝先以桃茢祓除不祥,然後進弔。今無故取朽穢之物,親臨觀之,巫祝不先,桃茢 朽之骨,凶穢之餘,豈宜以入宮禁?孔子曰:「敬鬼神而遠之。」古之諸侯弔於其國,必 過宣政一見,禮賓一設,賜衣一襲,衞而出之於境,不令貳於衆也。況其身死已久,枯 服,不知君臣之義、父子之情。假如其身尚在,奉其國命來朝京師,陛下容而接之,不 作禍祟,凡有殃咎,宜加臣身。上天鑒臨,臣不怨悔 佛本夷狄之人,與中國言語不通,衣服殊製,口不道先王之法言,身不服先王之法

表入,帝大怒,持示宰相,將抵以死。。裴度、崔羣曰:「愈言訐牾,罪之誠宜。然非內懷至忠,

天子咸夭促,言何乖剌邪?愈,人臣,狂妄敢爾,固不可赦。」於是中外駭懼,雖戚里諸貴,亦 安能及此?願少寬假,以來諫爭。」帝曰:「愈言我奉佛太過,猶可容,至謂東漢奉佛以後,

爲愈言,乃貶潮州刺史。

既至潮,以表哀謝日:

愚忠,恕臣狂直,謂言雖可罪,心亦無它,特屈刑章,以臣爲潮州刺史,旣免刑誅,又獲 臣以狂妄戆愚,不識禮度,陳佛骨事,言涉不恭,正名定罪,萬死莫塞。 陛下哀臣

豫食,聖恩寬大,天地莫量,破腦刳心,豈足爲謝!

之地,與魑魅同羣,苟非陛下哀而念之,誰肯爲臣言者? 測。 久長。加以罪犯至重,所處遠惡,憂惶慚悸,死亡無日。單立一身,朝無親黨,居蠻夷 州南近界,漲海連天,毒霧瘴氣,日夕發作。臣少多病,年纔五十,髮白齒落,理不 臣所領州,在廣府極東,過海口,下惡水,濤瀧壯猛,難計期程,颶風鱷魚,患禍不

策而無愧 薦之郊廟,紀太山之封,鏤白玉之牒,鋪張對天之宏休,揚厲無前之偉蹟,編於詩、書之 臣於當時之文,亦未有過人者。至於論述陛下功德,與詩、書相表裏,作爲歌詩, 臣受性愚陋,人事多所不通,維酷好學問文章,未嘗一日暫廢,實爲時輩所見推 了,措於天地之間而無虧,雖使古人復生,臣未肯**讓**。

以祖 迫,會不得奏薄伎於從官之內、隸御之間,窮思畢精,以贖前過。 當此之際,所謂千載一時不可逢之嘉會,而臣負罪嬰釁,自拘海島,戚戚嗟嗟,日與死 位以來, 政治少懈,文致未優,武剋不剛,孽臣奸隸,蠹居棋處,搖毒自防,外順內悖,父死子代, 伏惟陛下天地父母哀而憐之。 宜定樂章,以告神明,東巡泰山,奏功皇天,具著顯庸,明示得意,使永永年服我成烈。 以孫,如古諸侯,自擅其地,不朝不貢,六七十年。四聖傳序,以至陛下。 伏以皇唐受命有天下,四海之內,莫不臣妾,南北東西,地各萬里。 自天寶以後, 躬親聽斷,旋乾轉坤,關機闔開,雷厲風飛,日月淸照,天戈所麾,無不從順。 懷痛窮天,死不閉目, 陛下即

耳。」皇甫鎛素忌愈直,即奏言:「愈終狂疏,可且內移。」乃改袁州刺史。 帝得表,頗感悔,欲復用之,持示宰相曰:「愈前所論是天愛股,然不當言天子事佛乃年促

之,令其屬秦濟以一羊一豚投谿水而祝之曰: 初,愈至潮,問民疾苦,皆曰:「惡溪有鱷魚,食民畜產且盡,民以是窮。」數日,愈自往視

及德薄,不能遠有,則江、漢之間尙皆棄之以與蠻夷楚、越,況湖、嶺之間去京師萬 昔先王旣有天下, 迾山澤, 罔繩擉刃以除蟲蛇惡物爲民物害者, 驅而出之四海之

里哉?鱷魚之涵淹卵育於此,亦固其所。

首下心,伈伈睍睍,爲吏民羞,以偷活於此也?承天子命來爲吏,固其勢不得不與鱷魚 熊豕鹿麞以肥其身,以種其子孫,與刺史拒爭爲長雄。 刺史雜處此土也。刺史受天子命,守此土,治此民,而鱷魚睅然不安溪潭,據處食民畜 之近地,刺史縣令之所治,出貢賦以供天地、宗廟、百神之祀之壤者哉?鱷魚其不可與 鰮魚有知,其聽刺史。 今天子嗣唐位,神聖慈武,四海之外,六合之內,皆撫而有之,況禹跡所揜, 刺史雖駑弱,亦安肯爲鱷魚低 揚州

至也。 之,與頑不 則 必 日 是鱷 盡殺乃止,其無悔 五. |潮之州,大海在其南,鯨鵬之大,蝦蟹之細,無不容歸,以生以食,鱷魚朝發而夕 魚冥頑不靈,刺史雖有言,不聞不知也。 日不能,至七日。 今與鱷魚約:「盡三日,其率醜類南徙于海,以避天子之命吏。 三日不能,至五 靈而爲民物害者,皆可殺。 七日不能,是終不肯徙也,是不有刺史、聽從其言也。 刺史則選材技民,操疆弓毒矢,以與鱷魚從事 夫傲天子之命吏,不聽其言,不徙以避 不然,

祝之夕,暴風震電起谿中,數日水盡涸,西徙六十里,自是潮無鱷 魚 患。

因與約,禁其爲隸。 袁 人以男女爲隸, 召拜國子祭酒,轉兵部侍郎。 過期不贖,則沒入之。愈至,悉計庸得贖所沒,歸之父母七百餘人。

列傳第一百一 韓愈

大鎭 者乎? 太師 亦悔 士前 之。」愈日:「若爾,則無事矣。」會元翼亦潰圍出,廷湊不追。 策六軍將如牛元翼者爲不乏,但朝廷顧大體,不可棄之。 矣,復何道? 者,乃此士卒也。」愈大聲曰:「天子以公爲有將帥材,故賜以節,豈意同賊反邪?」語未終, 此 也 奮 鎭州 , 韶愈度事從宜,無必入。愈至, 廷湊嚴兵迓之, 甲士陳廷。 」衆曰:「無。」愈曰:「田公以魏、博六州歸朝廷,官中書令,父子受旗節,劉悟、李祐皆 ,若猶記之, 曰::「先太師爲國擊朱滔,血衣猶在,此軍何負,乃以爲賊乎?」愈曰::「以爲爾不記先 爾軍所共聞也。」衆曰:「弘正刻,故此軍不安。」愈曰:「然爾曹亦害田公,又殘其家 亂,殺田弘正而立王廷凑,詔愈宣撫。旣行,衆皆危之。 」衆讙曰:「善。」廷凑慮衆變,疾麾使去。因曰:「今欲廷湊何所爲?」愈曰:「神 固善。 天寶以來,安祿山、史思明、李希烈等有子若孫在乎?亦有居官 公久圍之,何也?」廷凑曰:「卽出 愈歸奏其語,帝大悅。 元稹言:「韓愈可惜。」穆宗 旣坐,廷湊曰:「所以紛紛 轉吏部

出紳江西觀察使。 神果劾奏愈,愈以詔自解。 時 宰相李逢吉惡李紳,欲逐之,遂以愈爲京兆尹、兼御史大夫,特韶不臺參,而除紳中 紳見帝,得留, 其後文刺紛然,宰相以臺、府不協, 愈亦復爲吏部侍郎。 長慶四年卒,年五十七, **塗罷** 愈爲兵部侍郎,而 贈禮部尚

侍郎。

書,諡日文。

餘慶鎭興元,奏爲參謀。卒,年六十四。 詩,而曹務多廢。 得進士第,調溧陽尉。 云。至它文造端置辭,要爲不襲蹈前人者。然惟愈爲之,沛然若有餘,至其徒李翺、李漢、 立,成一家言。其原道、原性、師說等數十篇,皆奧衍閎深,與孟軻、楊雄相表裏而佐佑六經 期以報。 門弟子」,愈官顯,稍謝遣。凡內外親若交友無後者,爲嫁遣孤女而衈其家。 皇甫湜從而效之,遽不及遠甚。從愈游者,若孟郊、張籍,亦皆自名於時。 郊爲詩有理致,最爲愈所稱,然思苦奇澀。 孟郊者,字東野,湖州武康人。少隱嵩山,性介,少諧合。愈一見爲忘形交。年五十, 每言文章自漢司馬相如、太史公、劉向、楊雄後,作者不世出,故愈深探本元,卓然樹 愈性明銳,不詭隨。 與人交,終始不少變。 令白府,以假尉代之,分其半奉。鄭餘慶爲東都留守,署水陸轉運判官。 縣有投金獺、平陵城,林薄蒙翳,下有積水。 張籍諡曰貞曜先生 成就後進士,往往知名。經愈指授,皆稱「韓 李觀亦論其詩曰:「高處在古無上, 平處下 |郊閒往坐水旁, 裴回賦 嫂鄭喪,爲服

博士。歷水部員外郎、主客郎中。當時有名士皆與游,而愈賢重之。籍性狷直,嘗賣愈喜博 簺及爲駁雜之說,論議好勝人,其排釋老不能著書若孟軻、楊雄以垂世者。 愈最後答書曰: 張籍者,字文昌,和州烏江人。第進士,爲太常寺太祝。久次,遷祕書郞。 愈薦爲國子

哉 ? 可以至於道者,浚其源,道其所歸,溉其根,將食其實。此盛德之所辭讓,況於愈者 抑其中有宜復者,故不可遂已。 吾子不以愈無似,意欲推之納諸聖賢之域,拂其邪心,增其所未高。 謂愈之質有

嚮使獨言之而獨書之,其存也可冀乎?今夫二氏行乎中土也,蓋六百年有餘矣。 必多矣,必且以我爲狂爲惑。其身之不能恤,書於何有? 夫子,聖人也,而曰:「自吾得 其書出焉。 皆在,及乎夫子未久也,自夫子而至乎孟子未久也,自孟子而至乎楊雄亦未久也。然 根固,其流波漫,非所以朝令而夕禁也。 子路,而惡聲不入於耳。」其餘輔而相者周天下,猶且絕糧於陳,畏於匡,毀於叔孫,奔 昌言排之哉?擇其可語者誨之,猶時與吾悖,其聲曉曉。 走於齊、魯、宋、衞之郊。其道雖尊,其窮亦至矣。 昔者聖人之作養秋也,既深其文辭矣,然猶不敢公傳道之,口授弟子,至於後世, 其所以慮患之道微也。今夫二氏之所宗而事之者,下及公卿輔相,吾豈敢 自文王沒,武王、周公、成、康相與守之,禮樂 賴其徒相與守之,卒有立於天下。 若遂成其書,則見而怒之者 其植

乎今,而行乎後世者也。今吾之得吾志、失吾志未可知,則俟五十、六十爲之,未失也。 遠,故余所以不敢也。 **猶其勤若此,其困若此,而后能有所立,吾豈可易而爲之哉?其爲也易,則其傳也不** 天不欲使茲人有知乎,則吾之命不可期;如使茲人有知乎,非我其誰哉!其行道,其 然觀古人,得其時,行其道,則無所爲書。爲書者,皆所爲不行

爲書,其化今,其傳後,必有在矣。吾子其何遽戚戚於吾所爲哉?

譏 **|籍爲詩,長於樂府,多警句。 仕終國子司業。** 避是名哉!夫子之言曰:「吾與回言終日,不違如愚。」則其與衆人辯也有矣。駁雜之 非好己之道勝也,己之道乃夫子、孟軻、楊雄之道。傳者若不勝,則無所爲道,吾豈敢 曰:「張而不弛,文武不爲也。」惡害於道哉?吾子其未之思乎? 了前書盡之,吾子其復之。 昔者夫子猶有所戲,詩不云乎:「善戲謔兮,不爲虐兮。」記 前書謂吾與人論不能下氣,若好勝者。雖誠有之,抑非好己勝也,好已之道勝也。

省,求分司東都。留守裴度辟爲判官。度修福先寺,將立碑,求文於白居易。提怒曰:「近 捨湜而遠取居易,請從此辭。」度謝之。 湜卽請斗酒,飮酣,援筆立就。 度贈以車馬繒綵甚 皇甫湜字持正,睦州新安人。擢進士第,爲陸渾尉,仕至工部郞中,辨急使酒,數忤同

列

傳第一百一

韓愈

唐

「不羇之才也。」從而酬之。

厚,混大怒曰:「自吾爲顧況集序,未常許人。 今碑字三千,字三縑,何遇我薄邪?」度笑曰:

提嘗爲蜂螫指,購小兒斂蜂,擣取其液。 日命其子錄詩,一字誤,詬躍呼杖,杖未至,

嚙其臂血流。 <u>盧</u>仝居東都,愈爲河南令,愛其詩,厚禮之。|仝自號玉川子,嘗爲月蝕詩以譏切元和

逆黨,愈稱其工。

時又有賈島、劉义,皆韓門弟子。

日見京兆尹, 愈憐之,因教其爲文,遂去浮屠,舉進士。 島字浪仙,范陽人,初爲浮屠,名无本。 跨驢不避,謼詰之,久乃得釋。 來東都,時洛陽令禁僧午後不得出,島爲詩自 當其苦吟,雖逢值公卿貴人,皆不之覺也。 累舉,不中第。 文宗時, 坐飛謗, 貶長江主

簿。 會昌初,以普州司倉參軍遷司戶,未受命卒,年六十五

劉义者,亦一節士。 少放肆爲俠行,因酒殺人亡命。 會赦, 出, 更折節讀書, 能爲歌

爭語不能下賓客,因持愈金數斤去,日:「此諛墓中人得耳,不若與劉君爲壽。」愈不能止,歸 詩,出盧仝、孟郊右。 然恃故時所負,不能俛仰貴人,常穿屐、破衣。 樊宗師見,爲獨拜。能面道人短長,其服義則又彌縫若親屬然。後以 聞愈接天下士,步歸之,作冰柱、雪車一

齊、魯,不知所終。

道蓋 況、雌爲不少矣。自愈沒,其言大行,學者仰之如泰山、北斗云。 論 儒 拒楊、墨,去孔子才二百年。 愈排二家,乃去千餘歲,撥衰反正,功與齊而力倍之,所以過 仁義,可謂篤道君子矣。自晉汔隋,老佛顯行,聖道不斷如帶。 文爲諸儒倡,障隄末流 也。 術 一自比孟 以興 愈獨喟然引聖,爭四海之惑,雖蒙訕笑,跲而復奮,始若未之信,卒大顯於時。 贊曰::唐興,承五代剖分,王政不綱,文弊質窮,蠅俚混井。天下已定,治荒剔蠢,討究 當其所得,粹然一出於正,刊落陳言,橫鶩別驅,汪洋大肆,要之無抵捂聖人者。其 (典憲 軻,以荀況、楊雄爲未淳,寧不信然?至進諫陳謀,排難卹孤,矯拂媮末,皇皇於 ,薰醲涵浸,殆百餘年,其後文章稍稍可述。至貞元、元和間,愈遂以六經之 ,反刓以樸,剗僞以眞。然愈之才,自視司馬遷、楊雄,至班固以下不 諸儒倚天下正議 昔孟 助爲怪 軻

列

# 唐書卷一百七十七

## 列傳第一百二

李虞仲 錢 徽 珝 李翱 崔咸 盧簡辭 章表微 知猷 高 釴 弘 止 湜 簡水 銖 鍇 汝酮 湘 高元裕 馮 宿 定 少逸 審

璩

封

敖

鄭薰

敬晦

韋

博

李景讓

景溫

衣絮, **亟**,徽請召池州刺史李遜署副使,遜至而衍死, 以 士于軍。 財貸饋,坐是得罪。 錢徽字蔚章。 士乃大悅。 澤卒,士頗希賞,周澈主留事,重擅發軍廥,不敢給。 又辟宣歙崔衍府。 父起, 觀察使獎澤視其簿,獨徽無有,乃表署掌書記。 附見盧綸傳。 王師討察, 徽中進士第,居穀城。 軍賴以安。 檄遣采石兵會戰,戍還,頗驕蹇。 時大雨雪,士寒凍,徽先多頒 穀城令王郢善接僑士游客, 察賊方熾 ,澤多募武 會衍病

入拜左補闕,以祠部員外郎爲翰林學士,三遷中書舍人,加承旨。 列 傳 第 百 錢 徽 憲宗嘗獨召徽,從容

使, 獻 右 言它學士皆高 庶子,出號州刺史。 見徽批監軍表語簡約, 面 至者 不甚却。 選,宜 預聞機密,廣參決,帝稱其長者。是時,內積財,圖復河湟 微懇諫罷 歎曰:「一字不可益邪 之。 帝密戒後 有獻毋 ! 一銜之。 入右銀臺門, 以論淮西事忤旨,罷 以 避 學士。 <sup>一,</sup>然禁無名貢 梁守謙 職,徙太子 爲 院

江 訪紳及元稹,時稹與宗閔有隙,因是共擠其非。 李宗閱壻,殷士者汝士之弟,皆與徽厚。文昌怒, 者憑子也, 州 刺 入 拜禮部侍郎。 汝士等勸徽出文昌、紳私書自直,徽曰:「苟無愧於心,安事辨證邪?」敕子弟 多納古帖秘畫於文昌, 宰相段文昌以所善楊渾之、學士李紳以周漢賓並諉黴求致第籍。 皆世所寶。 徽不能如二人請,自取楊殷士、蘇巢。 有詔王起、白居易覆試, 方帥劍南 西川, 入辭, 即奏徽 而 黜者過半 取土 一,遂貶 苡私。 巢者 渾之

租 眞 盜 君 宜 知天 初 州有 轉 州 下事 湖州 有盜劫貢船,捕吏取濱江惡少年二百人繫訊,徽按其枉,悉縱去。 :牛田錢百萬,刺史以給宴飮贈餉者,徽曰:「此農耕之備,可他用哉! ,徽江、虢之治 時宣、一數旱,左丞孔戣請徙徽領宣歙,宰相以其本文辭進,不用。 不及知,況其它邪? 」還,遷工部侍郎,出爲華州刺 數日 命 代貧民 舒州得

文宗立,召拜尚書左丞。 會宣墨麻,羣臣在廷,方大寒,稍稍引避,徽素恭謹,不去位,

久而仆。 因上疏告老,不許。 大和初,復爲華州。 俄以吏部尚書致仕。卒,年七十五, 贈尙

書右僕射。

卿, 遺徽錢二十萬,不納。 徽與薛正倫、魏弘簡善,二人前死,徽撫其孤至婚嫁成立。任庶子時,韓公武以賂結公 或言非當路可無讓,徽曰:「取之在義不在官。」時稱有公望。

知制誥,進中書舍人。 子可復、方義。 可復死鄭注時。 摶得罪, 珝貶撫州司馬。 方義終太子賓客,子翔,字瑞文,善文辭,宰相王摶薦

崔咸字重易,博州博平人。元和初,擢進士第,又中宏辭。 鄭餘慶、李夷簡皆表在幕

府,與均禮。 入朝爲侍御史,處正特立,風采動一時。

使京兆尹劉栖楚等十餘人悉力报却之, 栖楚曲意自解,附耳語。<br/>
咸嫉其矯,舉酒讓度曰:「丞相乃許所由官囁嚅耳語,願上罰爵。」 度 敬宗將幸東都,裴度在興元憂之,自表求觀,與章偕來。 雖度門下賓客,皆有去就意。 於是李逢吉當國,畏度復相, 它日,度置酒 延客,

笑受而飲。栖楚不自安,趨出,坐上莫不壯之。

列

第

百

崔

成

韋

微

累遷陝虢觀察使, 日與賓客僚屬痛飲,未嘗醒;夜分輒決事,裁剖精明,無一 毫差,吏

稱爲神。入拜右散騎常侍、祕書監。大和八年卒。

咸 素有高世志,造詣嶄遠。 間游終南山,乘月吟嘯,至感慨泣下。 諸文中歌詩最善。

韋 表微字子明, 隋郿城公元禮七世孫。 羈丱能屬文。 母訓諭稍厲,輒不敢食,以是未

嘗讓責。

人,不愧陶淵明」云。 也,人皆欲之,吾年五十,拭鏡譾白,冒游少年間,取一班一級,不見其味也。 自以不能及也。 章皐鎭西川 ,王緯、司空曙、獨孤良弼、裴浼居幕府,皆厚相推挹。 擢進士第,數辟諸使府。 久之, ,入授監察御史裏行,不樂,曰「爵祿譬滋味 洗嘗謂表微似衛玠, 將爲松菊主

中書舍人。 以 所善者,表微獨薦韋處厚, 諸 父事 俄爲翰林學士。 表微 敬宗嘗語左右,欲相二韋, ,因曰:「隋位崇,入且翁右,奈何? 是時,李紳忤宰相,貶端州,龐嚴、蔣防皆謫去,學士缺人,人爭薦丞相 人服其公。 會崩。 進知 制誥。 文宗立 」答曰:「選德進賢,初不計私也。」久之,遷 後與處厚議增選學士 ,獨相處厚,進表微戶部侍 ,復薦路隋。 息 處 厚

<u>丌志沼</u>叛,詔<u>李</u>聽率師討之,次河上。 天子憂無成功,表微曰:「以聽軍勢,不十五日必

表微上言:「逆子降,又殺之,非好生也。 破賊。」及捷書上,止狹日。 志沼殘兵六千奔昭義,宰相請推處首惡者誅之,歸脅從者于魏。 請以聽代史憲誠于魏,志沼之徒,可使招納。」不

聽。以病痼罷學士。卒,年六十,贈禮部尙書。

間然。 如聲樂賤工能尊其師,著九經師授譜詆其違。 始,被病,醫藥不能具,所居堂寢隘陋,旣沒,弔客咨嗟。篤故舊,雖庸下,與攜手語笑無 尤好<u>春秋</u>,病諸儒執一概,是非紛然,著三傳總例,完會經趣。 又以學者薄師道,不

末,以中人爲和糴使,針繼疏論執。 高釴字翹之,史失其何所人。 與弟銖、鍇俱擢進士第。 轉起居郞, 數陳政得失,穆宗嘉之,面賜緋、魚, 累遷右補闕、史館脩撰。 召入翰 元和

林爲學士。

擥以示憂勤,帝納其言,賜錦綵。 張韶變興倉卒,釴從敬宗夜駐左軍。 俄罷學 翌日,進知制誥,拜中書舍人。入見帝,因勸躬聽 累進吏部侍郎,人善其振職。 出爲同州刺史。

卒,贈兵部尙書,遺命薄葬。

釴 少孤窶, 介然無黨援,以致宦達。 諸弟皆檢愿友愛,爲搢紳景重。

列傳第

百

高釴

等。以兵部侍郎判度支出爲昭義節度使,爲下所逐,貶連州司馬。以太子賓客分司東都,卒。 是不能裁,旣而抵帽于地曰:「吾決以至公取之,得譴固吾分!」乃取公乘億、許棠、聶夷中 億字壽仙,棠字文化,夷中字坦之,皆有名當時。 子湜,字澄之,第進士,累官右諫議大夫。 咸通末,爲禮部侍郎。 時士多繇權要干請,

書判 弗見省,羣臣失色。 士不參集。 留訓時時講繹,前命不可改。」當是時,已旱而水,彗變未息,鄭注權震赫,人情危駭,旣錄等 戶 ,驟拜侍講學士,錄率諫官伏閣言訓素行憸邪,不可任,必亂天下。 帝遣使者諭曰:「朕 錄字權仲,旣擢第,署太原張弘靖幕府,入遷監察御史。 部 ,徙太常卿。 不宜罰小史,隳舊典。」錄數曰:「吾老不能退,乃爲小兒所辱! 明年,訓當國,出鉄爲浙東觀察使,歷義成節度使。 嘗罰禮生,博士李慤愠見曰:「故事,禮院不關白太常,故卿莅職,博 大和時,擢累給事中。 大中初, 遷禮部尚 文宗得

一路字弱金,連中進士、宏辭科,辟河東府參謀,歷吏部員外郎,遷中書舍人。 開成元年,權知貢舉。 文宗自以題界有司,鍇以籍上,帝語侍臣曰:「比年文章卑弱,今

奏太浮華,宜賣掌書記,以誠流宕。」李石曰:「古人因事爲文,今人以文害事,懲弊抑末,誠 所上差勝於前。」鄭覃曰:「陛下矯革近制,以正頹俗,而鍇乃能爲陛下得人。」帝曰:「諸鎭表 如聖訓。」即以鍇爲禮部侍郎。 閱三歲,頗得才實。始,歲取四十人,才益少,詔減十人,猶

既逐膽,貶湘高州司馬。僖宗初,召爲太子右庶子,終江西觀察使。 子湘,字濬之,擢進士第,歷長安令、右諫議大夫。從兄湜與路巖親善,而湘厚劉瞻,巖

不能滿。

遷吏部侍郎,出爲鄂岳觀察使。卒,贈禮部尙書。

與公爲兄弟,欲共力驅兩河歸天子,天下莫不知。今張公不幸,幼兒爲亂兵所脅,內則誠款 靖亂之功、繼絕之德矣。」武俊悅,即以表聞,遂授愔留後。宿不樂佐愔,更從浙東賈全觀察 隔絕,外則彊寇侵逼,公安得坐視哉?誠能奏天子不忘舊勳,赦愔罪,使束身自歸,則公有 中脅主留事。李師古將乘喪復故地,憎大懼。於是,王武俊擁兵觀釁,宿以書說曰:「張公 宿 憎憾其去,奏貶 泉州 馮宿字拱之,婺州東陽人。父子華,盧親墓,有靈芝、白兔,號「孝馮家」。 ,貞元中與弟定、從弟審寬並擢進士第,徐州張建封表掌書記。建封卒,子愔爲軍 司戶參軍。

制誥。 軍, 忠。 格後敷三十篇,行于時。 避諱不拜,徙左散騎常侍、兼集賢殿學士。拜河南尹。洛苑使姚文壽縱部曲奪民田,匿于 吏不敢捕。府大集, 再遷都官員外郎。 召爲太常博士。王士眞死,子承宗阻命,不得諡,宿謂世勞不可遺,乃上佳諡,示不忘 牛元翼徙節山南東道,爲王廷湊所圍,以宿總留事。還,進中書舍人,出華州刺史, 裴度節度彰義軍,表爲判官。 累封長樂縣公。 部曲輒與文壽偕來,宿掩取榜殺之。歷工部、 淮西平,除比部郎中。 刑部二侍郎。脩 長慶時,進 知

敢。」 卒,年七十,贈吏部尙書,諡曰懿。 防庸,一方便賴。 子圖,字昌之,連中進士、宏辭科。 東川節度使,完城郛,增兵械十餘萬,詔分餘甲賜黔巫道。 疾革,將斷重刑,家人請宥之,宿日:「命脩短 大中時,終戶部侍郎、判度支。 治命薄葬,悉以平生書納 ,天也, 撓法以求 
就以 
就 墓中。 涪水數壞民廬舍,宿脩利 吾不

寬爲起居郎。

不肯白,乃亟去。 定字介夫,偉儀觀,與宿齊名,人方漢二馮。 第進士異等,辟浙西薛革府,以鄠尉爲集賢校理。 始,定居喪,號毀甚,故數移疾,大學 **順聞,斥吏,歸錢五十萬,及諸境,定返其遺,以書讓順不下士,順** 于頗素善之。頗在襄陽,定徒步上謁,吏

無狀。 非能古章句者邪?」親誦定送客西江詩,召升殿,賜禁中瑞錦,詔悉所著以上。遷諫議大 士疑其簡怠,奪職。 ,肄于廷。定部諸工立縣間,端凝若植。 坐游宴不節冤官。 三遷祠部員外郎,出爲郢州刺史。 起爲國子司業, 再遷太常少卿。 帝異之,問學士李母,珏以定對。 吏告定略民妻,乾沒庫錢,御史鞫治 文宗嘗詔開元霓裳羽衣舞參以 帝喜日:「豈

仕。 師,上日欲會尙書省,定據禮當集詹事府,詔可。 定 力爭罷之。 卒,贈工部尙書,諡曰節。 是歲、訓、注敗,多誅公卿,中外危惴。及改元,天子御前殿,仇士良請以神策仗衞殿門, 又請許左右史從宰相至延英記所言,執政不悅,改太子詹事。 論者多其正。換衞尉卿,以左散騎常侍致 鄭覃兼太子太

初,源寂使新羅,其國人傳定黑水碑、畫鶴記; 章休符使西蕃,所館寫定商山記於屏。

其名播戎夷如此。

審字退思,開成中,為諫議大夫,拜桂管觀察使,歷國子祭酒。 監有孔子碑,武后所立,

子緘,字宗之,乾符初,歷京兆、河南尹。睿宗署額。審請琢「周」著「唐」。終祕書監。

列傳第一百二 馮宿 李虞仲 李駰

功刺太常定議,其不請與請而過時者,聽御史劾舉。居京師不得過半期,居外一期。 久,風績凐歇,採諸傳聞,不可考信,誄狀雖在,言與事浮。臣請凡得諡者,前葬一月, 所以知其行者,惟諡是觀。古者將葬請諡,今近或二三年,遠乃數十年,然後請諡; 所以表德懲惡,春秋褒貶法也。 惡著而不請,許考功察行諡之。節行卓異,雖無官及官卑者,在所以聞。」詔可。 李虞仲字見之。父端,附見文藝傳。 。茆土爵禄,僇辱流放,皆緣一時,非以明示百代,然而後之 虞仲第進士、宏辭, 累遷太常博士。 建言:「謚者 人歿已 請考

望歸重。卒,年六十五,贈吏部尚書。 寶曆初,以兵部郎中知制誥,進中書舍人,出爲華州刺史,歷吏部侍郎。 簡儉寡欲,時

子博士、 皆訪於人。人不周知, 李翺字習之,後魏尚書左僕射沖十世孫。中進士第,始調校書郎,累遷,元和初,爲國 史館脩撰。 常謂史官紀事不得實,乃建言:「大氐人之行,非大善大惡暴於世者, 故取行狀盜牒。然其爲狀者,皆故吏門生,苟言虚美,溺于文而

忘其理。 但記倒 用 臣請指事載功,則賢不肖易見。如言魏徵,但記其諫爭語,足以爲直言,段秀實, 司農印追逆兵, 笏擊朱泚,足以爲忠烈。 不者,願敕考功、太常、史館勿受。 如此

可以傳信後世矣。」詔可。 又條興復太平大略曰:

大功。 聖明寬恕,億兆欣感。臣愚不能盡識。若它詔令一皆類此,武德、貞觀不難及,太平可 韓弘獻女樂,陛下不受,遂以歸之。三也。又出李宗奭妻女於掖廷,以田宅賜沈遵師, 樂遍畎晦。二也。昔齊遺魯以女樂,季桓子受之,君臣共觀,三日不朝,孔子行。今 俘之,赦不誅,詔田弘正隨材授職,欲歸者縱之。澄等得生歸,轉以相謂,賊衆莫不懷 所不可及者,若淄青生口夏侯澄等四十七人,爲賊逼脅,質其父母妻子而驅之戰,陛下 盛德,無肯拒戰。 陛下卽位以來,懷不廷臣,誅畔賊,刷五聖憤恥,自古中興之盛無以加。 一也。今歲關中麥不收,陛下哀民之窮,下明詔蠲賦十萬石,羣臣動色,百姓歌 劉悟所以能一昔斬師道者,以三軍皆苦賊而暱就陛下,故不淹日 臣見聖德 成

遂革弊事,復<u>高祖、太宗舊制:用忠正而不疑;屏邪佞而不邇;改稅法,不督錢而納布</u> 絕進獻,寬百姓租賦;厚邊兵,以制蕃戎侵盜;數引見待制官,問以時事,通壅蔽 臣聞定禍亂者,武功也;復制度、興太平者,文德也。今陛下旣以武功定海內,若

列

此六者政之根本,太平所以興。陛下旣已能行其難,若何而不爲其易者乎?

不勞而, 可以高枕自安逸。」如是,則高祖、太宗之制度不可以復。 以 成也。 ,陛下資上聖,如不惑近習容悅之辭,任骨鯁正直,與之脩復故事,以興大化, 若一日不事,臣恐大功之後,逸樂易生,進言者必曰::「天下旣平矣,陛下 制度不復,則太平未可以至。 可

臣竊惜陛下當可興之時,而謙讓未爲也。

過失,逢吉詭不校,翺恚懼,即移病。 召爲禮部郞中。 再遷考功員外郎。初,諫議大夫字景儉表關自代。 翺性峭鯁,論議無所屈,仕不得顯官,怫鬱無所發,見宰相李逢吉, 滿百日,有司白免官,逢吉更表爲廬州刺史。 景儉斥,翺下除朗州 刺史。久之, 時州旱, 面斥其

得隱,收豪室稅萬二千緡,貧弱以安。

厚,見推當時,故有司亦諡曰文。 府少監。 入為諫議大夫,知制誥,改中書舍人。 後歷遷桂管湖南觀察使、山南東道節度使,卒。」朝始從昌黎韓愈爲文章,辭致渾 柏耆使滄州,翺盛言其才。 耆得罪,由是左遷少

入遷侍御史, 得冒論? 簡辭獨詰曰:「按幹坐黨魚朝恩誅,貲田皆沒,大曆後數十年,比有赦令,無原洗之言, 盧 簡辭字子策。 」不爲治。 習知法令及臺閣舊事 **父**編, 福建鹽鐵院官盧昂坐贓, 別傳。 與兄簡能、 寶曆中, 弟弘止簡求皆有文, 簡辭窮按,乃得金牀、 黎幹子煟詣臺請復葉縣故田 並第進士。 瑟瑟枕大如斗。 有司莫能 歷佐帥府, | 煟 知,

書爲忠武節度使。 李程 鎭太原 ,表爲節度判官。 徙山南東道。 坐事貶衢州刺史,卒。 入授考功員外郎,累擢湖南、浙西觀察使,以檢校工部尚

曰:「禁中無此,昂爲吏可知矣。」

不出。 劍 劉 季述所幽,感憤卒,贈太尉 南 ,再辟掌書記。 簡能,見鄭注傳。其子知猷,字子謩,中進士第,登宏辭,補祕書省正字。 僖宗還京, 召拜工部侍郎、 入遷右補闕,出爲饒州刺 史館脩撰。 史,以政最聞。 歷太常卿、戶部尙書,至太子太師。 累進中書舍人。 蕭鄴鎭 朱玫亂 昭宗爲 刑南、 ) 避難

知猷器量渾厚,世推爲長者。 善書,有楷法。 文辭膽麗。 子文度,亦貴顯。

弘止字子 疆, 佐劉悟府, 累擢監察御史。 沈傳師表爲江西團練副使。 入拜侍御史。

華 州 刺史宇文鼎、戶部員 外盧允中坐贓 詔 弘止按訊。 文宗將殺鼎,弘止執據罪由允中,

乃連坐,不應死,帝釋之。 累遷給事 中。

鉤釐 使。 弘 帥 自 有 止 智 嬴 請 ĪE 還,拜工 會昌中, 興後,吏卒驕沓,銀刀軍尤不法,弘止戮其尤無狀者,終弘止治,不敢譁。 ,條上新法,卽表輿兩池使,自是課入歲倍,用度賴之。 地者,乃以弘止爲三州團練觀察留後。 病,丐身還東都,不許。 一部侍郎,以戶部領度支。 韶河北三節度計劉循 徙宣武,卒于鎭,贈尚書右僕射 何弘敬、王元逵先取邢、洛、 初, 兩池鹽法弊,得費不相償, 制未下, 種平, 卽 踰年 詔爲三州 磁三州, , 弘止使 出為武寧節 及河 宰相· 以判官司 北 李德裕畏諸 優詔褒勞。 度使。 兩鎖宣 空興檢 慰

子虔權,有美才,終祕書監。

部 員 外郎。 簡 求 字子臧, 會昌中 始從江西王仲舒幕府,兩爲裴度、元稹所辟,又佐牛僧孺鎮襄陽,入遷戶 討劉稹 ,以忠武節度使李彦佐爲招討使,各選簡求副之,俾知後務。

蘇、壽二州刺史。

文不害, 大中九· 年 居邊善綏御, 党項擾邊, 拜涇原渭武節度使。 人皆安之。 太原統退渾、契苾、沙陀三部, 徙義武、 鳳翔、 河東三鎭。 難馴制, 簡求為 它帥或與詛 政長權

太子少師致仕、還東都、治園沼林苑、與賓客置酒自娛。 盟,質子弟,然寇掠不爲止。簡求歸所質,開示至誠,虜憚其恩信,不敢亂。久之,辭疾,以 卒,年七十六,贈尙書左僕射

室,汝弼懼,移疾去,客上黨。 在,每宴亭中,未嘗居賓位,西向俛首,人美其有禮。 子嗣業、汝弼,皆中進士第。汝弼以祠部員外郎知制誥,從昭宗遷洛。 後依李克用, 克用表爲節度副使。 太原府子亭, 簡求所署多 方柳璨斲喪王

嗣業子文紀,後貴顯。

過宰相。」帝頗寤而不能有所檢制,人皆危之。俄換侍御史內供奉,士始相賀。 不時,稍稍決事禁中,宦豎恣放,大臣不得進見。一元裕諫曰:「今西頭勢乃重南衙,樞密之權 趙歸眞擅乘驛馬,元裕詆曰:「天子置驛,爾敢疾驅邪?」命左右奪之,還,具以聞。敬宗視朝 高元裕字景圭,其先蓋渤海人。第進士,累辟節度府。以右補闕召,道商州,會方士

注愧憾。及宗閔得罪,元裕坐出餞,貶閬州刺史。注死,復授諫議大夫、翰林侍講學士。 李宗閱高其節,擢諫議大夫,進中書舍人。鄭注入翰林,元裕當書命,乃言「以醫術侍」,

|莊恪太子立,擇可輔導者,乃兼賓客。 進御史中丞。 卽建言:「紀綱地官屬須選,有不稱

傳

百

高元裕

使, 院 職。 職 官帶 者請罷之。」 ,入授吏部 元裕請監院御史隸本臺,得專督察。 詔可。 御 史者,號「外臺」,得察風俗,舉不法。 尙 於是監察御史杜宣猷柳瓌崔郢、侍御史魏中庸高弘簡並奪職。 書。 拜山南東道節 度使、封渤海郡公、奏蠲逋賦甚衆。 元和中, 累擢尚書左丞, 李夷簡因請按察本道州縣。 領吏部選。 在鎭 五年,復以吏部 出為宣歙觀察 故事,三司監 後益 不

尙書召,卒于道,年七十六,贈尙書右僕射。 元裕表言兄少逸才可任,因以命之,世榮其遷。 元裕性勤約,通經術,敏於爲吏,巖巖有風采,推重于時。 自侍講爲中丞,文宗難其代,

中, 曰:「山谷間是餅豈易具邪?」 謫隸恭陵,中人皆斂手。 出爲陝虢觀察使。中人責峽石驛吏供餅惡,鞭之, 少逸,長慶末爲侍御史,坐失舉劾,貶贊善大夫,累遷諫議大夫,乃代元裕。 以兵部尚書致仕,卒。 少逸封餅以聞。 宣宗怒 召使者責 稍進給事

元裕始名|允中,大和中改今名。

郎、同中書門下平章事。 超省郎進官者,惟鄭顥以尚主,而璩以寵升云。 元裕子璩,字瑩之。第進士,累佐使府。 閱月卒,贈司空。 太常博士曹鄴建言:「璩,宰相,交游醜雜 以左拾遺爲翰林學士, 擢諫議大夫。 懿宗時,拜劍南東川節度使 ,召拜中書侍 近世 竹、取多

帶贈之。 如意出 **德裕以能明專任已以成功,謂敖曰:「陸生恨文不迨意,如君此等語,豈易得邪?」解所賜玉** 不爲奇澀 爲宰相李德裕所器。 封敖字碩夫,其先蓋冀州蓨人。 ,賜以宮錦。 未幾,拜御史中丞,與宰相盧商盧囚,誤縱死罪,復爲工部侍郎。 ,語切而理勝。 劉稹平,德裕以定策功進太尉,時敖草其制曰:「謀皆予同,言不它惑。」 會昌初,以左司員外郎召爲翰林學士,三遷工部侍郎。 武宗使作詔書慰邊將傷夷者,曰:「傷居爾體,痛在股躬。」帝善其 元和中,署進士第,江西裴堪辟置其府, 轉右拾遺,雅 敖屬辭贍敏,

蓬、果賊依雞山,寇三川,敖遣副使王贄捕平之。 廷設九部樂,敖宴私第,爲御史所劾,徙國子祭酒。 但高其才,故不至宰相,卒。 大中中,歷平盧、興元節度使。 初,鄭涯開新路,水壞其棧,敖更治斜谷道,行者告便。 加檢校吏部尚書。 復拜太常, 進尙書右僕射。 還爲太常卿。 然少行檢, 始視

子彥卿、望卿,從子特卿,皆第進士。

列

人不治,薰頗以清力自將。牙將素驕,共謀逐出之,薰奔揚州。貶棣王府長史,分司東都。 鄭薰字子溥,亡鄕里世系。擢進士第,歷考功郞中、翰林學士。出爲宣歙觀察使。 前

施戟。 兼御史中丞,固辭乃冤。 久之,進左丞。 懿宗立,召爲太常少卿,擢累吏部侍郎。時數大赦,階正議光祿大夫者,得蔭一子,門 於是宦人用階請蔭子,薰却之不肯敍。宰相杜悰才其人,擬判度支,辭;又擬刑部 一性愛友,糾族百口,稟不充,求外遷。 擬華州刺史,

|薫端勁,再知禮部舉,引寒俊,士類多之。 旣老,號所居爲隱嚴,蒔松于廷,號「七松處

輒留中,爲倖侍酬沮。後以太子少師致仕。

土云云。

敬晦字日彰,河中河東人。

侍 郎。 旭 括,字叔弓,進士及第,遷殿中侍御史。 志簡淡,在職不求名。 周智光已誅,議者健括才,選爲同州刺史,拜御史大夫。 楊國忠惡不諧己,外除果州 刺史, 進累兵部 隱然

持重,弗以私害公。大曆中卒。

責之。 晦 進士及第,辟山南東道節度府,與馬曙聯舍。 吏負兼軍職,不引咎,走訴諸府牙將且十輩,方雜語以申吏枉, 於是,帥不政,法制陵頹,曙引大吏廷 闔府容美。 擢累諫議大夫。 晦讓諸將曰:「吏冒 武宗時,

軍名, 趙歸眞以非營罔天子,御史平吳湘獄,得罪宰相。晦上疏極道非是,不少回縱。 公等不能詰, 反引與爲伍,奈何?」衆愧謝,

大中中, 歷御史中丞、刑部侍郎、諸道鹽鐵轉運使、浙西觀察使。時南方連饉,有詔弛

書,諡曰 権酒茗,官用告覂,晦處身儉勤,貲力遂充。 一肅 徙兗州節度使,以太子賓客分司,卒,贈兵部尚

晦兄昕、嘷,弟眄、煦,俱第進士籍。 **町爲河陽節度使,**曍右散騎常侍,世寵其家。

開 中,蕭本詐窮得罪,詔與中人籍其財,中人利寶玉,欲竊取去,博奪還,簿無遺貲 章博字大業,京兆萬年人。 祖黃裳,浙西節度觀察使。 博取進士第,寖遷殿中侍御史。

詔博副之,擢右諫議大夫,召對,賜金紫。 屠隸主客。 回鶻入寇,以苻澈爲河東節度使,拜博爲判官。 博言令太暴,宜近中,宰相李德裕惡之。 因行西北邊, 商虜疆弱, 還奏有旨, 久之,進主客郎中。 會
法、
渾
叛
, 以何淸朝爲靈 時詔毀佛祠,悉浮 進左大夫,爲 武節 腹使,

列

傳

京兆 徙昭義。 尹。 與御史中丞囂競不平,皆得罪,下除博衞尉卿。 卒,年六十二,贈兵部尚書。 出爲平盧節度使、檢校禮部尙書,

錢十萬市朝廷歡,求領鹽鐵,景讓詣延英亟論不可,遂知名。 李景讓字後已,贈太尉憕孫也。 性方毅有守。 寶曆初,遷右拾遺。淮南節度使王播以 沈傳師觀察江西,表以自副。

亦使百歲母銜羞泉下,何面目見先大夫乎?」將鞭其背,更大將再拜請,不許, 軍且謀變,母欲息衆讙,召景讓廷責曰:「爾塡撫方面而輕用刑, 何庸母行?」 日,景讓率然對:「有日。」鄭曰:「如是,吾方有事,未及行。」蓋怒其不嘗吿也。 猶菑其身,況無妄而得,我何取?」亟使閉坎。 歷中書舍人、禮部侍郎、商華虢三州 母鄭,治家嚴,身訓勤諸子。 景讓重請罪,乃赦。 景讓家行脩治,閨門唯謹 始,貧乏時,治牆得積錢,僮婢奔告,母曰:「士不勤而禄, 故雖老猶加箠敕,已起,欣欣 刺史。 景讓自右散騎常侍出爲浙西觀察使,母問行 如初。 夫不寧, 嘗怒牙將, 杖殺之, 豈特上負天子, 且曰:「已貴, 皆泣謝,

入爲尚書左丞,拜天平節度使,徙山南東道,封酒泉縣男。 大中中, 進御史大夫, 甫視 罷,一軍遂定。

拜西川 世謂 餓死乎?」書聞,輒還東都。 右 事 , 而 ,劾免侍御史孫玉汝、監察御史盧楠,威肅當朝。 除 宣宗擇宰相 大夫百日, 節度使。 以病丐致仕,或諫:「公廉潔亡素儲,不爲諸子謀邪?」景讓笑曰:「兒曹詎 有他官相者, 盡書羣臣當選者,以名內器中,禱憲宗神御前射取之,而景讓名不得。 以太子少保分司。 卒,年七十二,贈太子太保,諡曰孝。 謂之「辱臺」。景讓愧艴不能平,見宰相,自陳考深當代,即 爲大夫三月,蔣伸輔政, 景讓名素出伸

衰矣。 賦三主,以獨子行爲嫌,請還代宗以下主復入廟,正昭穆。 爲李宗閔、楊嗣復所擢,故景讓在會昌時,抑厭不遷。 有孝於家、忠於國者飲此。」客肅然,景讓起卒爵,伸曰:「無宜於公。」 和後,大臣有德望者,以居里顯,景讓宅東都樂和里,世稱淸德者 性獎士類,拔孤仄,如李蔚、楊知退皆所推引。 然清素寡欲,門無雜賓。 李琢罷浙西,以同里訪之,避不見,及去,命斸其 始爲左丞,蔣伸坐宴所, 宣宗銜穆宗舊怨,景讓建請遷敬、文、 事下百官議,不然,乃罷,德望稍 ,號「樂和李公」云。 所善蘇滌、裴夷直皆 酌酒語客日: 、騙石焉。

盧攜當國,弟隱繇博士遷水部員外郎,材下資淺,人疾其冒,無敢繩, 事久廢,景温旣舉職,人皆韙其正。 景温不許赴省。 時故

弟景温

,字德己,歷諫議大夫、<a>福建觀察使,</a>

徙

華州刺史,

以美政聞。

累遷尙書右丞。

弟景莊,亦至顯官。

列傳第一百二 李景讓

## 唐書卷一百七十八

## 列傳第一百三

#### 劉賁

意。 齊羣臣,內掣侮天子,實常痛疾。 文宗卽位,思洗元和宿恥,將翦落支黨。方宦人握兵,橫制海內,號曰「北司」,凶醜朋挺,外 **擢進士第。元和後,權綱弛遷,神策中尉王守澄負弒逆罪,更二帝不能討,天下憤之。** 劉蕡字去華,幽州昌平人,客梁、汴間。明春秋,能言古興亡事,沈健于謀,浩然有捄世

大和二年,舉賢良方正能直言極諫,帝引諸儒百餘人于廷,策曰:

乎其不可及已。三代令王,質文迭救,百氏滋熾,風流蹇微,自漢以降,足言蓋寡。 以立本,推誠而建中,繇是天人通,陰陽和,俗躋仁壽,物無疵癘。 噫!盛德之所臻,敻 朕聞古先哲王之治也,玄默無爲,端拱司契,陶**毗心以**居簡,凝日用於不宰,厚下

列傳

化,氣或堙阨,災旱竟歲,播植愆時。 遐 前詔有司,博延羣彥,佇啓宿懵,冀臻時雍。 寡而食之衆,煩於令而鮮於治。 蠹。其擇官濟治也,聽人以言則枝葉難辨,御下以法則恥格不形。 其阜財發號也,生之 京師,諸夏之本也,將以觀治,而豪猾踰檢;太學,明敎之源也,期於變風,而生徒惰 軌 `列郡在乎頒條,而干禁或未絕; 百工在乎按度,而淫巧或未息。 俗恬風靡,積訛成 股 庶紹祖宗之鴻緒。 顧唯味道 ,<br />
祗荷丕構,奉若謨訓,不敢怠荒,任賢惕厲,<br />
宵衣旰食,<br />
詎追三五之 而心有未達,行有未孚,由中及外,闕政斯廣。 思所以究此繆盭,致之治平,茲心浩然,若涉淵水。故 國廩罕蓄,乏九年之儲;吏道多端,微三載之績。 是以人不率

策,孰叶於時?元凱之考課何先?叔子之克平何務。惟此龜鑑,擇乎中庸,斯在洽聞 道 綱條之致紊, 一而和氣克充? 推之本源, 子大夫皆識達古今,志在康濟,造廷待問,副殷虛懷,必當箴治之闕,辨政之疵 稽富庶之所急。 著於條對。 何施革於前弊?何澤惠於下土?何脩而治古可近?何 至若夷吾輕重之權, 孰輔於治。嚴尤底定之 明明

### 費對日:

肸

將親覽。

臣誠不佞,有正國致君之術,無位而不得行;有犯顏敢諫之心, 無路而不得達。

伏惟陛下少加優容,不使聖時有讜言受戮者,天下之幸也。 謹昧死以對: 專承大問,敢不悉意以言。 懷憤鬱抑,思有時而發。常欲與庶人議于道、商賈謗于市,得通上聽,一悟主心,雖被 **秋言之罪無所悔。** 沉逢陛下詢求過闕,咨訪嘉謀,制詔中外,舉直言極諫。 至於上所忌,時所禁,權幸所諱惡,有司所與奪,臣愚不識, 臣辱斯舉,

乎?防下以禮,則恥格安有不形乎。念生寡而食衆,可罷斥惰游;念令煩而治鮮,要 擇官濟治之心,阜財發號之歎,見陛下敎化之本也。且進人以行,則枝葉安有難辨 **惰業,繇學校之官廢;列郡干禁,繇授任非人;百工淫巧,繇制度不立。 伏以聖策有** 化,在脩己以先之;欲氣之和,在遂性以導之。捄災旱在致精誠,廣播殖在視食力。國 之成敗。心有未達,以下情蔽而不得上通;行有未孚,以上澤壅而不得下狹。欲人之 絀左右之纖佞,進股肱之大臣。 若夫追蹤三五,紹復祖宗,宜鑒前古之興亡,明當代 察其行否。博延羣彥,願陛下必納其言;造廷待問,則小臣安敢愛死?伏以聖策有求 廩罕畜,本乎冗食尙繁; 吏道多端, 本乎選用失當。豪猾踰檢, 繇中外之法殊; 生徒 而不敢荒寧,奉若謨訓而罔有怠忽,見陛下憂勞之至也。若夫任賢惕厲,宵衣旰食,宜 慮道之深也。 伏以聖策有思古先之治,念玄默之化,將欲通天地以濟俗,和陰陽以煦物,見陛下 臣以爲哲王之治,其則不遠,惟致之之道何如耳。 伏以聖策有祗荷丕構

賢箴闞之言,審政辨疵之令,見陛下咨訪之勤也。遂小臣斥姦豪之志,則弊革于前; 守陛下念康濟之心,則惠敷于下。 哉?或有以繫安危之機、兆存亡之變者,臣請披肝膽爲陛下別白而重言之。 叔子之所務,不若虞舜舞干。且非大德之中庸、上聖之龜鑒,又何足爲陛下道之 至若夷吾之法,非皇王之權;嚴尤所陳,無最上之策;元凱之所先,不若唐堯考 邪正之道分,而治古可近;禮樂之方著,而和氣克

建中之盛德,安有三代循環之弊、百僞滋熾之漸乎?臣故曰:「唯致之之道何如耳。」 當承天之道,以謹其終也。王者動作終始必法於天者,以其運行不息也。 道,以謹其始也。 **寮秋,元者氣之始也,春者歲之元也。** 寮秋以元加于歲,以春加于王,明王者當奉若天 始,又能謹其終,懋而脩之,勤而行之,則執契而居簡,無爲而不宰,廣立本之大業,崇 臣前所謂「哲王之治,其則不遠」者,在陛下愼思之、力行之、始終不懈而已。 又舉時以終歲,舉月以終時,春秋雖無事,必書首月以存時,明王者 陛下能謹其 謹按

亡、社稷安危之策而降於淸問,臣未知陛下以布衣之臣不足與定大計耶?或萬機之勤 憂勞之至也。臣聞不宜憂而憂者,國必衰;宜憂而不憂者,國必危。陛下不以國家存 有所未至也?不然,何宜憂而不憂乎?臣以爲陛下所先憂者,宮闈將變,社稷將危,天 臣前 所謂「若夫任賢惕厲,宵衣旰食,宜絀左右之纖佞,進股肱之大臣」,實以陛下

道。 之權,陷先帝不得正其終,致陛下不得正其始,況太子未立,郊祀未脩,將相之職不歸, 勢傾海內,羣臣莫敢指其狀,天子不得制其心,禍稔蕭牆,姦生帷幄,臣恐曹節、侯覽復 以守其官。奈何以褻近五六人總天下大政,外專陛下之命,內竊陛下之權,威懾朝廷, 名器之宜不定,此社稷將危也。臣謹按春秋:「压札子殺召伯、毛伯。」春秋之義,兩下 不得正其終,則後君不得正其始,故曰「定無正」也。今忠賢無腹心之寄,閣寺專廢立 生於今日,此宮闈將變也。臣謹按春秋:「定公元年春王。」不言正月者,春秋以爲先君 杜篡弑之漸,則居正位,近正人。 必正位,所近必正人。春秋:「闍弑吳子餘祭。」書其名,譏疏遠賢士,昵刑人,有不君之 其始也;終必書所終之地,所以正其終也。故爲君者,所發必正言,所履必正道,所居 董仲舒爲漢武帝言之略矣,有未盡者,臣得爲陛下備論之。夫繼故必書卽位,所以正 念,則顚覆大器,宗廟之恥, 下,二百餘載,其間聖明相因,擾亂繼作,未有不用賢士、近正人而能興者。 或一日不 之,固不可容易而守之。 下將傾,四海將亂。 伏惟陛下思祖宗開國之勤,念春秋繼故之誠。 此四者,國家已然之兆,故臣謂聖慮宜先及之。夫帝業艱難而成 太祖肇其基,高祖勤其績,太宗定其業,玄宗繼其明,至于陛 萬古爲恨。臣謹按春秋, 遠刀鋸之殘,親骨鯁之直,輔相得以顓其任,庶寮得 明法度之端,則發正言,履正道 ,人君之道 , 在體元以居正。 昔

五二九七

脅之心,復門戶掃除之役,戒其所宜戒,憂其所宜憂。 旣不得治其前,當治於後;不得 欲爲陛下言之,慮陛下不能用也。 世賢相老臣,訪持變扶危之謀,求定傾捄亂之術,塞陰邪之路,屛褻狎之臣,制侵陵迫 之憂,裴回鬱塞,以須陛下感悟,然後盡其啓沃。陛下何不聽朝之餘,時御便殿,召當 適足鉗直臣之口,而重姦臣之威。是以欲盡其言則有失身之懼,欲盡其意則有害成 知之矣。 春秋之微,稱兵者以逐惡爲義。 也。 相殺不書。 TE 固陰重之機,處父所以及殘賊之禍,故春秋非之。夫上漏其情,則下不敢盡意;上泄 故樊噲排闥而雪涕,袁盎當車而抗辭,京房發憤以殞身,竇武不顧而畢命,此皆陛下明 春秋善之。今威柄陵夷,藩臣跋扈。 失之者,是不君也;侵其命而專之者,是不臣也。君不君,臣不臣,此天下所以將傾 |其始,當正其終。 臣謹按春秋,晉趙鞅以晉陽之兵叛入于晉,書其歸者,能逐君側之惡以安其君,故 臣謹按春秋,晉狐射姑殺陽處父,書襄公殺之者,以其君漏言也。 此書者,重其顓王命也。夫天之所授者在命,君之所存者在令。 則可以虔奉典謨,克承丕構,終任賢之效,無宵旰之憂矣。 則典刑不繇天子,征伐必自諸侯,此海內之將亂也。 忽而不用,必泄其言,臣下旣言而不行,必嬰其禍; 有不達人臣大節,而首亂者將以安君爲名; 不究 操其命而 襄公不能

**震主**。 取捨。 亡也,失於彊暴;漢之亡也,失於微弱。 官無賢士。今紀綱未絕,典刑猶在,人誰不欲致身爲王臣,致時爲升平?陛下何忽 [虞之所以興,而景行於前;鑒]秦、漢之所以亡,而戒懼於後。 危之機,不知取捨之道,不任大臣,不辨姦人,不親忠良,不遠讒佞也。 伏惟陛下察唐、 官唯其能,左右唯其賢,元凱在下雖微而必舉,四凶在朝雖彊而必誅,考其安危,明其 不去邪?神器固有歸,天命固有分,祖宗固有靈,忠臣固有心,陛下其念之哉!昔秦之 不用邪?又有居官非其能,左右非其賢,惡如四凶,詐如趙高,姦如恭、顯,陛下何憚 (君而天下大治者,以能任九官、四岳、十二牧,不失其舉,不貳其業,不侵其職,居 臣伏見敬宗不虞亡秦之禍,不翦其萌,伏惟陛下深軫亡漢之憂,以杜其漸,則祖 至秦二世、漢元成,咸願措國如唐、虞,致身如堯、舜,而終敗亡者,以其不見安 !所謂「追蹤三五,紹復祖宗,宜鑒前古之興亡,明當時之成敗」者,臣聞堯、禹 **彊暴則姦臣畏死而害上,微弱則彊** 陛下無謂廟堂無賢相,庶 臣竊權 而 而

按春秋書「梁亡」不書「取」者,梁自亡也,以其思慮昏而耳目塞,上出惡政,人爲寇盜, 得下浹」,且百姓有塗炭之苦,陛下無繇 臣 .前所謂陛下「心有所未達,以下情塞而不能上通,行有所未孚,以上澤壅而不 而知,陛下有子惠之心, 百姓無繇而信。 臣謹

宗之洪業可紹,三五之遐軌可追矣。

保傳焉,如乳哺焉,如師之敎導焉。故人之於上也,恭之如神明,愛之如父母。今或不 故治天下者,不可不知百姓之情。夫百姓者,陛下之赤子,陛下宜令慈仁者視育之,如 者,存其百姓也。苟百姓不存,則雖社稷不得固其重,社稷不重,則人君不得保其尊。 皆不知其所以,終自取其滅亡也。臣聞國君之所以尊者,重其社稷也;社稷之所以重 然,陛下親近貴倖,分曹建署,補除卒吏,召致賓客,因其貨賄,假以聲勢,大者統藩方, 夕。 緣而弄法,冤痛之聲,上達於九天,下入於九泉,鬼神爲之怨怒,陰陽爲之愆錯。君門 於上也,畏之如豺狼,惡之如讎敵。今海內困窮,處處流散,飢者不得食,寒者不得衣, 小者爲守牧,居上無淸惠之政而有饕餮之害,居下無忠誠之節而有姦欺之罪。故人之 陛下有子惠之心,百姓安得而信之乎。使陛下行有所未孚,心有所未達,固其然也。 鰥寡孤獨不得存,老幼疾病不得養,加以國權兵柄顓於左右,貪臣聚斂以固寵,姦吏因 姦宄日彊,黎元日困,繇不能擇賢明而任之,失其操柄也。 臣聞漢元帝卽位之初,更制七十餘事,其心甚誠,其稱甚美。然紀綱日紊,國祚日衰, 臣所以爲陛下發憤扼腕,痛心泣血也。 |,不得告訴,士人無所歸化,百姓無所歸命。 官亂人貧,盜賊並起,土崩之勢,憂在旦 即不幸因之以病癘,繼之以凶荒,陳勝、吳廣不獨起於秦,赤眉、黃巾不獨生於漢, 如此則百姓有塗炭之苦,陛下何繇而知之乎? 自陛下卽位,憂勤兆庶,屢

利,煦之以和,教之以孝慈,導之以德義,去耳目之塞,通上下之情,俾萬國懽康,兆庶 之害,惟忠賢是近,惟正直是用,內寵便僻無所聽焉。選淸愼之官,擇仁惠之長,敏之以 塞四方之望。 降德音,四海之內,莫不抗首而長息,自喜復生於死亡之中也。 。誠能揭國柄以歸于相,持兵柄以歸于將,去貪臣聚斂之政,除姦吏因緣 伏惟陛下愼終如始,以

蘇息,卽心無不達,而行無不孚矣。

職而 陛下能斥姦邪而不私其左右,舉賢正而不遺其疏遠,則化狹朝廷矣。愛人而敦本,分 嚴刑不足以禁非,本不固則人流,法不守則政散,而欲教之必至,化之必行,不可得也。 爲忠。知人則任賢而去邪,正時則固本而守法。賢不任則重賞不足以勸善,邪不去則 未盡其方邪。夫立教之方,在乎君以明制之,臣以忠行之。君以知人爲明,臣以正時 化也,故以道御之。今陛下先之以身而政未必行,御之以道而人未從化,豈立教之旨 不勸而自立;導之也,則人不敎而率從。君子欲政之必行也,故以身先之;欲人之從 !奉法,脩其身以及其人,始於中而成於外,則化行天下矣。 臣前所謂「欲人之化也,在脩己以先之」,臣聞德以脩己,敎以導人。脩之也,則人

也,在立制度,修敎化。

臣前

!所謂「欲氣之和也,在遂其性以導之」者,當納人於仁壽也。 夫欲人之仁壽

夫制度立則財用省,財用省則賦斂輕,賦斂輕則人富矣。 敎化

咸遂矣。 脩則爭競息,爭競息則刑罰淸,刑罰淸則人安矣。 旣富矣,則仁義興焉; 旣安矣,則壽 考至焉。 仁義之心感於下,和平之氣應於上,故災害不作,休祥荐臻,四方底寧,萬物

以其人君有恤人之志也;文公三年之中,一書「不雨」者,以其人君無閔人之心也。故 悟致誠而旱不害物,文無卹閔而變則成災。 陛下有閔人之志,則無成災之變矣。 臣前所謂「捄災旱在乎致精誠」者,臣謹按春秋,魯僖公一年之中,三書「不雨」者,

廢百事之用,以廣三時之務,則播植不愆矣。 於力則功築罕,民勤於財則貢賦少,民勤於食則百事廢。」今財食與力皆勤矣,願陛下 臣前所謂「廣播殖在乎視食力」者,臣謹按春秋:「君人者必時視民之所勤。 民勤

其無九年之蓄,一年不登而百姓飢。 ,則廩蓄不乏矣。 臣前所謂「國廩罕蓄,本乎冗食尙繁」者,臣謹按春秋:「臧孫辰告糴于齊。」春秋譏 臣願斥游惰之人以篤耕殖, 省不急之費以贍黎

覈考課之實,定遷序之制,則多端之吏息矣。 也。 今陛下之用人也,求其聲而不求其實,故人之趨進也,務其末而不務其本。 臣願 臣前所謂「吏道多端,本乎選用失當」者,繇國家取人不盡其材、任人不明其要故

書之。 方,以保义邦家,式遏亂略。」太宗置府兵臺省軍衞,文武參掌,閉歲則櫜弓力穡,有事 盟諸侯不日,而葵丘之盟特以日者,美其能宣明天子之禁,率奉王官之法,故春秋備而 法,還軍衞之職,脩省署之官,近崇貞觀之風,遠復成周之制,自邦畿以形下國,始天子 豈先王經文緯武之旨邪!臣願陛下貫文武之道,均兵農之功,正貴賤之名,<br />
一中外之 足以鎭衞社稷,而暴足以侵害閭里。羈紲藩臣,干陵宰輔,隳裂王度,汩亂朝經。 則 制 外則破律於中,法出多門,人無所措,繇兵農勢異,而中外法殊也。臣聞古者因井田以 正名。今又分外官、中官之員,立南司、北司之局,或犯禁於南則亡命于北,或正刑于 而達諸侯,可以制猾姦之彊,無踰檢之患矣。 夫之威 如仇讎;足一蹈軍門,視農夫如草芥。謀不足以翦除姦兇,而詐足以抑揚威福;勇不 軍不主武事,止於養階勳。 **《釋耒荷戈,所以脩復古制,不廢舊物。今則不然。夏官不知兵籍,止於奉朝請;六** [軍賦] 間農事以脩武備] 提封約卒乘之數,命將在公卿之列,故兵農一致,而文武 臣前所謂「豪猾踰檢,繇中外之法殊」者,以其官禁不一也。臣謹按春秋,齊桓公 然則官者,五帝、三王之所建也;法者,高祖、太宗之所制也。法宜畫一,官宜 ,上以制君父;假天子之命,下以御英豪。 軍容合中官之政,戎律附內臣之職。首一戴武弁,疾文吏 有藏姦觀釁之心,無仗節死難之誼。 張武 同

唐

臣前所謂「生徒惰業,繇學校之官廢」者、蓋國家貴其祿、賤其能、先其事、後其行、

故庶官乏通經之學,諸生無脩業之心矣。

法制在焉,權可以御豪彊,恩可以惠孤寡,彊可以禦姦寇,政可以移風俗。其將校會更 臣前所謂「列郡干禁,繇授任非人」者,臣以爲刺史之任,治亂之根本繫焉,朝廷之

戰陣,及功臣子弟,請隨宜酬賞,苟無治人之術者,不當任此官,卽絕干禁之患矣。 臣前所謂「百工淫巧,繇制度不立」者,臣請以官位祿秩制其器用車服,禁以金銀

珠玉,錦繡雕鏤不蓄於私室,則無蕩心之巧矣。

臣前所謂「辨枝葉」者,繇考言以詢行也;臣前所謂「形于恥格」者,繇道德而齊禮

也。

臣前所謂「念生寡而食衆,可罷斥惰游」者,已備於前矣。 臣前所謂「令煩而治鮮,要察其行否」者,臣聞號令者,治國之具也,君審而出之,

臣奉而行之,或虧益止留,罪在不赦。今陛下令煩而治鮮,得非持之者有所蔽欺乎?

漢削諸侯,非不知禍之將至,忠臣之心,壯夫之節,苟利社稷,死無悔焉。臣非不知言 發而禍應,計行而身僇,蓋痛社稷之危,哀生人之悔,豈忍姑息時忌,竊陛下一命之寵 臣前謂「博延羣彥,願陛下必納其言;造廷待問,則小臣其敢愛死」者,昔晁錯爲

哉?昔龍逢死而啓商,比干死而啓周,韓非死而啓漢,陳蕃死而啓魏。今臣之來也,有 司或不敢薦臣之言,陛下又無以察臣之心,退必戮於權臣之手,臣幸得從四子游於地

下,固臣之願也,所不知殺臣者,臣死之後,將孰爲啓之哉!

無爲,垂拱成化。至若念陶鈞之道,在擇宰相以任之,使權造化之柄;念保定之功,在 孝,養高年以敎人悌長,字百姓以敎人慈幼,調元氣以煦育, 扇大和以仁壽,可以消搖 之愚,以爲未極敎化之大端、皇王之要道。伏惟陛下事天地以敎人恭,奉宗廟以敎人 治,而致和平者,在陛下行之而已。然上之所陳者,實以臣親承聖問,敢不條對。雖臣 法,仁足以勸善,義足以禁非,又何必宵衣旰食,勞神惕慮,然後致治哉! 百姓之怨痛,在擇良吏以任之,使明惠養之術。自然言足以爲天下敎,動足以爲天下 擇將帥以任之,使脩闊外之寄;念百度之求正,在擇庶官而任之,使顓聩業之守;念 至如人主之闕,政敎之疵,前日之弊,臣旣言之矣。若乃流下土之惠,脩近古之

晁、董,而畏中官眦睚,不敢取。 是時,第策官左散騎常侍馮宿、太常少卿賈餗、庫部郎中龐嚴見實對嗟伏,以爲過古 士人讀其辭,至感槩流涕者。 諫官御史交章論其直。

我留,吾顏其厚邪!」乃上疏曰:「陛下御正殿求直言,使人得自奮。 於時,被選者二十有三人,所言皆冗齪常務,類得優調。 河南府參軍事李郃曰:「蕡逐 臣才志懦劣,不能質今

列

傳第一

百三

劉賈

逃苟且之慚,朝有公正之路,陛下免天下之疑,顧不美哉!」帝不納。郃字子玄,後歷賀州 解。況臣所對,不及實遠甚,內懷愧恥,自謂賢良,奈人言何!乞回臣所授,以旌蕡直。臣 有一實不幸死,天下必日陛下陰殺讜直,結讎海內,忠義之士,皆憚誅夷,人心一搖,無以自 以直言召天下士,費以直言副陛下所問,雖許必容,雖過當獎,書于史策,千古光明。使萬 近臣故無害忠良之謀;以宗廟威嚴,近臣故無速敗亡之禍。 指事取驗,何懼直言?且陛下 臣銜怒,變興非常,朝野惴息,誠恐忠良道窮,綱紀遂絕,季漢之亂復興于今。以陛下仁聖, 有司以言涉訐忤,不敢聞。 皇王之成敗,陛下所防閑,時政之安危,不私所料。 古是非,使陛下聞未聞之言,行未行之事,忽忽內思,愧羞神明。 今實所對,敢空臆盡言,至 。自詔書下,萬口籍籍,歎其誠鯁,至於垂泣,謂蕡指切左右,畏近 又引春秋爲據,漢、魏以來,無與實比。

以師 刺 禮禮之。 費對後七年,有甘露之難。 <u>今狐楚、牛僧孺節度山南東西道,皆表實幕府,授祕書郎,</u> 而宦人深嫉實,誣以罪,貶柳州司戶參軍,卒。

陽處父以戒帝,又引閽殺吳子,陰贊帝決。帝後與宋申錫謀誅守澄不克,守澄廢帝弟潭王 而斥申錫,帝依違其間,不敢主也。 賈餗與王涯、李訓、舒元輿位宰相,以謀敗,皆爲中官夷

帝恭儉求治,志除凶人,然懦而不睿,臣下畏禍不敢言,故費對極陳晉襄公殺

其宗,而宦者益横,帝以憂崩。

魄憤胔,有望於陛下。」帝感悟,贈實左諫議大夫,訪子孫授以官云。 掃除之役,遂罹譴逐,身死異土,六十餘年,正人義夫切齒飮泣。 比陛下幽東內,幸西州,王 室幾喪。 及昭宗誅韓全誨等,左拾遺羅衮上言:「蕡當大和時,宦官始熾,因直言策請奪爵土,復 使費策早用,則杜漸防萌,逆節可消,寧殷憂多難,遠及聖世耶!今天地反正,枉

不臧死,宦者遂彊,可不戒哉!意費之賢,當先以忠結上,後爲帝謀天下所以安危者,庶其 切宦官,然亦太疏直矣。戒帝漏言,而身誦語于廷,何邪?其後宋申錫以謀泄貶,李訓以計 贊曰:漢武帝三策董仲舒,仲舒所對,陳天人大槩,緩而不切也。 寶與諸儒偕進,獨譏

舒 思 邪!

# 唐書卷一百七十九

## 列傳第一百四

李訓 鄭注 王涯 賈餗 舒元輿 王 璠 郭行餘 韓約 羅立言

李孝本 顧師邕 李貞素

善遇之,即以注術、仲言經義幷薦於帝。 快快不樂,思復用,知與注善,付金幣百萬,使西至京師厚結注。 操權力者皆齪齪,吾聞注好士,有中助,可與共事。」因往見注, 坐 擢 一武昭獄,流象州。 進 士第,補太學助教,辟河陽節度府。從父逢吉爲宰相,以仲言陰險善謀事, 李訓字子垂,始名仲言,字子訓,故宰相揆族孫。質狀魁梧,敏于辯論,多大言,自標置 文宗嗣位,更赦還,以母喪居東都。 鄭注佐昭義府,仲言慨然日:「當世 相得甚歡。 注喜,介之謁王守澄。守澄 時逢吉方留守, 厚昵之。

仲言持詭辯, 激卬 可聽,善鉤揣人主意,又以身儒者,海內望族,旣見識擢,志望 一不淺。

列傳

第

百

四

李

訓

山人」, 賞 右。 韓仗、 力。 不堪 遂 周易博士兼 始 宋 疑 帝不 帝外託講勸,又皆以守澄進,故與之謀則其黨不疑。 ,欲夷絕其類,顧在位臣持祿 諫議 申錫謀誅守澄不克,死,宦 而 與注出入禁中。 聽。 待 大夫李珝郭承嘏、 翰林侍講學士。 遇莫與比,因改名訓。 仲言數進講 服除,起爲四門助教, 入院, 至閹 中書舍人高元裕權璩等共劾仲言憸人,天下共知 一尹益横 寺, 取安, 帝猶慮宦人猜忌, 韶法曲弟子二十人侑宴, 必感慣申重,以激帝心。 一帝愈 無伏節 憤 死難 賜緋袍、 恥 者。 而憲祖之弑, 乃疏易五義示羣臣, 銀魚, 時大和 注 仲言 陰知帝 口尙穣粗 示優寵。 帝見其言縱橫 指 罪入未得, , 屢建 八年 帝 於 使衣戎服 也。 密 是 有 計 雖 給 能異訓意者 , 其十月, 謂 外假借, 事 引仲言: 不宜在左 果可任 中 鄭 H 内 肅

逐 監 西川 襄 ,欲天下 陽 明 監 年 軍 秋七月, 軍 訓 知 楊 啓帝 以 師 承 和 召 臣 進翰林學士、 待訓 准 還,至青泥 南韋元 、兵部郎· 驛,遺使 河東 中,知制誥, 王踐言於嶺外,已行,皆賜死。 者杖殺之。 居中倚重, 復以計白罷 實行宰相事。 守澄觀軍容使 而崔潭峻前物故,韶 宦人陳弘志時 了,賜鴆 死。

報 恩復讎 訓 本 ,素忌李德裕、宗閔之寵, 挾 奇 進 , 及 大 權在己,銳 意 乃因楊虞卿獄,指爲黨人,嘗所惡者 去 恶, 故與帝言天下事,無不如所欲。 悉陷黨中,遷貶無 挾注相朋比,務 剖

棺

鞭

户。

元

和

逆黨

幾

関 日 班列幾空,中外震畏。 帝爲下詔開諭,羣情稍安。不踰月,以禮部侍郞同中書門下平

章事,賜金紫服,仍詔三日一至翰林,以終易義。

意,宦官衞兵皆慴憚迎拜。天下險怪士徼 諸鎭 白罷,因以市恩。 士心,人皆惑之。 訓起流人,一歲至宰相,謂遭時,其志可行。 意果而謀淺,天子以爲然。 嘗建言天下浮屠避徭賦,耗國衣食,請行業不如令者還爲民。 俄賜第勝業里,賞賚旁午。 取富貴,皆憑以爲資。 欲先誅宦豎,乃復河、湟,攘夷狄,歸河朔 每進見,他宰相備位,天子傾 訓時時進賢才偉望,以悅 既執政,自

爲邪寧節度使,羅立言權京兆尹,韓約金吾將軍,李孝本權御史中丞。 及金吾臺府卒,劫以爲用。 外爲助援,內實猜克,待逞,且殺之。 始 ,<br />
注先顯,訓藉以進,及勢相埓,賴寵爭功,不兩立。<br />
然方事未集,乃出注使鎮 擢所厚善分總兵柄,於是王璠爲太原節度使, 陰許璠、行餘多募士 郭行餘 鳳翔,

蹯、行餘皆辭赴鎭,兵列丹鳳門外,彀而待,訓傳呼曰:「兩鎭軍入受詔旨!」聞者趨入,邠寧 露。」帝曰:「豈約妄邪?」顧中尉仇士良、魚志弘等驗之,訓因欲閉止諸宦人,使無逸者。 時 禁中,陛下宜親往以承天祉。」許之。卽輦如含元殿,詔宰相羣臣往視,還,訓奏言:「非甘 十一月壬戌,帝御紫宸殿,約奏甘露降金吾左仗樹,羣臣賀。 訓、元興奏言:「甘露近在

事連 殿與 上閣 訓等第,兵遂大掠, 出。 故。 内! 軍何 不知謀, 反。」士良 |訓急連呼金吾兵曰:「衞乘輿者,人賜錢百千!」於是有隨訓入者。 (金吾 天子, 殺諸司 至 即閉, 爲 會士良遣神策副 卽 一, 璠 爾? 士良榜笞急,乃自署反狀。詔出衞騎千餘,馳咸陽、奉天捕亡者, 扶輦決眾題下殿趨,訓攀輦曰:「陛下不可去! [士縱擊,宦官死者數十人。 手搏訓 懼 相與怨嘖,帝懼,僞不語,故宦 」會風動無幕,見執兵者,士良等驚,走出,闇者將闔扉,爲宦侍叱爭,不及閉。 史六七百 宮中呼萬歲。 ,弗能前 而躓,訓壓之,將引刀鞾中,救至,士良免。 入黎埴、羅讓、渾鐬、胡証等家及買耽廟, 人,復分兵屯諸宮門, 使劉泰倫、陳君奕等率衞士五百挺兵出 ,獨行餘拜殿下。 元興雖知謀,不以告涯,日:「上將開延英邪? 訓持辇愈急 宦人至仗所,約流汗不能舉首,士良等怪之曰:「將 人得肆志殺戮。 捕訓黨千餘 ,至宣政門,宦人郗志榮揕訓仆之,輦入東 .」士良曰:「李訓反!」帝曰:「訓 人斬四方館, 俄而元興、涯皆爲兵 立言、孝本領衆四百東西來,上 貲產一空。 ,所值輒殺。 宦人曰:「急矣,上當還 流血 大索都城 」而羣臣見宰相 兩省印、簿書輒持 成渠。 涯等惶遽易 所 宦 ,分掩涯 執 豎 知訓 涯實 服 步

衙,兵皆露持。 明 日 召羣臣朝 是時無宰相、御史中丞,久之,閤門使馬元贄啓宣政扉,傳詔張仲方可京兆 ,至建福門,從者不得入,光範門尙閉,列兵誰何,乃繇金吾右 仗至宣政

去,祕館圖

籍

,蕩然無餘者。

將立 尹 ,而更皆前死,羣臣不能班。 一鄭注。 邀召僕射令狐楚鄭覃、兵部尚書王源中、吏部侍郎李虞仲等至,帝對悲憤 帝初未知涯等被繫,猶遲其不朝,旣而上良白涯與訓謀逆,

涯 訊牒曰:「果涯書邪?」楚曰:「然!」「涯誠有謀,罪應死。」

屯兵 弘志使偏將攻之,呼曰:「王涯等得罪,起尙書爲相。 帽 「李訓累我。」俄行餘、立言皆得。自涯十餘族幷奴婢悉繫左右軍。 一章面 」涯曰:「君昔漏宋丞相謀於守澄,今焉逃死?」 訓旣敗,被綠衣,詭言黜官,走終南山,依浮屠宗密。宗密欲匿之,其徒不可,乃奔鳳翔, 、大衢,鼓而儆之,兵乃止。帝逼宦官,於是下詔暴訓、涯等罪。 是日,京師兵剽劫未止,民乘亂,往往復私怨相戕擊, ,奔鄭注,至咸陽, 追騎及之。餗匿民間, 」璠喜,啓關納之,旣行,知見紿, 嬴服乘驢 ,人死甚衆。 自歸。 孝本易綠榜、獨金帶、以 璠見涯,憲曰:「公何見 **璠聚河東兵環第自衞** 帝遺楊鎭、靳遂良等 泣日

爲盩厔將所執,械而東。 訓恐爲宦人酷辱,祈監者曰:「得我者有賞,不如持首去。」乃斬之,

傳其首,餘黨悉禽。

量錯、 後 始,元皋以屬疏自解,得去,士良訊奴,言事前一昔宿訓第,遣人追斬之。 一日,兩神策兵將涯等赴郊廟,過兩市,皆腰斬梟首以徇。 張華尙不免, 豈特吾屬哉?」約最後捕得,責以反狀,不服,斬之。 **鰊臨刑憤叱,獨元興日** 殺訓弟仲褒、 訓死,士良

五三三三

列

傳

四

李

鄭

进

捕宗密將殺之,怡然曰:「與訓游久,浮屠法遇困則救,死固其分。」乃釋之。 有韶棄都外,男女孩嬰相雜廁。 淹旬,許京兆府瘞斂,作二大冢, 葬道左右。 是時暴尸旁午,

燕,雖倡樂雜沓,未嘗歡,顏慘不展,往往瞋目獨語,或裴回眺望 它日 ,帝頗思訓,數爲李石、鄭覃稱其才。 而宦豎盆熾,帝末 ,賦詩以見情,自是感疢,至 以制,居常忽忽不懌,每游

棄天下云。

將軍試 中所 煮黄 欲。 鄭注 金餌之,寖親遇,署衙推,從至徐州,稍參處軍政。 與語。」守澄始拒不納,旣坐,機辯橫生,鉤得其意,守澄大驚,引至後堂,語終夕,恨 ,絳州翼城人。世微賤,以方伎游江湖間。 爲愬籌事,未嘗不用,挾邪市權,舉軍患之。監軍王守澄白愬,愬曰:「然彼奇士也, 元和末,至襄陽,依節度使李愬。 注多藝,詭譎陰狡,億探人廋隱,輒

行, 離 ,後要官貴人亦趨往。 御史中丞宇文鼎劾奏,乃上道,過奉天,輒還。 守澄 入總樞密 ,與俱至京師,厚加贍卹,日夜爲守澄計議,因陰通路遺。 既陷宋申錫,搢紳側目。 金吾將軍孟文亮鎭邠寧,取爲司馬,不肯 御史復言注姦狀, 請付有司治罪。 初土纖巧者附 始,

相見晚。

謝愬曰:「誠如公言。」卽署巡官。

惡其人,欲因斥去之,卽表副昭義節度,至府不旬月,文宗暴眩,守澄復薦注,卽日召入,對 王涯用注力再輔政,又憚守澄,遏其奏。更擢通王府司馬、右神策判官,士議讙駭。 劉從諫

浴堂門,賜賚至渥。是夜,彗出東方,長三尺,芒耀怒急。俄進太僕卿,兼御史大夫。

注資貪沓,旣藉權寵,專鬻官射利,貲積鉅萬,不知止。 起第善和里,通永巷,飛廡複

學士,時訓已在禁中,日日議論帝前,相倡和,謀鉏翦中官,自謂功在晷刻,帝惑之。 躁夫有所干謝,日走門。李訓旣附注進,於是兩人權震天下矣。 壁,聚京師輕薄子、方鎭將吏,以煽聲焰。 間入神策,與守澄語必終日,或夜艾乃罷。 尋擢工部尚書、翰林侍講 乘是進 險人

退士大夫,撓骫朝法,賢不肖淆亂,以爲弛張當然。衆策其必亂。

天寶時環江有觀榭宮室,聞注言,卽詔兩神策治曲江、昆明,作紫雲樓、采霞亭,詔公卿得列 始詔王涯爲権茶使。又言秦、雅災,當興役厭之。帝嘗詠杜甫曲江辭,有「宮殿千門」語,意

帝問富人術,以権茶對。其法欲置茶官,籍民圃而給其直,工自擷暴,則利悉之官。

舍隄上。

衣粗裘,外示質素。始,李愬病痿,注治之有狀,守澄神其術,故中人皆昵愛。 注本姓魚,冒爲鄭,故當時號「魚鄭」,及用事,人廋謂曰「水族」。貌寢陋,不能遠視,常

俄檢校尚書左僕射、鳳翔隴右節度使, 詔月入奏事。 請寮屬於訓,訓與舒元興謀終殺

注 慮 踵 弘 ,慮其豪俊爲助 茂 爲掌 是日,度支、 書記。 舊制 更擇臺閣長厚者 京兆等供帳。 節 度使受命,戎服詣兵部謁 入辭,帝賜通天犀帶。 ,以錢可復爲副,李敬彝爲司馬 ,後寖廢 出都門,旗干折, ,注請復之,而王璠、郭行餘皆 盧 簡能、 注惡之。 蕭傑爲判官

佻險 暇聽。 度使王茂元、蕭弘皆勒 餘 武 以 人皆族 功 鎭 梟注 兵 贊注爲姦 仲清 悉禽 注 个,守澄 首光宅坊 矣。擢仲清內常侍 聞 訓敗 談之。 與前 上,褚中藥化 死 了,數顧 少尹陸暢用其將 乃還。 以以  $\stackrel{\frown}{=}$ 訓畏注專其功, 財,爲率更令、鳳翔 + 兵備 日瘞 其屬魏弘 月葬產水,注奏言:「守澄 非常。 乏, 遼咸陽 羣臣皆賀 李叔和策, 節勸注殺監 及是人相 乃先 令,叔 五 少尹 ,乃夷其家。 和檢 日 慶。 訪注 I舉事 遣逢 校太子賓客, 軍張仲清及大將賈克中等十 藉其貲 計 ,國勞舊,願 至京 注率 事,斬其首,兵皆潰去。 初, 師與訓 五 得絹百萬匹,它物稱是。 未獲注 一百騎 賜錢 身護喪。」因 至扶風 約 一,京師 千萬 被誅。 戒 暢 令 嚴 鳳 可復 ·餘人, | 羣官 韓遼 注 翔 涇 等 妻兄 行 知 者臨送,欲 注 軍 及親卒千 注敗前 其謀 鄭坊節 魏逢 驚撓 司 馬 尤 不

郞 亦斬之。 弘茂, 可 復 右拾遺。 徽 弘茂妻蕭,臨刑詬曰:「我太后妹,奴輩可來殺!」兵皆斂手,乃免。 子 也 爲禮 可復將 部 死, 鄓 中。 女年 簡能 + 四、爲所 ) 簡辭弟 趸, ,駕部 女日:「殺 員 外郎。 我父 傑 何 者 面 目以 倪 弟 生 也 1 抱 弘節勇而 主 客 미 復 員 外 求

萬

生

所

服

爲

蠅數萬

飛

多謀,始在鄜坊趙儋節度府,爲注所辟。 敬彝爲路隋所辟,隋卒,客江淮,以未赴免,因擢

兵部員外郎,終衢州刺史。

王涯字廣津,其先本太原人,魏廣陽侯冏之裔。祖祚,武后時諫罷萬象神宮知名,開元

時,以大理司直馳傳決獄,所至仁平。父晃,歷左補闕、温州刺史。

宰相,涯坐不避嫌,罷學士,再貶號州司馬,徙爲袁州刺史。憲宗思之,以兵部員外郞召,知 制誥,再爲翰林學士,累遷工部侍郎,封淸源縣男。 久之,以左拾遺爲翰林學士,進起居舍人。元和初,會其甥皇甫湜以賢良方正對策異等,忤 涯博學,工屬文。往見梁肅,肅異其才,薦於陸贄。 擢進士, 又舉宏辭, 再調藍田尉。

遠,或召不時至,詔假光宅里官第,諸學士莫敢望。俄拜中書侍郎、同中書門下平章事,坐 涯文有雅思,永貞、元和間、訓誥温麗,多所稟定。帝以其孤進自樹立,數訪逮,以私居

循默不稱職罷,再遷吏部侍郎。

言:「蜀有兩道直濤賊腹,一繇龍州淸川以抵松州(1),一繇綿州威蕃栅抵棲雞城,皆虜險要 穆宗立,出爲劍南東川節度使。時吐蕃寇邊,西北騷然,又略雅州,涯調兵拒之。上

列

開懷以示之,所以要約諄熟異它日者,則匈奴之銳可出,西戎之力衰矣。」帝不 地。 臣 願 不愛金帛,使信臣持節與北虜約曰:『能發兵深入者,殺某人, 取某地

必答拜 部侍 獨拜。」涯怒,卽建言:「與其廢禮,不如審官,請避位以存舊典。」帝難之,詔尙書省雜議。 使。 安得弗改 頹 射、代郡公。 言:「受册官 、缺則 開元禮 郎李固言謂:「禮, 文宗嗣位,召拜太常卿,以吏部尚書代王播,復統鹽鐵,政益刻急。 長慶三年,入爲御史大夫,遷戶部尙書、鹽鐵轉運使。 所 攝 以尊事天子, 避正 總,至著定之禮,則不可越,僕射由是也」。 請 始上,無不答拜者,而僕射亦受册,禮 而御史中丞宇文鼎以涯兼使職,恥爲之屈,奏:「僕射視事日,四品以上官不宜 京兆河南牧、州刺史、縣令上日,丞以下答拜。 君也;大夫於獻不親,君有賜不面拜,爲君之答已也。 如 (禮便。 」帝不能 別嫌明微也。 君於士不答拜, 決,涯竟用舊儀 議者謂 非其臣則答,不臣人之臣也;大夫於其臣, 『僕射代尙書令,禮當重。 凡百 不得異。 '按令,凡文武三品拜一品, 雖相承爲故事,然人情難安者, 寶曆時,復出領山南 此禮、令相戾, 古者列國君獨與大夫 歲中, 不可獨據。」又 司州縣皆有 進尙書右僕 四品拜二 西道節度 雖賤 副

建白:「如建中元年九月戊辰詔書,收隸天子鹽鐵。」詔可。久之,以本官同中書門下平章事 自 李 師道平,三道十二州皆有 銅 鐵官 ,歲取冶賦百萬,觀察使擅有之,不入公上。 涯始

合度支、鹽鐵爲一使,兼領之。乃奏罷京畿權酒錢以悅衆。 度支,眞拜司空。 知不可,不敢爭。 李訓敗,乃及禍。初,民怨茶禁苛急,涯就誅,皆羣詬詈,抵以瓦礫。 始變茶法,益其稅以濟用度,下益困,而鄭注亦議權茶,天子命涯爲使,心 俄檢校司空, 兼門下侍郎。

萬,取之彌日不盡。家書多與祕府侔,前世名書畫,嘗以厚貨鉤致,或私以官,鑿垣納之,重 服室宇,使略如古,貴戚皆不便,謗訕囂然,議遂格。然涯年過七十,嗜權固位,偷合訓等, 流泉,居常書史自怡,使客賀若夷鼓琴娛賓。」文宗惡俗侈靡,詔涯懲革。 涯條上其制,凡衣 不能絜去就,以至覆宗。是時,十一族貲貨悉爲兵掠,而涯居永寧里,乃楊憑故第,財貯鉅 「祕固,若不可窺者,至是爲人破垣剔取奩軸金玉,而棄其書畫於道。 籍田宅入于官。 |涯質狀頎省,長上短下,動舉詳華。 性嗇儉,不畜妓妾,惡卜祝及它方伎。 別墅有佳木

裴鐇家 告。 葬 見帝從容言:「向與臣 給告涯當貶, 、涯等十一人,各賜襲衣。 |進從弟||沐,客||工南,困窮來京師謁||涯,二歲乃得見,許以祿仕,難作,亦死。 子孟堅爲工部與中、集賢殿學士,仲翔太常博士,季琰校書郎,皆死。 ,鐇執以赴軍,仲翔日:「業不見容,當自求生,奈何反相噬邪?」聞者哀之。後令狐楚 忽夢涯自提首告曰:「族滅矣,惟若存,歲時無忘我。」女驚號墮地,乃以實 [並列者,旣族滅矣,而露胔不藏,深可悼痛。] 帝惻然,韶京兆尹薛元賞 仇士良使盜竊發其冢,投骨潤水。涯女爲竇糾妻,以痼 仲翔始匿侍御史

列傳

昭宗天復初,大赦,明涯、訓之冤,追復爵位,官其後裔。

良厚。 之,而李逢吉、竇易直愛餗才,得不斥。 郎,知制誥。陳美文辭,開敏有斷,然褊急,氣陵輩行。 賈餗字子美,河南人。少孤,客江、淮間。從父全觀察浙東,餗往依之,全尤器異 舉進士高第,聲稱籍甚。 又策賢良方正異等,授渭南尉、集賢校理。 李渤爲諫議大夫,惡其人,爲宰相言 擢累考功員外 八、收卹

得士七十五人,多名卿宰相。再遷京兆尹、兼御史大夫、姑臧縣男。 之,觀察使李德裕敕吏還,怏怏爲憾。入爲太常少卿,復知制誥,歷禮部侍郎,凡三典貢舉, 穆宗崩,告哀江、浙,道拜常州刺史。舊制,兩省官出使,得朱衣吏前導,餗赴州,猶用

俄爲集賢殿大學士、監脩國史。 温造以聞。 而 入。御史楊儉、蘇特固爭,鰊曰:「黃面兒敢爾!」儉曰:「公爲御史,能嘿嘿耶?」大夫 大和九年上已,詔百官會曲江。故事,尹自門步入,揖御史。陳自矜大,不徹扇蓋,騎 坐奪俸,不勝恚,求出,爲浙西觀察使。 既得位,會李宗閱得罪,而指儉、特爲黨,斥去之。 未行,拜中書侍郎、同中書門下平章事。

少與沈傳師善,傳師前死,嘗夢云:「君可休矣!」「鯨寤而祭諸寢,復夢曰:「事已爾,回

奈何! 竟罹其禍。 一 鰊本中立,不肯身犯顏排姦倖以及誅,與王涯實不知謀,人冤之。 」劉蕡以賢良方正對策,指中人爲禍亂根本,而蘇與馮宿、龐嚴爲考官,畏避不敢聞,

舒元興,婺州東陽人。 地寒,不與士齒。 始學,卽警悟。 去客江夏,節度使郗士美異其

秀特,數延譽。

用也。 也。 數人,而日必取二十,謬進者乃過半,謂合令格可乎? 今有司多者三十,少止二十,假令歲有百元凱,而日吾格取二十,謂求賢可乎?歲有才德纔 卿非賢不在選,而有司以隸人待之,誠非所以下賢意。 得入,列棘圍,席坐廡下,因上書言:「古貢士未有輕於此者,且宰相公卿繇此出,夫宰相公 詩賦微藝,斷離經傳,非所以觀人文化成也。臣恐賢者遠辱自引去, 元和中,舉進士,見有司鉤校苛切,旣試尙書,雖水炭脂炬飡具,皆人自將,吏一倡名乃 今貢珠貝金玉,有司承以棐笥皮幣,何輕賢者,重金玉邪?」又言:「取士不宜限數, 羅棘遮截疑其姦 而不肖者爲陛下 又非所以求忠直

勃按深害無所縱。 俄擢高第,調鄂尉,有能名。 再遷刑部員 外郎。 裴度表掌興元書記,文檄豪健,一時推許。 拜監察御史,

列傳第一百四 舒元興 王璠

代人作奏,起逆旅,卒爲名臣。今臣備位于朝,自陳文章,凡五晦朔不一報,竊自謂才不後 激卬,出示宰相,李宗閔以浮躁誕肆不可用,改著作郎,分司東都。 未始遺,拔犀之角,擢象之齒,豈主义等可比哉?盛時難逢,竊自愛惜。」文宗得書,高其自 奏暮召,而臣所上八萬言,其文鍛鍊精粹,出入今古數千百年,披剔剖抉,有可以輔敎化者 周、嘉貞,而無因入,又不露所緼,是終無振發時也。 漢主父偃、徐樂、嚴安以布衣上書, 元興自負才有過人者,銳進取。大和五年,獻文闕下,不得報,上書自言:「馬周、張嘉貞 朝

政,權知御史中丞。會帝錄囚,元興奏辨明審,不三月卽眞,兼刑部侍郎。專附鄭注,注所惡, 然加禮舊臣,外釣人譽。 舉繩逐之。月中,以本官同中書門下平章事。詭謀謬算,日與訓比,敗天下事,二人爲之也。 時李訓居喪,尤與元輿善。及訓用事,再遷左司郎中。御史大夫李固言表知雜事。固言輔 元興爲牡丹賦一篇,時稱其工。 先時,裴度、令狐楚、鄭覃皆爲當路所軋,致閑處,至是悉還高秩。 死後,帝觀牡丹,憑殿闌誦賦,爲泣下。

弟元褒、元肱、元迥,皆第進士。 元褒又擢賢良方正,終司封員外郎。 餘及誅。

王璠字魯玉。 元和初舉進士、宏辭皆中,遷累監察御史。儀宇峻整,著稱于時。 以起

居舍人副鄭覃宣慰鎭州。 長慶末,擢職方郎中,知制誥。

姓。 遏其事不 進,削其禮,至僕射就臺見中丞,或立廷中,中丞乃至。 上日班 時 上 李逢吉秉政,特厚璠,驟拜御史中丞。 -奏,但罷曆爲工部侍郎,而絳亦用太子少師分司東都,議者不直之。 初,蹯按武昭 |言:「左右僕射,師長庶官,開元時,名左右丞相,雖去機務,然猶總百司,署位不著 見百官,而中丞、御史在廷。 元和中, **璠挾所恃,頗横恣,道直左僕射李絳,交騎** 伊愼爲僕射, 憲度倒置,不可爲法。」逢吉憚絳正, 太常博士章謙以愼位緣恩

遷京兆尹。 久之,出爲河南尹。 自李諒後,政條隳斁,姦豪寖不戢,蹯頗脩舉,政有名。 時內廢小兒頗擾民, 璠殺其尤暴者,遠近畏伏。 入爲尙書右丞,再

獄

,意逢吉德已,及罷中丞,乃大望。

是傾 復召 爲 心於璠。 鄭注姦狀始露,宰相宋申錫、御史中丞宇文鼎密與蹯議除之,璠反以告王守澄,而注由 左 丞 ,拜戶部尙書,判度支, 進左丞,判太常 :卿事。 封祁縣男。 出爲浙西觀察使。 李宗閔得罪,璠亦其黨, 李訓得幸,璠於逢吉舊故,故薦之, 見注求解乃免。 訓

解辯,得釋。 |璠 子 退休,直弘文館,所善學士令狐定及劉軻、 退休誅。 璠鑿潤州外隍,得石刻曰:「山有石,石有玉,玉有瑕。」術家謂璠 劉軿、仲無頗、柳喜集其所 ,皆被縛。 定

將誅宦

人,乃授

河東節度使,已而敗。

列

祖名崟,生礎,礎生蹯,盡遐休,蓋其應云。

怒, 即解去。 郭行餘者,元和時擢進士。 河陽烏重胤表掌書記。 重胤葬其先,使誌冢,辭不爲,重胤

故事猶在。」栖楚不能答。 牧,故尹爲長史,司 行餘移書曰:「京兆府在漢時有尹,有都尉,有丞,皆詔自除,後循而不改。 擢累京兆少尹。 馬即都尉、丞耳。 嘗値尹劉栖楚,不肯避,栖楚捕導從繫之。自言宰相<u>裴度,頗爲</u>諭止。 今尹總牧務,少尹副焉,未聞道路間有下車望塵避者, 開元時, 諸王爲

遷楚、汝二州刺史、大理卿,擢邠寧節度使。 李訓在東都,與行餘善,故用之。

韓約,朗州武陵人,本名重華。 志勇決, 略涉書, 有吏幹。 歷兩池權鹽使、 虔州

<u>入</u>趾叛,領安南都護。 再遷太府卿。

貲尤多。

大和九年,代崔鄯爲左金吾衞大將軍, 居四日,起事。 約繇錢穀進,更安南富饒地,聚

河南尹丁公著上狀,加朝散大夫。然倨下傲上,出具弓矢呵道,宴賓客列倡優如大府,人皆 立言始築城郭,地所當者,皆富豪大賈所占,下令使自築其處, 「有不如約,爲我更完!」民憚其嚴,數旬畢。民無田者,不知有役。 設鎖絕汴流,姦盜屛息。 羅立言者,宣州人。貞元末擢進士,魏博田弘正表佐其府。改陽武令,以治劇遷河陰。 吏籍其闊狹, 號於衆日;

就其謀。 刺史召爲司農少卿,以財事鄭注,亦與李訓厚善。 改度支河陰留後,坐平糴非實,沒萬九千緡,鹽鐵使惜其幹,止奏削兼侍御史。 訓以京兆多吏卒,擢爲少尹,知府事,以 繇廬州

惡之,以是稀遷,然自放不衰。

知雜 事。 李孝本,宗室子。 元 興入相,擢權知中丞事 元和時第進士, 累遷刑部郎中。 依訓得進, 於是御史中丞舒元興引

旣行,命師邕爲詔賜六道殺之,會訓敗,不果。 部員外郎、翰林學士。 顧師邕字睦之,少連子。 訓遣宦官田全操、 性恬約,喜書,寡游合。 劉行深、周元稹、薛士幹、似先義逸、 師邕流崖州,至藍田賜死 第進士,累遷監察御史。 劉英誗按邊 李訓薦爲水

列

傳第

百四四

王璠

校勘記

將作監改左金吾衞將軍。 李貞素, 嗣道王實子。 韓約之詐,貞素知之,流儋州,至商山賜死 性和裕, 衣服喜鮮明。 漢陽公主妻以季女。 累遷宗正少卿,由

李德裕嘗言天下有常勢,北軍是也。訓因王守澄以進,此時出入北軍,若以上意說諸將,易 得齒徒隸,尙才之云!」世以德裕言爲然。傳曰:「國將亡,天與之亂人。」若訓等持腐株支 鄭覃稱:「訓稟五常性、服人倫之教,不如公等,然天下奇才,公等弗及也。」德裕曰:「訓會不 大廈之頭,天下爲寒心豎毛,文宗偃然倚之成功,卒爲閹謁所乘,天果厭唐德哉! 如靡風, 贊曰:李訓浮躁寡謀,鄭注斬斬小人,王涯暗沓,舒元輿險而輕,邀幸天功,寧不殆哉 而返以臺、府抱關游徼抗中人以搏精兵,其死宜哉!文宗與宰相李石、李固言、

#### 校勘記

一繇龍州淸川以抵松州 四二及舊書卷四一地理志、簑宇記卷八四,淸川縣屬龍州,隸劍南道。此當作「龍州」,據改。 「龍州」,各本原作「龍川」,舊書卷一六九王涯傳作「龍州」。 按本書卷

## 書卷一百八十

### 列傳第一 百五

李德裕 燁 延古 崔嘏 丁柔立

李德裕字文饒, 元和宰相吉甫子也。少力于學,旣冠,卓犖有大節。 不喜與諸生試有

司,以蔭補校書郎。 河東張弘靖辟爲掌書記。 府罷,召拜監察御史。

穆宗即位,擢翰林學士。

更其手。 數召見,賚獎優華。 帝怠荒于政,故戚里多所請丐,挾宦人詗禁中語,關託大臣。

帝爲太子時,已聞吉甫名,由是顧德裕厚,凡號令大典册,皆

德裕建言:「**舊**制, 是等無佗材, ,駙馬都尉與要官禁不往來。 直洩漏禁密, 交通中外耳。 請白 開元中, [事宰相者,聽至中書,無輒詣第。]帝然 訶督尤切,今乃公至宰相及大臣私

再進中書舍人。 未幾,授御史中丞。

列 傳

第

始,吉甫相憲宗, 百 五 牛僧孺、李宗閔對直言策,痛詆當路,條失政。 李 德 裕 吉甫訴於帝,且泣,有

實繼之。 與元稹相怨,奪其宰相而已代之。 司皆得罪,遂與爲怨。吉甫又爲帝謀討兩河叛將,李逢吉沮解其言,功未旣而吉甫卒,裴度 逢吉以議不合罷去,故追銜吉甫而怨度,擯德裕不得進。 欲引僧孺益樹黨,乃出德裕爲浙西觀察使。 至是,間帝暗庸,試度使 俄而僧孺入

相,由是牛、李之憾結矣。

數年,惡俗大變。 德裕擇長老可語者,諭以孝慈大倫, 患難相收不可棄之義, 使歸相曉敕, 財贍兵,雖儉而均,故士無怨。 初,潤州承王國淸亂,竇易直傾府庫賚軍,貲用空彈,而下益驕。 又按屬州非經祠者,毁千餘所,撤私邑山房千四百舍,寇無所廋蔽。 '再期,則賦物儲 物。 南方信磯巫,雖父母癘疾,子棄不 德裕自檢約, 違約者顯寘以法。 以留州 ·敢養。

送使。<br />
今存者惟留使錢五十萬緡,率歲經費常少十三萬,軍用褊急。<br />
今所須脂盝粧具,度 違詔旨,不乏軍興,不疲人,不斂怨,則前敕後詔,咸可瓊承。」不報。方是時,罷進獻不閱 用銀二萬三千兩,金百三十兩,物非土產,雖力營索,尙恐不逮。願詔宰相議,何以俾臣不 素號富饒,更李錡、薛苹,皆権酒於民,供有羨財。元和詔書停権酤,又赦令禁諸州羨餘無 『常貢之外, 敬宗立,侈用無度,詔浙西上脂盏粧具,德裕奏:「比年旱災,物力未完。乃三月壬子赦 悉罷進獻』。此陛下恐聚斂之吏緣以成姦,彫實之人不勝其敝也。 l。 本道

月,而求貢使者足相接于道,故德裕推一以諷它。

線,元帝罷輕纖服,故仁德慈儉,至今稱之。 願陛下師二祖容納,遠思漢家恭約,裁賜節減, 則海隅蒼生畢受賜矣。」優詔爲停。 **尙以勞人損德爲言,豈二祖有臣如此,今獨無之?蓋有位者蔽而不聞,非陛下拒不納也。** 半臂、造琵琶捍撥、鏤牙筩於益州,蘇頤不奉詔,帝不加罪。夫鵁鶄、鏤牙,微物也。二三臣 且立鵝天馬,盤條掬豹,文彩怪麗,惟乘輿當御。今廣用千匹,臣所未諭。 昔漢文身衣弋 賜詔嘉歎。玄宗時,使者抵江南捕鵁鶄、翠鳥,汴州刺史倪若水言之,卽見褒納。皇甫詢織 又詔索盤條繚綾千匹,復奏言:「太宗時,使至凉州,見名鷹,諷李大亮獻之,大亮諫止,

萬,不爲細變。」有詔徐州禁止。 即顯募江淮間,民皆曹輩奔走,因牟擷其財以自入。德裕劾奏:「智興爲壇泗州,募顧度者 人輸錢二千,則不復勘詰,普加髠落。自淮而右,戶三丁男,必一男剔髮,規影徭賦,所度無 臣閱度江者日數百,蘇、常齊民,十固八九,若不加禁遏,則前至誕月,江淮失丁男六十 自元和後,天下禁毋私度僧。徐州王智興給言天子誕月,請築壇度人以資福,詔可。

1,此古之賢人篤於事君者也。 時帝昏荒,數游幸,狎比羣小,聽朝簡忽。 德裕上丹扆六箴,表言:「『心乎愛矣,遐不謂 夫迹疏而言親者危,地遠而意忠者忤。臣竊惟念拔自先

辭皆明直婉切。帝雖不能用其言,猶敕章處厚諄諄作詔,厚謝其意。然爲逢吉排笮,訖不 怪珍也; 主,亦由是也。」其一日寶衣,諷視朝希晚也;二日正服,諷服御非法也;三日罷獻,諷斂求 聖,徧荷寵私,不能竭忠,是負靈鑒。臣在先朝,嘗獻大明賦以諷,頗蒙嘉採。 四日納誨,諷侮棄忠言也;五日辨邪, ,諷任羣小也;六日防微,諷僞游輕出也。 今日盡節明

祥,古人所禁。請下觀察使令狐楚塡塞,以絕妄源。」從之。 欺詸,往者日數十百人。 德裕嚴勒津邏捕絕之,且言:「昔吳有聖水,宋、齊有聖火,皆本妖 旣行若飲,病者不敢近葷血,危老之人率多死。而水斗三十千,取者益它汲轉鬻於道,互相 時亳州浮屠詭言水可愈疾,號曰「聖水」,轉相流聞,南方之人,率十戶僦一人使往汲。

之聖者,莫若軒轅、孔子。 昔軒轅問廣成子治身之要,曰:『無視無聽,抱神以靜,形將自正。 歲,帝遣宦者至浙西迎之,詔在所馳馹敦遣。德裕上疏曰:「道之高者,莫若廣成、玄元,人 無益於子之身。』陛下脩軒后之術,物色異人,若使廣成、玄元混迹而至,告陛下之言,亦無 無勞子形,無搖子精,乃可長生。 愼守其一,以處其和。 故我脩身千二百歲矣,形未嘗衰。』 又曰:『得吾道者上爲皇,下爲王。』玄元語孔子曰:『去子之驕氣與多欲、態色與淫志,是皆 帝方惑佛老,禱福祈年,浮屠方士,並出入禁中。狂人杜景先上言,其友周息元壽數百

術, 玄宗時孫 世 出 於此。 天子 愼毋及藥,則九廟尉悅矣。」息元果誕譎不情, 雖 甑 好方士, 臣慮今所得者,皆迂怪之士,使物淖冰,以小術欺聰明, 生皆能作黃金,二祖不之服, 未有御其藥者。 故漢 人稱黃金可 豈非以宗廟爲重乎?**儻必致眞**隱, 自言與張果、葉靜能游。 成, 以爲飲食器則壽。 如文成 帝 五利者也。 高宗 願止 詔畫 時劉道合、 師保和之 工肖狀爲

德裕 以觀之,終帝世無它驗。 大和 爲鄭滑節度使, 三年,召拜 引僧 兵部侍 孺 協 郎。 文宗卽位, 力, 裴度薦材堪宰相, 罷度政事。 乃逐之。 怨相濟,凡德裕所善,悉逐之。 而李宗閔以中人助,先秉政, 於是二人權 且得君,出

圖

**雯天下,黨人牢不可破矣。** 

生 遺。 左, 盜,其策非是,養成癰疽 商 盡爲蠻有。 西道 德裕 今瘢夷尚 踰 凡虜之情 年 興 至, 吐蕃接者圖 徙 始, 剣南 則完殘奮怯, 1新,非痛矯革,不能刷 偽 盡 知 章皋招來南 西 川 之右。 之。 ,弟未決耳。 蜀自 皆有條次。 又料擇伏瘴舊潦與州兵之任戰者,廢遣獰耄什三四, 詔, 南韶 其部落衆寡, 復巂州, 入寇, 一方恥。 至元穎時,遇隙 成都既南失姚 敗杜元穎, 傾內資結 饋餫遠 乃建籌邊樓, ·蠻好, 邇 而發, 協, 而郭釗代之,病不 曲 按南道 示以 折 西亡維、 故長驅深入,蹂剔 咸 具。 戰陣文法。 山川險要與蠻相 |松, 乃召習 ·能事, 由 l 清溪下 邊事 德裕以皋啓戎資 千 民失職, ,者與之指畫 单, 沫水 士無敢怨。 入 者 蕩 而左, 圖之 無孑

列

之阻;作禦侮城,以控榮經掎角勢;作柔遠城,以阨西山吐蕃;復邛崍關,徙巂州治臺登, 弩 ; 戰,貸勿事,緩則農,急則戰,謂之「雄邊子弟」。其精兵曰南燕保義、保惠、兩河慕義、左右連 又請甲人於安定,弓人河中, 以奪蠻險。 騎士曰飛星、鷙擊、奇鋒、流電、霆聲、突騎。總十一軍。築杖義城,以制大度、青溪關 弩人浙西。 繇是蜀之器械皆犀銳。 率戶二百取一人, 使習

者不涉炎月,遠民乃安。 至,地苦瘴毒, 輦夫多死。 舊制,歲杪運內粟贍黎、巂州,起嘉、眉,道陽山江,而達大度,乃分餉諸戍。常以盛夏 德裕命轉邛、雅粟,以十月爲漕始,先夏而至,以佐陽山之運,饋

自如,德裕下令禁止。蜀風大變。 父母。毀屬下浮屠私廬數千,以地予農。蜀先主祠旁有猱村,其民剔髮若浮屠者,畜妻子 |蜀人多鬻女爲人妾,德裕爲著科約:凡十三而上,執三年勞;下者,五歲;及期則歸之

悉怛謀於虜,以信所盟,德裕終身以爲恨。 里,因山爲固,東北繇索叢嶺而下二百里,地無險,走長川不三千里,直吐蕃之牙,異時戍 以制虜入者也。 於是二邊寖懼, **德裕旣得之**, 南詔請還所俘掠四千人,吐蕃維州將悉怛謀以城降。維距成都四百 即發兵以守, 會監軍使王踐言入朝,盛言悉怛謀死,拒遠人向 且陳出師之利。僧孺居中沮其功, 命返

帝亦悔之,即以兵部尚書召,俄拜中書門下平章事,封贊皇縣伯。

江淮大賈,使主堂廚食利,因是挾貲行天下,所至州鎭爲右客,富人倚以自高。 進,雖聖賢經營,無繇成功。」俄而宗閔罷,德裕代爲中書侍郎、集賢殿大學士。 臺乃聽。凡罷朝,繇龍尾道趨出。」遂無輒至閣者。又罷京兆築沙隄、兩街上朝衞兵。 爲太子太傅,招所善載酒集宗閔閣,酣醉乃去。至德裕,則喻御史:「有以事見宰相,必先白 言:「朝廷惟邪正二途,正必去邪,邪必害正。然其辭皆若可聽,願審所取舍。 故事,丞郎詣宰相,須少間乃敢通,郎官非公事不敢謁。 李宗閱時,往往通賓客。 不然,二者並 德裕一 始, 一省符 切罷 李聽 嘗建

嘗言之。」對曰:「聖賢則有改過,若訓天資姦邪,尙何能改?逢吉位宰相,而顧愛兇回,以累 陛下,亦罪人也。」帝語王涯別與官,德裕搖手止涯,帝適見,不懌,訓、注皆怨,卽復召宗閔 傾頹也。』今訓小人,頃咎惡暴天下,不宜引致左右。」帝曰:「人誰無過,當容其改。且逢吉 官,德裕曰:「昔諸葛亮有言:『親賢臣,遠小人,漢所以興隆也。 可止。」更徙鎭海軍以代王璠。 輔政,拜德裕爲興元節度使。 後帝暴感風, 害語言。 鄭注始因王守澄以藥進,帝少間, 入見帝, 自陳願留闕下, 復拜兵部尚書, 宗閱奏:「命已行,不 又薦|李訓使待詔, 帝欲授諫 親小人,遠賢士,後漢所以

列

百五

李德

裕

軌。 不宜 爭鄭注處。 嘗 起爲浙西觀察使。 行下,日:「當此時, 客分司東都。 進鄭注, 宗閔 先是 有 帝惑其言, 璠 此。 入爲尙書左丞, 大和中, 以罪斥, 而德裕欲殺之,今當以官與何人?」填懼而出。 讒焰少衰。 開成初,帝從容語宰相:「朝廷豈有遺事乎? 召王涯 **潭王養母杜仲陽歸浙西**, 後對學士禁中,黎埴頓首言:「德裕與宗閔皆逐,而獨三進官。」帝曰:「彼 而注、 兄弟不相保, 、李固言、路隋質之。注、蹯、漢三人者語益堅,獨隋言:「德裕大臣, 而漳王以罪廢死, 遂貶德裕爲太子賓客,分司東都。 訓等亂敗。 況申錫邪? 帝追悟德裕以誣構逐, 因與戶部侍郎李漢共譖德裕嘗路仲陽導王爲不 有韶在所存問。 有司爲我褒顯之。」又曰:「德裕 ?」衆進以宋申錫對。 復貶袁州長史,隋亦免宰相。未 又指坐展前示宰相曰:「此德裕 時德裕被召,乃檄留後使如詔 乃徙滁州 刺 史。 亦申錫 帝俛 又以太子賓 比 首涕數 也。」

之,其所殺數最多。」卽自劾「始至鎭,失於用例,不敢妄」。遂待罪,有韶釋之。 殺半數以備水旱、助軍費。 魏謇等共劾奏德裕挾私怨沮傷僧孺, 卽 馳去。 德裕三在浙西,出入十年,遷淮南節度使,代牛僧孺。 淮南府錢八十萬緡,德裕奏言止四十萬,爲鷺用其半。 因索王播、段文昌、崔從相授簿最具在。 帝置章不下, 詔德裕覆實。 僧孺聞之, 以軍事付其副 僧孺訴于帝,而諫官姚合、 德裕上言:「諸鎭 惟從死官下, 更代,例 僧孺代 張鷺,

列傳第一百五 李德裕

治本也。」 姚崇、宋璟不能逾。至李林甫秉權乃十九年,遂及禍敗。是知亟進罷宰相,使政在中書,誠 小過必知而改之,君臣無猜,則讒邪不干其間矣。」又言:「開元初,輔相率三考輒去,雖 材者屬任之。政無它門,天下安有不治?先帝任人,始皆回容,積纖微以至誅貶。誠使雖 所與圖事者,李齊運、裴延齡、韋渠牟等,訖今謂之亂政。夫輔相有欺罔不忠,當亟免,忠而 造黨與、亂視聽,故上疑而不專。政去宰相則不治矣。在德宗最甚,晚節宰相惟奉行詔書, 視若堯、舜,寖久則不及初,陛下知其然乎?始一委輔相,故賢者得盡心。 久則小人並進, 知人不能舉,舉不能任,任而又雜以小人,害霸也。「太、玄、德、憲四宗皆盛朝,其始臨御,自 謂治亂繫信任,引齊桓公問管仲所以害霸者,仲對琴瑟笙竽、弋獵馳騁, 故正人一心事君,無待於助。邪人必更爲黨,以相蔽欺。君人者以是辨之, 之?請借物爲諭,松柏之爲木,孤生勁特,無所因倚。 後朝廷治。 武宗立,召爲門下侍郎、同中書門下平章事。旣入謝,卽進戒帝:「辨邪正,專委任,而 臣嘗爲先帝言之,不見用。夫正人旣呼小人爲邪,小人亦謂正人爲邪,何以辨 蘿蔦則不然,弱不能立,必附它木。 則無惑矣。」又 非害霸者;惟

延英,嗚咽流涕曰:「昔太宗、德宗誅大臣,未嘗不悔。 臣欲陛下全活之,無異時恨。 使二人 帝嘗疑楊嗣復、 李珏顧望不忠,遣使殺之,德裕知帝性剛而果於斷,卽率三宰相見

罪惡暴著, 日:「如令諫官論 天下共疾之。」帝不許,德裕伏不起。 爭,雖千疏,我不赦。」德裕重拜。 帝曰:「爲公等赦之。」德裕降拜升坐。 因追還使者,嗣復等乃免。

天之渝,不敢馳驅。』願節田游,承天意。」尋册拜司空。 『君就房有常節。』惟深察古誼,毋繼以夜。 時帝數出畋游,暮夜乃還,德裕上言:「人君動法於日, 側聞五星失度,恐天以是勤勤儆戒。 故出而視朝,入而 滅息。 詩日:『敬 傳曰:

确,無不敗。請詔牟無聽諸戎計。」帝於是貸粟三萬斛。 恃也。 夫見利則進,遇敵則走,雜虜之常態,孰肯爲國家用邪? |天德兵素弱,以一城與勁虜 與之食,以待其變。」陳夷行曰:「資盜糧,非計也,不如擊之便。」德裕曰:「沙陀、退渾,不可 奏。德裕曰:「回鶻於國嘗有功,以窮來歸,未輒擾邊,遽伐之,非漢宣帝待呼韓之義。不如 重器易粟於邊。 回鶻自開成時爲點戞斯所破。會昌後,烏介可汗挾公主牙塞下,種族大飢,以弱 退渾、党項利虜掠,因天德軍使田牟上言,願以部落兵擊之。議者請可其

問以計,德裕曰:「把頭峯北皆大磧,利用騎,不可以步當之。今鳥介所恃公主爾,得健將出 天德城以舍公主,帝不許。乃進逼振武保大栅杷頭峯,以略朔川,轉戰雲州,刺史張獻節嬰 會唱沒斯殺赤心以降,赤心兵潰去。於是回鶻勢窮,數丐羊馬,欲藉兵復故地,又願假 回鶻乃大掠,党項、退渾皆保險莫敢拒。帝益知向不許田牟用二部兵之效,乃復

得。」帝卽以方略授劉沔,令雄邀擊可汗於殺胡山,敗之,迎公主還, 奇奪還之,王師急擊,彼必走。 今銳將無易石雄者,請以藩渾勁卒與漢兵銜枚夜擊之,勢必 回鶻遂敗。 進位司 徒。

之地 棄四 安 置 自 師 河 西 都護,以萬人往戍, 七千里, 鎭 乎? 隴 及 憂 入吐蕃,則道出 臣以 是持 安東,皆不願貪外以耗內。 《斯遣使來,且言攻取安西、北庭,帝欲從黠戞斯求其地, 北庭五千里。 實費 爲縱得之,無用也。 (市虚事,滅 何所興發, 回鶻。 異時繇 回鶻今破滅,未知黠戞斯果有其地邪?假令安西 回鶻, 河西、隴右抵玉門關,皆我郡縣,往往 何道饋輓?彼天德、振武於京師近,力猶苦不足,況七千里 昔漢魏相 此三臣者,當 而又生之。」帝乃 請罷田 ·全盛時, 車師, 咋 賈捐之請棄珠崖, 尚欲棄割以肥中國,況 德裕曰:「不可。 有兵,故能緩急調發。 近狄仁傑 可得, 久沒甚遠 安西距京 亦 即復

使, 也。 以 大臣守之。 符節 三鎭 便以 澤路 如令魏、鎭不 付從諫。 兵屬旗 劉 從諫 李抱真始建昭義軍,最有功, 誅種 死,其從子頹擅留事 |大和時,擅兵長子,陰連訓、注,外託効忠, 與,則破 捨 而 其各以兵會。』」帝然之。 不討, 矣。 無以示四方。」帝曰:「可勝乎? 夫三鎮 (世嗣) 以邀節度, 德宗尚不許其子 列 乃以李回持節諭王元逵、 聖許之。 德裕 日:「澤路內地, 請使近臣明告以:『澤路命帥 繼 請除君側。 及劉悟死,敬宗 對 日:「」 河朔, 非河朔比,昔皆儒循 及 一有狗馬疾,謝醫 何弘敬 種所 恃以 方怠於政, 皆聽命 一、不得 脣 齒 拒 涿

下哉。 以破也。」它宰相亦媕婀趨和,德裕獨曰:「諸葛亮言曹操善爲兵,獨五攻昌霸,三越漅,況其 始議用兵,中外交章固爭,皆曰:「悟功高,不可絕其嗣。 兵已出,而弘敬逗留持兩端。德裕建遣王宰以陳、許精甲,假道於魏以伐隱。 不利,臣請以死塞責!」帝忿然曰:「爲我語於朝,有沮吾軍議者,先誅之!」羣論遂息。元逵 兵請自涉潭取磯、路。 然贏縮勝負,兵家之常,惟陛下聖策先定,不以小利鈍爲浮議所搖,則有功矣。 又從諫畜兵十萬, 栗支十年, 未可 弘敬聞,遽勒 有如

趣王 十五 當以財,李石以人欠一縑,故兵亂,石無以索之,弁何得邪?太原一鎧一戟,舉送行營,安致 謬曰:「弁兵多,屬明光甲者十五里。」<u>德裕詰曰:「李石以太原無兵,故調橫水卒千五百使成</u> 檢社,)弁因以亂,渠能列卒如此多邪?」則曰:「晉人勇,皆兵也,募而得之。」德裕曰:「募士 里明光乎?」使者語塞。德裕卽奏:「弁賤伍,不可赦。 議者頗言兵皆可罷。帝遣中人馬元實如太原,偵其變。弁厚賄中人,帳飮三日。 會橫水戍兵叛,入太原,逐其帥李石,奉裨將楊弁主留事。方是時,頹未下,朝廷益爲 河東監軍呂義忠聞,即日召檢社卒入斬弁,獻首 如力不足,請捨稹而誅弁。」遽

德裕每疾貞元、大和間有所討伐,諸道兵出境,即仰給度支,多遷延以困國力。 或與賊

嘗爲旗 約, 等下冊、洺、礠,而稹氣索矣。 生 臣 蹙,又販其族以邀富貴,不誅,後無 子儀乃不 **履首降。** 原 · 字日三趙,意將傳嫡,不及支庶。 令解 「守舊秩足矣。」帝曰:「吾恨無官酬公, 用者,悉誅之。策功拜太尉, 守備,得一縣一屯以報天子,故師無大功。因請敕諸將,令直 · 敢拜。 帝問:「何以處誼?」德裕 近王 智興、李載義皆超拜保、傅, 俄而高文端歸命,稱櫃糧乏,皆女子接發哺兵。 以懲惡。」帝曰:「朕意亦爾。」因詔石雄入路,盡取誼等及 日:「槇豎子, 進封趙國公。 臣前益封,已改中山。 毋固辭。」德裕又陳:「先臣 安知反?職誼爲之。今三州已降, 蓋 德裕固讓,言、「唐興, 太尉惟七人, 尚父 重惜此官。 臣先世皆嘗居汲, 裴度爲司徒十年, 亦不遷 |取州,勿攻縣。 故元逵 封於趙, 未幾, 願得封衞。」 冢孫寬中始 而 郭 誼持 種 窮

共、鮫、 其後, 也。 與顏回 隨 會 繼 賢人君 帝 武帝 一、子貢 糠 兜 嘗從容謂宰相曰:「有人稱孔子其徒三千亦爲黨,信乎? 而 納 所言皆 諫, 與舜、禹 子 更相 不然, 司 聽 馬侯、叔 稱譽,不爲朋黨 雜處堯朝,共工、 忠於國 黯 向 弘 則 雖並進,然廷詰齊人少情,譏其布被爲詐, 比 同 辽 心; ; 事 君, 禹、稷與皋陶 聞於義 **驩兜則爲黨** 不爲黨 則 同志,退而 也。 [轉相] ,舜、禹不爲黨。 公孫 汲 引,不爲 各行 弘 每與汲黯請間 其己, .」德裕曰:「昔 比 小 周。 人 不 미 相 則先發後繼,不爲黨 無邪 交以 與 比 黯 心也。」 劉向云:『孔子 先發 私 周, 迭為掩蔽 之,弘推 趙宣子、 臣 嘗以

從之,遂改

衞

國公。

列

傳

第

百

五

李

徳

裕

乎?陛下以是察之,則姦僞見矣。」 馬馳驅,以趨權勢,晝夜合謀,美官要選,悉引其黨爲之,否則抑壓以退。仲尼之徒,有是 仲尼之徒,唯行仁義。今議者欲以比之,罔矣。臣未知所謂黨者爲國乎?爲身乎?誠爲 公子有信陵、平原、孟嘗、春申,游談者以四豪爲稱首,亦各有客三千,務以譎詐勢利相 朋黨始於甘陵二部。及甚也,謂之鉤黨,繼受誅夷。以王制言之,非不幸也。周之衰,列國 國,不爲黨也。漢朱博、陳咸相爲腹心,背公死黨。 國邪,隨會、叔向、汲黯、房、杜之道可行,不必黨也。今所謂黨者,誣善蔽忠,附下罔上,事 太宗與房玄齡圖事,則日非杜如晦莫能籌之。 及如晦在焉,亦推玄齡之策。 周福、房植各以其黨相傾,議論相軋,故 則同心圖

靜。』今弘質爲人所敎而言,是圖柄臣者也。 且蕭望之漢名儒,爲御史大夫,奏云:『歲首,日 也。』大和後,風俗蹇敞,令出於上,非之在下。此敞不止,無以治國。匡衡曰:『大臣者,國 月少光, 咎在臣等。』宣帝以望之意輕丞相, 下有司詰問。 貞觀中, 監察御史陳師合上言: 家股肱,萬姓所瞻仰,明主所愼擇也。』傳曰:『下輕其上爵,賤人圖柄臣,則國家搖動而人不 者死,留令者死,不從令者死。五者無赦』。又曰:『令在上而論可否在下,是主威下繫於人 重於令。令重君尊,君尊國安。治人之本,莫要於令。』故曰『虧令者死,益令者死,不行令 時韋弘質建言,宰相不可兼治錢穀,德裕奏言:「管仲明於治國,其語曰:『國之重器,莫

謀隱慝,則人人皆得上論。 至於制置職業,人主之柄,非小人所得干。 古者朝廷之士,各守 官業,思不出位。 『人之思慮有限,一人不可總數職。』太宗曰:『此欲離間我君臣。』斥之嶺外。臣謂宰相有姦 人中來,當遏絕之。」德裕大意,欲朝廷尊,臣下肅,而政出宰相,深疾朋黨,故感憤切言之。 弘質賤臣,豈得以非所宜言妄觸天聽!是輕宰相。陛下照其邪計,從黨

餘員,衣冠去者皆怨。時天下已平,數上疏乞骸骨,而星家言熒惑犯上相,又懇丐去位,皆 不許。當國凡六年,方用兵時,決策制勝,它相無與,故威名獨重於時。 又嘗謂:「省事不如省官,省官不如省吏,能簡冗官,誠治本也。」乃請罷郡縣吏凡二千

令狐綯、崔鉉皆素仇,大中元年,使黨人李咸斥德裕陰事。 年,卒,年六十三。 潮州司馬。明年,又導吳汝納訟李紳殺吳湘事,而大理卿盧言、 髮爲森豎。」翌日,罷爲檢校司徒、同中書門下平章事,荆南節度使。俄徙東都留守。白敏中、 魏扶言:「紳殺無罪,德裕徇成其冤,至爲黜御史,罔上不道。」乃貶爲崖州司戶參軍事。 「執政皆其憾,可乎?」旣夕,又夢,綯懼曰:「衞公精爽可畏,不言,禍將及。」 白于帝,得以 宣宗卽位, 德裕奉册太極殿。帝退謂左右曰:「向行事近我者, 非太尉邪? 每顧我, 毛 德裕旣沒,見夢令狐綯曰:「公幸哀我,使得歸葬。」綯語其子滈, 故以太子少保分司 東都, 刑部侍郎馬植 、御史中丞 高日: 再貶 明

喜。 德裕: 常以經綸 性 孤 天下自爲,武宗知而能任之,言從計行,是時王室幾中興。 峭,明辯有風采,善爲文章。 雖至大位, 猶不去書。 其謀議援古爲質,衮衮可

卷旗 軍不得干軍要,率兵百人取一以爲衞。 四下,宰相不豫。 去,大兵隨以北。 先是,韓全義敗於蔡,杜叔良敗於深,皆監軍宦人制其權,將不得專進退,詔書一日三 又諸道銳兵票士,皆監軍取以自隨,每督戰,乘高建旗自表,師小不勝,輒 繇是王師所向多負。 自是,號令明壹,將乃有功。 至討回鶻、澤路,德裕建請詔書付宰司乃下,監

河朔 於事 日:「學士不能盡吾意。」伐劉稹也, 午漏下還第,休沐輒如令,沛然若無事時。 元逵等情得,皆震恐思效。已而三州降,賊遂平。 納 誤威 亡命,今視之何益? 而能伐謀也。三鎭每奏事,德裕引使者戒敕爲忠義,指意丁寧,使歸各謂其帥道之,故 元和後數用兵,宰相不休沐,或繼 不敢慢。後除浮屠法,僧亡命多趣幽州,德裕召邸吏戒曰:「爲我謝張仲武 」仲武懼,以刀授居庸關吏曰:「僧敢入者斬 韶王元逵、 火乃得罷。德裕在位,雖遽書警奏,皆從容裁決,率 其處報機急,帝一切令德裕作詔, 何弘敬曰:「勿爲子孫之謀, 帝每稱魏博功,則顧德裕道詔語,各其切 存輔車之勢。」 德裕數辭,帝 劉從

帝 旣 數討 恐傷威重。 叛有功,德裕慮忲于武,不可戢, 養由基古善射者,柳葉雖百步必中,觀者曰:『不如少息,若弓撥矢 即奏言:「曹操破袁紹於官度, · 追奔, 自謂

鉤 `,前功皆棄。』陛下征伐無不得所欲,願以兵爲戒,乃可保成功。」帝嘉納其言。

帝曰:「歸眞我自識,顧無大過,召與語養生術爾。」對曰:「小人於利, 方士趙歸眞以術進, 德裕諫曰:「是嘗敬宗時以詭妄出入禁中, 人皆不願至陛下前。」 若蛾赴燭。 向見歸眞

之門,車轍滿矣。」帝不聽。 于是挾術詭時者進,帝志衰焉。

所居安邑里第,有院號起草,亭日精思,每計大事,則處其中,雖左右侍御不得豫。

喜飲酒,後房無聲色娛。生平所論著多行于世云。

子燁,仕汴宋幕府,貶象州立山尉。懿宗時,以赦令徙郴州。 餘子皆從死貶所。

燁子延古,乾符中,爲集賢校理,擢累司勳員外郎,還居平泉。 昭宗東遷,坐不朝謁,貶

衞尉主簿。

復以制策歷邢州刺史。 德裕之斥,中書舍人崔嘏,字乾錫, 誼士也。 劉稹叛,使其黨裴問戍于州,嘏說使聽命,改考功郎中,時皆謂遴 坐書制不深切,貶端州刺史。 嘏舉進士,

員。 至是,作詔不肯巧傅以罪。

吳汝納之獄,朝廷公卿無爲辨者,惟淮南府佐魏鋤就逮,吏使誣引德裕,雖痛楚掠,終

又丁柔立者, 德不從, 竟貶死嶺外。

列 傳 一百 德裕當國時, 或薦其直淸可任諫爭官, 不果用。 五 李 德 裕 大中初,爲左拾遺。 五三四三

旣

德裕被放, 柔立內愍傷之,爲上書直其冤,坐阿附,貶南陽尉。

懿宗時,韶追復德裕太子少保、衞國公,贈尚書左僕射,距其沒十年。

以衆寡爲勝負矣。欲國不亡,得乎?身爲名宰相,不能損所憎,顯擠以仇,使比周勢成,根 邪正,再被逐,終嬰大禍。 兩進,進必務勝,而後人人引所私,以所私乘狐疑不斷之隙,是引樂、跖、孔、顏相閧于前,而 株牽連,賢智播奔,而王室亦衰,寧明有未哲歟?不然,功烈光明,佐武中興,與姚、宋等矣。 贊曰:漢劉向論朋黨,其言明切,可為流涕,而主不悟,卒陷亡辜。 嗟乎, 朋黨之興也, 殆哉! 根夫主威奪者下陵, 聽弗明者賢不肖 德裕復援向言,指質

## **唐書卷一百八十一**

## 列傳第一百六

#### 陳夷行 李紳 李讓夷 曹確 劉瞻 助

謁,爲太子講說。數遷至工部侍郞。 遷司封員外郞,凡再歲,以吏部郞中爲翰林學士。 陳夷行字周道,其先江左諸陳也,世客潁川。 由進士第,擢累起居郞、史館脩撰。以勞 莊恪太子在東宮,夷行兼侍讀,五日一

議論天子前,往往語相侵短。 夷行不能堪,輒引疾求去,文宗遣使者尉勞起之。 會以王彥威 爲忠武節度使,史孝章領邠寧,議皆出嗣復。 夷行曰:「比姦臣數干權,願陛下無倒持大阿,以鐏授人。」嗣復曰:「古者任則不疑,齊桓公 「苟自聖擇,無不當者。」嗣復曰:「若用人盡出上意而當,固善,如小不稱,下安得嘿然? 開成二年,進同中書門下平章事。而楊嗣復、李珏相次輔政,夷行介特,雅不與合,每 及夷行對延英,帝問:「除二鎭當否?」對曰:

列傳第

百六

陳夷行

得失, 器管仲於讎虜,豈有 遺竇洵 直 彼賤工安足言者。然亦不可置不用。」帝卽徙璋光州長史, 當 衙 **混論奏**, 鄭覃、 ·倒持慮邪?」帝以其面相觸,頗不悅。 嗣復嫌以細 故, 謂洵直近名。 夷行曰:「諫官當衙, 正須論宰相 仙韶樂工尉遲璋授王府率,右拾 以百練賜洵直。 進門下

論 <u>遂衰,罷爲吏部尚書,尋拜華州刺史</u>。 私。」夷行蓋專詆嗣復。又素善覃,陰助其力,以排折朋黨。 年,未嘗失道。人主用忠良久益治,用邪佞一日多矣。」時用郭遠爲坊州 戒以權屬人。」嗣復曰:「夷行失言,太宗易暴亂爲仁義,用房玄齡十有六年,任魏徵 言:「玄宗自謂未嘗殺一不辜,而任李林甫,種夷數十族,不亦惑乎?」夷行曰:「陛下今亦宜 不可,薳果坐贓敗,帝欲賞邧,夷行曰:「諫官論事是其職, 帝常怪天寶政事不善,問:「姚元崇、宋璟于時在否?」李珏曰:「姚亡而宋罷。」珏因推 是時,雖天子亦惡其太過, 若一事 善輒進官, 刺史, 夷行與崔珙俱拜, 右拾遺 恐後不 + 恩禮 有五 · 免有

官並列朝廷,不容獨優。 下,謂之『隔品致敬』。準禮,皇太子見上臺羣官,羣官先拜而後答,以無二上也。僕射與四品下,謂之『隔品致敬』。準禮,皇太子見上臺羣官,羣官先拜而後答,以無二上也。僕射與四品 乃奏:「僕射始視事,受四品官拜,無著令。 比日左右丞、吏部侍郎、御史中丞皆爲僕射拜階 武宗即位,召爲御史大夫,俄還門下侍郎平章事,進位尙書左僕射。 前日鄭餘慶著僕射上儀,謂隔品官無亢禮。時竇易直任御史中丞,

三公上儀,著定令。」詔可。始,累朝紛議不決,至夷行遂定。 議不可。 年,以左右僕射爲左右丞相,位次三公,三公上日答拜,而僕射受之,非是。 及易直自爲僕射,乃忘前議,當時鄙厭之。臣等不願以失禮速誚於時,且開元元 以足疾乞身,罷爲太子太保,以 望敕所司約

檢校司空爲河中節度使,卒。

銜芝墜輔車。 授之學。爲人短小精悍,於詩最有名,時號「短李」。蘇州刺史章夏卿數稱之。葬母,有鳥 李紳字公垂,中書令敬玄曾孫。 世宦南方,客潤州。 紳六歲而孤,哀等成人。母盧,躬

幸。」卽注以刃,令易紙,復然。或言許縱能軍中書,紳不足用。召縱至,操書如所欲,卽囚 |紳獄中,|鏑誅乃免。 或欲以聞,謝曰:「本激于義,非市名也。」乃止。 教士臠食之,即脅使者爲衆奏天子,幸得留。」鉤召紳作疏,坐錡前,紳陽怖栗,至不能爲字, 法,賓客莫敢言,紳數諫,不入;、欲去,不許。 會使者召齒,稱疾,留後王澹爲具行,錡怒,陰 下筆輒塗去,盡敷紙,錡怒駡曰:「何敢爾,不憚死邪?」對曰:「生未嘗見金革,今得死爲 元和初,擢進士第,補國子助教,不樂,輒去。客金陵,李錡愛其才,辟掌書記。錡寖不

列

|紳泣言爲逢||吉中傷。入謝,又自陳所以然,帝悟,改戶部侍郎。 詆訐紛然,繇是皆罷之,以紳爲江西觀察使。 累擢中書舍人。稱爲宰相,而李逢吉敎人告于方事,稱遂罷;欲引牛僧孺,懼紳等在禁近沮 乃以愈爲京兆尹,兼御史大夫,免臺參以激紳。 解,乃授德裕浙西觀察使。僧孺輔政,以神爲御史中丞,顧其氣剛卞,易疵累,而韓愈勁直, 山南觀察府。 穆宗召爲右拾遺、翰林學士,與李德裕、元稹同時,號「三俊」。 帝素厚遇紳,遣使者就第勞賜,以爲樂外遷, |神、||愈果不相下,更持臺府故事,論詰往反,

章處厚屢言紳枉,折逢吉之姦。後天子於禁中得先帝手椷書一笥,發之,見裴度、元穎、紳 下,百官賀逢吉,唯右拾遺吳思不往,逢吉斥思,令告大行喪於吐蕃。此時,人無敢言者,惟 所言於逢吉。逢吉滋怒,乃用張又新、李續等計,擢虞、昔範與劉栖楚皆爲拾遺,以同紳隙, 利於陛下,請逐之。帝初卽位,不能辨,乃貶紳爲端州司馬。 子,杜元穎、李紳勸立深王,獨宰相逢吉請立陛下,而李續、李虞助之。」逢吉乘間言紳嘗不 內結中人王守澄自助。會敬宗立,逢吉知紳失勢可乘,使守澄從容奏言:「先帝始議立太 程昔範善。及耆爲拾遺,虞以書求薦,紳惡其無立操,痛誚之。虞失望,後至京師,悉暴紳 三疏請立帝爲嗣,始大感悟,悉焚逢吉黨所上謗書。 逢吉終欲陷之。紳族子虞,有文學名,隱居華陽,自言不願仕,時來省紳,雅與柏耆、 栖楚等怒得善地,皆切齒。

以書禱 爲 滁 暴。 始 以太子賓客分司 州 俄 紳 南 刺 而 史。 大 逐, 漲 歷 霍 封 寶 Ш 多虎 曆赦令不言左降官與量 康 東都。 間 ,擷茶者病之, 湍 大和 瀨 險澀 中, 惟 李德裕當 治機穽,發民 乘 漲 移, 流 國, 乃濟。 處厚 擢紳浙 跡射 執 康州 争, 7,不能 東觀 有媪 詔 爲 察使。 止。 追 龍 定, 洞 紳 , 得徙 舊 李宗閔方得君,復 至, 傳 盝 能 江 州 去之,虎 致 雲 長 史, 雨 不 紳

尉 趙 那公。 ,盜文肅 武宗卽位,徙淮 居位四年,以足緩不任朝謁,辭位,以檢校右僕射平章事 南, 召拜中書侍郎、同中 書門下平章事,進尙書右僕射、 復節度淮南。 門下 ·侍郎 封

道,車馬不敢前。

|紳治

剛嚴,皆望風遁去。

遷宣

武

節度使。

大旱,蝗不

入境

以

太子賓客分司。

開成

初,鄭覃以紳爲河

南

尹

河南多惡少

,

或危帽

.散衣,

擊大毬,戶官

元藻持 謂 湘 部 吳氏 不調。 盜 人訟湘受贓狼 用程 | 兩端 世典宰相 **澧人吳汝納者,韶州刺史武陵兄子也。** 時李吉甫任宰相,汝納怨之,後遂附宗閱黨中。 糧 一錢有狀, 奏貶崖州 有嫌 籍 娶部 身娶民顏悅女。 疑紳 司 戶 人女不實, 參 內顧望,織成 軍 宣宗立 按悅嘗為青州 神使觀察判官魏鄧 其罪 , 德裕去位, 紳已卒。 諫官 武陵坐贓貶潘州司戶參軍死,汝納家被逐, 衙 屢論 推 而 會昌時,爲永寧尉,弟湘爲 **鞫湘**,罪明白,論報殺之。 時,議 列, 妻王故 詔遣 崔鉉等久不得志 衣冠 御史崔元藻覆按,元藻 女,不應 坐。 ,導汝納 江都 德 裕 使 惡

列

傳

第

百

六

李

紳

李

삃

夷

官、紳雖亡、請從春秋戮死者之比。 動元藻等,使三司結神杖鉞作藩,虐殺良平,準神龍詔書,酷吏歿者官爵皆奪,子孫不得進 方, 恣威權。 爲湘訟,言:「湘素直 故士族、湘罪皆不當死、紳枉殺之。」又言:「湘死、紳令卽瘞、不得歸葬。 元藻武功令。 而寘湘死。」是時,德裕已失權,而宗閔故黨令狐綯、崔鉉、白敏中皆當路,因是逞憾,以利誘 言:「御史覆獄還,皆對天子別白是非,德裕權軋天下,使不得對,具獄不付有司,但用紳奏 凡戮有罪,猶待秋分;湘無辜,盛夏被殺。」崔元藻銜德裕斥己,即翻其辭, ,爲人誣衊,大校重牢,五木被體,吏至以娶妻資媵結贓。」且言:「顏悅 韶削紳三官,子孫不得仕。貶德裕等,擢汝納左拾遺, 按紳以舊宰相鎭 因

烈,或陷暴刻,故雖沒而坐湘冤云。 始, 紳以文藝節操見用, 而屢爲怨仇所拫却, 卒能自伸其才, 以名位終。 所至務爲威

宋申錫善,申錫爲翰林學士 李讓夷字達心,系本隴西。 ,薦讓夷右拾遺,俄 擢進士第,辟鎭國李絳府判官。 拜學士。 素善薛廷老, 又從西川杜元穎幕府。 廷老不飭細檢, 數飲 典

酒不治職,罷去,坐是亦奪職。

累進諫議大夫。

張次宗。 歟? 若裴中孺、李讓夷,臣不敢有言。」乃決用讓夷,進中書舍人。 開成 可言其人。」石以馮定、孫簡 初, 鄭覃曰:「球故與李宗閔善 起居舍人李褒免,文宗謂李石曰:「褚遂良以諫議大夫兼起居郎, 蕭俶、李讓夷對, 且記注操筆在赤墀下,所書爲後世法,不可用黨人。 帝曰:「讓夷可也。」李固言請用崔球 旣而李珏、楊嗣復以覃之薦, 今諫議誰

願還,卒于道,贈司徒。 校尙書右僕射。 武宗初,李德裕復入,三遷至尙書右丞,拜中書侍郎、同中書門下平章事。 宣宗立,進司空、門下侍郎,爲大行山陵使。 讓夷廉介不妄交,位雖顯劇,以儉約自將,爲世咨美。 未復土,拜淮南節度使。 路州平, 以疾 檢

終帝世不得遷。

官同 中書門下平章事 曹確字剛中,河南河南人。播進士第,歷踐中外官,累拜兵部侍郎。 ,俄進中書侍郎 懿宗咸通中,以本

度曲 可及爲帝造曲,日歎百年,教舞者數百 確邀儒 辭調悽折,京師媮薄少年爭慕之,號爲「拍彈」。同昌公主喪畢,帝 術,器識方重 一,動循法度。 時帝薄於德,昵寵優人李可及。 皆珠翠像飾,刻畫魚龍地衣, 度用繒五千, 倚曲作 與郭淑妃悼念不已, 可及者,能新聲,

列

傳

第

百

曹

確

劉瞻

商雜流 僖宗立,始貶死。 樂工尉遲璋爲王府率,拾遺竇洵直固爭,卒授光州長史。今而位將軍,不可。」帝不聽。 辭,哀思裴回,聞者皆涕下。 巧佞惑天子 爲威衞將軍。 曰:「第去,吾當賜酒。」俄而使者負二銀榼與之,皆珠珍也。 ,假使技出等夷,正當厚給以財,不可假以官,與賢者比肩立、同坐食也。』文宗欲以 ,當族滅。」嘗見其受賜,謂曰:「今載以官車,後籍沒亦當 確日:「太宗著令,文武官六百四十三,謂房玄齡日:『朕設此待天下賢士。 方幸時,惟確屢言之。 舞闋,珠寶覆地,帝以爲天下之至悲,愈寵之。家嘗娶婦, 而神策中尉西門季玄者,亦剛骾,謂 可及憑恩橫甚,人無敢斥,遂擢 爾。 可及日:「汝以

同宰相,俱有雅望,世謂「曹畢」云。 確居位六年,進尙書右僕射,以同平章事出爲鎭海節度使,徙河中,卒。 始, 畢誠與確

弟份以忠武軍節度使入爲戶部侍郎,判度支,卒。

遷太常博士。 劉瞻字幾之,其先出彭城,後徙桂陽。 劉瑑執政,薦爲翰林學士,拜中書舍人,進承旨。 舉進士、博學宏詞,皆中。 出爲河東節 徐商辟署鹽鐵府,累 i 度使。

咸通十一年,以中書侍郎同中書門下平章事。 同昌公主薨,懿宗捕太醫韓宗紹等送詔

書、同平章事爲荆南節度使。 鄭畋以責韶不深切,御史中丞孫瑝、諫議大夫高湘等坐與瞻善,分貶嶺南。 獄 圖視中州道萬里,即貶臟州司戶參軍事,命李庾作韶極詆,將遂殺之。 天下謂膽鯁正,特爲 可矜。陛下徇愛女,囚平民,忿不顧難,取肆暴不明之謗。」帝大怒,卽日賜罷,以檢校刑部尙 ,。 遠繫宗族數百人。 瞻喩諫官,皆依違無敢言,即自上疏固爭:「宗紹窮其術不能效,情有 路巖、韋保衡從爲惡言聞帝,俄斥廉州刺史。 嚴等殊未慊,按 於是,翰林學士

讒擠,舉以爲冤。 幽州節度使張公素上疏申解,嚴等不敢害。

僖宗立,徙康、虢二州刺史,以刑部尚書召,復以中書侍郞平章事,居位三月卒。

**瞻爲人廉約,所得俸以餘濟親舊之窶困者,家不留儲。** 無第舍,四方獻饋不及門,行己

終始完潔。

弟助,字元德,性仁孝,幼時與諸兄游,至食飲,取最下者。及長,能文辭,喜黃老言。

年二十卒。

李蔚字茂休,系本隴西。 列 僔 第 百 六 李 蔚 舉進士、書判拔萃,皆中,拜監察御史,擢累尚書右丞。 五三五三

還,民詣 譏 河 東 病 時弊。 亂 懿 闕 殺其 次惑浮屠 請留 帝 帥 不 聽 崔 常常 詔 季 許 飯萬僧禁中,自爲贊唄。 康 但以虚 歲。 用邠寧李侃代之,士不附,以蔚嘗在太原府有惠政,爲 禮褒答。 僖宗乾符初,以吏部尚書同中書門下平章 俄拜京兆尹 蔚上疏切諫, 太常卿。 引狄仁傑、姚元崇、辛替否所言 出 爲宣武 節度使, 事 翟 爲東都留守。 徙淮南。 人所懷,拜 代

河

東

節

度使

同

平章

事

至鎭三日,卒。

0

金銀 甘 翠 者 玉 觀 百 年 坐 爲 抆 1,悉厚 夾 人 心篤向,如蔚言者甚多,皆不能救。 陳經 、舉之。 路 飾 樹 爲 始 詔 木 刹 ,其徒導衞 賜之。 懿宗 迎 几 傳 聚桑門 珠玉 佛骨 其 言刹悉震搖,若有光景云。 香 前 成 奧前 不逞 一爲帳 鳳翔 安 四 羅像, (國洞 |隅立 後係道 小人 天子 孔鷸 或言:「昔憲宗嘗爲此,俄晏駕。」帝曰:「使朕 ,賜寶坐二,度高 考鼓 瑞 至 御 一級珠瑟 鳥神人,高數尺,磴道 周飾之,小者尋丈,高至倍 斷 安 鳴螺繼 臂指 福 樓 一,流血 瑟 迎 日 幡蓋 拜 僖宗立,詔歸其骨,都人耆耋辭餞,或嗚咽流涕 夜, 京師 二丈,構以沈檀, 滿道。 至泣下。 ,殘綵以 錦 高貲相 車 繡 以升 所 興、載歌 爲幢 過 詔賜 與集 迎聚, ´; 前 刻 節 兩 檀 大 被 塗髤,鏤龍 街僧 舞從之。 衢 爲檐注 繡 皆良 費 7 嚢 無 作繒臺縵 !金幣, 錦 土為 貲限。 生 ,陛城塗黃 襜 鳳葩 秋 一見之, 珍 刹 京師耆老 七 夏四月, 薦, 國,注水銀 籭 相望 月 精 死 金釦 帝崩。 金 絕 無 于 及見元 **塗**, 恨 之, 至 每 咸 爲池 長 爭以 通 上施 刹,數 安 乃以 和 + 金 金 事 複 儿

以變化無方爲聖,以生而死、死復生、回復償報、歆豔其間爲或然,以賤近貴遠爲憙。 鞮譯 身,屏營山樊,行一概之苦,本無求于人,徒屬稍稍從之。然其言荒茫漫靡,夷幻變現,善推 差殊,不可研詰。 至漢十四葉,書入中國。蹟夫生人之情,以耳目不際爲奇,以不可知爲神,以物理之外爲畏, 不驗無實之事,以鬼神死生貫爲一條,據之不疑。 上不可加爲勝,妄相夸脅而倡其風。於是,自天子逮庶人,皆震動而祠奉之。 贊曰:人之惑怪神也,甚哉!若佛者,特西域一槁人耳。裸顕露足,以乞食自資,癯辱其 華人之譎誕者,又攘莊周、列禦寇之說佐其高,層累架騰,直出其表,以無 掊嗜欲,棄親屬,大抵與<u>黃</u>老相出入。

宗像,分供塔廟,爲賊臣嘻笑。 怒,竄愈瀕死,憲亦弗獲天年。 三月而徂,唐德之不競,厥有來哉,悲夫! 興哀無知之場,丐庇百解之胔,以死自誓,無有顧藉,流淚拜伏,雖事宗廟上帝,無以進 屈萬乘之貴,自等太古胡,數千載而遠,以身爲徇。 初,宰相王縉以緣業事佐代宗,於是始作內道場,晝夜梵唄,冀禳寇戎,大作盂蘭,肖祖 幸福而禍,無亦左乎!懿宗不君,精爽奪迷,復陷前車而 至憲宗世,遂迎佛骨於鳳翔, 嗚呼,運痑祚殫,天告之矣!戲不 內之宮中。 韓愈指言其弊,帝 覆

# 唐書卷一百八十二

## 列傳第一百七

鄭延昌 李固言 盧 鈞 盧簡方 王溥 李廷 章琮 崔珙 盧光啓 章貽範 周 涓 墀 琯 裴休 澹 遠 劉瑑 蕭鄴 夏侯孜 鄭肅 趙 仁表 隱 盧商 裴坦

贊

郎中。 固言上還制書曰:「陛下當以名臣左右太子,堪以慢官斥,處調護地非所宜。」詔改它王傅。 李固言字仲樞,其先趙人。 温造爲御史中丞,表知雜事, 擢進士甲科, 進給事中。 江西裴堪、劍南王播皆表署幕府。 將作監王堪坐治太廟不謹, 改太子賓客, 累官戶部

猾 **譁衆遮道,使不得去,固言怒,捕取杖殺之,尸諸道。** 李德裕輔政, 列 僔 第 百 七 出固言華州刺史。 李 固 官 俄而李宗閔復用, 既領選,按籍自擬,先收寒素,柅吏 召爲吏部侍郎。 五三五七 州大豪何延慶橫

固言再遷尙書右丞。

姦。進御史大夫。

章事,仍判戶部。

門下平章事。 大 和 九年,宗閔得罪,李訓、 旋坐黨人,出爲山南西道節度使,訓自代其處。 鄭注用事,訓欲自取宰相,乃先以固言爲門下侍郎、同中書 訓敗,文宗頗思之,復召爲平

姻戚。 黨 ; 保任,觀稱與否而升黜之,無乏才矣。」帝曰:「宰相用人毋計親疏。 竇易直爲宰相,未嘗用 稱:「詩日『濟濟多士,文王以寧。』聞德宗時多闕官,寧乏才邪?」固言曰:「用人之道,隨所 鄧州刺史王堪、隋州刺史鄭襄尤無狀。帝曰:「貞元時御史,獨王堪爾。」鄭覃本舉堪, 固言抵己,即曰:「臣知堪,故用爲刺史。舉天下不職,何獨二人?」帝識其意,不主前語,因 故語兩與之。 羣臣請上徽號,帝曰:「今治道猶鬱,羣臣之請謂何?比州縣多不治,信乎?」固言因白 使己才不足任天下重, 自宜引去; 苟公舉, 雖親何嫌? 用所長耳!」帝不欲大臣有

校 尚書左僕射。 俄以門下侍郎平章事爲西川節度使,詔雲韶雅樂卽臨皋館送之。 始置贏軍千匹,又募銳士三千,武備雄完。 讓還門下侍郎,乃檢

節度使。 武宗 蒲津歲河水壞梁,吏撤窄用舟,邀丐行人。 立、召授右僕射。 會崔珙、陳夷行以僕射爲宰相,改檢校司空兼太子少師,領河中 固言至,悉除之。 帝伐回鶻,詔方鎭獻

財 助 軍 ·, 上 一疏固諫,不從。 以疾復爲少師,遷東都留守。 宣宗初、還右僕射。 後以太子太傅

分司東都。 卒,年七十八,贈太尉。

固言吃,接賓客頗謇緩,然每議論人主前,乃更詳辯。

刺 史, 李珏字待價,其先出趙郡,客居淮陰。 見之,曰:「日角珠廷,非庸人相,明經碌碌,非子所宜。」乃更舉進士高第。河陽烏 幼孤, 事母以孝聞。 甫冠,舉明經, 李絳爲華州

表置幕府。以拔萃補渭南尉、擢右拾遺。

臣。 朔未改,陵土新復,三年之制,天下通喪。 **廷與宇文鼎、温畬、** 穆宗卽位,荒酒色,景陵 章瓘 始復土,即召李光顏 馮約同 進日:「道路皆言陛下追光顏等,將與百官高 于邠寧,李愬于徐州,期九月九日大宴羣 會。 且

今同軌之會適去,遠夷之使未還,遏密弛禁,本爲

秋 齊人,鐘 屯 邊 鼓 如令訪謀猷, 合饗,不施禁內。 付疆事 夫王者之舉,爲天下法,不可不慎。 召之可也, 豈以酒食之歡爲厚邪? A. 」帝雖置其言,然厚加勞 光顔 、愬忠勞之臣 一方盛

列 傳 第 百 七 李 珏 遣。

鹽

鐵使王

播

增茶稅十之五以佐用度。

压上疏謂:「權率本濟軍興,

五三五九

而稅茶自貞元以來

牛僧 中造 稅幾何?三不可。陛下初卽位,詔懲聚斂,今反增茶賦,必失人心。」帝不納。 其敞先及貧下,二不可。 外 郎。 孺 百尺樓, 辟署掌書記。 方天下無事,忽厚斂以傷國體,一不可。 茗爲人飲,與鹽粟同資,若重稅之,售必高, 僧孺還相,以司勳員外郎知制誥爲翰林學士,加戶部侍郎 土木費鉅萬,故播亟斂,陰中帝欲。 還爲殿中侍御史。 山澤之產無定數,程斤論稅,以售多爲利,若價騰踊,則市者稀,其 宰相韋處厚曰:「淸廟之器,豈擊搏才乎?」除禮部 **珏以數諫不得留,出爲下邽令。** 方是時,禁 武昌

申辨,貶江州 回人也。 。」帝愕然曰:「殷疾愈,注力也,可不一見之?」注由是怨珏。 鄭注以醫進,文宗一日語珏曰:「卿亦知有鄭注乎?宜與之言。」珏曰:「臣知之,姦 刺史。 徙河南尹 ⁄,復爲戶部侍郞 及李宗閔以罪去,珏爲

助, 鄭覃、陳夷行等更持議,一好惡,相影和, 下十四年,雖未至治, 如恃安而 開成 中,楊嗣復得君 忽,則疾生。 然視今日承平亦希矣!」压日:「爲國者如治身,及身康寧,調適以自 ,引珏同中書門下平章事,與李固言皆善。 天下當無事,思所闕,禍亂可至哉?」 朋黨益熾矣。 **玉數辭位**, 不許。 三人者居中秉權,乃與 帝嘗自謂:「臨

**珏曰:「祖宗倚宰相,天下事皆先平章,故官曰平章事。** 杜悰領度支有勞,帝欲拜戶部尚書,以問宰相,陳夷行答曰:「恩權予奪,願陛下自斷。」 君臣相須,所以致太平也。苟用一

帝曰:「易直此言殊可鄙。」帝又語:「貞元初政事誠善。」珏曰:「德宗晚喜聚財,方鎭以進奉 杜、汪、魏爲文皇帝謀,固此耳!」帝頗向納。進封贊皇縣男。 市恩,吏得賦外求索,此其敝也。」帝曰:「人君輕所賦,節所用,可乎?」珏曰:「貞觀時,房、 臣曰:『寶易直勸我,凡宰相啓擬,五取三,二取一。彼宜勸我擇宰相,不容勸我疑宰相。』」 吏、處一事皆決於上,將焉用彼相哉?隋文帝勞於小務,以疑待下,故二世而亡。 陛下嘗謂

郎,爲文宗山陵使。 江 稱道無逸篇以勸。時路州劉從諫獻大馬,滄州劉約獻白鷹,珏請却之以示四方。 矣!」已而武宗卽位,人皆爲危之。压曰:「臣下知奉所言,安與禁中事?」帝新聽政,珏數 西觀察使,再貶昭州刺史。 始,莊恪太子薨,帝意屬陳王。旣而帝崩,中人引宰相議所當立,珏曰:「帝旣命陳王 會秋大雨,梓宮至安上門陷于濘,不前,罷爲太常卿。 終以議所立,貶 遷門下侍

卒,年六十九,贈司空,諡 誼不以內外自異,表請立皇太子維天下心。 以 吏部尚 宣宗立,內徙郴、舒二州,以太子賓客分司東都。 書召、珏去鎭,而府庫十倍於初。 日貞穆 俄檢校尚書右僕射、淮南節度使。 江淮旱,發倉廩賑流民,以軍羨儲殺半價與人。 遷河陽節度使, 罷橫賦宿逋百餘萬。 珏 顧己大臣,

始,淮南三節度皆卒於鎮,人勸易署寢,珏曰:「上命我守揚州,是實正寢,若何去之?」

列傳

第

百七

李

珏

猫 珙

及家事。 及疾亟,官屬見臥內,惟以州有稅酒直而神策軍常爲豪商占利,方論奏,未見報爲恨,一不 性寡欲,早喪妻,不置妾侍,門無餽餉。 淮南之人德之,压已殁,叩闕下,願立碑刻

其遺愛云。

人之明,但以不疑责宰相。 贊曰:天子待宰相以不疑,是矣。雖然,於賢不肖當別白分明,乃可與言治。 文宗無知 劉向所云「持不斷之盧者,開羣枉之門」,殆文宗爲邪! 是時善惡混淆,故黨人成於下,主聽亂於上,王室之衰,由此爲

有威 重,精吏治,以拔萃異等,累擢至泗州刺 崔珙,其先博陵人。父頲,官同州刺史,生八子,皆有才,世以擬漢荀氏「八龍」。珙爲人 史。 由太府卿爲嶺南節度使,入對延英,文宗

見珙意慷慨,又知治泗得士心, 時徐州以王智興後,軍驕,數犯法,節度使高瑀未能制。 即謂宰相曰:「欲武寧節度使者,無易珙才。」更詔王茂元帥 天子思材望威烈者檢革其弊,

嶺南,而以洪代瑀。

居二歲,徐人戢畏。

訪治撫後先,珙對精亮有理趣,帝客嗟迂久。

諸道 签擊宰相李石於親仁里, 迹出禁軍, 珙坐不能捕, 以爲負, 望少衰。 鹽 入爲右金吾大將軍,遷京兆尹。 一鐵轉運使。 俄同中書門下平章事,仍領鹽鐵,卽拜中書侍郞。會昌二年,進位尚書 會大旱,奏析]隆入禁中者,取十九溉民田。 開成末,累進刑部尙書、 仇士良使

接,珙坐不自力避事,下除太子少師,分司東都,就拜留守。 起爲鳳翔節度使。 厚,數護其姦。 與崔鉉故有怨,及鉉宰相代爲使,卽奏珙妄費宋滑院鹽鐵錢九十萬緡,又劾與劉從諫 **貶澧州刺史**,再斥恩州司馬。 | 鉉復執政, 珙懼, 以疾自乞。 宣宗立,徙商州刺史,以太子賓客分司東都 方是時, 西戎歸故地, 邊奏係驛, 議所以綏 復節度鳳翔,卒于官。

左僕射。

明年,以兄琯喪,被疾求解,以所守官罷。

數百人呼指無誤。 子涓,性開敏。 終御史大夫。 爲杭州刺史,受署,未盡識卒史,乃以紙各署姓名傅襟上,過前 一閱,後

李德裕任御史中丞,引知雜事,進給事中。 馆字從律, 洪兄。 舉進士、賢良方正, 皆高第。 大和初,持節宣慰盧龍,使有指。 累辟諸使府。 入朝, 稍歷吏部 及興元殺李絳, 員外郎。

復往尉撫,軍皆按堵。還,遷工部侍郎、京兆尹。

以爲榮。 之,天下重其賢。以尙書右丞出爲荆南節度使,進左丞。 UI 南 宋申錫爲讒所危,宦豎切齒, 西道節度使,贈尚書左僕射。 俄判兵部西銓、吏部東銓, 徙東都留守。 時罕敢辨者。 琯行方介,有器藴, 馆與大理卿王正雅固請出獄付外, 以吏部尙書召, 人屬以爲相而卒不至,當時共容云。 時弟珙任京兆尹,並據 辭疾不拜。 會昌· 題劇處, 與衆治 干,

相尙, 與子灣,舉止秀峙,時謂玉而冠者。 推名德者爲之首。 咸通中,世推李都爲大龍甲,涓豪放不得預,雖自抑下,猶不許 擢進士第, 累進禮部員外郎。 當時士大夫以流品 ---, 而

澹 白 同中書門下平章事, 州 長史,被殺於白馬驛,家沒掖庭。 子遠,有文而風致整峻,世慕其爲,目曰「釘座梨」,言座所珍也。 終吏部侍郞。 遷中書侍郎。 從遷洛, 罷爲尙書右僕射。 柳璨忌衣冠有望者, 乾寧中, 以兵部侍郎 貶爲

與焉。

弟||璪

、興尤顯,躁位刑部尚書,璵河中節度使。

高, 無 諸崔自咸通 齒, 祖 母 唐 事姑孝, 一後有名, 每旦乳姑。一日病,召長幼言:「吾無以報婦,願後子孫皆若爾孝。」 歷臺閣藩鎭者數十人,天下推士族之冠。始,其曾王母長孫春秋

世謂崔氏昌大有所本云

懿宗初,罷爲荆南節度使,仍平章事,進檢校尚書左僕射,徙劍南西川。 史。 下遷檢校右僕射、 大中中,召還翰林,拜中書舍人,遷戶部侍郎,判本司,以工部尚書同中書門下平章事。 蕭鄴字啓之,梁長沙宣王懿九世孫。 山南西道觀察使。 歷戶部、吏部二尚書,拜右僕射。 及進士第,累進監察御史、翰林學士,出爲衡州 南韶內寇,不能制, 還,以平章事節度 刺

河東,在官無足稱道,卒。

長史。 尉。 累擢太常少卿,博士有疑議往咨,必據經條答。文宗高擇魯王府屬,肅以諫議大夫兼 鄭肅字义敬,其先滎陽人,以儒世家。肅力于學,有根柢。 王爲皇太子,遷給事中,進尚書右丞。出爲陝虢觀察使。 第進士、書判拔萃,補興平

方煽, 愛雅 開成二年,召拜吏部侍郎。帝以肅嘗輔導東宮、詔兼賓客,爲太子授經。 爲讒所乘,廢斥有端。肅因入見,言天下大本,不可輕動,意致深切,帝爲動容。然內寵 太子終以憂死。 出爲檢校禮部尚書、河中節度使。 武宗知太子無罪,特因於讒,而朝 旣而 太子母

列傳第

百

七

瀬郷

酸麻

五三六五

廷謂 右僕射同中書門下平章事,與李德裕叶心輔政。 肅臨義 不可奪,侹侹有大臣節,召爲太常卿。 宣宗即位,遷中書侍郎,罷爲荆南節度使。 遷山南東道節度使。 五年, 以檢校尙書

子洎,仕至州刺史。 洎子仁規、仁表,皆豪爽有文。 仁規位中書舍人。 卒,贈司空,諡曰文簡

所陵藉,人畏薄之。劉鄴未仕,往謁洎,而仁表等鄙訛其文。鄴爲相,因罪貶仁表,死嶺外。 仁表累擢起居郎。 嘗以門閥文章自高,曰:「天瑞有五色雲,人瑞有鄭仁表。」 傲縱多

始,肅罷政事,帝以盧商代之。

常額,人便之,歲貲返增。 府。 入朝,累十餘遷,至大理卿。爲蘇州刺史,吏以鹽法求贏貲,民愈困,商令計口售鹽,無 商字爲臣,蚤孤,家窶困,能以學自奮。舉進士、拔萃,皆中。由校書郞佐宜歙、西川幕 宰相上其勞,進浙西觀察使,召爲刑部侍郎、京兆尹。

丼二使財以贍兵,乃不乏。 方伐潞,芻糧踰太行餉軍,環六七鎭,詔商以戶部侍郎判度支,又詔杜悰兼鹽鐵、度支, 出爲東川節度使,以兵部侍郎還判度支,擢中書侍郎、同中書門

下平章事,范陽郡公。

大中元年春旱,詔商與御史中丞封敖理囚繫於尚書省,誤縱死罪,罷爲武昌軍節度使。

以疾解,拜戶部尙書,卒。

中,出爲常州刺史。 府推官,調長安尉。 疲耗,鈞爲市健馬,率三歲一易,自是無乏事 盧鈞字子和,系出范陽,徙京兆藍田。舉進士中第,以拔萃補祕書正字。 遷給事中,有大詔令,必反覆省審, 又從裴度爲太原觀察支使, 遷監察御史,爭宋申錫獄知名。 駁奏無私。 拜華州刺 史。 從李絳爲山 進吏部郎 關輔驛馬

槥還 其德,不懲而 不得通婚,禁名田產,闔部肅壹無敢犯。 以清靜治。 一葬,有疾若喪則經給醫藥、殯斂,孤女稚兒,爲立夫家,以奉稟資助,凡數百家。 擢嶺南節度使。 蕃獠與華人錯居,相婚嫁,多占田營第舍,吏或燒之,則相挻爲亂, 化。 又除采金稅。華、蠻數千走闕下,請爲鈞生立祠,刻石頌德,鈞固辭。 海道商舶始至,異時帥府爭先往,賤售其珍,鈞一不取,時稱絜廉。 貞元後流放衣冠,其子姓窮弱不能自還者,爲營棺 鈞下令蕃華 南方服 專

會昌 漢 水害襄陽, 拜鈞山南東道節度使, 築隄六千步,以障漢暴。 王師伐劉稹,

部

侍郎召判

(戸部。

列傳

第

百

七

虚的

悉原。 聽,坐治堂上,左右皆雌親卒,擊鼓傳漏, 武宗以鈞寬厚能得衆,詔兼節度昭義軍。會橫死,敕乘馹往,進檢校兵部尚書,專領昭義。鈞 次高平,惟信獻款,且曰:「不卽降者,畏石尙書爾。」鈞與約而遣。 及路,石雄兵已入,而頹將白惟信率餘卒三千保路城,未下。 )鈞自居甚安,雄引去,乃召惟信至,送闕下, 雄召之,使往十餘輩皆死。 方雄欲盡夷路 兵, 鈞

) 。) 迎還府,斬首惡乃定。 成人已去潞一舍,鈞選牙卒五百,壯騎百,以騎載兵夜趨,遲明至太平驛,盡斬之。 校尙書左僕射。 攻城,迫大將|李文炬爲帥,|鈞倉卒奔路城。 俄 而 興士五千戍代北,鈞坐城門勞遣,惟家人以觀。 韶趣戍者行,密使盡戮之。鈞請徐乘其變,而使者不發,須報。 文矩投地僵臥,稍諭叛者, 衆乃悔服, 戍卒驕,顧家屬不欲去, 卽相與謝 酒酣,反 卽拜檢 時

亂, 郡公,節度河東。 乃授|鈞|宣武節度使,人情妥然。召入,復爲吏部尚書,遷檢校司空、太子少師,封范陽 宣宗卽位,改吏部尚書。會劉約自天平徙宣武,未至,暴死,家僮五百無所仰衣食,思

志,故內怨望,數移病不事事,遨遊林墅,累日一還。一个狐綯惡之,罷僕射,以檢校司空守太 大中九年,召爲左僕射。鈞宿齒,數外遷,而後來多至宰相。始被召,自以當輔政,旣失

顧不任 子太師 檢校司徒,爲東都留守。 職 帝元日大饗含元殿,鈞年八十,升降如儀,音吐鴻暢, 答綯爲娼賢。 絢聞, 言于帝, 即以鈞 懿宗初, 復節度宣武,辭不拜,以太保致仕。 同中書門下平章事,爲山南 舉朝容歎。 卒, 年八十七, 贈太 西道節度使。 以鈞養碩長者, 俄

不爲鮮明,位將相,沒而無贏財。 鈞 與人交,始若澹薄, 旣久乃益固。 所居官必有績, 大抵根仁恕至誠而施於事。 玩服

傅,

諡日元

拜太僕卿,領大同節度。 簡方督兵 累遷江州 盧簡方, 乘邊,旁河 失其系世, 刺史。 相險, 徙大同軍防禦使,大開 久之, 徙振武軍, 道病卒。 不知所以進。 集樹堡鄣, 自 神山 盧鈞鎭太原, 屯田,練兵侈鬭, 至鹿泉縣三百里,扈遏其衝, 表爲節度府判官。 沙陀畏附。 會党項羌叛, 擢 賊不得騁, 義昌節度使, 候邏 鈞 使 便

擢累戶部侍郎、 韋 琮 字禮玉, 翰林學士承旨。 世顯仕。 踪進士及第, 以中書侍郎同中書門下平章事,遷門下侍郎兼禮部尙書, 稍進殿中侍御 史。 坐訊 獄 不得實, 改太常博士。

五三六九

列

傳

第

百

七

郼

琮

周

壢

無功,罷爲太子賓客分司,卒。

集賢殿學士。 周 墀字德升, 本汝南人。 長史學, 屬辭高古, 少孤, 事母孝。 文宗雅重之。 及進士第, 李宗閔鎭山南, 辟湖南團練府巡官, 表行 軍 入爲監察御 司 馬 閱歲

也。 宜,墀最爲天子欽矚。俄知制誥,入翰林爲學士。 遷起居舍人,改考功員外郎,兼舍人事。 大和末,訓、注亂政,以黨語汙搢紳有名士,分逐之,獨墀雖嘗爲宗閔所禮,不能以罪誣 帝御紫宸,與宰相語事已,或召左右史咨質所

出兵 戍彭蠡湖, 武宗即位,以疾改工部侍郎,出爲華州刺史。 禁止剽劫。 進拜義成節度使, 封汝南縣男。 徙江西觀察使。 宿將暴警不循令者,墀命鞭其 劾舉部刺史, 翦捕劇城,

月,一軍大治。

元和 王宰 實 重路權幸, 以兵部侍郎召判度支, 錄 求同平章事領宣武, 墀言:「天下大鎭如丼、 汴者纔幾, 以廣父功。 進同中書門下平章事, 凡人君尙不改史, 遷中書侍郎。 取必信也。」遂削新書。 建言:「故宰相德裕 宰之求何可厭?」 河東節度使 重定

宣宗納之。 駙馬都尉韋讓求爲京兆,持不與。 繇是妄進者少衰。

使。 射,卒,年五十九,贈司徒。 駙馬都尉鄭顯言于帝曰:「世謂墀以直言相,亦以直言免。」帝悟,加拜檢校尚書右僕 會吐蕃微弱,以三州七關自歸。 帝召宰相議河湟事,墀對不合旨,罷爲劍南東川節度

童時, 縣, ·疏食獨不足,今一啖肉,後何以繼?」 肅引州兵破禽之,自記平賊一篇上之,德宗嘉美。 裴休字公美, 孟州濟源人。 父肅, 貞元時爲浙東觀察使, 劇賊栗蝗誘山越爲亂, 兄弟偕隱家墅,晝講經,夜著書,終年不出戶。 生三子,体,仲子也,操守嚴正。 有饋鹿者,諸生共薦之, 休不食, 曰; 陷州 方兒

次爲時政記,所論非一,詳己辭,略它議,事有所缺,史氏莫得詳。 部侍郎領諸道鹽鐵轉運使。六年,進同中書門下平章事,即奏言:「宰相論政上前, 擢進士第,舉賢良方正異等。歷諸府辟署,入爲監察御史,更內外任。 請宰相人自爲記,合付史 至大中時,以兵 知印者

官。」詔可。進中書侍郞。

列

第一

百七

裴休

劉瑑

大和後,歲漕江、淮米四十萬斛,至渭河倉者纔十三,舟檝僨敗,吏乘爲姦, 冒沒百端

爲便。 横賦之,道路苛擾。 |休建言:「許收邸直,毋擅賦商人」又:「收山澤寶冶,悉歸鹽鐵 歲率雇緡二十八萬,休悉歸諸吏,敕巡院不得輒侵牟。 劉晏之法盡廢。 居三年,粟至渭倉者百二十萬斛,無留壅。 体分遣官詢按其弊,乃命在所令長兼董漕,褒能者,謫怠者。由江抵渭,舊 時方鎮設邸閣居茶取直, 著新法十條,又立稅茶十二法,人以 因視商人它貨

秉政凡五歲, 罷爲宣武軍節度使, 封河東縣子。 久之, 由太子少保分司東都, 復起歷

昭義、河東、鳳翔、荆南四節度。卒,年七十四,贈太尉。

嘗曰:「休眞儒者。」然嗜浮屠法,居常不御酒肉,講求其說,演繹附著數萬言,習歌唄以爲 與紇干息素善,至爲桑門號以相字,當世嘲薄之,而所好不衰。 |休不爲皦察行,所治吏下畏信。能文章,書楷遒媚有體法。爲人醞藉,進止雍閑。 宣宗

罷武宗方士,言多懇愊。 劉瑑字子全,高宗宰相仁軌五世孫。 大中初, 擢翰林學士。 第進士,鎭國陳夷行表爲判官。入遷左拾遺,諫 宣宗始復關隴,裁處叢繁,書詔夜數十,雖捉

筆遽成,辭皆允切。 會伐党項,詔爲行營宣慰使。

遷刑部侍郎,乃裒彙敕令可用者,由武德訖大中,凡二千八百六十五事,類而析之,參

**訂重輕,號大中刑律統類以聞,法家推其詳。** 

使。 被鎧擁矛盾,習擊刺,與吏士臨觀。 繇 河南尹進宣武軍節度使。 先時,大饗雜進倡舞,豫曰:「豈軍 又下令不何止夜行,使民自便,境內以安。 ·中樂邪?」取壯士千人, 徙河東節度

發太原,人方大驚。 未幾,以戶部侍郎召判度支。 後請間,帝視案上曆, 始,豫在翰林,帝素器遇,至是,手詔追還, 謂豫:「爲朕擇一令日。」豫跪曰:「某日良。」帝笑 外無 知者, 旣

曰:「是日卿可途相。」卽 韶同中書門下平章事,仍領度支。

宰相。 淪夷。 左僕射。 嘗 俄 今日不循 與崔愼 而 豫大病,加工部尚書, 由議帝前, 名責實,使百吏各稱職,而先流品,未知所以致治也。」愼 愼由請甄別流品,豫質曰:「王夷甫相晉,崇尙浮虛,以述 拜臥內,猶手疏陳政事。 居位半歲卒,年六十三,贈尚書 由 不得對,繇是罷 流 品,卒致

夏侯孜。 **豫以名節自將**, 凡議論處事不私, 趨於當乃止, 未嘗以言色借貴近。 與豫同 知政

列 傳 第 亳州譙人。 百 七 劉 琢 累遷婺、絳等州刺史。 趙 鰡 繇兵部侍郎、 諸道鹽鐵轉運使爲同中 五三七三

門下平章事 召 拜尙書左僕射,還執政,進司 仍領鹽鐵。 懿宗立, 空,爲貞陵山陵使。 進門下侍郎、譙郡侯。 坐隧壞,出爲河中節度使,循同平章事。 俄以同平章事出爲 西川節 腹使。

初,堂史署制,仆孜懷中,即死。不數日,孜罷。

咸通時, 蠻犯圖深入,士乏糧,追責政治圖無素備,以太子少保分司東都,卒。

同被害。 潰,捕斬皆盡,優詔嘉慰。 與絳燕間,吏報賊至,絳麾存約使去, 李融奏以自副、融疾病、委以軍政、大將宋朝晏火其營、夜爲亂、 奴客以死 趙隱字大隱,京兆奉天人。 拒守,獻家財勞軍,帝嘉之。賊平,渾瑊引在幕府。 累擢嶺南節度使,終于官。 祖植,當德宗出狩,變倉卒,羽衞單寡,朱泚攻城急,植率家 對曰:「荷公德厚,誼不當獨免。」即部勒左右捍之,而 父存約,辟署興元李絳府,值軍亂,方 累擢鄭州刺史。鄭滑節度使 植 列卒不動須之,遲明而

進 土 第,歷州刺史、河南尹。 隱以父死難,與兄騭廬墓幾十年,闔門誦書,不應辟召。 以兵部侍郎領鹽鐵轉運使。 咸通末,進同中書門下平章事,遷 親友更敦勉令仕, 會昌中,

中書侍郎,封天水縣伯

性仁悌,不敢以貴權自處。 始布 衣時,家無貲, 與騭同耕以養,雖姻宗之富, 未嘗干以

財。 官寢顯,還家,易衣侍左右,由布 衣也。 **驚終宣歙觀察使** 

母以安興臨觀,宰相方率百官拜恩於廷,即回班候夫人起居,搢紳以爲榮。 旣輔政,它宰相及百官皆詣第升堂慶母,歲時公卿必參訊。 懿宗誕日,宴慈恩寺,隱侍 後崔彦昭、張濬

僖宗初,罷爲鎭海軍節度使。 王郢之亂,坐撫御失宜,下除太常卿。 廣明初,爲吏部尚

居母喪,卒。

當國,皆有母,遂踵其禮。

士。 時光裔由膳部郎中知制誥,對掌內外命書,士歆羨之。 子光逢、光裔、光胤、皆第進士,歷臺省華劇。 光逢尤規獲自持,以中書舍人爲翰林學

裴坦字知進,隋營州都督世節裔孫。父义,福建觀察使。

當國 之,施一榻堂 坦及進 薦爲職方郎中,知制誥,而裴休持不可,不能奪。 士第,沈 上,壓角而 傳師表置宣州觀察府,召拜左拾遺、史館脩撰。 坐。 |坦見休, 重愧謝,休勃然日:「此令狐丞相之舉,休何力?」顧 故事, 舍人初詣省視事, 四 歷楚州刺史。 令狐 丞相 左 綯

傳 第 百 七 裴 坦 鄭 延 昌

列

右索肩輿亟出, 省吏眙駭,以爲唐興無有此辱,人爲坦羞之。 再進禮部侍郎, 拜江西觀察

使、華州 刺史。 召爲 中書侍郎、同中書門下平章事,不數月卒。

坦性簡儉, 子娶楊收女,齎具多飾金玉,坦命撤去,曰:「亂我家法。」世淸其概。

從子贄。

| 贄字||敬臣,及進士第,擢累右補闕、御史中丞、刑部尚書。昭宗引拜中書侍郎兼本官、同

中書門下平章事,專兼戶部尙書。

疏屬 以居,故臧獲猥衆,出入無度,殆此致謗言者。」帝每聞咸通事,必肅然斂衽,故偓稱之 帝疑其外風檢而暱惟薄,逮問翰林學士韓偓,偓曰:「贄,咸通大臣坦從子, 內雍· 友,合

爲贄地。

帝幸鳳翔,爲大明宮留守,罷。 俄進尚書左僕射,以司空致仕。 朱全忠將篡,貶靑州司

尸參軍,殺之。

鄭延昌字光遠,咸通末,得進士第,遷監祭御史。 鄭畋鎭鳳翔,表在其府。 黄巢亂京師,

京 畋 兆 倚 尹 延昌調兵食, ′, 判度支。 拜戶部尙書,以中書侍郞同中書門下平章事,兼刑部尙書。 且諭慰諸 軍。 畋 再秉政, 擢司勳員外郎、翰林學士。 進累兵部侍郎, 無它功,以病 兼

,拜尙書左僕射,卒。

中 拜 太常 書 府 判官。 侍 昭宗蒙難 卿 郞 溥 字德潤 同 胤 中書門 部尙書。 東內, 不 赴鎮,溥留 失其 下 | 溥與胤說 平章事 會朱温 何所人。 充集賢殿直 , 慢逼 判 衞 戶 第進士,擢累禮部員外郎、史館修撰。 軍 部。 , 貶淄州 執 劉 不能 季 學 述等殺之。 士。 司戶 有所裨益,罷爲太子賓客, 御 , 參軍, 賜自盡, 史中丞趙 帝 反正 光逢奏爲刑 與裴樞等投尸于河 驟 拜翰林學士、戶 分司 部 崔胤鎭 郞 東都。 中 武安, 知 部 雑 未幾, 侍郎, 表署觀 事 以

下 不 ·
平章事 從,以光啓權總中 盧 光啓字子忠,不詳 俄 語爲 太子少 書 事 何所 , 保, 兼 人。 判 改吏部侍郎。 三司, 第進 士, 進 左 爲 諫議大夫, 張 濬 所 厚 , 擢 參知機務 累兵 部侍 郎。 復拜兵部侍郎、同中 昭宗 幸鳳 翔, 宰相

五三七七

啓

五三七八

度支。 刺史。 以固思。 茂貞、卽拜工部侍郎、同中書門下平章事。 初, 倚權臣,恣驚不恭。 二人奔行在,貽範遷給事中,用李茂貞薦, 光啓執政,韋貽範、蘇檢相繼爲宰相。 帝還京師,檢長流環州,光啓賜死。 會母喪冤,踰月奪服。 茂貞與朱全忠通好,乃求尚主,取險女爲景王妃 胎範字垂憲,以龍州刺史貶通州, 閱旬爲工部侍郎、同中書門下平章事,判 不數月卒。 檢初拜中書舍人,貽範薦於 檢爲洋州

## 唐書卷一百八十三

## 列傳第一百八

畢 誠 崔彦昭 劉 鄴 豆盧瑑 陸展 鄭綮 朱朴 孫偓

韓偓儀

然薪讀書,母卹其疲,奪火使寐,不肯息,遂通經史,工辭章。 畢諴字存之,黃門監構從孫。 |構弟||栩生凌,凌生||夕,世失官爲鹽估。 性端慤,不妄與人交。 与生誠,蚤孤。

淮南, 學 如平日,德裕忌之,出爲慈州刺史。 曹爲辱,誠沛然如處美官,無異言。 大和中, 入拜侍御史。 舉進士、書判拔萃, 李德裕始與悰同輔政,不協,故出悰劍南東川節度使。 連中。 累官駕部員外郎、倉部郎中。 宰相知之,以職方郎中兼侍御史知雜事,召入翰林爲 辟忠武杜悰幕府。 |惊領度支,表爲巡官, 又從辟 故事,要家勢人,以倉、駕 故吏惟誠餞訊

使。 斛,以省度支經費,詔書嘉美。俄徙昭義,又遷河東。 孰謂頗、牧在吾禁署,卿爲朕行乎?」誠唯唯,卽拜刑部侍郎,出爲邠寧節度、河西供軍安撫 誠到軍, 遣吏懷諭, 羌人皆順向。 党項擾河西,宜宗嘗召訪邊事, 誠援質古今,條破羌狀甚悉, 時戍兵常苦調饟乏,藏募士置屯田, 河東尤近胡,復脩把頭七十烽,謹候 帝悅曰:「吾將擇能帥者, 歲收穀三十萬

虜,寇不敢入。

者,帝所喜,以錢七十萬聘之,夫婦日自進食,得其歡心,乃進之帝,嬖幸冠後宮。 曰:「太原於我無分,今以是餌,將破吾族矣。」不受。使者留于邸,鹹亦放之。太醫李玄伯 相。 事。 令狐綯忌之,自邪寧凡三徙,不得還。 誠思有以結綯,至太原,求麗姝盛飾使獻。 藏於吏術尤所長,旣貴,所得祿奉,養護宗屬之乏,無間然。 再期,固稱疾,改兵部尙書,罷。旋兼平章事節度河中。 懿宗立, 遷宣武節度使, 召為戶部尚書, 判度支。未幾, 卒,年六十二。 以禮部尙書同中書門下平章 始,藏被知於宣宗,嘗許以 玄伯又治 綯

崔彥昭字思文,其先淸河人。 淹貫儒術,擢進士第。 數應帥鎭辟奏,於吏治精明,所至 丹劑以進,帝餌之,疽生於背。

懿宗立,收玄伯及方士王岳、虞紫芝等,俱誅死。

課最。 累進戶部侍郎。 繇河陽節度使徙河東。先是,沙陀諸部多犯法,彥昭撫循有威惠,三

年,境內大治,耆老叩關願留,詔可。

路巖、韋保衡皆坐朋比賄賂得罪死,蕭倣秉政,矯革之,而彥昭協力,故百職脩舉,祭不至 不六月,遷門下侍郎。帝因下詔暴收等過惡,申勵丁寧,以成其美。 僖宗立,授兵部侍郎、諸道鹽鐵轉運使。 俄同中書門下平章事,仍判度支。 初,楊收、

昆弟也。 彥昭雖宰相,退朝侍母膳,與家人齒,順色柔聲,在左右無違,士人多其孝。 凝大中初先顯,而 彥昭未仕,嘗見凝,凝倨不冠帶,嫚言曰:「不若從明經舉。」 彥昭 與王凝外

爲憾。至是,凝爲兵部侍郎。 母聞彥昭相,敕婢多製履襪,曰:「王氏妹必與子皆逐,吾將共

行。」彥昭聞之,泣且拜,不敢爲怨。 一而凝竟免。

伶人李可及爲懿宗所寵,橫甚,彥昭奏逐,死嶺南。 累拜兼尚書右僕射,以疾去位,授

太子太傅,卒。

李德裕爲浙西觀察使,奇其文,表爲掌書記。德裕三領浙西及劍南、淮南,未嘗不從,會昌 劉鄴字漢藩, 潤州句容人。父三復,以善文章知名。少孤,母病廢, 三復丐粟以養。

列

第

百八

劉

掌

時,位宰相,擢三復刑部侍郎、弘文館學士。

陝虢 爵, 第。 以 禮部尙書同中書門下平章事,判度支。 至懿宗立,綯去位,鄴乃申直其冤,復官爵,世高其義。進戶部侍郎、諸道鹽鐵轉運使。 高元裕 歷中書舍人,遷承旨。 |鄴 六七歲能屬辭, 表署推官, 高少逸又辟鎭國幕府。 德裕憐之, 使與其子共師學。 鄴傷德裕以朋黨抱誣死海上,令狐綯久當國,更數赦,不爲還官 僖宗嗣位,再遷尙書左僕射。 咸通初, 德裕既斥, 擢左拾遺, 鄴無所依, 召爲翰林學士, 去客江 賜進士 湖 間。

平章 崔沆、豆 事。 初 盧豫匿將軍張直方家,賊捕急,三人不肯臣,俱見殺。 章保衡、路巖與鄴同秉政,爲迹親,俄而蕭倣、崔彥昭得相,罷鄴爲淮南節度使、同 黄巢方熾, 韶高駢代之,徙節度鳳翔,固辭, 還左僕射。 帝西狩, 追乘輿不及,與

事。 字相 是日,宣告于廷, 豆盧瑑者, 多不至四 字希真, 五 謂 大風雷 何? 河南人。 」答曰:「紫微方災,然其人又將不免。」後楊收、韋保衡、路巖、 雨拔樹。 仕歷翰林學士、<br />
戶部侍郎, 未幾, 及禍。 初,咸通 中, 與崔沆皆拜同中書門下平章 有治歷者工言禍福,或問:

盧攜

劉鄴、于踪、豫與流,皆不得終云。

累進翰林學士、中書舍人。展工屬辭,敏速若注射然,一時書命,同僚自以爲不及,昭宗優 書門下平章事。故事,自三省得宰相,有光署錢,留爲宴資,學士院未始有,至扆,爰光院 士輒戲曰:「造牓天也。」以譏扆進非其時。累爲尙書左丞,封嘉興縣男。徙戶部侍郎、同中 廷文書,後無繼者,今朕得之。」始,其舉進士時,方遷幸,而六月牓出。至是,每甚暑,它學 遇之。帝嘗作賦,詔學士皆和,獨扆最先就,帝覽之,嘆曰:「貞元時,陸贄、吳通玄兄弟善內 陸晟字祥文,宰相贄族孫。客於陝,遂爲陝人。光啓二年,從僖宗幸山南,擢進士第,

王而 屬軍事,必有後害。」帝顧軍興,責展沮撓,貶峽州刺史。師果敗。久之,授工部尙書。 嗣覃王以兵伐鳳翔,扆諫曰:「國步方安,不宜加兵近輔,必爲它盜所乘,無益也。且親

錢五十萬,以榮近司。 進中書侍郎,判戶部。

從天子自華州還,以兵部尚書復當國,封吳郡公。

令狐渙。」偓曰:「設展如是,亦不足責。 下責其不死難則可,以爲不喜,乃讒言也。」帝遂悟。 曰:「外言處不喜我復位,元日易服奔啓夏門,信不?」偓曰:「孰爲陛下言此?」曰:「崔胤、 天復初,帝密語韓偓曰:「陸扆、裴贄孰忠於我?」偓曰:「晟等皆宰相,安有它腸?」帝 且陛下反正,扆素不知謀,忽聞兵起,欲出奔耳。 陛 累兼戶部尙書。

列傳第

百八

陸展

鄭檠

內怨望,及是議以爲陰有黨附, 始附朱全忠,謀去朝廷衣冠有望者, 罪 固 帝至 不可赦 自 鳳 翔,大赦 然尙脩職貢,朝廷未之絕,無宜於韶 天下, 諸道皆賜詔,獨不及李茂貞。 貶沂王傅,分司 貶扆濮州司戶參軍, 殺之白馬驛, 年五十九。 東都。 書有以異也。」始,崔胤罷相,展代之。 胤 死, 展日:「國 復授吏部尚書,從遷洛。 西, 鳳翔爲最近, 展初名 迹其 柳璨

允迪,後改云。

藏州 掠准 兵部 制 書,不報,輒移病去。 庫。 南,繁移檄請無犯州境,巢笑,爲斂兵,州獨完。僖宗嘉之,賜緋 郎中表 鄭繁字蘊武。 後它盜至,終不犯鄭使君錢,及楊行密爲刺史,送都還緊。 知雜事,遷給事中。 及進士第,歷監察御史,擢累左 召爲右散騎常侍,往往條摘失政,衆讙傳之,宰相怒,改國子祭酒 杜弘徽任中書舍人,繁以其兄讓能輔政,不宜處禁要,上還 司郎中。 困窶甚,丐補廬州刺史。 魚。 王徽爲御史大夫,以 歲滿去, 贏錢千緡 黄巢

議者不直,復還常侍。 司 上班簿,遂署其側曰:「可禮部侍郎、同中書門下平章事。」、上歌本善詩,其語多俳諧,故使落 大順 後,王政微,緊每以詩謠託諷,中人有誦之天子前者。昭宗意其有所蕴 未盡, 因有

不及我。」史言不妄。俄聞制詔下,數曰:「萬一然,笑殺天下人!」旣視事,宗戚詣慶, 調,世共號「鄭五歇後體」。至是,省史走其家上謁,繁笑曰:「諸君誤矣,人皆不識字,宰相亦 曰:「歇後鄭五作宰相,事可知矣。」固讓,不聽。立朝侃然,無復故態。 自以不爲人所瞻望, ,搔首

纔三月,以疾乞骸,拜太子少保致仕,卒。

少卿李元實欲取中外九品以上官兩月俸助軍興,朴上疏執不可而止。 朱朴,襄州襄陽人。以三史舉,繇荆門令進京兆府司錄參軍,改著作郎。乾寧初,太府

大集。 宮闕 制 有上洛重山之險,北有白崖聯絡,乃形勝之地,沃衍之墟。若廣浚漕渠,運天下之財,可使 蕩然矣。 河壯麗處多,故都已盛而衰,難可興已,江南土薄水淺,人心囂浮輕巧,不可以都,河北土 事 ,局署帑藏,里閈井肆,所存十二,比幸石門、華陰,十二之中又亡八九,高祖、太宗之制 擢 關中,隋家所都,我實因之,凡三百歲,文物資貨,奢侈僭偽皆極焉;廣明巨盜陷覆 自古中興之君,去已衰之衰,就未王而王。今南陽,漢光武雖起而未王也。 國子毛詩博士。上書言當世事,議遷都曰:「古王者不常厥居,皆觀天地興衰,隨時 夫襄、鄧之西,夷漫數百里,其東,漢輿、鳳林爲之關,南,菊潭環屈而流屬於漢,西 臣視 Щ

列

厚水深, 人心 疆復狠戾,不可以都。惟襄、鄧實惟中原,人心質良,去秦咫尺,而有<u>上</u>洛爲之

限,永無夷狄侵軼之虞,此建都之極選也。」不報。

朴罷爲祕書監,三貶郴州司戶參軍,卒。 許巖士得幸,出入禁中,言朴有經濟才,又水部郞中何迎亦表其賢,帝召與語, 夫、同中書門下平章事。 以素無聞,人人大驚。 一委朴。 |朴爲人木彊,無它能。方是時,天子失政,思用特起士,任之以中興,而|朴所善方士 |朴移檄四方,令近者出甲士,資饋饟;遠者以羨餘上。後數月,巖士爲韓建所殺, 俄判戶部,進中書侍郎。 帝益治兵,所處可 擢左諫議大

討處置等使。 同 ,中書門下平章事,遷門下,爲鳳翔四面行營都統。 與朴皆相者孫偓,字龍光。 始,家第堂柱生槐枝,期而茂,既而偓秉政,封樂安縣侯。 父景商,爲天平軍節度使。 俄兼禮部尚書、行營節度諸軍都統招 偓第進士,歷顯官,以戶部侍郎 與朴皆貶衡州

相 詬 曳仆諸前,不之責,曰:「若持怒心,卽自撓矣。」 偓 性通簡,不矯飭,嘗曰:「士苟有行,不必以己長形彼短、己淸彰彼濁。」每對客,奴童

兄儲,歷天雄節度使,終兵部尚書。

列 傳 第 百 八 韓 五三八七 終始屬 權綱,猶冀天下可治。宦人忠厚可任者,假以恩倖,使自翦其黨,蔑有不濟。今食度支者乃 問,今又誅之,誰不懼死?含垢隱忍,須後可也。天子威柄,今散在方面,若上下同心,攝領 諫議大夫。宰相崔胤判度支,表以自副。王溥薦爲翰林學士,遷中書舍人。偓嘗與胤定策 八千人,公私牽屬不減二萬,雖誅六七巨魁,未見有益,適固其逆心耳。」帝前膝曰:「此一事 誅劉季述,昭宗反正,爲功臣。帝疾宦人驕横,欲盡去之。偓曰:「陛下誅季述時,餘皆赦不 韓偓字致光,京兆萬年人。擢進士第,佐河中幕府。召拜左拾遺,以疾解。 卿。」 後遷累左

嘗面 辭曰:「渙再世宰相,練故事,陛下業已許之。 若許渙可改,許臣獨不可移乎?」帝曰:「我未 ·命,亦何憚?」 偓因薦御史大夫趙崇勁正雅重,可以準繩中外。帝知偓,崇門生也,嘆 中書舍人令狐渙任機巧,帝嘗欲以當國,俄又悔曰:「渙作宰相或誤國,朕當先用卿。」

其能讓。

皆忌胤。 初,李繼昭等以功皆進同中書門下平章事,時謂「三使相」,後稍稍更附韓全誨、周敬容, 胤開,召鳳翔李茂貞入朝,使留族子繼筠宿衞。偓聞,以爲不可,胤不納。 | 堡 又 語

黨許 及鄠, 罪, 怨。 厚與 令狐 屬; 有兵 因 日 自新 金帛官 初 見帝 夕議 誅全海 朝 以 則家與國不可保。」胤 渙日:「吾屬 廷 衞 ·慟哭。 事,奈何不欲我見學士邪?」繼 危矣。」及胤召朱全忠討全海, 則 爵 兵檢中人,今敕使、衞兵爲一,臣 等; 狂謀自破, ,毋使豫 若茂貞 至鳳翔,遷兵部侍郎, 不惜宰相邪?無衞軍則爲閹豎所圖矣。」 偓曰:「不然。 政 ,帝不用。 事。 不如韶, 今宰相不得顓 聞,憂,未 即許全忠入朝。 **彥弼潛偓及澳漏禁省語,不可與圖政,** 知所出。 進承旨。 昭等飲殿中自 **汴兵將至**, 決事 .竊寒心,願 李彥弼見帝倨甚,帝不平,偓請逐之,赦其 繼 未及用, 屋動胤督 昭輩所奏必聽。 紹茂貞 如,帝怒,偓曰:「三使相 而 全誨等已劫帝 (還其 茂貞還衞卒。 、衞軍。 它日 帝怒曰:「卿有官 虚改, 不然, 無兵則家與國 西幸。 叉 勸 后有功, 則 表 兩 暴 鎭 人人生 |偓 一夜追 內臣 兵 加

今中 出, 我當直,亦繼以死。」旣而帝畏茂貞,卒詔貽範還相, 麻 側,毀瘠則 宦侍合髞。 ·可草 宰 ·相韋 廢務,勤恪 」從皓曰:「君求死邪?」偓 胎範 相 茂貞入見帝曰:「命宰相而 可 母 辨。 喪, 則忘哀, 陛 韶還位,偓當草制, 下誠惜貽範 此非· 人情可處也。」學士使馬從皓逼偓求草, 才, 日:「吾職 俟變穣 學士不草 上言:「貽範處喪未數月, 內署, 而召可 麻, 消代草麻。 可默默乎? 也, 非反邪? 何必使 自是宦黨怒握甚 明 艴然出 出峩冠 遽使視 日, 廟堂, 百官至, 偓 事, 姚 日:「腕可 泊 傷孝子心。 入泣 聞 從皓讓 而 日 血柩 三使 麻 斷,

偓曰:南司輕北司甚,君乃崔胤、王溥所薦,今日北司雖殺之可也。 兩軍樞密,以君周歲無

奉入,吾等議救接,君知之乎?」偓不敢對。

孝,與人異。」意遂決。個議附胤類如此。 聞烏聲曰:『上與后幽困,烏雀聲亦悲。』陛下聞之惻然,有是否?」帝曰:「然。是兒天生忠 偓,偓至,再拜哭曰:「崔胤甚健,全忠軍必濟。」帝喜,偓曰:「願陛下還宮,無爲人知。」帝賜 以麪豆而去。全誨誅,宮人多坐死。 恩不可赦, 「善。」崔胤請以輝王爲元帥,帝問偓:「它日累吾兒否?」偓曰:「陛下在東內時,天陰雾,王 茂貞疑帝間出依全忠,以兵衞行在。帝行武德殿前,因至尚食局,會學士獨在,宮人招 然不三十年不能成人,盡誅則傷仁。願去尤者,自內安外,以靜羣心。」帝曰: 帝欲盡去餘黨,偓曰:「禮,人臣無將,將必誅。 宮婢負

輒立 固請, 宰相者。 王溥、陸扆,帝以王贊、趙崇爲相,胤執贊、崇非宰相器,帝不得已而罷。贊、崇皆偓所薦爲 遂固辭。初,偓侍宴,與京兆鄭元規、威遠使陳班並席,辭曰:「學士不與外班接。」主席者 ,二公將以我爲知禮。」全忠怒屋薄己,悻然出。 帝反正,勵精政事,偓處可機密,率與帝意合,欲相者三四,讓不敢當。蘇檢復引同輔 乃坐。 全忠見帝,斥屋罪,帝數顧胤,胤不爲解。 旣元規、班至,終絕席。全忠、胤臨陛宣事,坐者皆去席,偓不動,曰:「侍宴無 全忠至中書,欲召偓殺之。 有譖偓喜侵侮有位,胤亦與偓貳。會逐 鄭元規日:

列

傳

第

百八

韓偓

五三九〇

矣。」再貶榮懿尉,徙鄧州司馬。 「偓位侍郎學士承旨, 公無遽。」 天祐二年,復召爲學士,還故官。 全忠乃止, 貶濮州司馬。 帝執其手流涕曰:「我左右無人 偓不敢入朝, 挈其族南依

王審知而卒。

坐無下,全忠怒,貶儀棣州司馬,侍御史歸藹登州司戶參軍。 兄儀,字羽光,亦以翰林學士爲御史中丞。 偓貶之明年, 帝宴文思毬場,全忠入, 百官

子塊然,所與者惟佞愎庸奴,乃欲鄣橫流、支已顯,寧不殆哉!觀燦、朴輩不次而用,捭豚臑 拒貙牙, 趣亡而已。 贊曰:|懿、僖以來,王道日失厥序,腐尹塞朝,賢人遁逃,四方豪英,各附所合而奮。 一韓偓不能容,況賢者乎?

## 唐 書卷 一百八十

## 列 傳第一 百九

馬植 楊收 發 嚴 涉 路巖 韋保衡 盧 攜

旣而州部廢池珠復生。 諸首領皆來納款,遣子弟詣府, 遷 饒州 馬植字存之,鳳州刺史勛子也。 刺史。 開成初,爲安南都護。 以政最,檢校左散騎常侍,徙黔中觀察使。 請賦租約束。 精吏事,以文雅絢飾其政,清淨不煩,洞夷便安。 第進士, 又擢制策科, 植奏以武陸縣爲陸州〔1〕,即柬首領爲刺史。 補校書郎。 繇壽州團練副: 羈縻 使三

部 宰 侍郎領諸道鹽鐵轉運使,遷戶部,俄同中書門下平章事,進中書侍郎。 相 李德裕所抑,內怨望。 會昌中,召拜光祿卿, 宣宗嗣位, 遷大理。 植自以譽望在當時諸公右,久補外, 白敏中當國,凡德裕所不善,悉不次用之,故植以刑 還朝不得要官,爲

初,左軍中尉馬元贄最爲帝寵信,賜通天犀帶。 列 傳 第 百 九 馬 植 楊 收 而植素與元贄善,至通昭穆,元贄以賜

帶遺之。 詔捕親吏下御史獄,盡得交私狀,貶常州刺史,以太子賓客分司東都。 它日 對便殿,帝識其帶,以詰植,植震恐,具言狀, 於是罷爲天平軍節 起爲忠武、宣武 li 度使。 旣行, 節度

使,卒。

植怒, 著令「三館學士不避行臺」,自植始。 先,遂同舉酒。 初, 奏言:「開元中, 植兼集賢殿大學士,校理楊收道與三院御史遇,不肯避, 今緘辱收與大學士等,請斥之。」中丞令狐綯援故事論救, 麗正殿賜酒, 大學士張說以下十八人不知先舉者, 臺制:三院還臺,以一人爲朝長云 朝長馮緘錄其騶僕辱之。 說以學士德行相 宣宗釋不問。 因

楊收字藏之,自言隋越國公素之裔, 世居馮翊。 父遺直, 德宗時, 以上書闕下, 仕爲

濠州錄事參軍,客死姑蘇。

此。 里人 及壯,長六尺二寸,廣 |收 七歲 多造門觀賦 而 孤,處喪若成人。 詩, 至壓敗其藩, 顙 深頤, 母長孫親授經,十三通大義。 疏眉目,寡言笑,博學疆 收嘲之曰:「爾非羸 角者, 記, 善屬文,所賦輒就, 至 奚用 一它藝無不通解。 觸吾藩?」 吳人號神 切當率類 貧甚,以

母奉浮屠法,

自幼不食肉、約日:「爾得進士第,乃可食。」

涔陽耕得古鍾,高尺餘,收扣之,曰:「此姑洗角也。」旣亂拭,有刻在兩欒,果然。 嘗言:

剛。 爲宮,某律爲商,某律爲角,某律爲徵,某律爲羽,某律少宮,某律少徵,亦曰『變』,曰『比』。 丞鮑業始旋十二宮。夫旋宮以七聲爲均,均言韻也,古無韻字,猶言一韻聲也。始以某律 蓋商聲剛而二少聲下,所以取其正、裁其繁也。漢祭天則用商,而宗廟不用,謂鬼神畏商之 爲徵,姑洗爲羽;祭地者,函鍾爲宮,太蔟爲角,姑洗爲徵,南呂爲羽。訖不用商及二少。 舞雲門以俟天神,歌太蔟、舞咸池以俟地祇。大呂、黃鍾之合,陽聲之首。而雲門,黃帝樂 收問:「五弦外,其二云何?」说曰:「世謂周文、武二王所加者。」收曰:「能爲文王操乎?」說 也;咸池,堯樂也。 聲乎?」稅大驚,因問樂意,收日:「樂亡久矣。上古祀天地宗廟,皆不用商。周人歌大呂、 即以黃鍾爲宮而奏之,以少商應大絃,收曰:「止!如子之言,少商,武絃也。 「琴通黃鍾、姑洗、無射三均,側出諸調,由羅蔦附灌木然。」時有安浌者,世稱善琴,且知音。 均成則五聲爲之節族,此旋宮也。」乃取律次之以示況。況時七十餘,以爲未始聞,而收 西京諸儒惑圜鍾、函鍾之說,故其自受命,郊祀、宗廟樂,唯用黃鍾一均。章帝時,太常 不敢用黃鍾,而以太蔟次之。然則祭天者,圜鍾爲宮,黃鍾爲角,太蔟 且文世安得武

以兄假未仕,不肯舉進士。 既假褫褐,乃入京師。明年,擢進士,杜悰表署淮南推官。

百九

楊收

未冠也。

|惊領 間。 可致, 若調 收 度支, 西南,地寬平多水泉, 又以假方外遷,誼不可先,固辭。 、兵捍賊,則民疲士怨。 兵 不 又節 ·可得。 度劍南東西川 且地當蠻衝, 可灌稅稻。 輒隨府三遷。 假令大穰,蠻得長驅,是資賊糧,豈國計耶?」乃止。 本非中國。 或謂悰計興屯田 植嗟美爲止。 宰相馬植表爲渭南尉、集賢 今輟 西南屯士往耕, ,省轉饋以飽邊士,悰將從之,收日: 復爲悰節度府判官。 ,則姚、巂兵少,賊得乘 (校理 ,議補監察御 蜀有可縣,直

專治 以母 幕 學改 府。 喪死。 太常 始 寺。 未幾 周 博士,而嚴亦自揚州召爲監察御 揮罷 太常, 服除 假 自浙 宰相,節度東川,表其弟嚴掌書記,俄而墀本,悰辟爲觀察使判官,兄弟並在 ,從淮南崔鉉府爲支使。 分務專治者也,所以藏天子之旂常。 西判官擢監 察御史,而收亦自西川 燙, 史。 拜侍御史。 收 因 建言:「漢制, 今旂常因車飾隸太僕,非是。 遷。 夏侯孜以宰相領度支, 兄弟同臺, 總羣官而聽日省, 一世榮其友。 。」未及行, 引 以詳 判 分務而

萬, 以 懿 )來, 宗 置鎭 時, 火邕州, 南軍 擢 案中書舍人、翰林學士承旨, 以 掠交趾 拒 蠻。 , 悉 調 教蹋 華 人往 張 屯, 戰必注滿, 涉氛瘴死者 以中 蠻不能支。 -書侍郎  $\ddot{+}$ 七, 同中書門下平章 戰 無功, 又時食汎舟餉南海 蠻 勢 益 張。 收議 豫章募 南 蠻

其功,

進尙書右僕射,封晉陽縣男。

案。

遷

長

安

令。

**韙之。** 改 從,曰:「方謫去,可乎?」以二小舸趨官。又明年,流驪州,俄詔內養追賜死。 流死者十一人。 前用嚴譔爲江西節度使,受謝百萬,及它隱盜。 凡五年,罷爲宣歙觀察使,不敢當兩使稟料,但受刺史俸,留公藏錢七百萬。 <u>玄价實左右之,乃招四方賕餉,數千諉至,收不能從,玄价以負己,大恚,陰加毀短。</u> 自作書謝天子,丐弟嚴死,奉先臣後。 「輔政無狀,固宜死。 造廟主,署新諡,詔百官議。 |收兄發,字||至之,登進士,又中拔萃,累官左司郞中。 鉅 ,乾寧初爲翰林學士,從入洛,終散騎常侍。 改太常少卿,爲蘇州刺史,治以恭長慈幼爲先。 益貴,稍自盛滿,爲夸侈,門吏童客倚爲姦。中尉楊玄价得君,而收與之厚,收之相 後三年,詔追雪其辜,復官爵。 今獨一弟嚴以奉先人之祀,使者能假須臾使秉筆乎?」使者從之。 發與都官郎中盧搏以爲改作主,求古無文,執不可。 以書授使者,即仰鴆死。 子鉅、鳞。 明年, 貶端州司馬。 吏具大舟以須, 收不 鳞至戶部尚書。 徙福建觀察使, 又以能政 宣宗追加順、憲二宗尊號,有司議 帝見書惻然,乃宥嚴,坐收 章保衡又刻收 收得韶謝日 貶婺州 聞 知禮 知政 朝 刺 廷 者

意有治劇才,拜嶺南節度使。 列 僔 第一 百 九 承前寬弛, 發操下剛嚴, 軍遂怨, 起爲亂, 囚傳舍,

唐

假字仁之,仕終常州刺史。 收與昆弟護喪葬偃師,會者千人。

起以聞, 嚴字凛之,舉進士。時王起選士三十人,而楊知至、竇緘、源重、鄭朴及嚴五人皆世胄, 詔獨收嚴。 累遷至工部侍郎、翰林學士。收知政,請補 乾符中,以兵部侍郎判度支,卒。子涉、注。 外, 拜浙東觀察使。 |收貶,

嚴亦斥爲邵州刺史,徙吉王傅。

陵慢,王室殘蕩, 能去,將重不幸,禍且累汝。」然以謙靖,終冤于禍。 涉,昭宗時,仕至吏部侍郎,哀帝時,進同中書門下平章事。 賢人多罹患。 涉受命,與家人泣,語其子凝式曰:「世道方極,吾嬰網羅不 爲人端重有禮法。 方賊臣

注爲翰林學士。 涉已相,辭內職,爲戶部侍郞。

食。 累官中書舍人、翰林學士承旨,文宗優遇之。 路巖字魯膽,魏州冠氏人。父羣,字正夫,通經術,善屬文。 居循循謙飭,若不在勢位者。所與交,雖 性志純絜、親歿、終身不肉

褐衣之賤,待以禮,始終一節。

外 郎 入翰林爲學士, 以兵部侍郎同中書門下平章事, 年三十六。居位八歲, 巖 幼惠敏過人,及進士第,父時故人在方鎭者交辟之,久乃答。 懿宗咸通初, 進至尚書左僕 自屯田 員

大度, 章保衡同當國 魏國 故與保衡還相惡。 於是王政秕僻, 治 故 關, ,二人勢動天下,時目其黨爲「牛頭阿旁」,言如鬼陰惡**可** 取壇丁子弟教擊刺, 俄罷嚴爲劍南 宰相得用事。 西川節度使, 嚴顧天子荒闇,且以政委己,乃通路遺,奢肆不法。 使補屯籍, 承蠻盜邊後,嚴力拊循, 由是西山 八國來朝。 以勞遷兼中書令, 畏 置定邊軍於邛州 也。 旣權 侔 則爭 俄與 , 扼 封

是徙 至江 閱武 言。 以 破邊咸家, 一得罪誅 陵 荆 都場,咸、籌莅之,其議事以書相示則焚之,軍中驚, 始,爲 |咸乃與郭籌者相依倚爲姦,嚴不甚制, 南 兩 昔皆白。 節度使,道貶新州 可佐軍興。」帝問:「咸何人?」對曰:「宰相巖親吏也。」帝怒,斥蟠叟,自是人無敢 相時,委事 殛, 剔取喉驗其已死」。 捕誅咸、籌等。 親吏邊咸。 刺史,至江陵,免官,流儋州, 嚴至新州,韶賜死,剔取喉,上有司。或言嚴嘗密請「三品 會至德令陳蟠叟奏書願請間言財利,帝召見, 俄而自及。 軍中惟邊將軍、郭司馬爾,妄給與以結士心。 籍入其家。 以有異圖,恟恟,遂聞京師。 嚴體貌偉麗, 則曰:「臣願 美須髯, 巖坐

珍玩資予之。 同昌公主,遷起居郎、駙馬都尉。主,郭淑妃所生,懿宗所愛,而妃有寵,故恩禮最異,悉宮中 保衡者,京兆人,字藴用。 俄歷翰林學士承旨,以兵部侍郎同中書門下平章事,自尚主至是裁再期。 父慤,宣宗時,終武昌軍節度使。 保衡,咸通中,以右拾遺尙

蕭遘與同升,以嘗薄于己,皆見斥。逐楊收,傾路巖,人益畏之。主薨,而寵遇不衰。 立,進司徒。 性浮淺,旣恃恩據權,以嫌愛自肆,所悅卽擢,不悅擠之。 俄爲怨家白發陰罪,貶賀州刺史,再貶澄邁令,遂賜死。 保衡舉進士王鐸第, 于籍、

進門下侍郎、尚書右僕射。

弟保义,自兵部侍郎貶賓州司戶參軍。 而劉瞻等坐主薨見貶者,偕復起。

書、弘文館大學士。 累進戶部 盧攜字子升,其先本范陽,世居鄭。 初,王仙芝起河南,攜表宋威、齊克讓、曾衮皆善將,爲招討使。 侍郎、 翰林學士承旨。 攜麥陋而語不正,與鄭畋俱李翱甥,同位宰相 乾符五年, 擢進士第, 進同中書門下平章事 被辟浙東府。 入朝爲右拾遺, 及威殺倘君長,賊熾結, 然所處議 俄拜中書侍郎 多駁 刑 歷臺省, 部尚

度使, 韶宰相百官議。 益不制,乃以王鐸鎭|| 南爲諸道都統。 攜素厚高駢,屬令立功,乃固不可巢請,又欲激巢使戰而敗鐸,因授 攜不悅。 是時,黃巢已破廣州, 勢張甚,表求天平節

**率**府率。 會駢將張璘破賊,帝復召攜,以門下侍郎同平章事。 又徇駢與南詔和親,與畋爭,相恨詈,繇是罷爲太子賓客,分司東都。 及鐸失守,以駢代之,即按關東諸 俄為兵部尚

將爲鐸、歐所任者,悉易置。內倚田令孜,而外寄戎政於駢,與奪惟所愛惡。

太子賓客罷,分司東都,是夜仰藥死。 兵亂,天下危懼,人皆咎攜,始下詔以巢爲天平節度使。 後病風足蹇,神智瞑塞,事多決於親吏楊温、李脩,賄賂顯行。 巢入京師,斷棺磔尸於長安市。 韶下, 賊已破潼關。 及巢破淮南, 明日,以 **璘**戰死,

子晏,天祐初爲河南尉,柳璨殺之。

|攜爲之鴟梟,宜天之假手於賊而磔其枯胔也。 贊曰:盧攜之敗王鐸,私高駢,賊遂卷咸、鎬而西,易若舉毛,可謂朝無人焉。 唐將亡,

校勘記

列傳

第

百九

校勘記

以武 陸 縣 爲陸州 陸 [州」,本書卷四三下地理志作「武陸州」。

(三) 乃招四方賕餉數千諉 按文義欠明。 舊書卷一七七楊收傳作「招來方鎮之路,屢有請託」,通鑑

卷二五○略同。「千」當是「干」之訛。

## 唐書卷一百八十五

### 列傳第一百一十

# 鄭畋 王鐸 第 王徽 章昭度 張濬

其科。 刑部 鄓 鄭畋字台文,系出滎陽。 中知雜事, 李德裕爲翰林學士,高其才,及守浙西,辟署幕府。 拜給事中。 父亞,字子佐。 德裕罷宰相,出爲桂管觀察使,坐吳湘獄不能直冤,貶循州 爽邁有文,舉進士、賢良方正、書判拔萃,三中 擢監察御史,李回任中丞, 薦爲

刺史,死于官。

拔萃擢渭南尉。 不調幾 久乃入爲刑部 | 數學進士,時年甚少,有司上第籍,武宗疑,索所試自省,乃可奏。 十年,外更帥鎭幕府。 父喪免。 員外郎。 宣宗時, 劉瞻爲宰相, **綯去位,始爲虞部員外郎。** 白敏中、令狐綯繼當國,皆怨德裕,其賓客並廢斥,故畋 薦授戶部郞中,入翰林爲學士, 右丞鄭薰誣畋罪,不可任郎官,出 爲宣武推官,以書判 俄知制誥。 會討

列傳第

百

+

鄭

畋

五

四〇二

梧州

刺

史。

進學 徐州 土 賊 一承旨。 龐 勋, 書詔 瞻以諫迕懿宗, 粉委,畋思不淹晷,成文粲然,無不切機要,當時推之。 賜罷, **畋草制書多褒言**, 章保衡等怨之, 以爲附下罔上, 勛平,以戶部侍郎 貶

坊, 市虔、吉米以赡安南, 五道米往餉之,船多敗沒。 吅 1宜備 僖宗 而歲加獻錢二十萬緡。 立, 顧 問, 內徙郴、絳二州, 畋敕導者止百步, 詔 可,遂著于令。 罷荆、洪等漕役,軍食遂饒。 **畋請以嶺南鹽鐵委廣州節度使韋荷,** 畋曰:「荷且有功, 以右散騎常侍召還。 禁百官僕史不得擅至宰相府。 以兵部侍郎進同中書門下平章事。 而 後以王師甫爲嶺南供 師甫以利啖朝廷, 故事,兩省轉對延英, 交、廣、邕南兵, 歲煑海 故時, 謀奪其兵, 軍副 取鹽直四十萬緡, 獨常侍不與。 宰相騶哄聯數 使, 舊取 師甫 溢 能 北 語無

之。 豐,其下思歸,衆一離,即巢机上肉耳,法謂不戰而屈人兵也。 道之師方至,蕞爾賊,奈何捨之,令四方 <u></u>
畋欲因授嶺南節度使,而盧攜方倚高駢,使立功, 合,故能興江、淮,根蔓天下。 再遷門下侍郎,封滎陽郡侯。 乾符六年,黃巢勢寖盛,據安南,騰書求天平節度使。 國家久平, 士忘戰, 以星變求去位,不許。 解體邪? 」 
 」 
 町:「不然。 乃曰:「駢才略 所在閉壘不敢 帝令羣臣議, 今不伐以謀,而怖以兵,恐天 無雙, 出。 巢之亂本於饑, 如以 准 南 咸請假節 恩釋罪, 天下 · 勁兵, 其衆 以紓難 使 及歲 以

攜議。 戎,以公主下嫁。」攜 下憂未艾也。」僕射于琮言:「南海以寶產富天下,如 裾衊於硯,因抵之。 <u></u>
畋曰:「安危屬吾等,而公倚淮南用兵, 又議從之。 帝以大臣爭口語,無以示百官, 吾不知所稅駕。」會駢奏:「南蠻方彊 "典賊, 乃俱罷,以畋爲太子賓客,分司東都。 國藏竭矣。」天子內亦屬駢, 嫚。 攜怒,拂衣去, 請 乃然 如西

俄

召

拜吏部尙書。

得脫 器 東都 靈 諸將,乃聽命,刺血以盟。 | 畋遣子| 凝績從帝,有詔進同中書門下平章事。 有機急,不可中覆,請便宜從事,臣當以死報國。」帝曰:「利社稷,無不可。」」畋還,蒐士卒,繕 軍 國 武節度使唐弘夫爲行 一械,濬城隍,使于梁者道相屬。 俄而賊使至,諸將皆欲附賊,畋開諭不可,卽悉出金帛,請 身去,復不聽。 餘黨數百人皆捕誅之。 ,臣請死以懲無狀。」帝勞遣之,且曰:「公謹扼賊衝,無令得西向。」 或曰:「方艱虞時,事 明年 遣兵戍京師,以家財勞行,妻自絍戎衣給戰士。帝出梁、洋,畋上謁斜谷,泣曰:「將相 爲鳳翔隴西節度使,募銳兵五百,號「疾雷將」,境中盜不敢發,發輒得。會巢陷 而使以僞赦令示軍中乃去。明日, 軍司馬。 遷檢校尚書右僕射、 西面行營都統。 詔使至,畋召監軍袁敬柔以逆順曉 軍中承制除拜, 賊將又至,畋斬 乃以前

中和 元年,賊將汪蹯率衆三萬來攻,畋使弘夫設伏以待。 璠內輕败儒柔, 縱步騎鼓而

五四〇三

列

第

鄭畋

前。 及 鄜 畋 延 軍四合,鏖戰龍尾坡,殺賊二萬級,積尸數十里,多獲鎧仗,璠遁去,禽蹯子 時諸鎭兵在寰內尙數萬,無所歸,畋招來之,厚加慰結。乃與涇原程宗楚、秦州仇公遇、 檄 李孝恭、夏州拓拔思恭約盟,傳檄天下。 至,遠近咸聳,各治兵思立功,奔問行在。 多旗幟, 乘高伐鼓, 時王命不出劍門, 巢大懼,不敢西謀。 賊不測衆寡,陣未整, 四方謂王室微,不能復興, 當此時,微畋,天子幾 伏發, ,斬之,威動京 衆皆囂。

敕 都 無 輕 弘 賜御袍犀帶。 進, 夫 (取咸陽, 二人不聽,果敗。 以桴濟兵渭水。 拜而不賀 以鄜、夏兵屯東渭橋。 賊伏甲偽走, 弘夫與宗楚乘勝入都門, 爲賊所覆。 再進司空、兼門下侍郎、京城四面行營 

帝聞捷曰:「朕知畋不盡,儒者之勇乃爾!」

衞 畋 曰:「吾方入朝,公能戢兵愛人,為國滅賊乎?能, 出 軍 司 旣 馬李昌 半道, [言者屯興平,遣麾下求爲南面都統,輒引兵趨府。 內慚負, 即辭疾。 韶授 太子 少傅,分司 則 守此矣。」遂委軍去。 東都,便醫於興元 **畋**不意 昌 見襲, 言自自 登城好

將孫 不廢耕,請以檢校散騎常侍隸奉天軍。」制皆可。 鄴 明 坐 一臟抵 至 死, 行 在 **畋奏言:「方** ,以王鐸將兵,復拜 關 輔 失守,鄴護褒斜有功,請 **畋司空、門下侍郎、** 舊制, 使府校書郎以上, 滿三歲遷, 監察 平章 **発死。** 事 陳秋 軍務 兒保嵯峨山 一以容決。 拒 興州 戍 列傳第一百一十 鄭畋 王鐸

御 **畋以爲不可,請:「行營節度,繇裏行至大夫,許滿二十月遷,校書郞以上,滿二歲乃奏。** 史裏行至大夫、常侍,滿三十月遷。 雖節度兼宰相,亦不敢越。 自軍興, 有歲內數遷者;

밂 年六十三,贈太尉。後帝思畋忠力,又贈太傅。凝績數歲亦卒。始,李茂貞以博野裨將戍 者。」帝以其誠,乃授檢校司徒、太子太保,罷政事。 帝曰:「乘輿東還,繇大散關幸鳳翔,供張頓峙,一委昌言,乃可安。臣若以宰相從,彼且猜 初,與李思恭配饗僖宗廟廷,又贈宗楚、弘夫官。 奉天,畋召隸麾下,委以游邏,厚禮之。茂貞感其飾擢,及畋還葬鄭,表爲請謚曰文昭。 阻,非所以靖反側也。 今畋當國,內不喜。故三人相結,而遣客上畋過咎。帝得其情,不許。 -興者 乎?」卒不肯處其下。令孜、敬瑄內常銜之。賊平,帝將還,而李昌言自以襲畋而奪之鎭 時田令孜恃權,有所干請,歐不應。陳敬瑄欲以官品居宰相上,歐曰:「外宰相安得論 如故事。」從之。 請以散官養疾。或羣臣有疑,願出臣章示之,使知天子於臣無纖芥 以凝績爲壁州刺史,留養。徙龍州,卒, 畋乃引疾去位,入見 天復

爲給事中,至侍郎。 其損怨類如此。 巢之難,先諸軍破賊,雖功不終,而還相天子,坐籌帷

|畋爲人仁恕,麥采如峙玉。凡與布衣交,至貴無少易。

鄭穀者,薰子也。方畋秉政,擢

幄,終能復國云。

將大斥不 侍 挹。 官 武 郎 敏 中辟署 節度使 尚 拜 王 御 鐸 書左僕射,超拜司 ·附者, 字昭範 史中丞 西川 病鐸持其事, 一,以戶 幕府 宰相播昆弟子 部侍郎 咸通後, 徒。 判度支。 不得肆, 韋保衡緣恩倖輔政, 仕寖顯, 也。 會昌 十二年, **搢**紳賴焉。 歷中書舍人、禮部 韧, 擢 繇禮部尙書進同中 進 鐸亦上疏 始 一士第, 由 譯得進 累遷右 侍 派解, 鄓。 士, 「補闕、 書門 乃以檢校左僕射, 故謹 所 取 下平章 事之。 多才實 集賢殿 事 士, 雖 直 稱 爲 加 學 政權, 出 世 稱

|係望 孫。 使、 望 鐸 文 不 諸道 進, 輔 ||葆||宗| 風 敏 未 辨善言兵, 又鄭 行營 天下 戰 初 「輒潰 都統, 畋 以左僕射召。 大震。 數言其賢, 然中無 鐸 封晉 退 少師,從天子入蜀, 朝廷 營 國 「襄陽。 有。 議置統 公。 復拜 始,鐸當 鐸信之, 門下 綏納 於是以高駢 帥, 流

流

元 ·侍郎、 國,練制 鐸因 舉爲將,分精兵使守湖南 益 清 平章 募 代之,貶 自 度,智慮周密, | 率諸 軍 事。 - , 完器鎧, 武 將督 乾符六年, 賊破江 太子 | 羣盗 賓客,分 時論推允。 備 帝 張 設。 司 即以鐸爲侍 俄 東都 而 陵,宋威 李係 會河南 賊捨 者, 廣 盜 中、 州 無 西 起,天下 功, 平王 荆 鼓而 南 諸 一晟諸 將 節 北 跂 度 觀

未

幾

召拜太子

拜司

徒、門下侍郎、平章事,加侍中。

復以太子太保

|蜀師三萬壁||盩屋,移檄天下。 判延資、戶部、租庸等使。 噫鳴流涕,固請行。時中和二年也。乃以檢校司徒、中書令爲義成節度使,諸道行營都統, 徒,以義成節度還屯。 争欲破賊,故巢戰數蹙。 王重榮、諸葛爽、康實、安師儒、時溥六節度爲將佐,而中尉西門思恭爲監軍,率衞兵洎梁、 是時,誅討大計悉屬駢,駢內幸多難,數偃蹇,而外逗撓。 四年,徙義昌節度使。 鐸功危就,而讒見奪,然卒因其勢困賊。後數月,復京師、策勳居關東 於是表崔安潛自副,鄭昌圖、裴贄、裴樞、王摶等在幕府,以周岌 宦人田令孜策賊必破,欲使功出于己,乃搆鐸於帝, 先是,諸將雖環賊,莫肯先。及鐸檄至,號令殷然,士氣皆起, 鐸感慨王室,每入對,必 罷爲檢校司

平章事。

被黜 三百餘人皆遇害。 ,依魏幕府,內樂禍,且怨中朝大臣,導從訓以詭謀,使伏兵高雞泊劫之,鐸及家屬吏佐 |鐸世貴,出入裘馬鮮明,妾侍且衆。 朝廷微弱,不能治其冤,天下痛之。 過魏,樂彥禛子從訓心利之。 李山甫者,數舉進士

諸鎭第一。

城陷,漢勳力戰死,錄貶韶州司馬。終太子賓客 弟鐐,累官汝州刺史。 乾符中,王仙芝來攻,鐐拒之,自督勇士與別將董漢勳守南、北

五

徽 高湜 言。 又多病 始 言無 用 薦 徽 韶宰相選 徽字昭文,京兆人。第進士,授校書郎。 自往曰:「公知黴,安得不從?」商大喜,表爲殿中侍御史,署節度府判官。 墨,遂絕妄欺 知 回 不應在選。」豫爲言,乃罷。 (雑事) 忌,公議浩然歸重。 可尚主者,或以徽聞。 進考功員 擢翰林學士。 外郎。 徐商罷政事,守江陵, 故事 從令狐綯署宣武、淮南掌書記,召授右拾遺。 徽本澹聲利,聞 ,,考簿以朱注上下爲殿最,歲久易漫,吏輒竄易爲姦。 沈詢判度支、徐商領鹽鐵、皆辟署使府。始、 心欲 不喜,往見宰相劉瑑曰:「徽年過四十, 表徽 在幕府, 恐其不樂外, 御史中丞 書二十餘 忍不

河中, 還,將汙以官。 西狩,冒夜出。 廣 裂練 明 元 書章,遣 年,盧攜罷宰相, 徽陽瘖不答,以刃環脅,卒不動。 徽與崔沆、豆盧豫、僕射于踪詰朝乃知,追帝不及,墮崖 人間走蜀。 以徽 詔 拜兵部尙書、京城四 爲戶部侍郞、同中書門下平章事。 賊令歸第,使醫護視 面宣 昼慰催陣 使 是日 越間 久之,守者懈,乃奔 ,黃巢入關, 爲賊所 執 迫

磁 能 三州貳 制。 昭義 朝議以大臣鎭撫, 于己。 高潯與賊戰 昭義 所隸 石橋,敗績。 即授徽檢校尚書左僕射、同中書門下平章事,領昭義節度使。 ※唯澤一 州。 其將劉廣擅還, 帝以兵部侍 與鄭昌圖 據路州。 權守路,士心多附方立,昌圖不 別將 孟 方立殺廣, 因取邢、洛、 是

時,李克用亦爭澤、潞, 因說行營都監楊復光,請赦沙陀罪,令赴難。 微商朝廷力未能以兵抗之,奉表固辭,詔可。 其夏,沙陀會諸軍,遂平京師,徽助爲多,遷右 更爲諸道租庸供軍使。

前,徽不屈勢倖,一平以法,繇是爲帝左右所憎,以其黨薛杞爲少尹,輕其權。 安撫制置脩奉使。 帝念徽無罪,拜吏部尚書,封琅邪郡侯。 帝還京師,復申前授,稱疾不任奉謁。宰相疾其怨望,貶集州刺史。會帝避沙陀,出次寶雞。 奏止不使到府。 請帝東還。 尪 一廢自言。 大亂之後,宮觀焚殘, 及煴僭號,迫羣臣作誓牒,徽託手弱,卒不肯署。煴平,帝至鳳翔,召徽爲御史 又進檢校司空、御史大夫,仍權京兆尹。 衆念,共潛罷黴, 徽外調兵食,內撫綏流亡,踰年,稍稍完聚,興復殿寢,裁制有宜,即 園陵皆發掘,鞠爲丘莽, ,令赴行在。俄授太子少師。|徽途移疾||中, 未行而嗣襄王煴作亂,帝進次漢中。 乘輿未有東意,詔徽充大明宮留守, 官要家爭遣人治第,侵冒齊民,訟訴滿 煜逼召徽,以 |杞方居喪,激 滿百日免。 京畿 奉

銓選失序, 昭宗立,見便殿, 吏肆爲姦, 進對詳治,帝顧宰相曰:「黴神氣尙彊,可用。」乃復授吏部尙書。 補調 重複不可檢。 |徽爲手藉, 一驗實之,遂無姦滯。 進右僕射。

大夫,固辭足痺,復拜太子少師。

列傳第一百一十 王徽 韋昭度

大順元年卒,

贈

司空,

諡

日貞

Ħ.

周爲 言從, 人,位臺省牧守者三十餘人。 同州 皆擢 言其先本魏諸公子,秦滅魏,至漢徙關中霸陵,以其故王家,爲王氏。 刺 進士第。 史, 死葬咸陽鳳政原, 至鳳閣舍人者三人,故號「鳳閣王氏」。自是訖大中時,登進士者十八 |徽有雅望,拜宰相一日而京師亂,故其設施無可道者 子孫因家杜陵。 曾祖擇從, 昆弟四人, 日易從、 十世 加 朋從、 鴷,

李昌符 鄓 即位,守中書令,封岐國 翰林學士 韋 亂 昭 興蒼卒, 度字正紀, 承旨從。 昭度質家族於禁軍,誓共討賊,士感動,乃平昌符。 京兆人。 未幾, 公。 擢進士第, 踐歷華近, 同中書門下平章事。 還京, 累遷中書舍人。 授司空。 再狩山 遷太保,兼侍中。 僖宗 ?西狩, 南, 還次鳳翔, 以兵部侍

地, 昭度信之,請還。 合兵以 方山東兵連 鐵券, 慢 州 刺 先帝所命,若何違之? 拜昭 史王 一禍結, 度 建 未半道,建以重兵守劍門,急攻成都, 兼行營招撫使。 变 陳敬瑄 朝廷不 於成都,以昭度爲西川節度使。 能治 一淹 乃建幢節行 腹 半歲, 心疾 始拔 也, ;城下, 漢州。 宜亟還定之。 諭其衆曰:「毋久閉」 囚敬瑄 建紿 昭度曰:「公暴 敬瑄不內,詔東川顧彥朗與建 敬瑄 自 一稱留後。 小醜, 壘。」 當 師 責 罷 遠出, 敬瑄 建等 昭度為東都 遣 可 事 辨。」 蠻 夷

留守。

謀,請貶之。 譏詆朝政。 今又引磎叶力, 此姦人務立黨與, 惑上聽, 號尙父。 言:「太宗由是卽位,後人臣無復拜者。 郭子儀有大功,嘗授之,固辭免,況行瑜乎?」乃更 追復官爵,許其家收葬,贈太尉。 杜 讓能旣被害, 行瑜怨。 昭度懼,稱疾,罷爲太傅, 未及報,而行瑜收昭度於都亭驛殺之。天子不得已,下詔暴其罪。 會用李磎輔政,而崔昭緯密語行瑜曰:「前公已爲尙書令,昭度持不可。 以司徒、門下侍郎復爲平章事,進太傅。 致仕。 恐事復有如杜太尉時。」行瑜乃與李茂貞數上書 行瑜、茂貞、韓建聯兵至闕下,言昭度伐蜀失 王行瑜求爲尚書令, 昭度建 行瑜誅,乃

馱, 士皆厭給。 服 員 :在,再進諫議大夫。宰相王鐸任行營都統,奏署都統判官。 外郎。 展居金鳳山,學從橫術,以捭闔干時。 張濬字禹川,本河間人。性通脫無檢,汎知書史,喜高論,士友擯薄之。不得志,乃羸 黄巢之亂,稱疾,挾其母走商山。 帝異之, 曰:「爾乃及是乎?」對曰:「臣安知爲此, 張濬教臣也。」乃急召濬至 樞密使楊復恭遇之,以處士薦爲太常博士,進度支 僖宗西出, 衞士食不給, 漢陰令李康獻糗 公餌數百

列

陷危也。」諸將雜然曰:「諫議語是!」敬武卽引軍從濬西。 敗,後賊平,將安往?誠能此時共誅大盜,迎天子,功名富貴可反手而取。 哉?」敬武愕胎愧謝。 郎判度支。後再狩山南,拜同中書門下平章事,仍判度支。 曰:「公爲天子守藩,今使者齎詔至,不北面俯伏而敢侮慢,公乃未識君臣大分,何以 黃巢, 販鹽虜耳, 時 敬 武 在平盧, 捨天子而臣之,何利邪?今諸侯勤王者踵相接, 濬宣詔已, 土按兵默默。 軍最彊,累召不肯應。 濟往說之,而敬武已臣賊,不迎使者。 濬召將佐至鞠場,倡言:「忠義之士當審 擢濬爲會軍使。 公等據一 吾憐公等捨安 賊平,以戶部侍 州以觀 濬責之 長吏民 利 而 成

治之要,對曰:「在彊兵。 兵彊,天下服矣。」天子繇是甘心於武功。 後與論古今事,濬輒曰: 「漢、晉之遠無可道,陛下春秋鼎富,天資英特,內偪宦臣,外迫彊臣,故不能安。此臣所以 復恭恃援立功,專任事,帝稍不平。當時多言濬有方略,善處大計,乃復見委信, 濬 始繇復恭進,復恭中失權,更依田令孜,故復恭銜之。 及爲中尉,數被離 間。 管問 昭宗 卽

雲州 武 四品以上議,皆言:「王室未寧,雖得太原,猶非所有。」 濬固爭:「先帝時,身播屯亂,蓋 是時, 赫 連鐸 上言:「先帝幸梁,繇李克用與朱玫連和,請舉兵誅之,願帥兵爲掎角。」帝詔文 朱全忠威振關東, 而安居受殺李克恭,以路州歸全忠。 全忠乃與幽州李匡威、

心而泣血也。」

必破。 萬。 尉等餞長樂坂,以酒屬濬,濬不肯舉。是役也,濬外幸成功,而內制復恭,故銜之。 馬招討制置使,京兆尹孫揆爲昭義節度使副之,韓建爲供軍使;以全忠、匡威、鐸並爲招討 克用、全忠不相下也。 天下其謂我何? 樞密使駱全諲爲行營都監;以汴甲三千爲帳下;發五十二軍、邠、寧、鄜、夏雜虜合五 帝置酒安喜樓臨餞,濬飮酣泣下曰:「陛下偪於賊,臣願以死除之。」復恭聞不懌, 今軍中費尚足支數年,幸聽勿疑。」既濟、緯相倡和,帝乃決出師,詔濬爲河東行營兵 」久不決。 請因 [其弱討之,斷兩雄勢。」帝曰:「平巢,克用功第一。 孔緯曰:「濬言萬世之利, 陛下所顧一時事爾。 臣見師度河,賊 今乘危伐之,

以濬爲相,暮請以兵見。」乃止。 及韋昭度死,復用緯爲宰相,故濬亦拜兵部尚書,領天下租庸使。 罷濬爲武昌軍節度使,三貶繡州司戶參軍。 兵趨潞,以中人韓歸範持節護送至軍。 亦棄城去。 軍失太半。 全諲飲藥死,建遁去。克用上書請罪,其辭悖慢,因韓歸範以聞。 先是,汴、華、邠、岐兵絕河會平陽。 濬次陰地關, 諸軍壁平陽。 存孝進掠晉、絳、慈、隰,其鋒甚盛。 會太原將李存孝方攻路,揆至長子,爲存孝所禽,汴 |汴將||朱崇節已戍路,|濬慮||汴人遂據有之,乃令||揆分 存孝擊之,皆大北,委仗械去。 濬斂衆夜遁,比 全忠爲申請, 濟間道出王屋,奔河淸,桴而濟,麾下略 詔聽使便。 將復用,克用上言:「若朝 濬乃至藍田依韓建。 朝廷震動,即日下韶

列

然朝廷得失,時時言之。 蓋知其將篡也。 王師範起兵靑州,欲取濬爲謀主,不克。全忠脅帝東遷,濬聞曰:「乘興卜洛,則大事去矣。」 乾寧中,罷使,拜尙書右僕射。 全忠畏濬構它鎭兵,使全義遣牙將如盜者夜圍墅殺之,屠其家百餘人,實 劉季述亂,濬徒步入洛,泣論張全義,并致書諸藩,請謀王室之難。 上疏乞骸骨,遷左僕射致仕,居洛長水墅。 雖自屛處,

之,示不忘朝廷,且欲雪家冤而不克。 死,不如去以存吾嗣。」格拜而辭, 彦率士三十人送之, 泝漢入濁, 後事王建。 走淮南,依楊行密。 始,濬素厚永寧史葉彥,彥知其謀,以告濬子格。 時行密得承制除拜,播請每除吏,必紫極宮玄宗像前致制誥于桉,乃出 終廣陵。 濬度不免,父子相持泣曰:「留則俱 少子播,間道

天復二年十二月。

當大過之世,爲天下唱。扶支王室,幾致中興。俄而爲孽豎亂宦所乘,功業無所成就。 贊曰:唐之季,嗣君暗庸,天穢其德久矣。 纖人柄朝, 靡謀不乖。 如畋、鐸皆社稷之才,

以亂止亂,悖繆厥心,悲夫!

#### 唐 書卷一 百八十六

## 列傳第一百一十一

趙德諲 周寶 王處存部 匡凝 楊守亮 鄧處訥 楊晟 雷滿 顧彦朗 陳儒 彦暉 劉巨容 馮行襲

徐州歸天子。 周寶字上珪,平州盧龍人。會祖待選, 事平盧節度希逸爲牙將, 。父懷義, 通書記,擢累檢校工部尚書、 每戰,得攻魯城者,必手屠之。歷左贊善大夫,從|李洧以 爲魯城令, 天德西城防禦使,以徙城事不爲宰相 安祿山反, 率縣人拒戰, 死之。 祖

李吉甫所助,以憂死。

疆毅,未嘗詘意於人。 官不進,自請以毬見,武宗稱其能,擢金吾將軍。 鎭才校入宿衞,與高駢皆隸右神策軍,歷良原鎭使,以善擊毬,俱補軍將,尉以兄事寶。 寶藉蔭爲千牛備身。 天平節度使殷侑嘗爲懷義參軍, 寶從之,爲部將。 以毬喪一 目。進檢

列 傳

第一百一十一

周 籫

> 五 四

> 五

會昌時,

選方

唐

校工 一部尚 書、 涇原節度使。 務耕力,聚糧二十萬斛, 號良將。

主之; 卒自 檢 校 司 守,發杭州 黄 空。 巢據宣、歙, 鹽官都, 時羣盜 兵戍縣鎮, 徐及主之; 徙寶鎭 所在槃結,柳超據常熟, 判 海 新登都, 軍節度 八都:石鏡都, 兼 杜稜主之; 南 面 董昌 王敖據崑山 招 討使。 1主之; 唐山 巢聞,出采石, 都,饒京主之;富春都,文禹主之; 清平都,陳晟 王騰據 華亭,宋可復據無錫。 略揚州 主之,於潛都, 僖宗入蜀,加 吳文舉 寶 練

龍

泉都

,凌文舉主之。

受命。 殺之。 京師陷 寶 亦稍惑色,不卹事,以壻楊茂實爲蘇州 中和 寶表留 四年, 賊 ,將赴難,益募兵,號「後樓都」。明年,董昌據杭州 二年,進同中書門下平章事, 餘杭鎮使陳晟攻諸, ",不聽。 乃殘郛署、汙垣牖去。 諸以州授晟。 兼天下租庸副使,封汝南郡王。 刺史,重斂,人不 韶以王蘊代 寶子璵統後樓都 載, 聊。 柳超 載留 田 令 放以趙載代之,茂實不 自常熟入睦州 潤州 孱不能馭軍 實和裕,喜接士,以 ·,部伍橫肆。 刺史章諸

攻常州 叛。 據常州。 王藴 初, 刺 鎮海將張郁以擊毬事實。 謂州 史劉革迎降,衆稍集。 及董昌徙義勝軍節度使,寶承制擢杭州都將錢鏐領州事。 兵還休,不設備,郁遂大掠,蘊嬰城守。 寶遣將丁從實督兵攻之,郁走海陵, 光啓初, 劇賊剽崑山, 寶遣將拓拔從討定之。 寶遣郁領兵三百戍海上, 宣州賊李君旺陷義興 依鎭遏使高霸 郁保 常療 郁醉 從實 丽 因

是時,右散騎常侍沈誥使至江南,負田令孜勢,震暴州縣。 嗣襄王下令搜令政黨,寶

收誥及趙載殺之。

約西定京師,寶喜,將赴之,或曰:「高氏欲圖公地。」實未信。 勳、欺朝廷也。」駢遣人切讓,寶亦詬絕之。 帝在蜀,淮南絕貢 答曰:「平時且不聞境上會,況上蒙塵,宗廟焚辱, 高 |財領鹽鐵,辟寶子信爲支使,寶亦表||開從子在幕府。 、賦,謾言道浙西爲實剽阻。 帝知其誣,不直駢,自是顯隙。 寧高會時耶?我非本康,不能爲人作功 | 財爲都統,蹇不禮寶,寶銜之。 財遣人請會金山, 財出屯東塘, 謀執實,實

寶抵于地曰:「公有呂用之,難方作,無誚我! 寶驚出,諭曰:「爲吾用則吾兵,否則寇也。六州皆我鎭,何往不適?」乃自靑陽門出奔,士 大掠,官屬崔綰、陸鍔、田倍皆死。 浩奉朗領府事。 會部將劉浩、刁頵與度支催勘使、太子左庶子薛朗叛,寶方寢,外兵格鬭,火照城中。 」即奔常州依丁從實, 寶至奔牛埭,駢饋以齏葛,諷其且亡也。 召後樓都,無一士至

常州 死,年七十四,贈太保。 錢鏐遣杜稜、成及攻薛朗,稜子建徽攻從實,聲言迎寶,擊破賊君旺,取船八百艘,遂圍 從實奔海陵。 鏐具櫜鞬迎寶,舍樟亭。未幾,殺之。不淹月,而駢爲畢師鐸所囚。 鏐以杜稜守常州,文德元年拔潤州,劉浩亡,不知所在,執朗,剖其

列傳第

百 一 十

周賢

王處存

心祭寶,使阮結守潤州。 楊行密殺高霸,而張郁、丁從實皆死。

反, 師悅 初, 連和,與鏐有隙, 黃巢平,時溥遣小史李師悅上符璽,拜湖州刺史。 而結好於行密,安仁義次潤州,復助之。 昭宗時, 乾寧三年卒,子繼徽代, 遷忠國軍節度使。

乃奔揚州

詢遂 以地附行密,其將沈攸謂不可,繼徽 走,鏐取其地。 求顧全武等。 一絕鏐,攻蘭溪,鏐使方永珍擊詢。 陳晟據睦州十八年死, 未幾,鏐將楊習攻婺州 弟詢代立,畏鏐忌己,因徐綰亂, 天祐元年,行密遣將闞晊、陶雅救之,執鏐弟鎰、大將 詢乃奔楊渥,渥以金師會守之。及繆破衢州,師會 與田頵通。 **鏐割桐廬隸杭州** 

僮千人,以此 王處存, 京兆萬年人。 奮,累除檢校 司空、金吾大將軍 世籍神策軍,家勝業里,爲天下高貲。 十,遙領 興元節度使。 父宗,巧射利,侈靡自奉,

號哭,不俟韶,分麾 司 馬唐弘夫亦屯渭北。 處存自右軍鎭 使歷檢 下兵二千間道 韶處存檢校尙書右僕射督戰,俄拜東南面行營招討使。 校刑部尚書、定州 至 山 南 衞 乘 制置使, 興。 外約王重榮連盟, 累遷義武節度使。 進 屯渭 橋 而 涇州 處存

黄巢陷京

師,

叔處直兵擾其尾,令騎將甄瓊章次義豐,而存敬游弈騎已至,且戰且引十餘里,執瓊章。 門下平章事,又進太保。 近 及李匡威得志,謀幷取之。處存善脩鄰驩,內撫民有恩,痛折節下賢, 納,趣上道。 徒、同中書門下平章事 婚好,遣使十輩曉譬迎勸,卒共平京師。 授京城東面都統。 克用爲第一。 太師,諡曰忠肅。 河心。 處存臨事通便宜,有大將風。 田 光化三年,朱全忠使張存敬攻幽州,以瓦橋濘潦,道祁溝關。 令孜討王重榮,徙處存節度河中,上書言:「重榮有大功,不可改易,搖諸侯之心。」不 軍迹河朔舊事,推子郜由副使爲留後,昭宗從之。 歲時講兵,與諸鎭抗,無能侵軋者。 軍次晉州,刺史冀君武閉門不內,而重榮拒詔。 遷檢校司空。 每痛國難未夷,語輒流涕,軍中多處存義,愈爲之用。 復出兵三千屬大將張公慶會諸軍捕巢泰山, 幽、鎭兵悍馬彊,其地勢也,而易定介於其間,侵軼歲至。 王鐸差興復功,以勤王舉義處存爲第一 累加侍中、檢校太尉。 累拜節度使,加檢校司空、同中書 郜方與劉守光厚, 卒,年六十五,贈太子 協穆太原以自助,遠 素善李克用, 滅之。 ,收城破賊 進檢校司 又故 乃畀 而

列傳

第一

百一十一

王

處存

鄧處

訥

五四一九

圖 河 氏 見攻也。」全忠責 太原,使處直 全忠表 。」全忠許之。 北 叔琮下深澤, 而 挑戰, 焚其餘 《處直 處 爲節度留後、檢校尙書左僕射。 主留後。 直 **遂**圍定州。 執大將 宋出, : 何故 處直以從孫爲質,上所持節, 事 涉河乃戰,處直大敗,亡大將十五,士死者數萬。 馬少安,圍祁州,屠之,斬刺史楊約,休兵十日。 全忠亦至,處直辭曰:「弊邑事上未嘗不忠, 克用,答曰:「太原藉兄弟之舊,修好往 郜斬親吏梁汝, 移書存敬, 卽獻絹三十萬, 且. 一請盟。 具牛酒犒師。 一來,常道 俄而 事鄰 外郛陷, 未嘗 處直壁沙河, 也。 存敬收械甲以 存敬取 不禮,弗虞君之 君苟爲罪,請改 問 以 其 族 成而還。 存敬 賦 戰 奔

處直字允明,天復初爲太原郡王。郜至太原,克用表爲檢校太尉,卒

盜 推 使 李裕 描 頂爲 .... 鄧 留後, 處 召諸 卽復置鎭南軍 訥字沖韞 請諸朝。 州 戍校 , 徇日:「天下未定,今與君等安護州邑,以待天子 邵州龍潭人。 僖宗方在蜀,遣使者無 擢項節度使。 少從江 頃悟, 不受命。 西人閔頊 慰。 當是時, 防秋安南, 更爲檢校尙書右僕射、 撫州 中和 刺 史鍾傳據洪州 元年還,道 命,若何? 潭州 一衆稱 欽化軍節度 議者 逐觀 善。 欲 乃

使,以處訥爲邵州刺史。

集夷獠數千屠牛勞衆,操長刀柘弩寇州縣,自稱「朗北團」,陷灃州 劫居人。 軍」。推滿爲帥,景思爲司馬,襲州, 將 鎭 量軍從財准南 朗州武陵 見滿 俄進武貞軍節度使。 已據州、悉衆趨衡州、逐刺史徐顥、詔授衡州刺史。 人雷滿者,本漁師,有勇力。 逃歸,與里人區景思獵大澤中,嘯亡命少年千人, 先是, 殺刺史崔翥。 **陬溪人周岳與滿狎**, 時武 陵諸蠻數叛,荆南節度使高駢擢滿爲裨將, 韶授朗州兵馬留後。 因獵, 石門峒酋向瓌聞滿得志,亦 宰肉 殺刺史呂自牧,自稱刺 署 歲略江陵, 不平而鬭, 伍 長, 自號 欲殺滿, 焚廬落, 「期 專

罪,奈何? 武 欽化軍節 安軍節 周岳 )項 度使。 度使。 羸 一疆大,且治人有恩,哀徐顯窮, 」衆曰:「善。」於是礪甲訓兵,積八年,結雷滿爲援,攻岳斬之,自稱留後。昭宗 軍誘 戦, 處訥 項墮伏中,故大敗。 聞之哭,諸將入弔。 率兵納之。 淮 處訥 西將黃皓殺項。 曰:「與君等荷僕射恩,若合一州之兵問周岳 向瓌召梅山十峒獠斷邵州道, |岳開亂, 以輕兵入潭州 **頻掩其** 自 稱

史。

龍 口 關。 不三日, 勛以 4 會劉 酒 建鋒、 犒 師, |殷說||助日:「劉公勇智絕人,術家言當興翼、軫間。 馬殷兵至, 攻灃陵, 處訥遣邵州豪桀蔣勛、 鄧 繼崇率兵三千斷 今精兵十萬,攻

列

傳

第

百

+

鄧

處訥

以奇兵出迪田 湘 其 下 和,不許,卒禽勛斬之。 壁,麾瀕江軍夾擊,勛大敗,拔定勝一壁, 軍,納之。 鄉 ,取邵州, 畏建鋒虐, 戰必克,收敗衆以餉軍,公哀鄉兵扞關, 殆矣。 既入,處訥方宴,執而 ,踰澗山,據江爲壁,伏兵于莽,誘勛度江。 進壁定勝、武安。 夜棄甲走。 建鋒至關曰:「此天意也!」盡用邵旗鎧趨潭州。 殺之。 建鋒使殷督諸將擊之,殷大敗,走江滸。 建鋒許勛賞,未及行,造請, 進圍邵州。 不如下之,富貴可得也。 未下而建鋒死, 勛見士未陣,爭出鬭 弗許 殷代為節度使。 , 勛怒, 鄉人 」勛謂然。 殷 夏侯陟 率鄧繼崇攻 守者以爲 分兵襲 教殷 |勛請 勛 叉

亂, 據 病不 連州 脅衆自防,盜 能去,以千騎留連州,衆飢, 殷遣將李瓊攻永州, 是時,道州蠻

蘇結、 |郴人|陳彥謙殺刺史董岳, 永州 殺刺 殺行旻。 何庾, 史鄭蔚,與景仁合從,數遣諜殷虛實,完壘自 從蔡結求糧,乃相倚杖, 衡人楊師遠各據州叛。 李瑭攻道州,蔡結約峒獠爲援,久不勝, 發官帑募士,自稱都 統,勝兵四千。 宿人魯景仁從黃巢爲盜, 與州戍將黃行存誘 守。 零陵 謀曰:「蠻所恃, 工商 唐行旻乘巢 四五千人 至廣州,

攻郴州 林藪耳。」乃屯大川 陳彥謙出戰,軍亂不能陣,斬彥謙。 ,伐山焚林,獠驚走。 城陷, 進圍連州, 執蔡結、何庾, 魯景仁乘城守,三日不下,夜焚其門 殷斬之。 李瓊出耒陽、常寧,

入之,景仁自刺死。

項字公謹。 滿字秉仁。 岳字峻昭。 行旻字昌圖。

取器 使成汭 以出。 滿 兵出,襲江陵,入之,焚樓船,殘墟落,數千里無人跡。弟彦恭,結忠義節度趙匡凝以 不脩飭,每宴使客,抵寶器潭中,曰:「此水府也,蛟龍所憑,吾能沒焉。」乃裸入水,俄 累遷檢校太尉、 同中書門下平章事。天復元年卒。 子彦威自立。 間荆南節 度

逐彥威,據江陵。 匡凝弟匡明擊之,還走朗州。

朱敬玫不平,謀殺之。敬玫覺,先率兵入其府,彥譽方寢,拔劍縋城奔親軍壘,不得入,彥譽 中人似先元錫、王魯琪慰撫,密戒曰:「若敬致可誅,誅之,以爾代而魯琪爲副。」敬政盛兵出 方據荆南,紹業憚之,踰半歲乃至。僖宗入蜀,召紹業還行在,以彥暮代節度。 迎,元錫等不敢發而還。 曰:「而等負我!」俄見害, 陳儒, 江陵人。世爲牙右職。 復詔鄭紹業爲節度使,逗留不進。 親屬僚佐皆死。 廣明元年,以鄭紹業爲荆南節度使,時朗州刺史段彥聲 敬政以少尹李燧爲留後, 且誣彥譽以罪。 彦謩與監軍 帝遣

千,號「忠勇軍」,暴甚,儒不能制。 敬政署儒領府事。 明年,遷檢校工部尚書,爲節度使,進檢校右僕射。 初,紹業將申屠踪率兵五千援京師,旣歸, 儒告以忠勇橈 敬致有悍卒三

列傳

第一

百一十一

陳儒

劉巨容

五四二三

治, 琮請除之。大將程君從聞之, 率衆奔澧州 琮追斬百餘人, 軍乃潰。 已而踪復顓軍。 雷滿

三以兵薄城,儒厚啖以利,乃去

勇而殘, 撃満 盜刺其腹死。 前 淮南將張瓌、韓師德據復、岳二州, 此數殺大將富商, 荆故將夷戮幾盡。 師德兵上峽,大略去。 故積賄, 時以楊玄晦代敬玫監軍, 壞引兵逐儒,儒將奔行在, 每曝衣,紈繡不可計。 自署刺史。 儒請壞攝行 召敬玫還成都, | 褒見心動, 遺卒賊之。 旣又劫還,囚之。 軍司馬, 懼帝治前罪, 稱疾自 師德攝節度副 壞,滑州人, 敬致衣黃 使, 暴

蘇皆 甲鼓 倂尸于井。 史 郭 無 盡、米斗錢四 秦宗言來寇,馬步使趙匡欲奉儒出,瓌覺之,殺匡而絕儒食,七日死。 遺, 禹 率峽州 夜擊闔 復州長史陳璠從壞至江陵, 「爲警。 十千,計抔而食,號爲「通腸」。疫死者,爭陷其尸,縣首于戶以備饌。 刺史潘章解圍。 宗言不能下,乃解去。 明年 密斷壞首置囊中,走京師獻之,授安州刺史。 德 諲又至,諸將困于戰,城遂陷,瓌死, 二年,宗權遣趙德諲攻瓌,瓌求救於歸州 瓌固壘二歲, ,人無 軍 樵 刺 中

劉 巨容,徐州人。 爲州大將。 **龐勛之反,自拔歸,授埇橋鎭遏使。** 浙西突陣將王郢反,

攻明州 ,巨容以筒箭射郢死,拜明州刺史,徙楚州團 |練使。

之, 難,不愛惜官賞, 巢 彭 巨容合諸道兵討之,授南面行營招討使,累兼天下兵馬先鋒開道供軍糧料使、檢校司空,封 山 城縣侯 南 追之,伏興林樾間,賊大敗,執賊將十三人,轉鬭一舍,虜獲不可計。 率十俘八,以功遷檢校禮部尚書。諸將欲乘勝追斬巢,巨容止曰:「朝家多負人,有危 東道節度使以扞巢,屯團林。 黃巢亂江淮,授蘄黃招討副使,徙襄州行軍司馬、檢校右散騎常侍。 事平卽忘之,不如留賊,爲富貴作地。」諸將謂然,故巢復熾。 江西招討使曹全最與巨容守荆門關,與賊戰,巨容僞北, 巢浮江東奔,巨容追 巢據荆南, 及陷兩京, 俄遷

所逐 ,引麾下東出襄、鄧。 巨容明吏治。 時僖宗在蜀,公卿多因巨容護赴行在。 秦宗權遣趙德諲合晏弘兵攻襄州,巨容不能守,奔成都 山南西道節度使鹿晏弘爲禁軍

傳,令孜恨之。 巨容自言其術 始,揚州 人申屠生能化黃金, 龍紀 巨容留不遣。 元年,殺巨容,夷其宗,生幷死 田令孜之弟遁襄州,巨容出金夸之。 高駢客之,爲呂用之所譖,亡奔襄、漢,駢遣吏捕得, 及在蜀,匿生,使術不得 生見

巨容部將馮行襲者,均州武當人,以謀勇稱里中。 列 傳 第 百 + 劉 巨 容 趙 德 諲 中和初,鄉豪孫喜聚衆數千人,謀攻 五 四二五

以輕騎進, 行 乘勝逐刺史呂燁,據均州,巨容因表爲刺史。 襲伏 八士江 我爲鄉導,城可下。」喜信之,旣度江,吏出迎,伏甲興,行襲擊喜,斬之,衆皆潰。 隩,以單舟迎喜曰:「州人思得將軍久矣。 顧將軍 兵多必剽掠, 若留· 衆江

行襲

就擢 行襲方附 楊守忠表爲行軍司馬,使領兵撬谷口以通秦、蜀。 戎昭 昭宗即授金州防禦使。 帝在閩,均之右有長山, 軍節 全忠,盡殺之,收詔書送全忠。 度使。 朱全忠圍 時山南西道節度使楊守亮將襲京師,道金、商, 當襄、漢貢道, 鳳翔, 神策中尉韓全誨遣中人二十輩督江、 有劇賊據險劫獻物,行襲平之。武定節度使 鳳翔李茂貞養子繼臻據金州 行襲逆戰破之, 准兵過其州, 行襲攻拔

行襲, 行襲 行全爲子, 天祐 不足禦建, 以馮 二年,王建遣將王思綰攻行襲, 恭領 更名宗朗,授觀 州,罷防禦使而 遣別將屯金州。 緊察使, 廢戎昭軍 以渠、 行襲議徙戎昭軍於均州, 巴、開三州隸之。 敗其兵, 州大將金行全出降, 宗朗不能守, 以金、房爲隸。 焚郭 行襲奔均州。 全忠以金 邑去。 人不樂 全忠以 建 以

趙 德諲,蔡州人。 從秦宗權爲右將,以討黃巢功授申州刺史。 光啓初, 與秦誥、鹿晏弘

列 僔 第 百 + 趙 德 諲 楊 守 亮 荆南,又度宗權必敗,舉地附朱全忠。 留裨將王建肇守之,遺人纔數百室。 合兵攻襄州,節度使劉巨容奔成都。 明年 宗權假德諲山南東道節度留後,進攻荆南,悉收寶貲, 全忠方爲察州四面行營都統,即表以自副,加忠義 ,歸州刺史郭禹來討,建肇納之,奔黔州。 德諲 失

節度使。

宗權平,加中書令,封淮安郡王,卒,子匡凝嗣

匡凝字光儀,由唐州刺史自爲山南東道節度留後, 昭宗即授節度使,不三年, 以威惠

聞。 累遷檢校太尉兼中書令。 匡凝矜嚴盛飾,前後持鑑 自照。

方城 鎭遏使度軫奔全忠,發其謀。 ,執刺史趙匡璘,斬首五千級;拔鄧州,執刺史國湘。 全忠之敗清口,匡凝與奉國節度使崔洪、河東李克用、淮南楊行密約合兵攻全忠。 全忠移書切責,使氏叔琮攻唐州, 匡凝懼, 乞盟 刺史趙匡璠降。 進 重 會

驅民趨申州,遂奔行密, 全忠還之,質洪子於汴。 河東客伊超使淮南還,過察,洪亦留之,因是丼|俊送|全忠,以部將苛拘爲解,遣兄|賢入質, 全忠使親將陳俊、王紳入叔宗軍,崔洪留之,紳亡歸。 全忠使賢調察卒二千出戍。將行, 麾鼓亙百餘里。 武昌杜洪邀之,弗及,察士多亡去,從者纔二千 洪與行密欲邀友恭軍,不克。 大將崔景思不悅, 殺賢,洪懼, 會

五四二七

弟匡 諭 止之,匡凝流涕曰:「吾爲國屛翰,渠敢有他志! 明 大破汴軍於鄧州, 元年 ,封匡凝爲楚王。時諸道不上供,唯匡凝歲貢賦天子。 因勸匡凝與王建連和。 及荆南成汭敗, 」副使王筠勸絕全忠, 匡凝取江陵, 全忠方圖天下, 全忠怒,出兵攻之。 表匡明為

荆南節度留後,有詔拜檢校司徒、荆南節度行軍司馬。

度使,分其衆爲崇義、勇義、順義、廣義四都, 殺。 駇, 兄弟分仕二 乃燔州 敗荆南 全忠 全忠以其兵分可圖也,乃使楊師厚攻匡凝,自將中軍繼之,屯臨漢。 以師厚爲山 救兵,俘其將。 國,若適揚州, 單舸夜奔揚州。行密見之曰:「君在鎭,輕車重馬輸於賊,今敗乃歸我邪? 南東道節度留後,遂趨江陵。 是自取 全忠循江而南,師厚繇陰谷伐木爲梁。匡凝以兵二萬瀕江戰,大 疑也。」匡明謂然, 全忠遂有荆南。 匡明亦謀奔淮南,子承規諫曰:「昔諸葛 乃趨成都,王建待以賓禮,授武信軍節 匡凝遣客謝,囚不 自

仙芝死 復恭家, 楊 守亮, 又事 日守亮、守信。 徐唐 曹州 莒, 劫 本姓訾, 剽洪、饒二州。 復恭收京師, 名亮。 與弟信俱從王仙芝爲盜。 楊復光平江 守亮以戰多,拜山南西道節度使、 西, 得其兄弟, 亮身長 養爲假子, 七尺餘, 檢校太保, 以信養於弟 色如鐵。

興 牵 軍節度使,並同中書門下平章事。 復恭又以假子守貞爲龍劍節度使,守忠爲武定軍節

度使, 守厚爲綿州刺史。

楊晟,分軍逼守厚,軍未成列而敗。 檢校司徒、 初,朱玫取興、鳳州,虢州刺史滿存以兵赴行在,復收二州,昭宗擢爲感義軍節度使,累 建將華洪以兵萬人壁綿州之郊,敗守忠、守厚,二人分道行,收兵趨閬州 同中書門下平章事 與復恭四假子及利閬觀察使席儔等共攻王建。 先是守貞、守忠聞建兵出,拔衆奔綿州,并力共攻東川 建軍已圍

始, 復恭敗, 依守亮。 而鳳翔李茂貞、邠寧王行瑜、鎭國韓建等共劾守亮納叛人, 請以

及 鎭兵討之。茂貞自爲興元節度使,以書誚責宰相。帝爲削守亮官爵,因詔茂貞問罪。 來救不克,以衆入興元。 存 奔閬州 洪進圍之。帝以徐彥若帥鳳翔, 茂貞拔興、鳳、洋三州,破守亮於西,乘勝入興元。復恭挾諸假子 以興元授茂貞。 茂貞不肯拜,帝乃以其子 滿存

密 爲 興元 節度使。

俄

而

送京 衣食,不 見 韓 建。 吏縛以帛, 如殺之。」建許諾。 守亮視 洪拔閬州,守亮等皆挺身走,將北奔太原,趨商山,飢甚,丐食于野,爲邏戍所縛, 建左右八百人皆常隸己,語建曰:「此屬吾養之素厚,無一爲我死。 內毬于 復曰:「公幸貸我,俾生見天子,陳先人功,萬有 帝御 延喜樓問反狀,守亮不得語,頷 而已。 一不死。」 左右白服罪,即 公無費 」建檻車

列

傳

第

百

+

閯 守

亮

閯

軍。

執獻 太廟 斬獨 柳下, 梟于市。 守厚死巴州 ,麾下兵多歸王建。 **|**存奔京師,爲左武衞大將

大散 爲都 翻 校。 楊晟,不詳宗系。 僖宗 政兵 (攻關 在陳倉,邠寧朱玫遣萬騎合昌符追行在,乃擢晟感義軍節度使、檢校司空,守 ·", |晟 製卻 隸鳳翔軍,節度使李昌符畏其勇,欲殺之,妾周擿使亡去, ,戰潘氏,遂大敗, 內外無固志。 帝更徙興元,晟 西奔,政取興、 隸神策

|鳳 州 晟襲 文州 逐 刺 史,據成、龍、茂等州

千降 顧彦 且畏 以 我為机 於建, 建 暉 王 爲 過己, 建 攻 上肉乎? 建兵所逐。 建以 成 乃約 都 奇兵襲楊守厚等,皆亡去。 田 山南 不出。 令孜 建使王宗裕率騎 西道節度 以晟故將, 建築甬 使 道屬陣 與連 楊守亮兄弟 五萬 和,假威戎軍節度使,守彭州。 以入,斬晟首 晟開門決戰,大敗, 圍晟 合謀 食四郊麥, 拒建, 掠 掠民資產。 遂約降。 新繁, 焚漢 晟擊建,無功引還。 建饋十羊, 晟假 州 子實 叉 (攻東川 以騎八 |晟日:

晟固辭,旦夕問省,乃視事。 晟有仁心,下懷其恩,雖城 中 愛將安師建者,勇而有禮,旣就執,建顧日:「爾報楊司徒足 食 盡 無 叛者。 初, 昌符死,晟得其妾周, **日**: 事之, 周請

顧彥朗、彥暉者,豐州人,並爲天德軍小校。 其使察京以兄弟有封侯相, 每厚禮之, 使

子贈賚,稍稍進秩。黃巢亂長安,率軍同復京師。

劍門,陳敬瑄使吏奪其節,彥朗不得入,保利州。 彥朗遷累右衞大將軍。 光啓中,擢 拜東川節度使、檢校太保、同中書門下平章 敬瑄 誣劾彦朗擅 興兵掠西境。 僖宗下詔 至

中曉講和,乃得到軍。署彥暉漢州刺史。

鄣梗。 卽 據二州,守亮不能制。 初,楊守亮忌壓州刺史王建凶暴,欲逐之。 敬瑄告難于朝,帝詔和 **彥朗與建雅舊,陰助貲饟。** 解,又敕李茂貞鐫諭。 建聞,合溪洞豪館取閬州, 建攻成都, 彦朗挾故憾,與幷力, 擊利州, 刺 史走,

發兵攻梓州, 而 守厚軍,彥暉辭疾,不克取。 境上關賦 會彥朗卒,彥暉自知留後。 相稽詬,建怒。 **彥暉告急于建,建使李簡救之,戒曰:「賊破,** 景福元年,遂攻彦暉。 健素有吞噬心,以 診朗與婚婭, 久未忍。 明年爲節度使。 中人送節,爲綿州 **彥暉請救於楊守亮,遣楊子彥戍梓,執建** 井取彦 刺 暉,無須再往也。」 及彥暉,則交好 史楊守厚 所留。 愈疏 簡破 守厚

列傳第

百

\_ + \_

顧

产

朗

館,帟幕衾服皆具,更養爲子,改名琛。 大將王宗弼,彥暉責曰:「王公何以見討?君爲大將,不諫云何?」宗弼謝罪, 明年,建將華洪破綿州,守厚走,得彥暉節。 卽 解縛, 時詔已 使就

進彥暉檢校司空、東川節度使矣。

議大夫李洵諭止,建拒命。帝以嗣郯王戒丕鎭鳳翔,徙茂貞代建,皆不奉詔。 |彥暉,取腧、||上、||普三州,壓||梓州南,敗||彥暉兵,奪鎧馬八百,凡五十戰,圍遂固。 中人爲兩川宣諭協和使。 李茂貞亦欲爭其地,使子興元節度使繼密引軍救彥暉,以窺東川。 回襲之。 乾寧二年,昭宗在石門,督彥暉、 **彥暉不敢出,但遣人蹇建舟路,建遂擊取巴、閬、蓬、渠、通、果、龍、利八州。 帝遣** 建奉詔還, 建赴行在。 而兵不解。彥暉謀窘, 建率兵二十萬次綿州, 因大略漢、眉、資、簡等州。 四年,華洪率衆五萬攻 即劾彦暉劫輜運, 帝仍遣左諫

之,使侍左右。嘗語諸將曰:「與公等生死同之,違者先齒疥癆賓。」衆曰:「諾。」及圍急,瑤請 聚親信飮,得同死。 彥暉顧王琛曰:「爾非我舊,可自求生。」指頹垣令逸。 彥暉手殺妻子, 梓有鏡堂,世稱其麗,彥暉嘗會諸將堂上,養子瑤尤親信,彥暉以所佩劍號「疥癆賓」佩

乃自刎,宗族諸將皆死,麾下兵猶七萬。

見者皆笑。 初,韋昭度爲招討使,彥暉、建皆爲大校。 至是錄笑者皆殺之。私署洪爲東川節度留後。 **彦暉詳緩有儒者風。** 建左右髠髮黥面若鬼,

五四三三

復其祀,聖人善之。處存平黃巢,定京師,功冠諸將。昭宗嘗有意都襄陽,依趙凝以自全。 大抵唐室屏翰,皆爲朱温所翦覆,過於夷狄、荆舒之爲害也甚矣。 贊曰:詩云「戎狄是膺,荆舒是懲」,嫉其爲中國之害也。春秋之世,楚滅陳、鄭,而卒

# 書卷一百八十七

### 列傳第一百一十二

王重榮 珙 珂 諸葛爽 李罕之 王敬武 師範 孟方立 遷

孰知天子爪士?」具言其狀。玄寔嘆曰:「非爾明辨,孰由知之?」更諉於府,擢右署。 重榮 訴於中尉楊玄寔,玄寔怒,執重榮讓曰:「天子爪士,而藩校辱之!」答曰:「夜半執者姦盜, 任爲列校,與兄重盈皆以毅武冠軍擢河中牙將,主何察。時兩軍士干夜禁,捕而鞭之。士還, 多權詭、衆所嚴憚、雖主帥莫不下之。稍遷行軍司馬。 王重榮,太原祁人。父縱,大和末爲河中騎將,從石雄破回鶻,終鹽州刺史。 重榮以父

以外援未至。今賊裒責日急,又收吾兵以困我,則亡無日矣。請絕橋,嬰城自守,不然,變生 師,賊調取橫數,使者至百輩,坐傳舍,益發兵,吏不堪命。 黃巢陷長安,分兵略庸,節度使李都不能支,乃臣賊,然內憚重榮,表以自副。 重榮脅說都曰:「我所詭謀紓難,

地邇京

對。 出 官 何 賊 以 分制之? 奉 使斬之, 重榮佩刀歷階曰:「首謀者,我也, 迎。 \_ |都 潘至, 因大掠居 大饗 吾兵 士, 人以悅其下。 、寡,謀不足,絕之,禍且至, 倡言曰:「天子以大臣守土, 誰得逐之? 爲我 天子使前京兆 尚誰索?」目滿吏,趣具騎,滿即奔還。 尹竇潏間道慰其軍,因 顧以節假公。」遂奔行 疏首惡者。」衆無 一韶代 在 都。 重榮乃悉 重榮迻主留 重榮 敢 銮

表爲同華節度使。 于河,遂舉同州降。 重榮兵於西關門,於是出兵夏陽,掠河中漕米數 武 賊 功 楽糧 賊 重榮與連和 仗四 使 健將朱温以舟師下馮翊,黃鄴率衆自華陰合攻重榮。 十餘艘。 , 有詔即副河中行營招討,賜名全忠。 復光欲斬之,重榮曰:「今招賊, 擊賊將李詳於華州, 即拜檢: 校工 部尙書, 執以 爲節度使。 徇。 千艘。 賊使尙讓來攻, 會忠武監軍楊復光率陳、蔡兵萬人屯 切釋罪。 重榮選 兵三萬攻温, 且温武銳可用,殺之不祥。」 重榮感勵 而朱温將勁兵居前,敗 士衆,大戰,敗之, 温懼,悉鑿舟沈

執其 使陳景斯總兵自嵐、石赴河中,親率師從之,遂平巢,復京師。 與李克用共憂患,其人忠不顧難,死義如己。 、將趙璋,巢中流矢走。 巢 喪二州,怒甚,自將精兵數萬壁梁田 重榮兵亦死耗相 當。 若乞師焉,事蔑不濟。」乃遣使者約連和 重榮軍華陰,復光軍渭北,掎角攻之,賊大敗 懼巢復振,憂之,與復光計 以功檢校太尉、同中書門下 復光日:「我世 克用

平章事,封琅邪郡王。 累加檢校太傅。

**邠州**。 策軍: 方與全忠有際, 書,且言:「奉密詔,須公到,使我圖公。 克用將兵援河中。 斥所餘以澹軍。」天子遣使者諭旨, 使, 中人田令孜怒重榮據鹽池之饒。 神策軍潰還京師,遂大掠。 建請二池領屬鹽鐵,佐軍食。 信之,請討全忠及政。 重榮上書劾令孜離間方鎭。令孜遣邠寧朱玫進討,壁沙苑。 克用乘勝西,天子走鳳翔 不聽。 于時 互 盜 甫 定 , 國 用 大 覂 , 諸 軍 無 所 仰 , 帝數詔和解。 此令孜、朱全忠、朱玫之惑上也。」因示僞韶。 重榮不許, 令孜徙 重榮 克海節度使, ,奏言:「故事, 克用合河中兵戰沙苑, 歲輸鹽三千乘于有司 ,以王處存代之, ) 致大敗, 而令孜爲神 重樂治克用 克用 一, 則

意者 賀。 **遣諫議大夫劉崇望齎詔諭天子意,兩人聽命,** ,輒置其上,機發皆溺。 俄嗣襄王煴僭位,重榮不受命,與克用謀定王室。 重榮遂斬煴,長安復平。 嘗辱部將常行儒, 然性悍酷,多殺戮,少縱舍。 即獻綠十萬, 行儒怨之, 光啓三年, 引兵夜攻府, 楊復恭代令孜領神策,故與克用善, 嘗植 願討)攻自贖。 大木河上, 崇望還, 羣臣皆 內設機軸,有忤 重榮亡

出外,詰旦殺之,推立重盈。

射, 卽拜節度使。 重盈前此已歷汾州 未幾,同中書門下平章事。 刺史。 黃巢度准,擢陝號觀察使, 及代重榮,留長子哄領節度事,入殺行儒,軍 重榮據河中, 三遷檢校尚書右僕

度使。

昭宗立,進太傅、兼中書令,封琅邪郡王。父子兄弟相繼帥守,而從子瘟亦爲忠武節

爭河中,上言:「珂本家蒼頭, 請選大臣鎭河中。」又與朱全忠書言之。 珂急, 乃遣使請婚於 重榮有大功,不可廢。」行瑜怒,使其弟行約攻珂,克用遣李嗣昭援之,敗珙於猗氏,獲其將 日:「珂不受代,且晉親也, 李克用。 乾寧二年,重盈死,軍中以其兄重簡子珂出繼重榮,故推爲留後。珙與弟絳州刺史瑤 克用薦之天子,許嗣鎮,然循以崔胤爲河中節度使。珙復構珂於王行瑜、李茂貞, 將不利於公。」行瑜等約韓建共薦洪。 韶日:「吾重已授珂矣。

之怒,以師討三鎭,瑤、珙兵引去。克用拔絳州,斬瑤而屯渭北,敗行約於朝邑。 | 鎭銜帝之却其請也:連兵犯京師,謀廢帝、誅執政而立||吉王,固請授||城河中。 克用聞

走其軍。帝次|莎城,百官繼至,士民從者亦數萬。帝欲入谷中自固,以谷有「沒唐石」,惡 李筠軍,嗣延王戒丕、嗣丹王允以鹽州六都兵從帝出啓夏門,次于郊。 之,繼鵬怒,輒射帝,縱火焚門,帝率諸王及衞兵戰,繼鵬矢及帝胄,軍乃退。帝出幸定州將 劉景宣,二人,茂貞黨也,欲以兵劫全瓘等,請帝幸鳳翔。兩軍合譟承天門街,帝登樓喩和 行約走京師。弟行實在左軍,共說樞密使駱全瓘,謀挾帝幸別。右軍李繼鵬以告中尉 兩軍憚鹽州兵銳,各

徙石門。 民匿保山谷間,帝每出, 或獻飴漿,帝駐馬爲嘗,民皆流涕。 旣而遣嗣薛王

知柔及劉光裕還京師

克用 使, 珂爲糧料使。 閻名珪,左神策軍拍張人,爲茂貞養子云。 進營渭橋 在河中未出也,帝懼茂貞之逼,復使嗣延王戒丕以御服玉器賜之,督其西,乃壁渭北, 克用 遣使者奔問行在,帝因詔克用、珂以兵趨新平,又詔涇州張鐇會克用軍以扼岐陽。 於是行瑜壁興平,茂貞壁鄂。 克用造子存貞請天子還宮口。 行瑜兵數卻,茂貞懼,斬繼鵬,傳首以謝。 韶削行瑜官爵,以克用爲邠寧四面行營都招討 韶以騎三千戍三橋 繼鵬姓

因攻珙,珙戰數北。 帝旣還,加珂檢校司空,爲節度使。 | 珙任威虐,殺人斷首置前,而顏色泰定,下恐,不敢叛,然稍弱,無鬭志。 克用以女妻之, 珂親迎太原, 以李嗣昭助守河中, 又失衆,凡五月,爲牙將朱簡所殺,挈

其地入朱全忠,表授節度使、同中書門下平章事,更名友謙。

光化二年,爲部將李璠所殺,自爲留後,詔代」供節度。

既宴,盛列珍器音樂,珙請於柷曰:「僕今日得在子弟列,大賜也。」三請,柷不答。 史,避難江湖,帝聞剛鯁,以給事中召,道出陝,珙謂且柄任,厚禮之。 曰:「天子召公,公不可留此。」遂罷,遣吏就道殺之,族其家,投諸河,以溺死聞。 祝鄙其武暴,不降意。 柷者,故爲常州刺 帝不能詰。 珙勃然

珙死,贈太師。 詔陝州冤死者,有司弔祭,存問其家。

華州 劉 以何絪戍之。進攻珂,全忠率師繼進,即劾珂交構克用,爲方鎭生事,不可 疑。 爾持一繩縛之。」存敬以兵數萬度河,由含山襲絳州 曰:「道且斷,往救必俱亡,不如歸朝廷。」珂窮, 原,爲絪所迮,不能進。珂急使妻遺克用書曰:「賊攻我, 彊 而 季述所廢,珂憤見言色,屢陳討賊謀。 ,不敢加兵。 珂與太原、鎭定等道亦請加行密都統, 韓公出精銳固潼關,以張兵勢。僕不武,公其惠我西偏地,以爲扞守。肅,請公自有之。 而朱公不顧約,以攻弊邑。弊邑亡,則邠、 全忠擊楊行密不能克, 及王鎔詘服, 拔定州,而克用兵折,乃謂其將張存敬曰:「珂恃太原侮慢我 諷荆、襄、青、徐等道請 以討全忠。 旣反正, 首獻方物, 岐非君所保, 天子神器斂手付人矣。 遣使告李茂貞曰:「上初反正, 詔藩 , 繇是兩罷之,全忠怨珂 刺史陶建釗、晉州刺史張漢瑜皆降, 己爲都統以討行密, 朝夕見俘,乞食大梁矣。」克用答 帝甚倚之。 而全忠以克用方 赦。 不忘 帝猗違未 阿乞師太 也。 鎭 宜與 無相 帝

鴟張,禍緊其手。 訓白 珂 祖其 | 城,會橋毀,潛具舟將遁,夜諭守兵,無肯爲用者。 衣曰:「苟有它,請斷臂自明。」」珂 如旦日,以情諗軍中,宜有樂從者,可則濟,否則召諸將行成以緩敵,徐圖 出,問計所宜,答曰:「若夜出,人將爭舟,一夫 牙將劉訓叩寢門,珂疑有變,叱 西安危,國祚長短,繫公此舉也。」茂貞不答

自聽 所向,上策也。」河然之。明日,登城語存敬曰:「吾於朱公有父子驩,君姑退舍,須公至,吾 命。」乃執太原諸將并奉節印內存敬軍, 豎大幡城上,遣兄璘與諸將樊洪等見存敬。

存敬解圍而戍以兵。

入。居旬日,以存敬守河中,舉珂室徙于汴。 報曰:「舅之恩,無日可忘。君若以亡國禮見,黃泉其謂我何?」」珂出迎,握手泣下,騑轡以 凡氏王者皆事之。」至是,忘誓言,過重榮墓,偽哭而祭。次虞鄉,珂欲面縛牽羊以見,全忠 全忠自洛至。全忠,王出也,始背賊事重榮,約爲甥舅,德其全己,指日月曰:「我得志, 後令入覲,遣人賊之於華州。

自重榮傳珂,凡二十年。

北面 招討副使。徙夏綏銀節度使,檢校尚書右僕射。 勛勢職,率百餘人與泗州守將湯羣自歸,累遷汝州防禦使。李琢討沙陀於雲州, 諸葛爽,青州博昌人。爲縣伍伯,令答苦之,乃亡命,沈浮里中。 龐勛反, 入盜中爲小

者,本神策將,狀短陋,倚中官勢,剽財輸京師,凡鉅萬,人怨之,爽至,募州人戰,衆不從,相 黃巢犯京師, 韶率代北行營兵入衞, 次同州, 降賊, 偽署河陽節度使, 代羅元杲。 元杲

列傳第

百一十二

諸葛爽

李罕之

五四四四

唐

率迎爽, 元杲奔行在。 爽間道奉表僖宗以自明, 詔拜節度使。 李克用援陳許,道天井關

爽懼,不肯假道,出屯萬善,克用自河中趨汝、洛。

脩武 至不流。 簡陰鏡關中,其下不悅,裨將樂彥禛間衆之隙,引其軍先還,故簡兵八萬自潰 誘爽,自金、商馳,復入之,厚禮文珠及戍人,還之魏。 同州 ,爽率輕兵入之,溫偃旗設伏以待,爽謂賊遁,士解甲就舍,伏發,爽悉棄鎧馬奔還。 爽累授京師東南面招討諸行營副都統、 爲魏博韓簡擊敗之,不敢入。 明年,韶爽爲東南面招討使,伐秦宗權,表李罕之自 簡留將趙文班戍河陽,自攻軍,時中和二年也。 左先鋒使, 於是一次以新鄉,簡自軍來,戰獲嘉西。 兼中書門下平章事。 朱温爲賊守 相藉溺清水 河陽人 至

與澤州刺史張言共立一爽子仲方爲留後,爲蔡賊孫儒所攻,奔于汴,儒取孟州。 爽 雖 興庸厮,善吏治,法令澄壹,人無愁咨。 **擢累檢校司空**。 光啓二年卒。 其將劉經

攻剽五臺下。 李摩雲」。 李罕之,陳州項城人。少拳捷。 隨黃巢度江,降于高駢,駢表知光州事。 先是, 絳民壁摩雲山避亂, 初爲浮屠,行丐市, 羣賊往攻不克,罕之以百人徑拔之, 爲秦宗權所迫,奔項城,收餘衆依諸葛 窮日無得者,抵鉢褫衹衼去,聚衆 衆號

署懷州刺史。 陝伐宗權,即表以自副。 屯睢陽,無功。 又表爲河南尹、東都留守, 使捍

郭璆 入屯洛陽苑中。 罕之逐出之, 爽不能制。 會孫儒來攻,罕之不出。數月,走保黽池 有隙,擅殺璆,軍中不悅。 泂 東李克用脫上源之難,喪氣還,罕之迎謁謹甚,勞餼加等,厚相結。 經戰不勝,還河陽。 俄而爽死,其將劉經、張言共立爽子仲方,欲去罕之。而罕之故與 經間衆怒,襲其壁,罕之退保乾壞,經追擊,反爲所敗,乘勝 罕之屯鞏,將度汜,經遣張言拒河上,反與罕之合,攻 東都陷,儒焚宮闕,剽居民去。 爽遣將收東都, 罕之因府爲屯,

河東 孫儒逐仲方,取河陽,自稱節度使。 克用遣安金俊率兵助之,得河陽。 又表言爲河南尹、東都留守。 俄而宗權敗,棄河陽走,罕之、信進收其衆,丐援 克用表罕之爲節度使、同中書門下平章事。

有詔

經不克,屯懷州

爲罕之邀頡。 之,復擊晉州, 罕之與言甚篤,然性猜暴。 士仰以給, 重盈 王重盈欲出汴兵救, 罕之解圍還。 求之無厓, 反間於言, 文德元年, 言不能厭, 是時大亂後,野無遺秆,部卒日剽人以食。又攻絳州,下 罕之悉兵攻晉州, 罕之拘河南官吏笞督之;又東方貢輸 而言善積聚,勸民力耕,儲廥稍 言夜襲河陽, 俘罕之家。 行在者多 集。罕之 罕之

罕

之

奔河東, 城中食盡,言納孥於汴求救,全忠遣丁會、葛從周、牛存節來援,戰沅河聚。 克用復表爲澤州刺史,領河陽節度使,遺李存孝、薛阿檀、安休休率師三萬攻 全忠更以丁會爲河陽節度使,言歸洛陽 休休不利,

降全忠,存孝還。

禽溉 矣! 季筠 汴士呼罕之日:「公倚沙陀, 罕之副都統 」 存孝怒, 引兵決戰,存孝奮矟馳,直取季筠。 里無舍煙。 罕之保澤州,數出鈔懷、孟、晉、絳,無休歲,人匿保山谷,出爲樵汲者,罕之俘斬略盡, 敗其衆。 ,檢校侍中。 大順初,汴將李讜、鄧季筠攻罕之,罕之告急於克用,遣存孝以騎五千救之。 克用遣罕之、存孝攻孟方立,拔磁州,方立戍將馬溉兵數萬戰琉璃陂,罕之 行瑜誅,封隴西郡王,檢校太尉、兼侍中。 絕大國。今太原被圍,葛司空入上黨,不旬日, 讞夜走,追至馬牢川,**敗之**。 克用討王行瑜, 表 沙陀無穴處

沁州 死, 其 翻 懼它盜 覆 罕之恃 執 葛從周取澤州。 也。」光化初,昭義節度使薛志勤卒,罕之夜襲潞,入之,自稱留後,報克用曰:「志勤 刺 史、守將,遂款于汴, 至,一 功多, 不俟命輒 嘗私 克用愛將蓋寓求一鎭, 嗣昭又攻罕之,罕之暴得病, 屯于路。」 全忠表罕之昭義節度使,命丁會援之,與嗣昭戰含口,嗣昭 克用遣李嗣昭先擊澤州, 寓爲請,克用不許,曰:「鷹鸇飽則去矣,我懼 不能事。 |會代戍, 拘罕之家屬送太原。罕之攻 全忠更以罕之節度

河陽三城,卒于行,年五十八。 未幾, 嗣昭復取澤州,以李存璋爲刺史, 進收懷州, 攻河陽。

**汴將閻寶引兵至,嗣昭還。** 

城闕復完。 始,儒去東都也,井閈不滿百室。言治數年,人安賴之,占籍至五六萬,繕池壘,作第署, 全忠懼言異己, 乃徙節天平, 以韋震爲河南尹。 言後賜名

度使,趣其兵使西。及京師平,進檢校太尉、同中書門下平章事。 王敬武,青州人。 已還,卽逐師儒,自爲留後。時王鐸方督諸道行營軍復京師,因承制授敬武平盧節 隸平盧軍爲偏校,事節度使安師儒。中和中,盜發齊、棣間, 龍紀元年卒。 遣敬武

|棣州 人,使不絕其祀,君之惠也。 刺史張蟾迎安潛,師範遣部將盧弘攻之,弘與蟾連和。 子師範,年十六,自稱留後,嗣領軍。 蟾請救於朱全忠,全忠馳使論解,師範拔其城,斬蟾,而安潛不敢入。 不然,願死墳墓。」弘少之,不爲備,師範伏兵迎于路,部將 昭宗自以太子少師崔安潛領節度,師範拒命。 師範以金啗之,曰:「君若顧先 劉鄭

列傳第

百

+

王

敬武

日:「法非我敢亂。」乃抵舅罪。 以靑州父母所籍,每縣令至,具威儀入謁,令固辭,師範遣吏挾坐,拜廷中乃出。 師範 喜儒學,謹孝,于法無所私。 母恚之,師範立堂下,日三四至,不得見三年,拜省戶外不敢 舅醉殺人,其家訴之,師範厚路謝,訴者不置, 師範

不可,答曰:「吾恭先世,且示子孫不忘本也。」

十興, 全忠, 不持,可乎?」乃與行密連盟。遣將張居厚、李彥威以甲槊二百輿給爲獻者,及華州, 全忠已并鄆州,遣兵攻師範,師範下之。會全忠圍鳳翔,昭宗詔方鎭赴難,以師範附 命楊行密部將朱瑾攻靑州,且欲代爲平盧節度。師範聞之,哭曰:「吾爲國守藩,君危 閣人覺, 衆擐甲譟,殺全忠守將婁敬思。 是時崔胤方在華, 閉門拒戰, 執居厚還 先內

|茂章欲啗||友寧,不肯救。 未幾,城破,友寧負勝攻別屯。 下,全忠督戰急,友寧驅民十萬,負木石,築山臨城中,城陷,屠老少投尸淸水,遂圍登州。 攻密州,破之,以張訓爲刺史。 進攻沂州,敗其兵,還靑州,半舍而屯。 友寧率軍東討。是時帝還長安,故全忠丼魏博軍屯齊州。王茂章方以兵二萬合師範弟師誨 劉 茂章度汴軍怠,與師範合擊友寧於 。友寧方攻博昌,未 1並發。 全忠使從子

石樓,斬其首,傳於行密。

全忠望見,歎曰:「吾有將如是,天下不足平! 全忠怒,悉軍二十萬倍道至。 茂章閉營, 」於是退屯臨淄。 何軍懈,毀壁出鬭,還與諸將飲,訖, 茂章畏全忠,乃斂軍而南, 復戰。

駡而 死。」虔裕固請,茂章乃去。 使李虔裕以五百人後拒。 死。 張訓召諸將謀曰:「汴人至,師少,何以待之?」衆請焚城而亡,訓曰:「不然。」即封 茂章解衣寐, 已而追至,虔裕一軍覆,茂章免。全忠見虔裕,欲釋之,瞋目大 虔裕謼曰:「追至,將軍速去!」茂章曰:「吾共決

萬, 十萬緡以謝軍。 諸將請決戰,而師範以弟故,乃請降。 全忠留楊師厚圍靑州 汴將劉重霸執|棣州刺史邵播,得其書八百紙,皆教師範戰守, 敗師範兵於臨朐,執諸將,又獲其弟師克。 全忠歸其弟,假師範知節度留後事 是時, 師範衆尚十餘 師範 全忠憚而殺 獻 錢二

府藏,下縣門,密引兵去。

固辭, 使詣 汴, 鄭但素服 葛 全忠笑曰:「取兗州 從周圍兗州,劉鄭不肯下,從周以師範命招之,乃盡出將士,開門降。 乘驢而往。 量 何大邪? 全忠賜冠帶, 」擢署都押衙, 辭曰:「囚請就縶。」不許。 在諸舊將上。 諸將趨入,鄩 旣見,慰之, 從周爲辨裝, 飲以酒, 無讓,

歲餘,徙師範于汴,亦縞 列 傳 第 百 + 王 素請罪。 敬 武 孟 全忠見以禮,表爲河陽節度使。 方 立 五四四 既受唐禪,友寧妻訴 四

全忠奇之。

讎 使者曰:「死固不免,予懼坑之則昭穆失序,不可見先人地下。」酒行,以次受戮者二百人。 人于朝,乃族師範于洛陽。 先是,有司坎第左,告之故。 師範乃與家人宴,少長列坐,語

黄巢 州, 監 廷未 又使李克脩 數 僖宗自用舊宰相王徽領節度。 留後,擅裂邢、洺、磁爲鎭,治邢爲府,號昭義 受,囚全勗, 領諸道行營都統 放賊 軍 至是,方立自以山東三州爲昭義, 大帥 能 祁 孟 戦石橋. 審 制 爲 誨 乃固讓 以 亂, 攻取之, 乞 ,不勝,保 師 書 邢州人。 欲銷懦之, [詩|鐸, 以路 求復 昌圖 殺殷銳,遂幷路州, 華州 未定, 昭 願得儒臣守路。 始爲澤州天井戍將, 義軍。 昌圖治不三月, 乃徙治龍岡 爲裨將成鄰所殺, 墨制假方立檢校左散騎常侍、兼御史大夫,知邢州 時天子在西, 克用遣賀公雅 而朝廷亦命克脩, 鐸使參謀中書舍人鄭昌圖 州豪桀 表克脩 輒去。 軍。 河、關雲擾,方立 稍遷游弈使。 還據路州。 、李筠、安金俊 重遷, 方立 為節 酪 人請監軍使吳全勗知兵馬留後。時王 度留 有懟 更表李殷銳爲刺 以潞州舊軍畀之,昭義有兩節,自 後。 衆怒,方立率兵攻鄰,斬之,自 中和元年, 擅地 三部將擊路州 初, 會克用為河東 而李克用窺路州 知昭義 昭義 史。 有路、 昭義節度使高潯 留 謂潞 事, 節 |邢、洛、磁四 爲方立 度 險 欲遂爲帥。 使, 微度朝 M) 方立不 人悍, 所破。

此始。

克脩字崇遠,克用從父弟。 精馳射,常從征伐,自左營軍使擢留後,進檢校司空。

還,引耽自殺。 敗,禽其二將,被斧頸,徇邢壘呼曰:「孟公速降,有能斬其首者,假三州節度使!」方立力 屈,又屬州殘墮,人心恐。 性剛急,持下少恩,夜自行陴,兵皆倨,告勞。 走,脫歸者纔十二。龍紀元年,克用使李罕之、李存孝擊邢,攻磁、洺,方立 萬赴之,克脩還。後二年,方立督部將溪忠信兵三萬攻遼州,以金啖赫連鐸與連和。會契丹 武安、臨洛、邯鄲、沙河。 攻鐸,師失期,忠信三分其兵鼓而行,克用伏兵于險,忠信前軍沒。旣戰,大敗,執忠信,餘衆 擊邢州取故鎮,進攻武安。方立將呂臻、馬爽戰焦岡,爲克脩所破,斬首萬級,執臻等, 方立倚朱全忠爲助,故克用擊邢、洛、磁無虛歲,地爲鬭場,人不能稼。光啓二年,克脩 克用以安金俊為邢州刺史,招撫之。 方立丐兵於王鎔, 鎔以兵三 自顧不可復振,乃 戰琉璃陂,大

浴、磁三州降,執王虔裕三百人獻之,遂遷太原。 以精甲數百赴之,假道羅弘信,不許, 從弟遷,素得士心,衆推爲節度留後,請援於全忠。 乃趨間 入邢州。 表安金俊爲邢、洺、磁團練使,以遷爲汾州 大順元 全忠方攻時溥,不卽至,命王虔裕 年, 存孝復攻邢, 遷挈邢

列傳第

百

— +

\_

孟方

立

校

勘記

五四

四九

刺史。

隙,逼天子出奔,雖馘朱玫,仆僞襄王,謂曰定王室,實卑之也。身死部將手,救亂而卒于亂, 故不足與共功。 重榮兩得之。不殺朱全忠,而爲全忠誅,絕其嗣,宜矣。餘皆庸奴下材,無所訾責云。 贊曰:以亂救亂,跋扈者能之;以亂不能救亂,險賊者能之。蓋救亂似霸,然而似之耳, 觀王重榮寧不信哉!破黃巢,佐李克用平京師,若有爲當世者。 俄而奮私

#### 校勘記

(1) 克用遺子存貞請天子還宮 實緣、 舊五代史,莊宗未嘗名存貞。 「存貞」,通鑑卷二六〇作「存勗」,考異云:「實錄作『存貞』。 據後唐 實錄蓋誤。」按通鑑同卷有「克用進軍潤橋,遣其將李存貞

爲前鋒」文,疑「存貞」別爲一人,此當是「存勗」。

# 唐書卷一百八十八

### 列傳第一百一十三

## 楊行密 時溥 朱宣 孫儒

賞,行密以功補隊長。 |陶雅爲左衝山將,討定鄕盜。 自爲八營都知兵馬使。 在圖,刺史遣通章行在,日走三百里,如約而還。 刺史鄭繁捕得,異其貌,曰:「而且富貴,何爲作賊? 楊行密字化源,廬州合淝人。少孤,與羣兒戲,常爲旗幟戰陣狀。 都將忌之,俾出戍。 刺史走,淮南節度使高駢因表爲廬州刺史。乃以田頵爲八營都將, 將行,都將問所乏,對曰:「我須公頭!」卽斬之, 秦宗權寇廬、壽間,刺史募殺賊,差首級爲 」縱之。與里人田頵、陶雅、劉威善。僖宗 年二十, 亡入盜中,

公楚。 財將呂用之恐行密不可制,造俞公楚以兵五千屯合淝,名討黃巢而陰圖之。 秦宗權遣弟度淮取舒城, 列 傳 第 百 十 Ξ 櫋 行 密 行密破走之。 時張敖據壽州(1),許勍據滁州, 五四五 與行密挐 行密擊殺

戰。 取舒州 又舒人陳儒攻刺史高澞,澞來告難, 爲勍所奪 光啓二年,張敖遣將魏虔攻廬州, 行密未能定。 賊吳迴、李本逐澞,據其城, 大將李神福、田頵破之楮

詭 東, 脹 執 甚。 如藉 也。」李濤怒曰:「以順去逆,何衆寡爲!今尙何歸,願以所部前死。」行密喜, 日:「賊近, 海 廷 伏 次天長,而揚州陷。 公耄昏,妖人用權,彥乃以逆除暴,熾其亂。公亟應,必得其地。」行密乃檄部州,哀兵而 範 彦軍 陵 畢師鐸、秦彥攻高駢,呂用之以獸命署行密行軍司馬,督其兵進援。 襲 西壕,殺閣者,啓外兵,彥軍疲,守邏皆潰去, 鎭 見 致 命 行密 遏 不出。 報我。」俄而陷一屯,別將李宗禮入曰:「兵相百,戰且不利,請堅壁,徐引歸 , 而 一使高霸殺之,幷其衆,輦所收財歸于廬。 .日:「公之入,以少擊衆,室家未完。 授行密 會財死,襲勸行密舉軍縞素,大臨三日。進攻城,未能下。 副使,以行軍司馬李璠知留後。 行密入據揚州。 若外被重圍,情見勢殆,不如避之。」行 於是,朱全忠自爲淮南節度使, 行密大怒,廷範、蹯不敢入。 未閱月,孫儒奄至, 客袁襲說行密日: 行密 益甲出戰,俘殺 用之將張審晟 「臥帳中,令 全忠更 兵 遣 將 銳 可

乃還。 當 此 既又謀趨洪州, 時 孫儒疆,赫然有吞吳、越意。 襲不可,曰:「鍾傳新興,兵附食多,未易圖也。 行密 **| 欲遁保** 海陵,襲勸還廬州, 孫端據和州 治兵 爲後計,行 趙暉屯

請

以

行

密

知

觀察留後

兵二 不勝 結此二人以圖宣州 萬 對 襲勸 屯, 行密「速趨 行密 不戰 我綽綽有餘力矣。」行密 退曷山 分奇兵伐木開道 堅 壓 立以須。 四出,瑭驚北, 宣 人求戰, 從之。 示以弱, 遂圍宣州。 暉 次采石 待其怠,一舉 刺 行密自糝 史趙鍠糧盡,親 可禽」。宣 將

等戦

蘇

瑭

將

多出降。

蝗 吾 頭 軍」, 壘 全忠故 一一個。」 初 行 以李神 人也, 密 蝗喜, 有銳士五 福 爲左 發使求之。 多遺之金 石黄 千, 頭 衣以黑繒黑甲,號「黑雲都」。又丼盱眙、曲溪 一,許妻以女。 (都尉, 襲日:「斬首送之, 兵銳 甚。 明日 曲溪將 髞城上曰:「劉郎 無後慮。」乃歸蝗首于汴。 劉金策蝗必遁 不爲 爾壻 紿 曰:「將 二屯, ! 昭宗 蝗 軍若 籍其 宵遁,獲之。 韶行密檢校 (士爲) 出 願 自 黄

司

徒、宣歙池

觀察使。

行密 錢鏐將杜稜 錢鏐戰 行密節度使。 郵。 時韓守威以功拜 不解 行密懼, 行密復入揚州 儒 蘇、湖、常、潤亂甚。 退還宣州,遣安仁義襲成及,取潤州, 亦使劉建鋒奪潤、 池州 北結時溥托儒 刺 史,行密表徙湖州 行密 常。 雖得宣州 全忠遣 帝以杭州爲防禦使, 龐 以兵護送。 師古將兵 而蔡儔爲 自將 十萬, 一萬屯 孫 而 授鏐;以宣州號寧國 儒 李師悅 所破, 丹楊。 自潁 在湖州, 以廬州 度推助 行密 降。 與杭 取常州 州 儒 敗 刺 進 殺 於 攻

神 驕 福 之。」乃退舍。 擊降旺,逐景思 順 二年 ٠, 儒 儒衆以爲 屯 溧 攻腰 水 循 怯 Ш 山構 屯, 守 破之, 者 壁。 懈 行密遣李神福 禽儒將李弘章。 神福 夜襲走之。 屯廣德, 俄而 儒將 田 計 康 頵 旺 日:「兵倍 取和州 劉 威為儒 不戰 安景思取 所敗。 當 避 行密欲 滁州 其銳

守銅官,神福 使 前 不 得戰,退無仰儲,不亡何待?」於是,行密以神福 日:「儒 掃境以來, 利 速 戰, 宜堅壁老其師, 爲宣池 則我 無敵 都游 矣。 弈 使。 又 出 儒始乏食 輕騎絕賊糧道

常熟名賊陳可兒間儒、行密之鬭,竊入常州 自稱制置使。 行密遣陶雅守潤 張訓

揚州,因執楚州刺史,以輕兵襲常州,斬可兒。

所有 安。 議出 孫 易四 表田 儒 鹽茗畀民輸 圍 鄰所無,不積 題守宣城 行密宣 州 帛, 長驅 凡五 日 幕府 , 入揚州 財 一月不 有餘矣。」行密納之,始選吏綏勸所 高勗曰:「瘡破之餘, 解。 戰凡七年,定 臺濛作 魯陽 五 不可 八 堰, 州 以加 **挖輕** 生人將 斂。 舸饋糧, 盡, 部 且帑貲何患不足, 行密 故行密 勞隱 軍 休 不 息 困 其下 若悉我 卒 遂 破

攻歙州,於是,刺史。握相有美政,民愛之,爲拒戰,顧兵數却。 察儔以廬州叛附朱全忠, 未幾,傷自殺。 行密先冢皆爲儔發掘, 納孫儒 ,行密以隸袁積軍 將張顥 吏請夷發[傳世墓,不許。 ,而倪章據舒州 積請戮之, 與儔 ,朝廷所命者,食盡欲降, 連和 行密 表劉 威 愛其勇, 爲 密遣 刺 史。 李 更置 遣 神 田 于 福 親 頵

密書,請還京師。 行密以魯郃代樞、州人不肯下,請陶雅代。 雅於諸將最寬厚,以禮歸樞

于朝。 是歲,李神福 拔舒州 倪章亡,以神福爲舒州刺 史。

弘 大 汴 將劉 都王 乾寧二年,行密襲濠州, 身僅 知 俊儲 冤。 穀石碭,將南襲。 韶拜行密淮南節度副 李簡重甲絕水縋而入, 張訓 屯漣水, 大使, 知節度事, 遣兵浮海掩得其廥。 執刺史張璲, 檢校太傅、同中書門下平章事,封 以劉金守之,進取 知俊戰不勝,因攻漣水, 壽州。

張崇爲鏐執, 五 月 董昌 破蘇州 爲錢鏐所攻, 行密欲嫁其妻,答曰:「崇不負公,願少待。」俄而還,自是行密終身倚愛。 執繆將成及,以朱黨守之。 來告窮。 行密遣臺濛攻蘇州,安仁義、 田頵攻杭州, 身督戰。 明年 别 將

將侯 張宣 莫敢犯。 甚 一,彊天下。 瓚 朱 來 延壽拔蘄、光二州, 歸, 嘉 汴將寇產卿以騎 興, 太原將李承嗣、 繆大將顧全武救之,執宣、約,逐題於驛亭埭。 三千襲之,致全忠厚意,景不許,苦戰, 行密以霍丘當南北走集,以邑豪朱景爲鎮將。 史嚴、 史建章亦來奔。 行密推赤心不 未幾, **彦卿** 疑,皆以爲將。於是,兵銳 泰寧節度使朱瑾率部 敗而去。 景驍毅絕人,諸盜 田頵 、魏約

帝惡武昌節 度使杜洪與全忠合, 手韶授行密江南諸道行營都統, 討洪。 汴將朱友恭

列

傳

第

百

+

Ξ

楊

行

密

聶 以樓船 金 率 精 騎 兵萬 兵 助 章 人與張 守。 《崇戦 友恭 次樊港, 泗州 金敗 章據 險,不得前, 瞿章守黄州 友恭鑿崖開道 聞 友恭 至 , 南 ,以彊弩叢射,殺章別將 走武 昌 行密遣 將 馬珣

遂 圍 武 昌 章率軍薄戰,不勝。 友恭斬章,拔其壁

|
|
|
|
| 安豐, 全忠 自 行密 免者數千 漣 旌 軍 行密 聞 幟 水 出 全忠率葛從周萬騎攻光州 汴將牛全節 得馬乃還。 車 之 來 必殺賊,弟無往。」稔解鞍自如, 直 欲汴圍 西 與從周 行 入 門,繇北門去, が師 密使將羸 未幾, 占 解,乃擊師古。 沿皆遁 苦 從周涉淮圍壽州, 壘 復 鬭 圍壽州 ",後軍 走, 兵千人為前 舞槊而 ,以銳士萬二千齕雲馳,迫淸口,不進,壅准上流灌師古軍 追 及 乃 馳。 得度。 壽 , 七 柴再用遣小校王稔以輕騎覘賊 李承嗣曰:「公能 日 陽, 鋒。 , 而 訓 走 大破之。 亦登岸, 龐師古、聶金以衆七萬壁清口。 會大 暮依樾步戰,殺傷多,汴兵乃解。 師 古易之,方圍棋 八雪, 叩淠 士多凍死。 超 以其栅。 潛師趨清口 水, 方涉 || | | | | | 軍中,不顧。 潁 為運所 州 大囂, ,破其衆, 刺 **汴兵圍之。** 史王敬義燎薪 乘 卽 河湯 朱瑾 斬 朱延壽擊從周 則從周不擊而 師 時亡馬法峻 死萬 。候者請救 古, 侯瓚以百 屬道,汴 一死十八。 瑾 軍 潰。 稔 蓰 張訓 敗 屯 追

|珣| 諸將曰:「爲諸君擊中壁,食其穀以歸。」乃夜擊之, 馬 珣 收散 卒三 百 自黄州 間 道 趨 分寧 絕 Ш 谷 襲撫州。 全諷走。 |錽 將危全諷 明 日 珣高 列 會, 几 壁, 廣旗 皆萬 、幟,伐

鼓循 山而下,連營潰。 既還,行密駡曰:「豎子,不遂據其城邪

行軍 何拒之久?」裴曰:「糧盡歸死,非僕素也。」初,成及之執,行密閱其室,唯圖 勸其降。 鏐 自 以 司馬,固辭,引刀欲自刺,行密乃止,厚禮而歸之。繆亦遣魏約等還。 舟 師 決水灌城,城壞,襲乃降。一鏐喜,具千人食以待。 元年,秦裴取鏐崑山鎮,顧全武圍之。行密諸將數敗,全武遂圍蘇州, 至。 濛食盡,行密遣李簡、蔣勳迎之,敗全武兵,濛得還。 旣至, 士不及百。 後軍 潰,裴援絕,全武 [書藥劑,將辟爲 **鏐日:「軍寡** 臺濛固守,

其境 約 使者督殷、汭、滿連兵解圍,行密還。 友裕 尶 會雨霖、 青州 ,满來結好。 下:「饗我不過日中, 全忠攻蔡州 來救, 將陳漢賓擁兵送款 達引 撤 圍還。 還。行密攻徐州,汴將李禮壁宿州以援,全忠自將次輝州。行密戰不勝,乃 奉國節度使崔洪來丐師。明年,遣朱瑾率兵萬人攻徐州,屯呂梁,洪遂來 行密壁黃、鄂間,杜洪寘鴆于酒、于井,棄城去,行密知,不入。 全忠諭馬殷、成汭、雷滿合兵攻行密,汭、滿猶豫,汭惡殷事全忠,掠 若不至, 行密,王綰、張訓、周本率兵迎之,漢賓中悔,綰、訓入見漢賓, 可攻城。」漢賓釋甲聽命。 詔加檢 校太尉、兼侍 中。 光州叛, 行密自攻之, 汴將 全忠又遣

引去, 天復 **諜奔告**, 元年, 傳言盜殺錢鏐 全武悉衆躡之。 李神福急攻臨安, 神福返鬭, 與伏夾攻,斬首五千級, 顧全 武列八壁相望, 執全武。 神福 軍青山,僞若 明日,遂圍

列

傳

第

百

+

=

楊

行

密

臨安, 鏐將秦昶以步兵三千降。 神福乃令軍中護鏐先墓, 禁樵采, 鏐遣使者厚謝。 神福以

|鏐不死,臨安未可下,納犒而還。

沙, **彊弩射之**,存軍熾。 明年, 大將劉存率兵二萬、戰艫七百伐湖南。 行密歸顧全武於繆,繆亦釋秦裴以 殷伏軍長磧洲, 報 以樓艓據上流, 乘風颺

節度使,出璉水,攻徐、宿;使朱延壽圍蔡州;田頵捍錢鏐; 保大、橫海、義武、大同八道攻之。 守中書令,封吳王,承制封拜, 帝在鳳翔,以左金吾大將軍李儼爲江淮宣諭使,授行密東面諸道行營都統、檢校 且告難。 詔朱瑾爲平盧節度使,繇海州取凊、 時已削奪全忠封爵,詔西川、 行密討杜洪、馬殷,以分全忠 齊; 河東、 馮弘鐸為感化 忠義 幽州、 太師、

存還計事, 破,禽業,掠上高、唐年而去。是時,杜洪困甚,且禽。 與頵連和, 行密乃以李神福爲鄂岳招討使,劉存副之,遣冷業攻馬殷。 勍引衆走。 全忠使韓勍率步兵萬人屯躡口 洪復振。 冷業屯平江,爲三壁。 頵之敗, 更以臺濛爲宣州觀察使, ,荆南節度使成汭亦悉衆救洪。 殷將許德勳以銳卒號「定南刀」夜襲業,擊三壁皆 會田頵、安仁義絕行密,行密召神福 復遣 神福 杜洪戰屢敗、嬰城、請救於 存攻鄂州。 神福逆戰,敗之,汭 順義軍使

武

無錫當浙衝,行密使票將張可悰守之。鏐勁兵三千夜襲城,可悰以百騎擊走之,吏皆

臺濛卒,行密以子渥爲宣州觀察使。天祐二年,王茂章曰、李德誠拔潤州,殺安仁義。 答曰:「未也,方勞諸軍一戰。」乃蔽火斂旗以須。 覘者以告,鏐兵復至,可悰大破之。

蛤子湖 德勳以梅花海鶻迅舸進,斷木龍,舟蔽江,車弩亂發,執彥章,溺死萬人。殷釋彥章還,德勳 王茂章爲潤州團練使。 第 山 之南,爲木龍鎖舟,夜徙三百舸斷楊林岸。彥章入荆江,將趨江陵。佶躡之, 聶彦章等率舟師復伐殷,攻岳州。 許德勳、詹佶以舟千二百柁入

謂曰:「爲我謝吳王,僕等數人在,湖、湘不可冀也。」

將李 城,見王茂章營第,日:「天下未定,而茂章居寢鬱然,渠肯爲我忘身乎?」茂章遽毀損 去,遺衣臥內,皆經補浣。 孫儒亂,府庫殫空,能約己省費,不三年而軍富雄。嘗過楚州,臺濛盛供帳待之,行密一夕 友禽斬之。 佗日,侍劍如故。 行 密寬易,善遇下,能得士死力。每宴,使人負劍侍。陳人張洪因以劍擊行密,不中,近 濛還之,行密曰:「吾興細微,不敢忘本,君笑我邪?」 濛大慚。 行密蚤出,有盜斷馬鞅,不之問,以故人人懷恩。始,乘

不視事三日,因是病篤,召將吏付家事,問嗣於其佐。 東遷,行密恥憤被病。 方帝困鳳翔,再遣使督兵,以爲行密可亢全忠者, 全忠亦知天子倚行密為重,乃弒帝以絕人望。 周隱對日:「宣州司徒易而信讒,唯淫 然兵至宿州,紿言糧盡,乃還。 行密聞之,發喪,

代渥,使亟還。 酗 淮南節度留後。 非我二人勿應也。」及是,二人以符召渥。 几 五 十四。 是好,不可以嗣,不如擇賢者。」時劉威以宿將有威名,隱意屬威。 始,屋守宣州,押牙徐温 遺令穀葛爲衣,桐瓦爲棺。夜葬山谷,人不知所在。 行密召所親嚴求曰:「我使周隱召吾兒而 行密證屋曰:「左衙都將張顯、王茂章、李遇皆怙亂,不得爲兒除之。」卒,年 、王令謀約渥曰:「王且疾,而君出外,此殆姦 渥至,行密承制授檢校太尉 不至,奈何?」|求往見隱, 諸將 諡 行密不答。 日武 、同中書門下平章事、 人計。 忠 因以王茂章 它日 召檄仍在 了有召,

制授 渥銀 曰:「都統印,先帝所以賜王父子,安得授人?」諸將唯唯 張顥議歸都統印於宣論使李儼, 侍中、淮南節度副大使、東面諸道行營都統,封弘農郡王 行節度事。 諸將畏顯, 無敢對。 顥投袂去,乃共請於儼,承 渥流涕。 騎 軍都尉

腹 鍾 兵 入,皆色動 Į, 不得,及去宣,鲞帷帟以行,茂章嫚駡不與。 匡 屯。 時 渥 好 渥 顥脅以爲有異謀, 授以江西制置使。 酒行, 射。 初與許玄膺爲刎頸交, 及嗣位, |祐數其罪,皆斬之。||渥召|周隱曰:「君嘗以孤爲不可嗣,何也?」隱不對, 遣陳祐疾馳,懷短兵,微服入秦裴帳中,襲大驚,命飲,召三將 朱思勍、范師從、陳鐇以兵戍洪州,渥爲張顯所制,三人者,渥 踰年,遣兵五千襲之,茂章奔杭州。 事皆決之,諸將莫敢忤。 渥求王茂章親 秦裴執

遂殺之。

鋒甚 **溥,以獻天子,故破賊溥功第一。加檢校司徒、同中書門下平章事,進檢校太尉、兼中書令、** 窮意沮,僨死牖下,可爲長太息矣! 鉅鹿 所部萬人降。 溥遣將李師悅等追尾巢至萊蕪,大破之。 諸將爭得巢首,而林言斬之,持歸 其家。溥怒,署璠宿州刺史,俄殺之。別遣將引銳兵三千入關,僖宗因以武寧節度命之。 軍乃入,共推溥爲留後,逐詳客館。溥厚具貲裝,遺蹯護還京師,夜駐七里亭,璠擅殺詳,屠 次河陰,軍亂,剽居人。」溥招戢其衆,引還屯境上,疑不敢歸。 郡王。 l盛,連戰輒克,授東面兵馬都統。 遂合許、克、鄆兵, 逐尚讓於太康, 斬首數萬級,讓以 巢敗東走,圍陳州,營澱水。秦宗權方據淮西,相聯結。溥地介於賊,乃悉師討之,軍 徐州彭城人。爲州牙將。黃巢亂京師,節度使支詳遣溥與陳璠率兵五千西討。 宗權阻兵,拜溥蔡州行營兵馬都統。 詳以牛酒犒士,約悉貰其罪,

楚,士氣剽而不剛。

贊曰:行密興賤微,及得志,仁恕善御衆,治身節儉,無大過失,可謂賢矣。

然所據准、

行密無霸材,不能提兵爲四方倡,以興王室,熟視朱温劫天子而東,謀

列傳

百一十

Ξ

時薄

亂。 全忠 郭言等東,兵道宿州, 怨, |溥自以先起, 賊 平 自是連歲略徐、泗, 克用爲攻碭山, 與朱全忠爭功,嫌恭 功名顯朝廷, 遺溥書請假道。 朱友裕救之,各亡其大將。 師不弛甲。 日構。 位都 統, 溥辭不可, 孫儒方與楊行密爭揚州, 顧不得而全忠得之, 全忠自將及其郊,未得志, 間其墮,以兵襲之。 友裕進攻宿州,不能拔。 頗悵恨。 韶全忠爲淮南節度使平其 引去。 言戰甚力, 全忠使司馬李璠、 |溥窮, 時大順元年 解而還。 乞師於

也。

表徙 聽可。 昭宗 泗。 軍 益 鄭州 以宰 不振。 明 泗州 年, 刺 柏 丁會築堤閼汴水,灌宿郛,三月拔之,使劉瓚守。而溥將劉知俊引兵二千降全忠, 史。 刺 劉崇望代之,授溥太子太師。 民失田作, 史張諫聞溥已代, 諫畏兩怨集己, 又大水荐飢, 卽上書請隸全忠, 乃奔楊行密。 死喪十七以上。 溥慮去徐且見殺,惶惑不受命、論軍中固留, 行密以諫爲楚州刺史,幷其民徙之,以兵屯 納質子焉。 乃請和於全忠, 溥旣復留,諫大懼, 全忠約徙地而罷兵。 全忠爲 有詔

徐汶出降。 至 軍 責 朱 友裕 黿 友裕答曰:「溥困 溥求救於朱瑾。 率 軍 攻溥,嬰城不出。 且 全忠自以兵屯曹,將去, 破, 乃徇妖辭,士心墯矣。」 有語全忠曰:「軍行非吉日,故師無功。」全忠遣參謀徐璠 留精騎數千授霍存日:「事急,可倍道 焚其書, 督餫饋, 急攻之, 溥

拔之。 趨之。」瑾兵二萬與溥合攻友裕,存引兵疾戰,瑾、溥還壁。 友裕,友裕堅營不出,瑾食盡,還兗州。 自是完壘不戰。 王重師、牛存節等梯其堞以入,溥徙金玉與妻子登燕子樓,自焚死, 全忠使龐師古代友裕, 明日復戰,霍存敗,死之。 溥分兵固保石佛山, 師古攻 進 逼

實景福二年。

全忠遂有其地,私置守焉。

戰死,其將崔君裕攝州事。 **黃巢之亂,敬武遣將曹存實率兵西入關,而宣爲軍候,道鄆州。** 朱宣、宋州下邑人。父以豪猾聞里中, 存實揣知兵寡,襲殺之,據其地,遂稱留後。以宣功多,署濮州 坐鬻鹽抵死。宣亡命去青州,爲王敬武牙軍 是時,節度使薛崇拒王仙芝

刺史,留總帳下兵。

朱全忠,使秦賢列三十六壁,自將督戰。 萬,弟瑾勇冠三軍,陰有爭天下心。 載兵竊發,逐克讓, 六月,不能拔,引兵去。僖宗嘉其守,拜宣天平節度使,累加同中書門下平章事。宣有衆三 中和初,魏博韓簡東鏡曹、鄲,引兵濟河。存實迎戰,死于陣,宣收殘卒嬰城。 據府自稱留後,天子卽授以帥節,兄弟雄張山東。時秦宗權悉兵攻 **瑾嗜殘殺,光啓中,求婚於兗州節度使齊克讓,託親迎,** 全忠大恐,求救于宣。宜與瑾身率師往擊宗權, 簡圍之

列傳第

宗權敗走

攻運 郭詞 千傅城。 斬之,拔濮州,朱裕奔歸鄆,使珍薄郿挑戰,宣不出。 宣納汴亡命,移書詆讓。 全忠將丁會轉戰,不勝,去。 爲刺 全忠 ,取曹州,壁乘氏。 史, 裕開門,軍入,縣門發,死者數千,縱畾石擊未入者,殺裨將百餘 厚德宣,兄事之,情好篤密,而內忌其雄,且所據皆勁兵地,欲造怨乃圖之,即聲 大將郭銖斬詞奔全忠。 宣救曹不克,奔還范。 宣以新有恩於全忠,故答檄恚望。 **邁謀悉兵襲**汴, |珍圍濮州, 裕爲書給降,導珍入,信之,夜以兵數 全忠乃自攻瑾。 宣使弟罕救濮。 全忠由 是顯結其隙,使朱珍先 瑾以兵掠單父, 人。復取曹,以 全忠自將擊罕,

留濮 營。 | 蓮三分其兵出擊之,全忠迎戰東阿,南風急,汴軍居下,甚懼。 <u>令賀瓌守濮州,爲友裕所攻,委城走。</u> 幾不脫,大將多死。乃謀持久徼極取宣,歲一再暴其鄙,奪之食,俘其工織,勵有存者。 全忠卽遣龐師古攻齊州,宜、瑾皆戍以兵,久不下。 州 全忠未知,運糧以入,乃覺,走瓠河,與友裕相失,距濮十五里舍,明日,友裕乃至。 景 福 初,復伐宣,令從子友裕先驅,自繼之。 全忠令友裕馳壯騎諜鄲虛實,身將而北。 友裕進擊徐州,時溥求援於宣,戰不勝而還,溥遂亡。 次衞南,宣以輕兵夜掩友裕軍,走之,據其 。會宜引還,縱兵戰,全忠南走,絕塹去, 乾寧元年,全忠身往,薄淸河結壘。 俄而風返,全忠得縱火焚其

旁,嫖薰漲天,宣等大北。 是夏,全忠壁曹州南,宜薄戰,禽其將三人,全忠還。

賀瓌以奇兵擊全忠輜重,不及,戰鉅野東,瓌大敗,見禽,師無孑餘。 宣求救于|李克用,友恭退壁|曹南。數月,全忠自伐宣,刈其麥,敗克用將李承嗣等,乃還。 全忠曰:「豈殺人有遺邪?」乃搜軍中,復斬數千人,風亦止,執瓌示城下。 級,引而南。 宣追之,大鈔曹州。其秋,全忠復攻鄆,壁梁山。宣、克用挑戰,全忠設伏破之,斬首數千 明年,使朱友恭擊兗州,瑾堅壓,乃塹而守。宣饟瑾,友恭奪其糧。全忠自軍單父。會 克用躡全忠後,至柏和,大寒,全忠軍多死。不閱月,復圍兗州,因略地襲丘。 軍道大陂, 風暴起,

禮,因使招瑾。 全忠志,數日乃去。 不之虞,瑾伏壯士橋下,瓊單騎至,方交語,士突起,掖瓊以入,斬其首棄城下,汴軍大震。 **瑾之兄瓊守齊州,見勢屈,以州歸全忠,結同姓歡。全忠許之,輕騎至軍,全忠勞苦加** 瑾領精騎鬲池笑語如平生歡,乃使將胡規僞送款,欲得瓊躬上符節。 全忠

伐宣,宣逆戰,敗于馬頰河。師古迫其西門,兵不出。 三年,克用使其將李瑭以兵屯莘援宣,爲羅弘信所破。 全忠大喜,度宜可困,遺靡師古

深溝爲不可逼。明年,葛從周密造舟于塹,師人踰而升。宣出奔,爲民所縛,追至,執以獻 全忠之攻宣,凡十興師,四敗績。宣才將皆盡,益內沮,度不能與全忠确,則固守,增堞

列傳

百一十三

朱宜

孫儒

五

七萬計 衆與瑾奔楊行密,行密迎之高郵,解玉帶以賜, 全忠. 瑾 及大將康懷英等舉城降。 事 行密尤盡力。 斬之而納其妻。 行密,瑾敗之清口,擊殺師古,而從周還, 使師古攻兗州。 **谨引麾下走沂州,刺史尹懷賓不納,乃趨海州,** 二月、食盡,瑾自出督芻粟,轉掠豐、沛間,而子用貞 表領徐州節度使, 師至淠水,方涉,瑾追及, 畀以兵。 刺史朱用芝以其 殺傷溺死幾盡。 師古、從周以兵

史李璠 使諸: 秦宗 屯胙城東南, 權 葛爽與儒戰洛水,爽敗,儒亦東圍鄭州。 孫儒, 走,儒進拔河橋,遂取河陽,留後諸葛仲方出奔。 爲都將。 河南河南人。以趫卞橫里中,隸忠武軍爲裨校, 列偽旗鼓疑之,儒乃還。 光啓初,宗權遣儒攻東都,留守李罕之出奔,儒焚宮闕,屠居人。 朱全忠屯中牟救之,不敢前。 全忠壓河陰,儒掠汴鄙, 與劉建鋒善。 黄巢亂, 儒衆夜登城,刺 全忠兵卻, 河陽節 以兵屬 度

前鋒。 淮南, 會全忠與宗權戰, 乘高駢之亂, 儒常曰:「丈夫不能苦戰萬里,賞罰繇已,奈何居人下,生不能富貴,死得廟食乎? 儒留濠州。 宗權敗走。 會楊行密得揚州, 懦聞,殺孟人,流尸於河,焚井邑乃去。 宗權使弟宗衡爭淮南,以儒爲副 宗權又遺儒鈔 建鋒爲

未幾,汴兵攻蔡,宗權召之,儒稱疾不往,宗衡督之。 卽大會帳下,酒酣,斬宗衡,

與建鋒 、許德勳等盟。 有騎七千,因略定傍州,不淹旬,兵數萬,號「土團白條軍」。

汴,且送宗衡、秦彦、畢師鐸首,全忠藉以聞。 文德元年,破揚州,自爲淮南節度使,與時溥連和。 昭宗授儒檢校司空,全忠署爲招討副 初,全忠嘗以書招儒,故又納款於

守潤 常。 龍紀初,悉兵攻宣州,行密取淮南,儒還,行密走, 全忠約行密圖之。 儒謀定江南, 乃北爭天下, 畏全忠擣虚, ,始得潤、常、蘇三州,兵益彊,使建鋒 ` 乃遣人卑辭厚賄,

全忠薦於朝,韶授淮南節度使。

拔常、潤,仁義走。全忠遣將龐從等軍十萬掩至高郵,儒悉師禦之,故仁義間取潤州 田頵等敗建鋒於武進,取常州。 大順元年,行密取潤州,以安仁義守之;常州以李友守之。儒怒,三分其軍度江,建鋒復 杭州錢鏐將沈粲自蘇州奔儒, 行密諸將在潤、常者,皆爲 劉威

建鋒所逐,仁義、頵棄潤州走。

師於錢鏐。 兵三萬,邀儒黃池。 西溪,自引軍逆戰。 明年,儒引兵自京口轉戰,召建鋒皆行。 會谿潦暴湧,廣德、黃池諸壁皆沒,儒分兵取和、滁二州。 儒軍圍之數重,黑雲將李簡以騎馳之,行密乃免。 儒遣馬殷擊走之。儒營廣德,乘勝至東溪,淮人大恐。 行密諸將屯險者,聞儒至,皆走。 儒遂圍宣州,行密乞 行密遣臺濛屯 題、 威等合

列

百一十

=

孫

儒

校 勘 記

營糧: 揚州 以 給 一數十萬斛以稟飢民。 其秋 軍。 撫尉衣食 行密懼, 敗。 儒 焚揚州, 儒連· 使儒 將 屯稍 遁去。 BÍ 軍聞其家尚完,人人思歸, 丽 西,行密使陶雅屯潤州 儒 西,傳檄遠近,號五 戴規曰:「儒軍數敗,今掃地而至, 屯廣德,陶雅以騎軍破儒前鋒,屯嚴公臺。 一十萬, , 扼其 不戰可禽也。」行密乃遣親將入揚州, 旌旗相屬數百里,所過燒廬舍, 〈歸路。 決死於我, 十二月,頵、威與儒 若吾遣降者間至 殺老弱 取

決戰

了,皆大

弁不 據險 更召 知城 日:「此頭不 當廟以報德。」及殷據湖南,表儒贈司徒、 邀 問 能 景 下 ·兵寡, 計 興。 儒 福 糧。 元年,儒 對 久當入京師。」至是, 傳首闞 題執儒獻行密,諸將皆降。 乃晨出,率仁義、題背城決戰,破五 曰:「儒焚倉隤壘以來, 行密乃分兵攻廣德壁而絕饟道。 復 園宣州, 屯陵陽。 糧盡將爲我禽。 行密戰不利,謀出奔, 下。 儒 就刑 樂安郡王,立廟以祀 建鋒、殷哭之,相語曰:「公常有志廟食,吾等有 于市, 一十壁。 軍適大疫,儒病痁,遺建鋒、殷鈔諸縣。 見劉威 若勁兵背城 會暴澍且冥,儒軍大敗。 日:「中君之謀。 時劉威方繫獄,且死,行密窮, 坐制 其困。」李神福亦請 |儒 嘗引鑑搔 儒病 甚 行

#### 校勘記

時張敖據壽州 「張敖」, 九國志卷一 李神福傳、卷三田頵傳及通鑑卷二五六均作「張翱」。 通經 12

考異曰:「妖亂志作『張敖』,吳錄作『張璈』,今從十國紀年。」

(三) 王茂章 「茂」,各本原作「彦」。本書卷一八九田頵傳、九國志卷三安仁義傳、新五代史卷二三

使」,通鑑卷二六五亦載「潤州團練使王茂章」。此當作「茂章」。據改。

汪景仁傳及卷六一楊行密傳、通鑑卷二六四均作「茂」。又本卷下文云「以王茂章爲潤州團練

## 唐書卷一百八十九

#### 列傳第一百一十四

# 高仁厚 趙犫 翠 珝 田頵 朱延壽

戒曰:「毋與鵶兒鬭。」敬瑄喜其兵可用,益選卒二千,使仁厚將而東。 敬瑄遣黃頭軍部將李鋋、鞏咸以兵萬五千戍興平,數敗巢軍。 高仁厚,亡其系出。 初事劍南西川節度使陳敬瑄爲營使。 黃巢陷京師,天子出居成都, 賊號圖兵爲「鵐兒」,每戰,輒

欲 不能制。 怖 其餘。 亡不得,故皆死,自是閭里乃安。 先是,京師有不肖子,皆著疊帶冒,持梃剽閭里,號「閑子」。京兆尹始視事,輒殺尤者以 仁厚素知狀,下約入邑閭縱擊。 竇潏治京兆,至殺數十百人,稍稍憚戢。 軍入, 閉子聚觀嗤侮, 於是殺數千人, 坊門反閉, 巢入京師,人多避難實難, 開子掠之, 吏

會邛州賊阡能衆數萬 列 第 百 + 四 略諸縣,列壁數十,涪州刺史韓秀昇等亂峽中,韓求反蜀州 髙 仁 厚 五. 四七 諸將

遣將不 得死, 尙 禽,徇諸 者,署背 視 妻子囚 書左 賊 壘, 定。 則告諸 僕射、 持兵入諭 於賊 吏請焚之,仁厚命取財糧,乃縱火,尸賊成都。 壁 日『 敬瑄 日 歸順』,皆得復農矣。」縱諜去, ,約不得軍虛實 眉州 | | | | | | | | | 壁:「大軍至。」 召仁厚還,使督兵四 其衆,皆眞降。 刺史。 出者斬 ! 」衆駡之,求赴 財帥 且死。 句胡僧 **渾擎**詐窮 討,屯永安。 仁厚哀之, 曰:「爲我報 大驚 水死, 而逸, 命諸將毁栅鼓 ,斬之,莫能禁,衆執胡僧 衆鉤出, 更執之,仁厚曰:「愚人不足語。」降 阡能遣諜者入軍中, 吏執以獻 仁厚還,天子御樓勞軍,授仁厚檢校 斬 丽 以徇, 前。 賊 明 賊渠羅渾擎設 餘棚皆下。 日 我 以降。 且. 戦 仁厚 韓求 有能 伏詐 諜 按轡 釋 自 知 衆署 大賊 甲 言 ·迎我 2父母 徘 徊

以 쬭 舟道,負岸而 公。」仁厚許之。 舟兵救火,仁厚遣人鶩沒鑿舟,皆沉 敬瑄 仁厚問狀, 與仁厚謀曰:「秀昇未禽,貢輸 陣。 詔拜 對曰:「天子蒙塵,反者何獨我?」仁厚檻車送行在,斬於市 使游軍 行 軍司馬。 逼 賊,久不戰 仁厚聞賊儲械、子女皆在屯, 衆懼, 則夜以千卒持短刀、弫弩直薄營,火而譟之。 梗奪,百官乏奉,民不 多潰。 秀昇斬潰兵,欲脅止之,衆怒,執秀昇 鹽食。 乃以銳兵瀕江, 公能 破賊,當以東川待 伐木頹水礙 秀昇

有望言。 東 Щ 節 度使楊師立初隸神策軍,累遷檢校司空、同中書門下平章事。 敬瑄諷帝召師立以本官兼尚書右僕射,師立益怒,移檄言敬瑄十罪,殺監 聞敬瑄以仁 厚代 軍

斬而 德陽, 卓文 走之。 諸軍都虞候,率兵二萬討之。 田 沉 繪 天子 徇 不應。 于 屯涪城, 師立嬰城,閱四旬,夜出兵擾北栅,仁厚設兩 池 楊茂言謂仁厚且敗,引兵走,久乃還。 所討 於是 死 帝乃下韶削官爵。 上: 君雄悉誅其家, 遣兵 反者耳,吾等何與?」乃與士安譁而進,以仁厚書示 安不敢出,師立自督士, 攻綿州, 不克。 師立遣大將張士安、 獻首 敬瑄 i天子。 即表仁厚為東川 又檄劍州刺史姚卓文共攻成都,假卓文爲指揮應接使, 十戰皆北。 仁厚入府 明日, 翼而伏,披栅門列炬,賊不敢進,伏發, 鄭君雄守鹿頭關。 會諸將,仁厚曰:「副 、縱繫囚 節度留後,楊茂言爲行 仁厚約城 脈貧 中斬首惡者賞, 師立 絕。 仁厚次漢州, 使當以死報 日:「請以死 詔拜劍南 軍副使, 君雄謼于軍 東 謝衆。 前軍 天子。 楊棠爲 川 節 · 戦 擊 度

李順之逆 光啓 戦, 二年, 君雄死。 遂據梓州, 又發維、茂州羌軍擊仁厚,斬之。 絕敬瑄。 君雄時爲遂州 刺史, 乾寧中,皆追贈司 亦陷漢州, 攻 人成都。 徒。 敬瑄 使部將

使。

羣兒 無敢 趙 魐 亂。 陳州 父 宛丘 叔文 人,世爲忠武 見之日:「是當 軍 牙 [大吾門。]稍長,喜書,學擊劍,善射。會昌中, 將。 犫 資 警 健, 兒弄時好爲 營陣 行 列, 自 從伐路州, 號令指顧,

列

傳

第

百

+

四

趙

壁

收 大井關 又從 征 蠻, 忠武 軍 功多,遷大校。

聽命。 署,儲糧爲持久計。 求生,徒懼無益也。 繚長壕五周,百道攻之。州人大恐,犫令曰:「士貴建功立名節,今雖衆寡不敵,男子當死地 者悉內之,繕甲兵,募悍勇,悉補子弟領兵。 曰:「巢若不死長安,必東出關,陳其衝也。」乃培城疏塹,實倉庫,峙藁薪,爲守計。 道乞師於朱全忠。 僖宗嘉其功,遷累檢校司空。巢聞楷死,驚且怒,悉軍據澱水,與秦宗權合兵數十萬 黄 (巢入長安,所在盜興,陳人詣節度府,請犫爲刺史,表于朝,授之。 引銳士出戰, 屢破賊。 未幾,汴軍至,壁西北,陳人思奮,擊引兵急擊賊,破之。圍凡三百日而 宗權輸鎧仗軍須,賊益張。犫小大數百戰,勝負相當,故人心固, 且死國,不愈生爲賊乎?吾家食陳祿,誓破賊以保陳,異議者斬! 巢益怒,將必屠之,乃起八仙營於州左,僭象宮闕,列百 巢敗,果東奔。賊將孟楷以萬人寇項,犫擊禽 旣視事,會官屬計 民有貲 乃間 官曹

獨完 忠武軍節度,仍治陳州,流亡踵還。 **摩悉忠力以孤城抗賊,巢卒敗亡。** ,以功檢校司徒,加泰寧、浙西兩節度,皆在陳幷領之。 中 和 五年,擢彰義軍節度使。 巢雖敗,宗權始熾,略地數千里,屠二十餘州, 與弟昶至友愛,後將老,悉以軍事付之,乃卒,贈太尉。 龍紀 初,進同 中書門 下平章事、 唯陳賴犫

然附全忠,亦賴其力復振,故委輸調發助全忠,常先

亦留陳。 檢校尚書右僕射。 有神相之者。犂曙決戰,士爭奮死鬭,禽賊酋數人,斬級千餘。 昶字大東,神采軒異,而內沈厚,有法度。 進檢校司徒。 當時,方鎭言忠壯吏治,舉言犫、昶。犫之老,乃授留後,遷忠武節度使, 劭勸農桑,於人有恩惠。 破孟楷功多。 加同中書門下平章事。乾寧二年卒,年五 巢之圍, 昶夜掫師, 疲而寢, 如 **犫領泰寧,以昶爲州刺史、** 

十三, 贈太尉。

皆洞,賊畏不敢逼。以勞檢校尚書右僕射,遙領處州刺史。 殘齡,即夜縋死士取柩以入。,庫有巨弩,機牙壞,不能張,珝以意調治,激矢至五百步,人馬 **犫子琊,字有節。** 雄毅喜書,善騎射。 巢之難,激勵麾下,約皆死。 以先家邇賊,畏見

節 事,進兼侍中,封天水郡公。 i度使。 陳土惡,善圮,珝疊甓表墉,遂無患。 按鄧艾故蹟,決翟王渠溉稻以利農。 昶之喪,知忠武留後,政簡濟,上下安之。 三加檢校太保。光化二年,同中書門下平章 一家三節度,相繼二十餘 全忠表為忠武軍

年,陳人宜之。

列

僔

第

百

+

74

趙豐

田顋

以 檢 校太傅爲右金吾衞上將軍, 從東遷。 天 復 初 韓建帥忠武,以珝知同州節度留後。 歲餘, 以疾免。 卒,年五十五,贈侍中, 昭宗還長安, 詔入 朝, 賜號 迎鑾 功臣」。 陳人爲

罷

市。

甲, 募屯 謂追 邊, 田 頵字德臣,廬州合肥人。略通書傳,沈果有大志。與楊行密同里,約爲兄弟。 騎不能及。 遷主將。 行 密 頵 據廬州, 乘輕舠追之,鍠驚,遂見禽。 類謀爲多。 攻趙鍠於宣州,鍠出東溪,乘暴流以逸,阻水解 行密表類為馬步軍都虞候 應州

屯。 刺 詒 史 與戰 社棱。 書仁義通好,以疑行密,行密待益 史, 頵寧國軍節 沙 陀 叛將安仁義奔淮南,行密大喜,屬以騎兵,使在顋右,兩人名冠軍中,共攻常州,殺 題走,<br />
行密怒,<br />
奪其兵。<br />
或諫<br />
行密曰:「<br />
彊敵傅壘,<br />
不用<br />
題 錢鏐方屯潤州,一夕潰。 度使。 累遷檢校太保、同中書 會孫儒南略, 厚,署行 軍 副 門下 題等屯丹陽,儒 使,卒用 平章事。 此二人功禽儒。 仁義 ,非計也。」行密復將題。 火揚州,壁廣德,頵破其 至檢校太保 乃表仁義爲潤

邪 」又求池、歙爲屬州, 頵 三 平 馮 弘 鐸, 至揚州謝行密。 行密不許, 頵始怨。 左右求貲不已, 將還,指府門曰:「吾不復入此。」 獄 吏亦有 請 頵 怒曰:「吏覬吾入獄 州

刺

百 東 保 城 與語 會稽 是 | 青馳擊, 無爲 射 錢鏐部將徐綰叛, 中 奪其地, ·麾下。 虚 屠 士衆也。」鏐 西築壘絕往來道,鏐患之,出金幣十興,募能奪地者。 繆授璋衢州刺史。 鏐入杭州逐館, 日:「軍 中小 題攻城未能克, 將濟江絕西陵, 叛常然,公爲 縮屯靈隱山 迎題。 人長,何助逆耶?」顧攻北門, **西遣客何曉見鏐曰:「王宜** 爲繆將所却,圍 陳璋以死士三

益

急。

如阜, 質, 頵 未明,殺之,諸將不爲用。」閱遺其佐杜荀鶴至汴通 於是頵絕行密, 子,譬百川不朝 所,故授廬州刺史以間之。 頵 願 先是, 願公上天子常 又請鏐子元瓘出質, 召還顧。」行密使人謂頤曰:「不還, 行密欲女鏐子,鏐急,乃遣元豫迎女,且告行密曰:「題得志,」 大募兵。 于海,雖 賦, 狂奔澶漫,終爲涸 題請悉儲峙, 李神福白行密:「頵 乃與綰 題怒,族其家,儒曰:「公不用吾謀,死無地矣。」 引兵還。 單車以從。」行密答曰:「貢賦 土,不若順流無窮也。 我遣人代守宣州。」題不從。 必数, 然內怨行密與鏐, 好,全忠喜, 宜先圖之。」行密日:「頵 , 屯宿州 因移書曰:「侯王守方以奉天 東南揚爲大,刀布 繇汴 須 ·而達,適足資 爲患必大,請以子爲 變。 鏐輸錢二百萬緡犒 有大功, 行 密以 《敵爾。」 而 康儒 金玉 反狀

神 福謂諸將曰:「頵反,此心腹疾,宜速攻之。」頵遣李皐詒書神福曰:「公家在此,苟從我,當 頵 與安仁義連和攻昇州,劫刺史李神福 妻息厚養之。神福方與劉存攻鄂州, 行密召之。

列

第

百

+

四

田

頣

流急擊,大破之,因縱火,士多死。 始,顧將王壇等以舟師躡神福後,至吉陽磯,不戰。會日暮,壇掩神福軍半濟, 城而來,此天亡也。」乃瀕水堅壁不出,請行密以兵塞顒走道 分地以王。」答曰:「吾以一卒從吳王,任上將,終不以妻子易意。」乃斬皐,破頵兵於曷山。 明日,壇復戰,敗於皖口,頹乃自將來戰。 神福曰:「賊棄 神福 反舟順

嚴,善得士心。戰卒數百,濠梁不毁,開門鬭,先告所當中,然後射之。 舟蕪湖。 諫,乃止。 行密遣使謂曰:「吾不忘公功,能自歸,當復爲行軍副使,但不可處兵。」仁義欲降,其子固 一,仁義常曰:「志誠弩十,不當瑾槊之一;瑾槊十,不當吾弓之一。」人以爲然。 又其治軍 仁義焚東塘戰艦,夜攻常州,不克,轉戰至夾岡,立二幟,解甲而息,追兵莫敢嚮。 行密遣將王茂章攻潤州。仁義以善射冠軍中,當時稱朱瑾樂,米志誠弩,皆爲第 茂章等不敢與确。 頵陳

紿言母病, 等戰廣德,濛以行密書遺壇諸將,皆再拜氣奪。濛麾兵擊之,壇走。 可。」濛頓首謝,率騎度江,爲陣以行。 士笑其法, 濛日:「顧宿將多謀,備之何害?」 興王壇 以爲才容二千人,顧輕之,不復召兵。與戰黃池,矢石始交而濛遁,兵爭逐北,遇伏,顒大 還至蕪湖。 聞壇敗,留精兵二萬屬郭行琮,身走城。濛之行,爲狹營小舍,覘者 。神福旣以不戰困顒,頵 吾思爲將者非公莫

退軍示弱,士超隍,濛殊死戰,軍潰。 敗,召蕪湖兵,不得入。行踪及壇皆歸行密,頵恚,自料死士數百,號「爪牙都」,身薄戰。 **頵奔城,橋陷,爲亂兵所殺,年四十六。其下猶鬭,示** 

題首,乃潰。

題始以元瓘歸,戰不勝,輒欲殺之,題母護免。 及繆與行密合,題曰:「今日不勝,必殺

元瓘。」已而頵死,傳首至淮南,行密泣下,葬以庶人禮,亦葬康儒,還元瓘於杭

等皆爲上客。文圭有美名,全忠、鏐交辟不應。 題善爲治,資寬厚,通利商賈,民愛之。 善遇士,若楊夔、康軿、夏侯淑、殷文圭、王希羽 **顧置田宅,迎其母,以甥事之,故文圭爲盡** 

。變知題不足亢行密,著瀃賦以戒,頵不用。

行密使王茂章穴地取潤州,安仁義以家屬保城樓,兵不敢登。 召李德誠曰:「汝可以委

命。」乃抵弓矢就縛,父子斬揚州市。

結人心,而延壽敢殺。 朱延壽者,廬州舒城人。 時揚州多盜,捕得者,行密輒賜所盜遣之,戒曰:「勿使延壽知。」已而 事行密,破秦彦、畢師鐸、趙鍠、孫儒,功居多。 行密欲以寬恕

列傳第

百

+

四

朱

延

陰許延壽殺之。

使。 偏 卽 不不 表爲准南節度副使。 初,壽州 勝 ,將斬之,厚請益五旗,殊死戰, 刺 史高彥温舉州入朱全忠,行密襲之,諸將惲城堅不可拔, 全忠獨屯壽春, 全忠引去。 延壽以新軍出,每旗五伍爲列,遣李厚以十旗擊西 於是取黃、蘄、光三州,以功遷壽州 延壽鼓之,拔其城, 團 練

備 而不敢逼 昭宗在鳳翔, 也。 延 韶延壽圍蔡以披全忠勢, 壽 用軍常以寡鬭衆,敗還者盡斬之。 擢奉國軍節度使。 全忠兵每至,延壽開門不設

遣辯 紿 病 士召之,延壽疑,不肯赴。 目 田 行 頵之附全忠, 觸 柱僵 延壽陰約日:「公有所爲, 妻, 延壽姊也,掖之。 姊遣婢報故,延壽疾走揚州,拜未訖,士 行密泣曰:「吾喪明, 我願執鞭。」題喜,二人謀絕行密。 諸子幼, 禽殺之,而廢其妻。 得舅代我, 行密憂甚, 無憂矣。

滕、 絕之, 薛大夫。 贊日: 非忠 於唐 全忠, 如仁厚、田、朱,材不足爲吳、蜀之老,可與事天子哉 世。 唐之盜也, 棄 所 附 而 行密志梟其元而 覬尊大,亦已妄矣。 後已。 孔 子 田 稱 | 類使出 孟 公綽 軍 爲趙、魏老則優,不可以爲 賦 而 助之, 此 其 (謀責 難 而

## 唐書卷 一百九十

### 列傳第一百一十五

劉 建 鋒 成汭 杜洪 鍾傳 劉漢宏 張雄 潮

審邦

劉知謙

盧光稠

尙 殷 十餘萬。 書左僕射、武安軍節度使。 收散卒,轉寇江西,有衆七千,推建鋒爲主,殷爲前鋒,張佶爲謀主。 劉 建鋒字銳端,蔡州朗山人。爲忠武軍部將,與孫儒、馬殷同事秦宗權。 乾寧元年,取潭州,殺武安節度使鄧處訥, 自稱節度留後,奉表京師, 略洪、虔數州, 儒之敗,建鋒 詔卽拜檢校 衆遂

馬般 鐵 檛 攻邵 擊建鋒死,斷其喉。 建鋒已得志,即嗜酒不事事。 州 未 克,於是遣 人迎殷。 衆推張信爲帥, 磔膽于市。 新息小史陳贍爲建鋒御者,妻美且豔,乃私之。 信 固 辭, 馬踶傷信左髀,下令曰:「吾非而主。」時 贍怒,

列

傳

第

百

五

劉

建鋒

節度兵馬留後。 錫命,四方畏服,然後按兵討不廷,霸業成矣。」殷悟,厚結宣武朱全忠以請于朝, 楊行 曰:「荆南闍弱,焉能患我?准南,我讎也,固不吾援。 公若置邸京師,歸天子職貢,王人來 密、劉隱皆養士以圖 殷 佶坐受其謁。 郁又教殷鑄鉛鐵錢, 王霸,謂其屬高郁曰:「吾欲 既而率將吏推殷爲留後。詔卽除檢校太傅、潭州刺史。殷以成汭 十當銅錢 一;民得自摘山,收茗算,募高戶置邸閣居 重幣以奉四鄰而固吾境,計安出? 乃拜湖南

方亟,遣中人間道賜朱書, 賀、梧、象、柳、宜、蒙等州。又攻容管,執寧遠節度使龐巨曦, 於是收邵、衡、永、道、郴、連六州,進攻桂州,執留後劉士政。 密詔使殷與楊行密攻汴州,殷兵訖不出 虜其衆及貲。 諸城望風奔潰, 昭宗在鳳翔,難 盡得昭、

茗,號「八牀主人」。歲入算數十萬,用度遂饒

常有光怪。 朝亡夕至,但誼不忍舍公。」行密具齎以遣曰:「爾還,與兄共食湘、楚,然何以 「願通二國好,使商賈相資。」行密喜。 殿弟實,沈勇知書史,從孫儒爲盜 行密知之,曰:「吾今歸汝于兄。」辭曰:「賨一敗卒,公待以不死。 既至,殷表以自副。 ,晚事楊行密爲黑雲軍使。 每勸殷與行密連和,殷畏全忠, 與錢鏐戰,數有 報我? 湖南 功。 在字下, 」答曰: 夜臥,

殷與建鋒同里人,凡宗權黨散爲盜者,皆以酷烈相矜,時通名「蔡賊」云。

以禹凶慓,欲殺之。禹結千人奔入峽,夜有蛇環其所,祝曰:「有所負者,死生唯命。」旣而蛇 郭 禹 成汭, 當戍江陵,亡爲盜,保火門山。 青州人。少無行,使酒殺人,亡爲浮屠。後入蔡賊中,爲賊帥假子,更姓名爲 後詣荆南節度使陳儒降,署裨校。久之,張瓌囚儒,

禹,禹以靑州剽卒三百畀之,使討荆南部將牟權于淸江,禽權,取其衆。禹又破其將王建肇, 禹乃襲歸州,入之,自稱刺史。招還流亡,訓士伍,得勝兵三千。 秦宗權故將許存奔

建肇奔黔州。 昭宗拜禹荆南節度留後,始改名汭,復故姓。

當支解以逞。」會存夜斬營襲厚,破之,厚奔萬州,爲刺史張造所拒,走綿州。 厚屯白帝。汭率存乘二軍之間攻之,二軍使人辞辱汭,韓楚言尤劇,汭恥之曰:「有如禽賊, 宗權餘黨常厚攻變州。 是時,西川節度使王建遣將屯忠州,與夔州刺史毛湘相脣齒, 存入夔州

即使司馬劉昌美守虁,率存泝江略雲安,建將皆奔。 存按兵渝州,盡下瀕江州縣 之,夫曰:「未可知。」|李取刀斷其首,幷殺三子,乃自剄。||汭畏其烈,禮葬之,刻石表日烈女。 楚言妻李語夫日:「君常辱軍,且支解,不如前死。」楚言不決。 李礪刀席下,方共食,復語

時王建肇據黔州自守,帝以建肇爲武泰軍節度使。汭遣將趙武率存攻之,建肇走,汭

列

百

一十五

成

汭

乃以 矣。」遣將襲之。 武爲留後,存爲萬州刺史。 存夜率左右超堞走,與王建肇皆降於王建。 存不得志, 汭遣客伺之, 方蹴毬, 汭日: 「存必叛, 自試其力

帝 满 故 中書令、上谷郡王。 汭 數 所 且. 面 據 所 詔 汭 、舉少 刻石頌 頗 別爲節度,內數請之,宰相徐彥若不許。 地下。」踰月,吏暴死。汭聞,益詳於獄。 自 知 視桓、文,一賊不能取,而怨朝廷乎?」汭大慚。 過。 吏治,嘗錄囚,盡其情。 功, 晚得 輒固辭。 雲安権鹽,本隸鹽鐵,汭擅取之,故能畜兵五萬。初任賀隱,隱,賢 妻父任之,譖害諸子,內皆手殺之,至絕嗣。 時鎭國節度使韓建亦以治顯,號「北韓南郭」。汭進累檢校太 墊江賊陰殺令,其主簿疑小史導之,訊不 始治州,民版無幾,未再期, 及彥若罷,道江陵,內出怨言,彥若曰:「公 晚喜術士,餌藥濱死 灣、朗本荆南隸州,為雷 自占 · 承。 者 臨 者也, 萬 刑 尉、

師略 備 角。 可 取 行 汭身自 也 江 天 至公安, 陵, 復 」擊汭 三年 內諸將念 將 ·,帝詔 君山 卜不吉, 而 行, ,敗之,火其船,衆大潰,汭投 下知汭 私 淮南節度使楊行密圍鄂州,朱全忠使韓勍救之,諷汭與馬殷、雷彥威 欲還 ,無鬭 不足亢行密,無敢 志。 師厚日:「公舉全軍, 淮南將李 神 福 諫, 江 壁沙橋, 中道還,何以見百姓?」內 死,士民皆爲彥威所劫。 唯親吏楊師厚勸之。 望汭 軍日:「戦艦 雖盛,首尾斷絕, 韓勍走還。王建 乃行。 堂皇悉 彦威潛

遂取變、施、忠、萬四州。

天祐中,

全忠表內死國事,請與杜洪皆立廟

者爲 聞紹卒,募士三千入鄂州以守。 土團 杜 洪 .軍,賊不敢侵,於是人人知兵。 鄂州人。 爲里俳兒。 洪爲州將, 乾符末,黃巢亂江南,永興民皆亡爲盜,刺史崔紹募民彊雄 杭州刺史路審中爲董昌所拒,走客黃州。 有功,亦逐岳州刺史居之。光啓二年, 中和末, 安陸賊

周通率兵攻審中,審中亡去,洪乘虛入鄂,自爲節度留後,僖宗即拜本軍節度使。

是時,永興民吳討據黃州,駱殷據永興,二人皆隸土團者也,故軍剽甚。

洪雖得節制

還, 而附,朱全忠,絕東南貢路。乾寧初,身自將擊討,乞師准南, 延壽拔黃州, 俘討獻京師。 駱殷棄永興走, 行密取其地。 楊行密遣朱延壽助之。 洪得駱殷,倚爲腹心,間取 |洪|

永興守之。

忠義 縣民方詔守以待命。 趙匡凝、 全忠方圍鳳翔, 武安馬殷襲安州。 昭宗遣使者東出,道武昌,洪皆殺之。 神福已得韶, 行密使李神福、 大喜,以永興壯縣, 劉存率舟師萬 饋餫所仰, 時行密略光州, 人討洪, 既得鄂半矣, 駱殷棄永興走, 韶洪出兵, 與 逐進 軍

洪嬰城請救於汴,全忠率兵五萬營霍丘。 列 傳 第 百 + 五 杜 洪 鍾 熚 行密禦之,汴兵不利,引還,使別將吳章以三 无 四 八五五

鄂州

固矣 朱公。」與延祚皆斬揚州市。 里 洪 責曰:「 使辯士臨說,洪恃|汴方彊,無降意。 或勸|存急擊援兵,則城自下,|存曰:「擊之, 賊入,則城 也。」璘曰:「殺彊則弱者橈矣。」乃自擊開道軍,敗之,禽汴士三百人,徇城下。 曰:「准兵深入,仰永興以濟,若奇兵取之,賊不戰而潰。」洪以精兵合汴人間道掩永興,三十 千 計窮,復 兵 而舍。 解圍 若縱其遁,城可取也。」俄而汴軍走,是日城陷,執洪及曹延祚,窮斬其餘。行密見洪 爾同逆賊弑主,與孤爲仇,吾軍還,而復爲賊後拒,今定何如?」洪謝曰:「不忍負 存以方詔、苗璘當之。 汴亡卒走淮壁,言軍虚實曰:「鄆軍懦, 神福 走全忠,全忠遣曹延祚合吳章兵萬三千救洪。 迎破之。 時全忠方與河東軍薄戰,故不能救洪。 以劉存守鄂州。 行密死,馬殷遂取其地 淮南將劉 洪乃求助於馬殷,殷不答。 存濬坎傅 可取,開道軍不可當 城。 洪軍氣沮,存 殷爲洪謀

傳爲 傳之去,竊州以叛,使弟子昌據信州 、據之, 長,乃鳩夷獠,依山爲壁,至萬人,自稱高安鎭撫使。 鍾 傳, 言諸 洪州高安人。以負販自業,或勸其爲盜必大顯。時王仙芝猖狂,江南大亂,衆推 朝 沼部 即拜 刺史。 中和二年,逐江西觀察使高茂卿,遂 僖宗擢傳江西團練使, 俄拜鎭南節度使、 仙芝遣柳彦璋掠撫州,不能守, 有洪州 撫 民危全諷間 檢校太保、 傳

中書令,爵潁川郡王,又徙南平。

「全諷罪,無害民者。」火卽止。 率兵 圍撫州, 天火其城,士民讙鶩,諸將請急攻之,傳曰:「乘人之險,不可。」乃祝曰: 全諷 聞, 謝罪聽命,以女女傳子匡時。 傳以匡時爲袁州刺

史,擊馬殷。 又以彭玕爲吉州刺史。 开,健將也,傳倚以爲重。

悔之, 戒諸子曰: 「士處世尙智與謀, 必禱佛祠,積餌餅爲犀象,高數尋。 走傳府。 廣明後,州縣不鄉貢,惟傳歲薦士,行鄉飲酒禮,率官屬臨觀,資以裝齎,故士不遠千里 傳少射獵,醉遇虎,與鬭,虎搏其肩,而傳亦持虎不置,會人斬虎, 晚節重斂,商人至棄其貨去。 勿效吾暴虎也。」乃畫搏虎狀以示子孫。凡出軍 天祐三年卒。 然後免。 一攻戰, 旣貴,

人圖 執匡時及司馬陳象歸揚州。 揚州。 匡時自立爲節度觀察留後。 楊渥使秦裴攻匡時,圍洪州。 渥切責,匡時頓首請死,渥哀赦之,斬象于市。 次子匡範爲江州刺史, 怨兄立, 挈州附淮南, 匡時城守不出,凡三月,城陷,淮軍大掠三日止, 因言兄結汴

<u>注</u> 左 氏 <u>【春秋,嘗募求西京石經,厚賜以金,楊州人至相語曰:「十金易一筆,百金償一篇,況得</u> 彭玕旣失援,厚結馬殷,且觀虛實,使者還曰:「殷將校輯睦,未可圖也。」遂歸款。 |玕通

士乎?」故士人多往依之。

始,危全諷 聞匡時立,喜曰:「聽鍾郞爲節度三年,我自取之。」及渥兵盛,不敢救,潛謀

五

鍾傳

劉

漢宏

所
丼
。

攻渥 茂章觀之, 會淮南亡將王茂章過州,請曰:「聞公欲大舉, 對曰:「揚州有士三等, 公衆正當其下, 盍更益之?」 願見諸將才否。」全諷 全諷不能答。 蒐衆十萬, 後爲楊氏 邀

柳蹈 完家。 節度使。 得罪,乃授漢宏觀察使,代之。僖宗在蜀,貢輸踵驛而西,帝悅,寵其軍爲義勝 劉 漢宏,本兗州小史,從大將擊王仙芝,劫輜重叛去。 於是都統王鐸遣將崔鍇降之,表爲宿州刺史,漢宏恨賞薄,有望言。 乾符末,略江陵,焚民室廬, 會浙東觀 軍 察使 廛無 即授

「巨木 漢宏旣有七州,志侈大,輒曰:「天下方亂,卯金刀非吾尙誰哉?」鴉噪諸廷,命斫樹,或 不可伐。」怒曰:「吾能斬白蛇,何畏一木!

漢宏羸服走,或執之,紿而免。 沮,悉軍 錢鏐宵濟襲破之。 中和 <del>;</del> 一萬 二年,遣弟漢宥率諸將攻杭州,壁西陵,爲董昌所敗。 列艦 '明年, 西陵, 謀宵濟襲昌。 漢宏屯黃嶺, 明日復戰,鏐斬其弟漢容、將辛約。 禱於江,有一矢墜前,惡之。 發洞獠同攻昌,鏐出富陽擊諸營,多潰去。 復遣兵七萬瀕江而屯,昌使 俄與鏐遇, 繆俘馘五千, 時鍾季文守明州, 漢宏大

處州, 蔣瓌婺州,杜雄台州,朱褒温州。褒兵最彊,故漢宏使褒治大艦習戰,以史惠、施堅實

帝聞杭、越挐戰,遣中人焦居璠持節詔通好,皆不奉詔。

韓公汝將其軍。 與褒戰,燒其艦, 進屯豐山。

我嘗夢持金殺我者,必錢鏐也。」昌命鏐斬之。 堅實詣鏐降,漢宏率麾下六百人走台州,鏐斬其母妻于屯。 光啓二年, 鏐率諸將攻越, 自趨導山, 破公汝於曹娥埭。 漢宏曰:「自古豈有不亡國邪?」昌使斬于市, 叱刑者曰:「吾節度使,非庸人可殺。 杜雄饗其軍,皆醉,執漢宏以見

兵五萬,乃自號「天成軍」。 於節度使時溥。 張雄,泗州連水人。 二人懼禍,乃合兵三百度江,壁白下,取蘇州據之。 與里人馮弘鐸皆爲武寧軍偏將。 弘鐸爲吏辱, 稍稍嘯會, 雄爲辯數,幷見疑 **戦艦千餘** 

海中,使別將趙暉據上元,資以舟械。 鎭海節度使周寶之敗,奔常州,聞高駢將徐約兵銳甚,誘之使擊雄,與之蘇州。 寶兵散,多降暉,衆數萬。雄即以上元爲西州。 雄匿衆

楊行 密 圍揚州, 畢師鐸厚齎寶幣, 啖雄連和。 雄率軍浮海屯東塘。 是時揚州圍久,皮 才,欲治臺城爲府,旌旗衣服僭王者。

列

傳 第

百

\_ +

五

張 雄

以差爲 囊 初 革 ,以上元爲昇州, 帶 食無餘 雄 軍富 軍 中殺 過所 韶授雄刺史。 人代糧 欲, 卽不 ,纔千 戰 未幾卒。 去。 錢。 暉數剽江 聞 雄善 雄 至, 馭 間道 . 道 衆,人思之,爲 雄擊殺之, 挾 珍 走軍 ·, 以 立廟。 坑 其 銀 衆, 二斤易 弘 经釋代為 自 屯 3斗米, 上元。 刺 史。 逮 大順 糠 籺

爲 尙 未 迎 行 揚 用 屋,巨木 遂 淮 州 密 公 不計其久,取木於境可也。」弘鐸 行行 東塘, 迺 南 弘 知之,遣客說止,不聽。 弘 我 節 進說行密,行密不從。 鐸 形 且. 密 善騎射,侃侃若儒者。 度 讓 好謂曰:「兵有勝負,今衆尚 舞,州人駭曰:「州且易主。」大將馮暉等勸弘鐸悉軍南嚮, 募工治艦。工曰:「上元爲舟,市木遠方, 笑日:「吾 副 公。」弘鐸 使。 見尙 得 舉軍盡哭。 君,倘 公迺日:「頗憶爲 **頵逆擊於曷山** 客曰:「公不見聽,未知勝幾 何 憂? 行密已得准南, 行密挐 介宣、楊間,不自安,而州數有怪。 彊, 馮公求潤州否。何多尚邪。 飛艫, 乃自 弘鐸大敗,收殘士欲入海。 棄于海, 弘鐸納好。 不持兵入其軍,執弘鐸手 堅緻 奈何? 及樓船? 可勝數十歲。」題曰:「我爲舟於一 然倚兵艦完利 吾府雖隘, 」時行密大將田頵 聲言討鍾傳, 謝 行密懼復振, 遣人 天復二年, 大風發 ,尉勉, 日:「臣 尙 ,謀取潤州, 可以居。 遂以 「爲君,恨其 實襲頵。 在宣州 (歸,表 若欲

戰 南都。」從事 徐 約 者 曹州 成日 「都者 得 國 蘇 稱 州 有 詔 授 刺刺 平? 史。 錢 |約後蹇窘 鏐遣弟銶攻之, 與其下哭而 約驅民墨 別, 入海死 鑱 其耏曰:「 鏐使 願

漳州 它日 軍, 緒怒,欲斬其母, 母以行, 敢哭,夜殡道左。 復取光州,劫豪桀置軍中,潮自縣史署軍正,主稟庾,士推其信。 僖宗入蜀,盜興江、淮,壽春亡命王緒、劉行全合羣盜據壽州。 王潮字信臣,光州固始人。五代祖曄爲固始令,民愛其仁,留之,因家焉。 皆不能 賦不如期, 緒 切責潮曰:「吾聞軍行有法,無不法之軍。」對曰:「人皆有母,不聞有無母之人。」 有也。 三子同辭曰:「事母猶事將軍也,殺其母焉用其子?」緒赦之。會母死,不 宗權切責,緒懼, 初以糧少,故兼道馳,約軍中日:「以老孺從者斬。」潮與弟審邽、審知奉 與行全拔衆南走、略潯陽、贛水,取汀州, 緒提二州籍附秦宗權。 未幾,衆萬餘,自稱將 自稱刺史,入 世以貲願。

劍퀪 縛緒 日:「拜 子 以 時望氣 ,美須眉,才絕衆,吾不知子死所。」而 徇 而 者言軍中當有暴興者,緒潛視魁梧雄才,皆以事誅之,衆懼。 衆呼萬歲,推行全爲將軍,辭曰:「我不及潮,請以爲主。」潮苦 劍三 一動者, 我以爲主。」至審知,劍躍於地,衆以爲神, 行全怪寤, 亦不自安, 與左右數十人伏叢翳,狙 皆拜之。 譲 次南安,潮語行全 不克,乃除地 審知讓潮, 自 剚

列

傳

第

百

十五

王潮

五四

九

蜀 爲 副 以幹王室。」於是悉師將行, 緒歎曰:「我不能殺是子, 會泉州刺史廖彦若貪暴, 非天乎!」潮令于軍曰:「天子蒙難, 聞潮治軍有法, 今當出 故州人奉牛酒迎 交、 入巴、

潮。乃圍城,歲餘克之,殺彥若,遂有其地。

將兵, 授刺史。久之,嚴卒,其婿范暉擁兵自稱留後。 二州皆舉籍聽命,潮乃盡有五州地。 :「兵盡 初, 審知監之,攻福州。 黃巢將竊有福州,王師 益兵,將盡益將,兵將盡,則吾至矣。」於是彥復急攻,暉亡入海,追斬之。 審知乘白馬履行陣,望者披靡,號「白馬將軍」。暉守彌年不下 不能下,建人陳巖率衆拔之,又逐觀察使鄭鎰,自領州, 嚴舊將多歸潮,言暉可取,潮乃遣從弟彥復 詔 · , |潮 刨

人皆安之。 昭宗假 乾 潮福、建等州團練使,俄遷觀察使。 寧中,寵福州爲威武軍,即拜潮節度使、檢校尚書左僕射。 乃作四門義學,還流亡,定賦斂,遣吏勸農, 卒,贈司空。

朱全忠, 潮 全忠薦爲節 以審 知權節度, 度使、同中書門下平章事。 讓審邽, 不許。 詔審 帝在鳳翔、賜審知朱詔,自三品皆得承制除 知檢校刑部尚書、 節度觀察留後。 厚事

茂。 天祐初, 進琅邪郡王。

審邦 字次都。 爲泉州刺史, 檢校司徒。 喜儒術, 通書、春秋。 善吏治,流民還者假牛

鄭戩等賴以免禍,審邽遣子延彬作招賢院以禮之。 犂,興完廬舍。 中原亂,公卿多來依之,振賦以財, 如楊承休、鄭璘、韓偓、歸傳懿、楊贊圖

劉 知謙,壽州上蔡人。 避亂客封州 爲清海牙將, 節度使韋宙以兄女妻之,衆謂不可,

宙曰:「若人狀貌非常,吾以子孫託之。」

梧、桂。 之,疾病,召諸子曰:「今五嶺盜賊方興,吾有精甲犀械,爾勉建功,時哉不可失也!」 黃巢自嶺表北還,湖、湘間羣盜蟻結, 知謙撫納流亡,愛嗇用度,養士卒。 知識因據封州,有詔即授刺史兼賀水鎭使,以遏 未幾,得精兵萬人,多具戰艦,境內肅然。

度、未至、而牙將盧琚叛。隱率兵奉迎知柔,直趨廣州、禽琚獻之。 本軍行軍司馬,俄遷副使。 知謙卒,共推其子隱爲嗣, 天復初,節度徐彥若死,隱自稱留後。 淸海軍節度使劉崇龜表爲封州刺史。 於是知柔以聞,昭宗拜隱 嗣薛王知柔代領節

光稠 伏軍掉戰 度人<u>盧光稠者</u>,有衆數萬,據州自爲留後,又取韶州。 隱縱驅,伏發,挺身免。 天祐初, `始詔隱權節度留後,乃遣使者入朝,重賂 隱與爭之,戰不勝,悉師攻虔州。

列

傳第

百一

十五

劉知識

唐書卷一百九十

鍾傳盡劫其衆,欲遣子匡時守之。不克,州人自立譚全播爲刺史,附全忠云。 朱全忠以自固。 是歲,光稠死,子延昌自稱刺史,爲其下所殺, 更推李圖領州事。

五四九四

圖死,

